

687(8)

A



**ANTONII DE HAEN
RATIO MEDENDI.**

**TOMI OCTAVI PARS II,
PARTEM XV COMPLECTENS,**

ІНДЕКСІЯ

КОМІТАТИ ВАГОНА

ВІТА ГІГАНТІВ СОЛ

ВОЛОСИ

ВІЧНІ ПІДПІЛЛІ І БІОДА

ВІДАМІ СЛЯСІВОЛІ

ВІДСІЧ СОЛ

ВІДСІЧ СОЛОНІНІ

ВІДСІЧ СІДЛІВСЬКА, МОЛ

ВІДСІЧ ТІРІВІД

ВІДСІЧ ЧІРІВІД

P R A E F A T I O.

QUAMVIS parcior rerum prodeat hoc Tomo supplex, gravem tamen eamdem, ni fallor, utilissimamque publico esse, æqui lectores arbitrabuntur. Priora quippe tria capita observationes perpetuant, quas de ope submersis, suspensis, atque suffocatis, præstandâ *Parte XIV Rationis Medendi*, nec non *ejusdem continuatæ Tomo I* in publicum dederam. Adeòne gravam nobis amœnamque putas, quis fortè aggeret, hanc jam tertio recoctam crambem? Sed revocata daps novâ donatur novis condimentis gratiâ. Et recentiora mea observata, & cæterarum nationum præclarum operis promovendi studium, stupendaque per idem illarum felicitas, proponenda exemplo erant illis, qui in hac operâ præstandâ torpidi, diffici-

les, graves ac ferè desperabundi, in rerum præclarè gestarum æmulationem provocandi essent.

Prætereà me aliud ursit. Solutiōnem gravis quæſtionis medico-legalis egregii apud *Lugdunenses in Galliā* viri dederant, ac ſpectatifiſima ſocietas regia chirurgorum, ut videtur, confirmaverat; quām cùm repetitis admodūm experientis partim incertam, partim verò oppositam, partimque noxiām deprehendissem, æqui verique amor in jurisprudentiæ emolumētum, innocentiaeque tutamen latius exſpatiari me compulit.

Neque hæc erit ultima linea rerum. Ejus quippe earumdem natura eſt, ut ſuis ē latebris rarò nuda prodeat. Si optimus Deus, a quo omnia, & quo ſine nihil, vitam mihi viresque conſervet, nunquam deero, quin iis opportunitatibus, quas magistratus ampli-

fimus, ac practicum Nosocomium, mihi præ cæteris, ad elucidandum promovendumque hoc negotium suppeditant, sedulus utar.

Sed & aliud quid utile hic Liber fortè habebit. Æquè inanes nostri plus centies labores, quām felicia in enodandâ memoratâ quæstione experimenta, manu nos in insperata naturæ penetralia duxerunt; ac calamitatis cujuspiam, æquè obscuræ quām familiaris, notitiam, naturam curamque, nobis revelaverunt; quemadmodum *Caput III* docebit.

Tandem *Capitis IV* de dæmoniacis agentis, & utilem esse materiem, & scitu necessariam, omnes, nisi me animus fallit, mecum censem, quos Ecclesiæ reipublicæque tenet amor. Utique quæ sunt fidei, hæc fideliter, hæc constanter, hæc ad ipsum tutanda propugnandaque sunt martyrium: quæ retrò credula, quæ superstitiosa, quæ

viiiij PRÆFATI O.

religioni sacratissimæ adversa, indecora, atque probrofa sunt, hæc patefacere, hæc sistere, confundereque, cujusque est, cui religionis splendor, salus publica, atque tranquillitas reipublicæ cordi sunt. Viginti ferè retrò ab annis in hæc invigilarem jussérat omnium principum terræ religiosissima nostra IMPERATRIX & REGINA, neque ignavè hanc a me exultam provinciam fuisse, ad singulam, quam ejus occasionem dederat, erat experta. Operâ meâ, illustrissimique BARONIS VAN-SWIETEN, uti dudùm gestiebat, ad sagarum, rogo destinatarum examinandam causam; lætaque eamdem eòusque productam, atque elucidatam confexit, ut de accusatarum sive innocentia, sive stupiditate convicta, ne ultra morte ejusmodi punirentur, lege æternâ sanxerit. Dæmone autem obsessos dictos homines in Nosocomium meum inferri, quo-

tiescumque tales esse perhiberentur, jussit AUGUSTA; ut, an quid veri hæc turpis accusatio haberet, probè explorarem. Quid verò deprehenderim, in *Tomo V* hujus operis enuntiavi. Porrò ad oblatam novam ejusdem tentaminis occasionem, rem fusiùs debui pertractare, ut iteratis iisdem toties experimentis, cuique sive laïco, sive ecclesiastico, modus explorandæ veritatis tutissimus prudenterque pateret.

ELENCHUS CAPITUM.

CAPUT I.

*HISTORIA auxiliorum quæ submersis,
suspensis, suffocatis, atque infantibus
mortuis, ut videtur, in lucem missis,
adhibenda sunt, quo usque jam promota
per Europam sit.*

Pag. 1

CAPUT II.

*An in criminalibus certissima signa extent,
quibus instructus magistratus infallibili-
ter discernat vivusne quis, an mortuus,
in undas præcipitatus sit?*

19

CAPITIS SECUNDI

SECTIO PRIMA.

*Historia, hujus disquisitionis origo, ar-
gumentorumque ex eadem formatorum
examen.*

20

CAPITIS SECUNDI

SECTIO ALTERA.

Sextuplex *anatome corporum laqueo strangu-
laturum*, quorum varia phænomena
anatome describit, variumque experi-
mentorum effectum. 32

CAPITIS SECUNDI

SECTIO TERTIA.

Sextuplex *hominum Anatome*, quorum,
acutis chronicisve defunctorum, pulmo-
nes aqua spumosa scatuerunt: sexies
in Nosocomio, semel in urbe. 48

CAPITIS SECUNDI

SEXTIO QUARTA.

*Spuma pulmonum frequentissima ab alio-
rum anatomicorum experientia in iis,
qui mersi non fuerint, demonstratur.* 68


CAPUT III.

De Hydrope vero ipsius Pulmonis. 76

CAPUT IV.

De Dæmoniacis. 92

Appendix. 117



ANTONII



ANTONII DE HAEN
RATIO MEDENDI,
PARS DECIMA-QUINTA.

C A P U T I.

D E S U B M E R S I S.

§. I. *Cur tertio hanc materiam aggrediatur Autor?* §. II. *Laus tūm Gallorum, tūm Societatis Amstelodamensis, Hamburgenisque in auxiliando submersis. Numerosa apud illos in vitam revocatio.* §. III. *Parca hucusque Austriacæ Plebis laudatio. Ejus Objectiones, ad easque Responsa. Cur alibi multis, hic raris, vita suffocata animetur? Cur in Nosocomio etiam desperatos attingamus? Ut demersorum res, sic & suffocatorum suspensorumque se habet. Historia memorabilis auxilii sub-*

Tomi VIII Pars II.

A

2 RATIO MEDENDI.

merso admoti, quod principio spem vitæ dedit, turpiter verd deinde neglectum, mortis in causâ fuit. Alia Historia vitæ submersi viri eosque refocillatæ, ut sacris muniri ante obitum potuerit.

§. IV. Infantum recens natorum vita, ubi suffocata est, mortemque simulat, quâ arte revocanda? Argumentum hoc urgetur, luculentoque illustratur exemplo, Vota in Austriacos.

§. I. Quandoquidem ab aliquot retrò annis quæstio de revocandâ submersorum vitâ omnes in Europâ ονταντονες inflammativit, mearum esse partium duxi tractare eamdem, ipsique adhibere operi manum. Hâc de causâ Tomi XIII. Rat. Med. bonam eidem partem dicavi; elapsoque abindè biennio Tomi I. Rat. Med. continuatæ alteram partem ad elucidandam hanc utilissimam quæstionem unicè impendi, atque cōmissos meos in priore errores in posteriore correxi: quo autem mea cùm observata, tūm experienta, majorem publici in usum cederent, germanicè verti hoc ultimum opus curavi; cuius AUGUSTISSIMA IMPERATRIX, ac REGINA NOSTRA, vera Subditorum suorum Mater, exemplaria propemodùm CCCC. ad Austriæ

universæ Chirurgos & Balneatores, munificentissimâ suâ manu mitti curavit. Cùm autem inexhausta sit hæc materies, interquiescendum nunquam est à novis experimentis capiundis, ut priorum corrigamus defectus, luce autem novâ illustremus, eamdemque insperatis forsitan ditemus inventis. Quid aliæ Nationes ad salutare hoc institutum contulere præmittam.

§. II. *Inclyta Natio Gallica*, ab omni noto tempore in commoda non universi tantummodò regni, sed & orbis studiosissima, callidissimaque, egregias Dissertationes prodidit, aptasque his calamitosis succurrentis proposuit leges. Mirificè obsecundavit illis suprema Potestas. Intentaque in suum officium plebs tota reperitur sic, ut per singulas vasti regni provincias reportentur de morte triumphi, utique notiores singulis, quam ut hîc recenseantur. Et nuperrimè die *Martii* octavo ejus quem vivimus anni, juvenis, & *Aprilis* tertiam die, vidua, incola *Gerontrophii*, suam de *Sequanâ* extracti vitam à verâ morte servatam, militibus debent, qui in excubiis ibidem, & promptum, & perseverans præsidium tulerunt.

Societas Civium optimorum Amstelodamensis

A ij

mi collecta , quam planè nescio quot laudibus cumulem , quot extollam encomiis , quâque verborum significantiâ cæteris populis in exemplum feram , propriâ singulorum liberalitate idoneam pecuniam contulit , ut cuicunque , qui superstitem vitæ auram resuscitaverit submerso , seu in eâ Belgii fœderati provinciâ , ubi præmium sponte largitur suprema Potestas , seu in aliâ , in quâ necdùm publica remuneratio est , sex aureorum mercedem grata expendat , ne calamitosis hisque unquam auxilium desit .

Diariorum atque Commentariorum hujus societatis percelebris , pluries memini prioribus mei Operis Tomis ; jamque quarti Voluminis laudes cano , quod partim ipsius liberali providentiâ , partim populi vigilantiâ & promptitudine , denuò homines xxxvij , qui alias certam mortem occubuisserint , vivos Respublica lætetur . Profectò mihi , vitam clij mortalibus hoc modo , quatuor aut quinque duntaxat annorum curriculo , conservatam contemplanti , tūm & centies ac quadragesies præmium sospitatoribus , quos proba judicum locorum testimonia muniverant , concessum perpendenti , liquidò constat jam 840 aureos Societatem erogasse . Hoc resciens unus , alter-

que, donum non mediocre voluntarius
& ignotus ad societatem uterque misit.
Quid non facit ubi viget, ubi ardet,
sincerus proximi amor!

*Societas Hamburgensis ad animandas
cūm artes tūm inventiones utiles erec-
ta, historiam octo submersorum, quo-
rum sex restituta adhibitis præfidiis vita
fuerit, cum Amstelodamensi communica-
vit.*

§. III. Invitus & mœstus de carâ nos-
trâ *Austriâ* queror. Utinam post AUGUS-
TISSIMÆ munificentiam, singulis ejus-
modi servatoribus 24. florenorum mer-
cedem promittentis, toties quam alibi,
a certo interitu præservarentur submersi!
Abest autem a nobis hoc animi impen-
sum gaudium. Altius irradicatum in vulgi
animis præjudicium est, quam ut cuius-
quam effectus crederent auxilia fore sua;
& quia serotinum laborem usu cassum
lagent, tempestivum recusant.

At verò ultra pergunto. Ut suam ob-
velent inhumanitatem, contendere au-
dient ridiculum planè hic omne molimen
esse, quandoquidem in Nosocomio prac-
tico *Viennensi*, in quo opus, si uspiam
terrarum, tantâ cum diligentia, accura-
tione, frequentiâque exerceatur, ne unus
quidem revocatus fuerit in vitam. Quan-

6 RATIO MEDENDI.

tamcumque absurditatem habeat, injus-
titiamque, hæc assertio vulgi, æquitas,
veritas, publici boni amor, atque civis
boni officium, ad respondendum adi-
gunt me ne ultra vel minimum habeant
suæ barbariæ subterfugium.

Ac primò quidem dico, quos ad vi-
tam revocatos publica gentium aliarum
testimonia perhibent, hos nec diu in un-
dis sublituisse, neque maturo auxilio ca-
ruisse. Intereà dūm Medici atque Chirur-
gi advocentur, sedula plebs mox in
amnem dilatis corporibus opeū, quam
possit, omnem admovet, fricando, agi-
tando, irritando, inspirando, madidas
exuendo vestes, focum exstruendo,
ope fistulæ tabacariæ aut aërem, aut fu-
mum tabaci in posteriora injiciendo; ita
ut Chirurgi aut Medici supplere ea tan-
tummodò debeant, quibus præstandis
vulgus non erat. Nec nota etiam sibi
corpora deferunt ad eorum ædes, sed
vel in amne locatis, vel in proximas
ædes, tuguria, bubilia, stabulave, delatis
omne conferunt undique auxilium, unde
multoties in plures divisum præmium le-
gimus. Sic *Parisina*, sic *Hamburgica*,
sic *Batava Acta* sonant.

Jam ad nostrum nos convertamus No-
socomium. Ad hoc deferuntur corpora,

quæ quot horas , diesve unda texerit , ignoratur ; quæ diu in amnem deposita fuere , interea dūm per horas ad loci Toparcham eatur redeaturque , ut quid ille de invento corpore jubeat intelligatur. *Viennam* transferendum si mandet , horæ elabuntur priusquam & currus inventus fuerit , & equi , & autiga , qui horæ , qui milliarii , qui milliariorum itinere semiputridum cadaver in Nosocomium practicum deferant. Imò etsi urbi propior , quis fuerit submersus , neque ad ripam juvatur , neque nisi elapsis aliquot horis infertur in Nosocomium.

Si proindè ad vitam revocari unquam vix quisquam videatur , nisi quem aut aliquot minuta duntaxat , aut horæ quadrantem , quod frequenter , aut semi-horam , quod rarius , aut horam , quod rarissimè , merserat unda : si præterea in vitam demersi non redeant , nisi quibus , mox a flumine exceptis auxiliatrix fuerit adhibita manus : si denique plerisque non nisi plurium horarum labore salus redierit : quo deīm pacto velint hi , ut si vel per horas diesve corpora humi jacuerint , antequam deferantur ad nos , aut ne minimo quidem auxilio , aut se- riore tantummodo exiguoque præstito ; vel si primo tentamine frustrato , omnis

8 RATIO MEDENDI.

abjecta spes, omnisque projectus labor fuerit, quo, inquam, jure ea resuscitari in Nosocomio velint? Culpa profectò eorum est, quorum fuisset supremis patere mandatis, & educito protinus de flumine corpori, tempore modoque idoneis afferre præsidia; opus tunc non habuissent ut *Viennam* conferrent exanime corpus.

At verò navatis interim, inquiunt, strenuam horarum plurium operam; corpora delata itaque exanimia non censem: vitæ adesse scintillam ni supponeretis, frustaneo parceretis labori. Cùm nunc neminem resuscitaveritis hucusque, jure, an injuriâ, etiam nostra inania conamina fore concludamus?

Non attendunt, qui talia fantur, quid toties olim ad ejusmodi ineptias responderim. Quamvis passim haud alii revo-centur in vitam, quam quibus & protinus & perseveranter fuerit admota manus; quia tamen ultima restituendi meta neandum demonstrata est; & historiæne, an fabulæ extant, quæ post horas diesque submersionis auxilia & serotina, & levia, vitam resuscitasse memorant, institutum Nosocomii est etiam attingere desperatos; ut num inter centenos fortè vel unicus existeret, qui hujusmodi mirandis

historiis apponeret sigillum veri, constaret.

Neque etiam attendunt ad plura in nostris contenta relationibus quibus convicti esse debuissent dudum, vitam ad omnem industriam hominum restitui ceptam, demum in Nosocomio multo cum labore ad suum cum augmentum, tum stabilimentum feliciter ductam fuisse; ut vel hinc inutilem omnem nostrum laborem fuisse injuriosè negent.

Tandem haud attendunt iidem ejusmodi corpora, tantis incassum auxiliis, alios in fines exenterari a nobis, quæri que in illis verum causæ mortis intellectum, quo rectius fortè opitulari possemus demersis; peti etiam ex iisdem quæstionum medico-legalium solutionem, naturas aliorum morborum, & sic porro, ut brevi patebit.

Cum jam suspensorum hominum eodem sit quæ demersorum ratio, in repentina auxilio conferendo, nosque nihilominus iis, eodem modo neglectis, manum admoveamus, etsi vix specula supersit; sciant hi nos iisdem de causis, quibus submersorum, etiam suspensorum corpora attingere.

Redeo itaque ad priora mea monita & consilia, ut demersis suspensisque,

præceps admoveatur constansque auxilium, eaque novâ observatione confirmabo.

Augusti die nono anni 1772, trium cum dimidio annorum puer, ludens cum sociis, præceps in *Viennam* labitur ad 5 pomeridianam horam, rapidoque flumine ducentorum circiter passuum longitudine vectus, ad quemdam inibi palum sistebatur. Monachus reverendus accurrens, eum flumine festinanter eripuit, capite humili, pedibusque sublimibus, validissimè succutiit, quatefecit, parentumque curavit in ædes referri. Hi actutum narres & cordis regionem calente aceto fricantes, redeuntem percepere & calorem & cordis motum. Porrò hæc illi, interea dum chirurgus expectaretur: accedens tunc ille, turbamque hominum circa puerum occupatum cernens, abivit. Indè hi spiritum melissæ, vinumque calidum puero in os ingesserunt; excitatam autem vitæ scintillam convulsio extinxit.

Hunc casum non minùs inter fortunatos numerandum esse, quam inter infortunatos intelligit facile quisque per se. Reverendi viri atque parentum sollicitudine, suffocata vita animari manifestò visa est; mors autem convulsiva impunitanda Chirurgo est, qui nec venam tutu-

dit, nec reliqua auxilia ipsi apprimè nota admovit. Profectò est nunc in tantâ luce collocata res, ut quisque eum homicidii reum existimare debeat, qui impositæ cunctis legi non pareat. Et bene qui paruerint, consulent sibi. Ex laudatissimo enim Principum atque Magistratum, ad hoc opus perficiendum studio, & labore, brevi fore auguror, ut qui huic religionis humanitatisque officio defuerint, quorumque turba multa est, severè puniantur; & si de ipsis non liceat dicere: *Oderunt peccare boni virtutis amore*, dicatur saltem: *Oderunt peccare mali formidine pœnæ.*

Si vigesies, si octuagesies spe frustrarentur, si ex centum duos tresve certò aliàs morituros duntaxat servarent, nonne locupletissimam laboris haberent mercedem? immò si vitam eosque animarent tantùm, ut homo tempus nanciceretur se cum Deo reconciliandi, an hoc solùm non deberet ineffabili gaudio ipsis esse? Porrò ut exemplo id capiant, interiectam historiam, quæ cum scripto toto hoc opere demùm contigerit, nullibi appositius quam hîc inscrere possum.

Hoc ipso quem vivimus anno Julii 4. die, vir atrabiliarius per intervalla sive delirus, sive semimaniacus semet vespere

in profundioris *Viennæ* plagam præcipitat, luctansque cum undis à transeunte homine conspectus, ab illo, aliisque transeuntibus, unco oblongo in ripam trahitur, nulla ultrà exhibens vitæ signa. Hominem tamen diligenter palpant, fricant, ac pedibus sublatis quatefaciunt sic, ut librâ non minus aquæ vomitum ab eo fuisse testentur. Quo viso eum protinus curant in Nosocomium practicum deferri. In eoque post multa nostra molimina tussis excitata fuit, & alvi copiosus fluor. Continuato autem labore rigoratum ac glaciele corpus primùm recalescere cepit, dein sudore leni madere, per intervalla obdormire, voceque eosque privus homo, intelligentiam annuendo abnuendoque testari. Vox demùm rediit, impossibilisque ferè haçtenus deglutitio: sic ut 17 a submersione horâ alimenta atque medicamenta commodè deglutiret. Ad prima quidem molimina nostra cùm vitæ quædam signa adessent, sacræ Unctionis sacramento eum muniri curaveramus; ad redditam verò & intelligentiam mentis, & vocem, reliqua sacratissima animi præsidia ipsi conferti omnis nostra sollicitudo fuit. Spem tamen integri in vitam redditus vehementissima oborta Peripneumonia elusit, quæ cunctis auxi-

illis immorigera, hominem ad 38 a submersione horam sustulit.

Transactis 19 a morte horis, Cadaver in pleno cùm Medicorum, tūm Studiosorum conventu lustravi. Aperto primùm thorace, pulmo lævus lobo superiore purulentum tuberculum recondens, cum pleurâ nonnihil; dexter verò totus & cum hâcce, & cum mediastino, septoque medio, vinculis omnino latis coïvit, crassisque iisdem, fortibus, ac vasculosis. Uterque autem superficie anteriore ruber, laterali purpurascens, dorsali totâ nigerrimus. Neque in trachæâ, neque in bronchiis, vel minimum aut spumæ inerat, aut aquæ; lobi verò in taleolas transciSSI plurimum sanguinis, ac nonnihil spumosi liquoris, compressi adhuc copiosius fuderunt. Aperti cordis ventriculi valido reperiebantur flavoque polypo repleti, ipsi verò præ inflammationis intensitate vehementer rubebant, quemadmodum & tota trachæa, pulmonalis arteria, aorta, lateris utriusque pleura, pericardium, pleuræque dia phragma tam qua musculosum, quam qua tendinosum, succingentis portio, renesque. Intestina bona, ita ut ter injectus fumus tabaci nihil profsum nocuerit illis. Jecur albescens, perque omnia du-

rum. Bilis in vesiculâ amplissimâ erat abundans, atra quidem, verum diluta potius, quam, ut cæterum in atrabiliaris est, spissa, aut, ut aiunt, picea. Primam inter alteramque dextri lateris superioris costam musculus intercostalis, unâ cum eâ, quâ cum superscendentibus musculis connectitur cellulositate, profundissimè per omnem suam carnem inflammatus. Sine externis signis cujusquam contusionis haud modica pericranii portio rubicunda fuit. Dura-mater bona: pia solito rubicundior, potissimum verò in posteriore dextri hemisphærî lobo. In sinu longitudinali polypus flavus. Ventriculi naturales, finusque. Glandula pinealis ex pluribus indurescientibus corpusculis constabat. Igitur post libras medicas sanguinis quinque sex phlebotomiis homini detractas, tanta adhuc inventa fuit ejusdem in corpore copia, ut universalis proximodùm inflammatio conspiceretur in dentato; eamdemque observationem multa nobis suppeditarunt cadavera.

En denuò submersi historiam, quâ 1º constat frictione, corporisque inversi quatefactione, vitæ mortem similantis scintillas jam ad fluvii amnem emicuisse. 2º Hanc vitam nostro excitatam valde fuisse labore. 3º Itaque submersos ad au-

xilia matura , constantiaque , utut vita penitus extincta esse videatur , resuscitari presæpè posse. 4º Haud raro autem contingere ut nobiliores in corpore partes tantâ sive inflammatione , sive convulsione , sive defectione afficiantur , ut aut apoplexiâ , peripneumoniâve , aut epilepsiâ , aut syncope intereant ; quorum singulorum ex variis Autoribus plura exempla *Tomo XIV, Cap. III, pag. 75, 76,* excitavi ; sin verò non moriantur , eosdem aliquandò in morbos seu acutos , seu lentos , non raro gravissimos difficulterque curandos incidere ; quorum exempla , loco mox laudato , eaque ex propriis Nosocomii observatis protuli . 5º Etiam si nonnulli illorum , quorum vita videatur resuscitata fuisse , post liminio pereant , nihilò secius & laudandos , & divinâ lege imperatos esse revocandæ vitæ latentis conatus : cum quemadmodum ipso eo XIV. Tomo retuli , in *Actis N. C.* in iis *Amstelodamensium* , tandemque in hoc postremo viro , eousque vita sæpius per admota artis præsidia revocata fuerit , ut sincerâ peccatorum confessione , eorumdem absolutione , & sacrâ synaxi se convenienter parare ad beatam æternitatem potuerint ; quo summo beneficio desidibus spectatoribus pri-

vati fuissent. 6º Haustam pulmonibus aquam pro maximâ parte resorptam fuisse.

Interim dum de auxilio præstanto submersis sermo fit, ex supremæ Potestatis decreto, meisque variis scriptis, liquere manifesto singulis arbitror, & ad suspensos idem officium peti, & ad illos quos aut vini cerevisiæque fermentantis exhalatio, aut carbonum vapor, aut clausorum diu puteorum halitus è vivis videatur sustulisse. Supereft unicum tamen, de quo debuisssem maturius monere plebem, cujusque eam nunc, defectum meum correcturus, monebo.

§. IV. Infantum recens natorum simulatam mortem volo; quibus si debitam tulerimus opem, vitam profectò non paucis rediisse lætabimur. Cunctorum Obstetricantium libri si fortunatis exemplis abundant, multò magis, si plura auxilia nunc, eaque diuturniora, iisdem admoveantur, abundabunt. Præivit laudabilissimo exemplo egregius in *Palatinatu Embriulcus*, qui nonâ proximè elapsi *Aprilis* in oppido, aut pago *Lampertheim*, infantem, quem post uterinam 14 dierum hæmorrhagiam vertendo eduxerat, mortuumque crediderat, quia tamen ex repletis funiculi vasis nondùm exsanguem esse concludebat, in vitam

planè restituit ; tantâ quidem cum patien-
tiâ atque sedulitate , ut postquam in-
fanti , in tepido balneo vinoſo hærenti ,
ſuum exſpiratum aëra cautè inspiraſſet ,
frictuque ventrali artificialem respiratio-
nem creaffet , primordia demùm vitæ ,
poſt quadraginta minutorum laborem ad-
vertere ceperit , ac integrā vitam brevi
renatam gavisus fit. Conamina fiunt fa-
teor , vario Obstetricum artificio , aëriſ-
que inspiratu , ſed vel non clauſis naribus ,
aër ore inspiratus naribus exſpiratur ; vel
poſt aliquot inspirationes , frictionesque
frustraneas , citò desperatur. Si *Palatinus*
Obstetricans poſt inanes quadrantis horæ
inspiratus , ſi poſt mediam horam , ſi poſt
mediam horam mediumque quadrantem
horæ defecifſet , mortuum eſſe infantem
& ille & reliqui credidiffent , mortuus-
que manſiſſet infans , quem nunc vivum
ſalutavit laboris conſtantia. Utinam quæ-
quæ Obstetrix , plebsque universa , de utili-
tate hujus experimenti convic̄ta , nullam
unquam negligeret ejus faciundi occaſio-
nem ! Utinam demùm non modò in hiſce
infantibus , ſed etiam in ſubmersis , in
ſuspensis , inque ſuffocatis , quid ab ho-
mine ſingulo divina , quid politica lex ,
proximi exigat amor ; quamque reum co-
tam divino TRIBUNALI hominem hu-

ius neglectus sistat; omnes verbi divini præcones frequenti urgenteque sermonे, tam ex suggestu, quam ostiatim, parochianis inculcarent! Non est quod dubitemus, quin mota convictaque populi conscientia cunctis hisce miseris efficacius consuleretur.

Profectò hi, si in viâ deficientem fame hominem offenderent, quâ animi commiseratione non convolarent, hanc extinctam penè vitam conservaturi? Quod si quis illorum aptum in penu gerens cibum, porrigere illum deficienti præfractè negaret, quam hujus detestarentur crudelitatem! Quam indignabundi hoc ab illo non extorquerent alimentum! Hocque hominis simulacrum, quamdiù feram animam traheret, propalàm diffamarent! Se porrò seriò respiciant fitos ad fluminis amnem dum recens ex eodem educitur submersus: auxilia præstò habent, quæ si adhibere recusant, æquant profectò, si non superent illius qui cibum habebat & negabat immanitatem; neque homicidii crimine se minùs eo fœdant. *Non pavistis*, inquiebat *B. Cyprianus* divitibus qui in annonæ caritate non subvenerant indigentibus, *non pavistis*: *occidistis*. Jure illis dicere possumus: *Non juvistis*: *occidistis*. Meritò in Sacer-

dotem atque Levitam invehuntur, qui sauciatum in viâ *Jerichontinâ* hominem, quantum ipsorum fuit, prætereundo occiderunt; summoque, qui semimortuum curaverit Samaritanum, prosequuntur amore: abesse utique non possunt, quin se se demersum prætergressos, & inhumano Sacerdoti, & barbaro Levitæ, consimiles esse cum fateantur, tum erubescant.

Monui mox lubenter nos submersorum, suspensoriumque corpora in Noso-comium admittere, quod, irrito revocandæ vitæ labore, gravium aliarum quæstionum solutionem, morborumque minus cognitorum notitiam quæramus: ad has ambas nos in sequentibus Capitulis accingemus.

CAPUT II.

An in Criminalibus certissima signa extant, quibus instrutus Magistratus infallibiliter discernat, sit ne quis vivus, an mortuus, in flumen præcipitatus.

REGULA certò distinguendi ea creditur esse spumæ crassæ, flavæ subinde, atque tenacis, copia major minorve in

20 RATIO MEDENDI.

animalium repertæ pulmonibus , quæ viva , aut ipsa sese , aut alii , præcipitia in undas dederunt. Rejicere hanc regulam cogimur propter experimentorum contrariorum evidentiam ; quæ cum 1° ex eorum anatome petita sint , qui vivi essent submersi ; 2° ex eorum anatome , qui post mortem essent in undam præcipitati ; 3° ex anatome hominum , qui quolibet communi mortalibus morbo vitam cum morte commutarunt ; operæ pretium erit hoc Caput in totidem sectiones dividere , quæ singulæ singulorum anatomen tradant.

CAPITIS SECUNDI

SECTIO PRIMA.

§. I. *Laus Tractatus de hâc quæstione editi Lugduni Gallorum. Causa memorabilis ob quam editus fuerit.* §. II. *Affertio autem , hujus Tractatus basis , ostenditur experimentis necdum sufficien- tibus inniti : numerosa experimenta nos fallunt , ubi opus numerosissimis est ; imò aliquandò ne tunc quidem veritatem propalant. Textus Salomonis huc facientes. Defectum laudati Trac- tatus conabitur suis supplere experimen- tis Autor , eâ spe , fore ut defectus*

utriusque suppleant alii. Cur non contractas hic, sed integras historias anatomes dederit Autor? §. III. Exempla deficientis liquidi spumosi in pulmone demersorum. Vindiciæ Autorum, qui in demersorum pulmone hanc aquam negarunt: quâ tamen in re peccarunt? An corporis inversi succutio aquam omnem excutere de Pulmonibus possit? Negatur. §. IV. Juvencula Lugdunensis mori a submersione & citra inventam hanc aquam potuit, & simul à spasmo, Tracheæ strangulatione. §. V. Aqua potest pulmonem non subiisse videri, & reverâ tamen indubitatoque subiisse.

§. I. TRactatus eruditus, numerosisque experimentis dives, nuper *Lugduni Gallorum* prodiit, cui titulus: *Experimenta & Observata de mortis in Demersis, nec non comitum symptomatum, causâ, instituta coram Deputatis Scholæ Regiæ Lugdunensis, ad Brutorum Medicinam erecta, Deputatorum eorumdem testimonio confirmata, & ab Academiâ Regiâ Chir. laudata: Autoribus D. D. Champeaux & Faissolle. Germanico idiomate an. 1772 Dantisci* prodiit. Occasionem dedit *Lugdunensis* puella *Claudina Rouge*, quæ die 25 Junii 1767, horâ 9 vesp. felem suam

quæsitura, paternis ædibus exeuns, nunquam redierat. Die 30 Junii *Rhodanus* ad suam ripam, 18 ab urbe *Lugduno* lapide, submersum corpus depositus, quod a parentibus necessariisque *Claudinæ*, eò ad rumorem convolantibus, toto habitu, vestibusque, illius esse corpus, sine ullâ hæsitatione, affirmabatur. Judicis loci jufsu Chirurgus legalem jubetur facere anatomen, qui in suâ ad judicem relatione sustinuit non submersione, sed violento laqueo strangulatam *Claudinam*, dein præcipitem datam in *Rhodanum* fuisse, eo quod laquei signum, striam rubescentem circum collum, conspicere sibi visus esset. Corpus dein sepultum fuit.

Lugdunensis Prætor vigilantissimus misit duos celebres urbis Chirurgos, eos scilicet qui Dissertationem hanc conscripserunt, ut effodi sepulchro cadaver cūrarent. Hoc fecere 10 Julii. Clari hi viri, cùm putredo totum corpus externum deturpasset, externa quidem mortis violentæ signa, quæ ante 10 dies Chirurgus loci cum testibus se vidisse testatus erat, se nulla quidem deprehendisse declararunt; at verò cum encephali vasa valdè turgida sanguine, & pulmones citra vel minimum aquæ in se inclusum, indigestamque cœnam in ventriculo repe-

riissent, censuerunt *Claudinam Rouge* brevi post cœnam violentâ morte, (& ut postea censuerunt) strangulatione, peremptam, in *Rhodanum* præcipitatam esse. Haud impinger ad hæcce Judex, quamdam fœminam, & ancillam, nec non fratres *Perra* vocatos, stupri suspicione, in carcerem conjecit. Scriptitatum mox adversùs nostrorum Chirurgorum sententiam fuit, cùm à Jurisconsulto, captivorum patrono, tūm etiam ab aliis Medicis & Chirurgis. Acriter nervosèque defendere duo illi viri suam sententiam, atque ad eamdem statum inandam sedulitate, patientiâque tantâ, experimenta in canibus vario ac multiplici artificio cùm submersis, tūm suspensis fecerunt, ut negotium totum se confecisse crediderint, ac citra hæfitationem asseruerint : 1º Submersos mori ab aquâ inspiratâ, spumosâ factâ ex suâ cum aëre & transfudante pulmonum muco commiftione; suâque mole sic aëreum pulmonum spatium universum implente & extendente, ut transitus sanguinis per eosdem penitus fistatur. 2º Deficiente in demersis hâc aqueâ spumâ pulmonis, certò id concludi oportere, quòd mortui aliundè in aquam projecti fuerint. Adeoque *Claudinam*, hâc aquâ spumosâ in pulmone carentem,

mortuam fuisse priusquam *Rhodani* incola fieret. 3º Sui pectorum mortem apoplecticam esse, ut encephali eorumdem docuissent infartus; apoplecticā autem morte puellam periisse, eo quod & ejusmodi infartum vasorum caput haberet, & quod præterea non illi, sed qui decem anteā elapsis diebus cadaveris inspectiōnem Judici retulisset Chirurgus, vestigia laquei circum collum, & linguam ad duos digitos latos extra labia exsertam deprehendisset. 4º Nunquam suspensos gerere hanc spumosam in pulmonibus aquam. 5º Submersos nunquam linguam extra os prolatam habere, nec omnes suspensos; sed illos solos, quos laqueus infra cartilaginem scutiformem strinxerit. 6º Partes corporis, ut brachia, femora, collum, à morte fortiter constrictas, vestigium quidem servare pressionis, haud verò ullum aut excipere, aut relinquere eodem in loco ruborem: hunc impressionis ruborem in *Lugdunensis* juvenculæ sextâ a submersione die adhuc perstittiſſe, & illatæ per strangulationem mortis testimoniū irrefragabilem esse.

§. II. Si omnia hæc sic se haberent, ut hi, quos veneror, viri censuerunt, opem multam eamque laudabilem foro juris contulissent, multaque dubia iictu citius inter

inter Medicos & Jurisconsultos dispulif-
sent. At verò priusquam hæc in leges
artis cudantur, (quò enim aliò horum
autorum, censorumque conamina ten-
dant?) dabo hîc experimentorum meo-
rum plura, quæ cum illorum experi-
mentis collata, & sincerissimè compa-
rata, forsitan hanc illis, quam olim mihi
confessionem extorquebunt, quòd con-
clusio ex experimentorum numero insuf-
ficiente petita, propriæ famæ inimica,
arti nostræ noxia, ac veritati odiosa sit.
Insufficientiane dixero quæ numerosa edi-
derunt, quæ idem perpetuò clamantia
notaverunt experimenta? Nisi, ut in
multis aliis difficilioribus negotiis, ita &
in hocce, post numerosiora sanè experi-
menta, quam clari hi viri fecerunt, pro-
prios detexissem errores, ex necdum sat
numerofis experimentis natos, monere
erroris illos non auderem; jam verò dum
de re summi momenti agatur, audeo,
debeoque. Autoritate *Plateri*, *Wepferi*,
Walschmidii, *Beckeri*, *Dethardingii*, *Se-
naci*, quanta in hâc quæstione nomina!
evidentiâ quoque experimentorum, se-
mel in submerso homine, decies ac no-
nies in submersis canibus factorum fre-
tus, audax censui ita carere deglutitâ
aquâ ventriculos submersorum, ut qui

ultra id affirmarent, ne audiendi quidem forent. Interim occisorum hunc in finem canum meorum trigesimus septimus, trigesimus octavus, & omnium maximè quadragesimus, atram in quâ submersi fuerant aquam ventriculo eorumdem haustam esse monstrabant. Centena mea fortè ad naturam sanguinis, atque urinarum, indagandam experimenta videbantur mihi ad conclusionem irrefragabilem plures duxisse; at verò quotiesne palinodiam canere nova me experimenta compulerunt? sic nobiscum in re physicâ limitatissimis comparatum est. *Cunctæ res difficiles, non potest eas homo explicare sermone.* Eccl. i. *Vidi afflictionem quam dedit DEUS filiis hominum ut distendantur in ea.* Cuncta fecit bona in tempore suo, & mundum tradidit disputationi eorum, ut non inveniat homo opus quod operatus est DEUS, ab initio usque ad finem. Cap. III. *Et intellexi quod omnium operum DEI nullam possit homo invenire rationem eorum quæ fiunt sub sole;* & quantò plus laboraverit ad quærendum, tantò minus inveniat. *Etiam si dixerit sapiens se nosse, non poterit reperire.* Cap. VIII.

Interim cùm Medici, atque Chirurgi, in operum Dei contemplatione perpe-

tuò versentur, eorumdemque cognitio-
nem in usus convertere humanos obli-
gentur, reperiunt sese in eorumdem ope-
rum perquisitione necessitate inevitabili
perpetuò innexos; philosophiae autem,
ac medicinæ omnium singulorum errori-
bus jugiter monentur, ne quidquam in
humanos usus concludant unquam, nisi
experimenta a centenis centies repetita
idem perpetuò clamitent. Hinc quæ ami-
corum Gallorum experimentis desunt,
meis supplebo, brevi & illorum & meo-
rum ingentes hinc indè hiatus amici alii
explebunt, præproperas delebunt con-
clusiones, serique demùm opus non per-
ficient, sed emendabunt, augebuntque
nepotes.

In referendis porrò meis experimentis
lectorum haud paucis displicebo, cùm
non ea modò enarraturus sim quæ di-
rectè ad rem pertineant, verùm historiam
singulorum totam, cum universâ ana-
tome, sim traditurus. Considerent autem
hi dupli de causâ me ad hoc cogi;
primò, ut prævertam omnes cavillationes,
atque subterfugia, quæ ad plausibilem
difficultatum explicationem qualecum-
que, conjecturalem planè atque illegi-
timam quæri possent, si integra singu-
lorum historia desideraretur. Secundò,

ex varietate phænomenon, quæ nostra experimenta hūc usque habent, conabor peculiari capite mōrbum quempiam, eumque notabilem quidem atque frequenter, obscuriorem tamen, & multis ignotum, sic illustrare, ut ex incertis certa, quod paradoxon, eruantur. Hinc forent singulæ hoc capite traditæ historiæ magnam partem de integro in altero capite repetendæ; quod cùm lectoribus onerosum atque tœdiosum foret, malui ad semel traditas in hoc capite enarrationes integras referre, quam easdem in futuram morbi cujusdam elucidationem remittere: quibus interim omnis illa displacebit enarratio, legant modò illi quæ littoris italicis exarata, filum historiæ continuatum dabunt.

§. III. Puerum cuius historiam Cap. I, §. IV dedi, post consuetos restituendi labores incassum admotos, aperui horis 25 a submersione elapsis. Dura mater omnino naturalis; pia non nihil rubicunda: ventriculi vacui omnes; plexus autem choroidei solito turgidiores. In finibus lateralibus sanguis admodum paucus. Motu sectionis, & agitationis abdominis, liquidi quid ore profiliit; quale quid etiam in vitæ revocandæ tentamine observatum fuerat, non modò hīc, sed in pleris-

que ejusmodi factis tam in bruto, quam in homine tentaminibus. Colon valde; intestina tenuia leviter rubicunda. Ab aere solo valde turgebat ventriculus. Nec in aspera arteria primum firmiter constricta, ne quid efflueret, neque in bronchiis ulla spuma; immo ne perscissi quidem pulmones, multumque compressi, vel minimum spumosum fudere liquoris. Vacuus cordis thalamus uterque. Aorta ad cor vacua. Parum sanguinis in venâ cavâ. Ter venæ sectionem inter resuscitandi labores tentantes, vix unicam sanguinis unciam colligere potueramus, postmodum autem ex singulari fluxerat corpore agitato aperturâ, tenuis, atro-ruber, nec vel minimum, etsi diutius repositus, concrescens. *Tom. I. Rat. Med. cont. part. 2, pag. 211, 213, duobus in canibus aquâ submersis; & maximè, pag. 288 & 289, in tertio cane, aquam spumosam vix habuit pulmo.* Inde capimus egregios viros aliquos qui aquam subire pulmonem in demersis negârunt, in cadavera similia incidisse, quæ huic puerò, quæ hisce consimilia fuere brutis. Unde liquet non esse, qui hoc negarint, aut negligentiae, aut malitiæ insimulandos; præcipitantiæ tamen taxandos esse, quod ex unâ alterâve anatome id concluserint, quod pluribus pri-

mùm experimentis fuisset explorandum.

Quæret forsan aliquis, cùm puer hic a reverendo monacho pedibus in altum sublatis, ac declivi capite quatefactus sit, an non aqua delabi sic è pulmone potuerit, ut in anatome is eâ orbus apparuerit; & an non propterea hoc exemplum male affertur, ad improbandam sententiam de submersorum morte, ab aquâ pulmones ingressâ?

Non putem: primò, vir reverendus testatur se non vidisse hâc corporis succuptione aquam ore naribusque produisse. Secundò, canes non paucos eodem modo succussimus, aquam ipsam ore elabi vidi, & nihilominus spumosa aquâ scatere conspeximus pulmonem; undè aquam hanc aut gulæ, aut ventriculo, aut utrisque profluxisse censeo. Tertiò, aqua spumosa si inversi corporis succus eliminari potuisset, multò id faciliùs copiosiusque per nostras pressiones cùm variatas, tûm diuturnas universi thoracis contigisset. Sed his ipsis compressionibus ore & naribus aliquandò spumosum liquidum expressimus, & nihilominus penetratos aquâ invenimus pulmones: penitus se insinuasse aquam, & intimius se commiscuisse cum mucosâ atque tenaci visceris materiâ, quam ut per hos motus

omnes eliminaretur censemus: quod jamdudum observavit eximus *Tiffot* in libro dicto: *Avis au peuple pour sa santé*. Unde quoque in *Lugdunensi tractatu p. 244* asseritur « hoc spumosum liquidum nulli » defuisse submersorum pulmoni, sive » protinus, sive post diuturnam putrefactionem animalium examinaretur: imò » neque post diu suspensos quidem humili » capite canes, neque in pulmonibus submersorum transciisis diuque aëri expositis, unquam hanc spumosam aquam defuisse. »

§. IV. Exempla igitur adsunt deficiens in submersorum pulmone spumosæ lymphæ, qui nihilominus, hâc deficiente, submersione solâ perierunt. Potuit *Lugdunensis* juvencula horum è numero fuisse, adeoque solâ submersione periisse: periisse autem in aquâ, non submersorum, sed strangulatorum more; spasimus enim, sive terrore, sive undarum frigore natus, glottidemque claudens, funis vice perire submersos potest.

§. V. Sed longè mirabiliora vidimus. *Tom. I. Rat. Med. cont. part. 2, a pag. 289 ad 290.* Spuma aquosa deerat canis nostri **xxxvij** pulmoni, eumdem subierat tamen. Copiosâ atramenti fœce aqua sordescens, relictis in totâ aëreâ visceris

superficie grumis crassis, copiosisque, procul dubio in semimortuo animali absorpta fuit in vasa sanguinea: sic ut percisso in lamellas pulmone, hujus seris pumosi exprimi nihil omnino potuerit.

Itaque cum ex §. II & III. constet & homines bestiasque submersione perire aliquando non inventa pulmonis aqua, & aquam subire pulmonem posse, citra ejusdem a morte praesentiam; evidens fit generaliorem debito sententiam de absoluta necessitate aquae submersorum pulmonem replentis, magistratibus in alias mortis causas inquirendi frustraneum facilius negotium posse.

CAPITIS SECUNDI

SECTIO ALTERA.

Anatome corporum laqueo strangulatorum, quorum varia dedit phænomena anatome, variumque experimentorum effectum.

§. I. *Experimentum primum hominis laqueo suspensi, deinde in aquam præcipitati, cuius pulmo nullum liquidum spumosum habuit.* §. II. *Experimentum alterum quod aquam hanc spumosam præsentem sistit.* §. III. *Tertium exp-*

rimentum secundo simile. §. IV. Ut & experimentum quartum. §. V. In experimen-
to quinto, non facta demersione
strangulati, aqua spumosa deest. §. VI.
Sextum simile quinto. §. VII. Conclu-
sio ex hisce experimentis. §. VIII. An
per tria laqueo suffocatorum experimenta
id confidere quis possit, quod spuma ca-
reat pulmo horum? negatur per experi-
menta aliorum.

§. I. Priore sectione constitit in eorum pulmone, qui vivi mersi fuerant, aliquando aquam defuisse, adeoque limitandam esse famosam, circà quam versamur, opinionem: hâc sectione alteram ejusdem opinionis partem, quæ in nullius post mortem in aquam jaëti pulmone aquam spumosam reperiiri posse statuat, plurimum limitabit anatome.

In quodam suburbio homo quadragenarius, duro labore victum quæritans, torosus, taciturnus, jam ob panaritium domi residere coactus, postquam horâ semiprimâ optimè comedisset, sapientemque miscuisset cum ancillâ sermonem, elapsis abinde horâ & horæ quadrante, laqueo suspensus invenitur. Accurrunt ad ancillæ clamorem quotquot in ædibus erant, sed relinquunt suspensum. Chirurgi famuli, absente magistro, vo-

cati, spectaculum vident, abeuntque. Tandem ad horam pomeridianam quartam vice-judex cum chirurgis accedens, curat corpus laqueo solvi. Inanem fore in obrigescente jam corpore laborem, quem lex jubet, arbitrati, illud in nosocomium practicum, ut resuscitetur, conferri curant, horis fortè quinque a suspensione elapfis.

Collum vestigia gessit pollicem lata loramenti coriacei rigidi, quo se desperabundus suspenderat, & quod crassâ fibulâ ad occiput nexerat. Loramentum sub cartilagine cricoideâ principium compresserat tracheæ. Ruberrima erat tota, quam strinxerat, pars colli anterior, pollicem lata. Lingua non exserta. Os firmissimè clausum. Valde magna & dura glandula thymus.

Quamvis hîc nihil spei supereesse videatur, tamen, nescii quid præter expectationem contingere nonnunquam posset, ea quæ tentata a nemine fuerant tentare apud animum statuimus, & integro trihorio consuetos nostros, prioribus totmis recensitos, adhibuimus frustrâ conatus. Cadaver per noctem frigidâ in cava repositum fuit, sequenti mane in nosocomium relatum, ibique in paratum ad id balnei instrumentum præcipitatum,

sic, ut bihorio in aquâ submergeretur; abstersum deinde coram summi prætoris delegatis, discipulorumque compluribus, apertum fuit, a capite initio facto.

Utraque meninx sanguine infarta, copiosusque sanguis inter utramque effusus, tenuis, niger, idque ubique quidem, potissimum autem ad lobum posteriorem dextrum. Ferè vacui ventriculi cerebri omnes. Vix in sinu longitudinali, vix in sinibus occipitalibus lateralibusque sanguis fuit.

Neque collapsi pulmones fuere, neque multum tumidi, colore autem purpurei, peripneumonicorum more. Ligata a principio trachæa, ne quid efflueret, nihil in eâ, nihilque in pulmone spumosæ materiæ. Parùm utroque in corde sanguinis. Sed hic, & omnis ille, qui ex majoribus vasis collectus, & in linteaminibus ex venis tunsis defluus, nec non ille qui ex venâ seccâ fuit in vasa exceptus, vel hilum consistebat, pultem atram tenuemque referens. Intestina omnia ubique purpurea.

Ut pueri submersi anatome adversa fuit sententiæ, quam examinamus, defectu spumosæ pulmonum lymphæ, ita hæc suspensi per omnia favet, cum pulmonis siccitate, tum infarti sanguine encephali.

§. II. Octo ab indè transactis diebus, in alio suburbio se suspendit fœmina crassa, torosa, procera, circiter quadragenaria, maritata, a novem annis separata, eidem haud ita pridem rejuncta. Malè habere ceperat 28 Oct. sequenti die pejus. Ex suburbio venit in oppositam urbis plagam ad chirurgum venam tundenda, domumque cum marito redux, impransa lectum petiit; vesperascente die domum exiit, nocte latuit, & rubescente aurorâ laqueo suspensa inventa est ad $6\frac{1}{2}$ horam. Quamdiu pependerat, incertum. Solvebatur laqueo, sed sine ullâ ope relicta est, & gestatorio in nosocomium practicum ad horam decimam illata. Attulere & laqueum nobis; linteamen scilicet longum, quatuor pollices latum, non contortum, non latius tamen quam trium linearum vestigium relinquens, necans autem, licet genibus ferè flexis pendere debuisset. Strinxerat collum eo cavo, quod suprà cartilaginem scutiformem est. Lingua exerta inter labia prominebat. Molimina nostra consueta adhibituri, licet frustranea crederemus, pro consuetudine fuissimus, nisi foedatum cruento corpus delegatos prætoris expectare suassisset, ut iisdem præsentibus examinaretur an non priùs vulnerata, ac dein

suspensa fuisset. His demùm elapso quadrihorio se sistentibus, constitit omnem illum sanguinem ex pertusâ pridiè venâ profluxisse.

Cadaver tunc, quemadmodùm priùs, aquâ submersi septem minutorum spatio, detersumque cultro subjeci, à capite orfus. Oculi necdùm corrugati erant, opacari autem modicè cepti. Utraque meninx utcumque rubicundior solito. In frontis interni dextro cranium asperius fuit, & ossicula duo immersa in durâ matre cum eâdemque concreta, & in piâ matre simile officium eâdem in plagâ inventum. Nulla signa læsionis externa. Ventriculi cerebri superiores nonnihil lymphæ habuere, vix tertius, nihil quartus. Plexus choroidei naturales. Modicus admodùm in finibus lateralibus sanguis. Neque aut fractæ colli vertebræ, aut dislocatae.

Pulmo lœvus membranaceis vinculis fortissimis cum pleurâ coivit, pluribus atque latis in plagiis, pede autem equino suo cum diaphragmate; dexter autem liber omnino fuit. Ruberrimus uterque, minimèque confidens. *Tracheæ principium planè vacuum, album. Lobi pulmonum agitati nihil detumuere, transcißique intomos ultrà quadraginta, tantum spumosæ, ejusque ex rubro albescentis atque tenacis.*

lymphæ, cùm spontè, tùm compressi, mānārunt, ut nunquam abundantius demersorum aut hominum, aut animalium pulmones fuderint.

Colon intestinum leviter, ileum multùm, jejunum plurimùm inflammatum, imò præ inflammatione nigrum. In hujus jejuni intestini duobus in locis nidi erant teretium vermium copiosorum, viventiumque. In altero nido materies glutinosa purpureaque inventa est, in altero copiosior ex flavo alba. Lumbrici & in colo.

In submersi pueri cadavere *Cap. II, Sect. I, §. III*, nulla spuma inventa est; in cadavere viri suspensi *Cap. II, Sect. II, §. I*, quem mortuum bihorio merseramus, nulla aqua pulmones subierat. In fœminâ hâc ultimâ, post laquei strangulationem demersâ per $\frac{1}{8}$ horæ, tantùm spumosi liquidi profluvium prodiit ex pulmone, ut ex iis quos vivos unda mersit nunquam abundantius. Nulla signa hîc apoplecticæ, sed verè peripneumonicæ mortis. Ergo cuncta hîc gallorum virorum sententiæ adversantur.

§. III. Nuncius cujusdam civitatis, per octiduum in quodam diversorio *Vienensis* moratus, nunquam nisi ebrius ibidem conspectus, die 9 Februarii 1773,

malè se habere dixit, jacuit in paleario; die sequenti, ad 3 matutinam, aurigis mercatorios suos currus ad iter accingen-tibus se immiscuit, sed elapsâ vix me-diâ exindè horâ, de cujusdam currus mercatorii brachio adeò humili suspensus invenitur, ut digitis pedum humum, ge-nua flexus, contingere. Deposito chi-rurgus venam confestim secuit, & cor-pus gnaviter fricuit. Curâ judicis allatum corpus est in nosocomium horâ $6\frac{1}{2}$.

Venam secuerat chirurgus, nos illicò pariter. Observaveramus in submersorum suspensorumque plerisque sanguinem ad factam aperturam pleno jactu protinus prosilire, mox verò penitus quiescere; idem & hîc contigit in altero brachio, inque jugularium utrâque: ita ut vix unciam ex omnibus simul sumptis colligere potuerimus, vix dicam sanguinis, po-tius aquæ profundè rubræ, nec eo, nec sequenti die, vel minimum coeuntis. Re-liqua auxilia pro more, uti quoque tria larga fortiaque vesicantia, frictis aceto plagis admota sunt, & fervens catapla-smâ vesicantibus circumpositum, labo-riosèque renovatum.

Quo autem sanguis uberiùs fueret, magni *Trilleri* exemplo crura in feren-tem aquam immitti, alteramque post al-

teram pedum venam tundi curavi : extrà aquam vix tantillùm , in fervente verò aquâ abundantissimè sanguis fluxit. Qui paucus fuerat vase exceptus , tenuis ille , nec concrescens unquam ; qui in aquâ , ne minimum quidem grumum formaverat , ubi alias , si v. g. ex brachio profluum cruentum in aquam ferventem exceperis , tenax coagulum vides. Interea dum sanguis in ferventem aquam de pedum venis fluebat , prorupit pariter de juguli ac brachii utriusque venis , longèque postmodum , sic ut tandem venæ hæ obligandæ essent. Sex horarum impensa in hoc corpus opera fuit.

Anatome ad quartam pomeridianam , postquam corpus fuisset per horam submersum. Dupli fune suspenderat se homo , funisque eum locum constringerat , qui suprà thyroideam cartilaginem est , sic ut os hyoidis & linguæ radicem ad vertebrae apprimiceret , & epiglottidem glottidi fortiter admoveret.

Vesicantia septem horarum spatio nihil egerunt. Aperto corpore , attenti notavimus omnem illum qui totâ sectione effluxit sanguinem non nisi rubellum fuisse , citrâ cohæsionem vel minimam , liquorem. Meninges ambæ naturales , adstabant tamen , qui plusculò rubere eas-

dem censebant. Medulla transciessa solito pauciora puncta rubra ostendit. Multus liquor in ventriculo superiore dextro, nullus in ceteris.

Cor dextrum fluidi sanguinis tantillum, nihil dextrum habuit. Aorta vacua in abdomen usque, ejusque in initio principium osseum. Pericardii superficies interna leviter rubuit. *Pulmo sinistern & cum universâ pleurâ, & mutuos inter lobos, concretus; dexter liber omnino: neuter concidit.* Uterque numerosâ divisione transciſsus, aquam albam, spumosam fudit abundantissime: eadem & trachæa & bronchia scatuerunt.

In abdomine inflammatio ingens, ferè universalis, intestinorum tenuum, sic tam en ut portiones aut æquales spithamæ, aut eâ longiores, vel nihil, vel pauxillum tantum inflamatæ essent: occupatque eadem inflammatio fimbriæ mesenterii portiones, notabilem peritonæi partem, omnium autem maximè pancreas & duodenum; penitus enim nigrescebant: nec ab eâ ventriculus immunis fuit. Mirabilis coli & ventriculi figura, tabulâ potius quam sermone explicanda est. Et in ventre & in thorace viscera valde calebant, horâ licet decimâ tertiam a

morte elapsâ, & corpore horæ spatio in frigidâ aquâ posito.

In hoc corpore notamus 1º in suspenso deesse apoplexiæ signa, aedesse ea peripneumoniæ. Hoc tamen minùs hîc urgeo quoad apoplexiam: faciliùs enim encephalon, quam pulmo, revulsionem pati, a tanto sanguinis, quantum hîc contigit, profluvio potuit. 2º Aquam copiosam à mortui hominis pulmonibus haustam. 3º Ingentem & horrendam inflammationem visceribus inhæfisse abdominalibus. 4º Iterùm hîc, ut in submersis suspensisque assolet, sanguinem tenuissimum fuisse. 5º A fervidâ aquâ mentitum circulum cruoris observari posse.

§. IV. Homo mediæ, ut videbatur, ætatis, pugnax, caput a quatuor retrò septimanis malleo percussus, ex eoque tempore tristis, ac stupidus, die 11 Febr. 1773, jubebatur à diversorii hospite, cui famulabatur, quidquam quærere in granario, horâ circiter quintâ pomeridianâ, & cùm bihorio retardentem quærunt, invenere suspensum. Nihil auxiliū ipsi præstitum est, ad undecimam autem noctis vectus in nosocomium fuit. Consueta auxilia admota sunt trihorii spatio. Nulus ferè sanguis sive ex brachiis, sive

ex venis fluxit jugularibus, sive ex locatorum in ferventi aquâ pedum venis; quique paucus excipi in vasculum potuit, tenuis ille omnis fuit, nec morâ coiit. Injecti in gulam liquores descendere in ventriculum non potuerant.

Die 12 Febr. cadaver ad quintam postmeridianam submersimus bihorio, & ad septimam aperuimus. Laquei vestigium non suprà cartilaginem scutiformem, ut §. II. & III. neque infrà cricoideam, ut §. I. verùm ad medium cartilaginem scutiformem erat. Ingens omentum. Vix eminens infrà costas jecur. Tenuia intestina tota purpurascebant: ut & hinc indè colon & cœcum. Mira coli figura cursusque, ferè ut in §. III. Capax valde ventriculus, vario ciborum genere plenus.

Pulmo dexter totus cum pleurâ firmissime coivit, laevus minimè: uterque ruberrimus, jecinoris instar, maximè dexter: variî lobi perscissi transversim copiosum sanguinem, & separatim spumosum serum fuderunt, copiosum quidem, sed minus, quam in proximè priore abundantem: trachæa autem, ac majora bronchia, aquâ leviter spumosa verè turgebant. Cor utrumque penè vacuum, tantillùm aquæ rubellæ in se continuit; tenuis rubellusque liquor, minimè consistens ex apertis per-

universum corpus vasis prodiit. Meninges cerebri naturales, exceptâ leviore rubidine ad posteriora. Paucus admodum, isque tenuis omnino, in sinibus lateribus sanguis. Sinus longitudinalis vacuus. Ventriculi autem superiores & triplo naturali capacitate ampliores, & aquâ pellucidâ pleni; sic & tertius: an & quartus, ruptura infortunata inter examinandum contingens, dicere vetat? Læsionis in capite externo nullum vestigium.

§. V. Mater tera die decimâ septimâ Aprilis privignum tertium annorum strangulaverat. Tri horiò jacuit corpus non soluto laqueo. Tandem ad nos delatum, confuso nostro labore incassum agitavimus. Pericranium in eâ ossis bregmatis plagâ, quæ frontem respicit, ruberrimam plagam habuit, ac si vis externa adhibita fuisset. Integumenta tamen nihil simile ostendebant. Dura mater leviter, pia tota vehementer inflammata. Vix lympha in ventriculis: plexus choroidei turgidiores, ac hydatici. Pulmo non concidebat solo, eoque immanni, infarto sanguineo, nam spumosæ lymphæ nihil habuit. Cor perfectè vacuum utrumque. Sanguis solutus.

§. VI. Homo vultu totoque corporis habitu venustissimus, ad libellum sup-

plicem aulæ datum repudiatus, 21 vel
22 Apr. 1773 suspenderat se; nesci-
tur utrūm incipiente an progressâ nocte:
ad 10 mat. repertus in laqueo erat. So-
litus labor irritus pro more fuit. Sanguis
solutus, sequenti autem die seri quid su-
pernatabat, quod cochleari exceptum,
ac igni impositum, instar albuminis ovi
coagulabatur. Rubra ejusdem pars non
concrescens, aliquid plus tamen spissitu-
dinis, quam pura aqua habebat. Intereà
dùm pectus spiritu vini calido fricabat
noster chirurgus *Scherer*, advertit pecto-
ris sibilum, ejusdemque alternâ pressio-
ne ac remissione veluti respirationis mo-
tum: hinc quamdiù hic sibilus motusque
durabat, perrexit ille, & dein alii tho-
racem premere alternatim, donec post
adhibitum sine ullâ pausâ hunc laborem,
& motus respirationis & sibilus cessaret
omnis. Cùm vinum calens in os injec-
tum videretur sibilum, vel ronchum im-
pedire, siphone ex ore id exantlavimus,
moxque rediit ronchus. Dein totum scro-
tum spiritu vini calido continuò fovimus,
& lata multa admovimus vesicantia.
Sequente mane horâ octavâ cadaver in-
flammatione pericardii, & utriusque ce-
rebri meningis, nec non ecchymosi inter
utrasque, imò ipsis contusionibus inte-

gumentorum, suspicionem dedit hominem voluisse se occidere, capitis in partem allisione, antequam confugeret ad laqueum; vel agitatione violentâ in suspensi principio caput ad trabem, vel partem violentè allisisse. Laqueus suprà cartilaginem scutiformem strinxit. Pulmones membranaceis vinculis ubique cum pleurâ & pericardio concreti. Pulmones graves a plurimo sanguine, *sine minimo vel spumæ, vel lymphæ*. Cor utrumque vacuum. Omentum ingens. In ileo ad novem spithamas a valvula coli stercorea materies. Ileum totum purpureum ac ferè nigrum a sanguine.

Si his addideris experimentum *Tom. I. Rat. Med. cont. Part. II. pag. 290.* relatū de absentiâ spumæ aquosæ, flavæ aut rubellæ, in suspensi militis pulmone, habebis septem suspensos strangulatosve, quorum tres, post suspensionem non mersi, quavis caruerint spumâ pulmonis; unus post suspensionem mersus, eadem quoque vacuus repertus sit; tres verò eamdem haud minore quantitate, quam unquam vivorum demersorum plerique pulmonibus gerant, gesserint.

Totum quod mihi ex hisce licet concidere est, 1º suspensorum pulmones hâc spumâ vacuos reperiri sæpius. 2º Suf-

pensi, & post anatomen submersi hominis pulmonem etiam ab omni aquâ vacuum reperiri, ut in primo hujus sectionis cadavere apparuit. 3º In suspensis, qui ante anatomen submerguntur, non raro aquam intrare in pulmonem, quemadmodum tria cadavera docuerunt; nisi fortè alia subsit hujus spumæ causa, de quâ deinceps: hucusque enim non debeo nisi secundum eruditorum horum virorum principia, atque systema rationari & concludere. 4º Adeoque contra experimenta esse, & quod mortuorum pulmonem non subeat aqua, & quod ejus in submersi corporis pulmone vacuitas violentum arguat, atque ante submersionem illatum mortis genus.

Liceat autem hîc rogare, an saltem ad trium suspensorum, qui spumâ pulmonum caruerunt, experimenta, si reliqua de industriâ non fecisset, contrà prudentiæ regulas peccâsserem, si spumam in suspensorum non reperi unquam pulmone conclusisset? Omnipotens; minor est enim experimentorum numerus, quam foret ad benè concludendum necessarius. Fortè meum judicium, vel alii, vel ipsemet, præproperum fuisse argueremus. Quod enim alii observârunt, an non idem a me observari poterit? Idque non

penitus raro? Si *Bartholinus* deprehenderit, vid. *Bonnetum Med. sept. Lib. VIII*, pag. 630, in suspenso homine fistulam pulmonalem spumâ copiosâ impletam; si aliam suspensi anotomen referat *Bonnetus*, cuius pulmo distensus fuerat, implensque thoracem totum, hic spumosus atque fungosus, ibi marmoris instar variegatus; si alio loco *Bartholinus* dicat: «In strangulato inveni pulmones grandes, variegatos, cæruleos, rubore intersperso leves & spongiosos, sanguine spumoso tam plenos, ut non tantum externæ venæ tumidæ in membra nân apparerent, sed in dissectione cordis demonstrantem me ferè impiderent; » an non vix concionandæ temeritatis me similia, postmodùm observanda, damnarent? Quod autem similia haud raro obtingant, faciet palam sectio sequens.

CAPITIS SECUNDI SECTIO TERTIA.

Sextuplex hominum anatome, quorum, morbis acutis chronicisve defunctorum, pulmones aquâ spumosâ scatuerunt; sexies in nosocomio, semel in urbe.

§. I. Hominis peripneumoniâ atque ischuriâ

churiā mortui *pulmo habuit spumam aquosam.* §. II. Studiosi pleuro-peripneumoniā denati *pulmo eamdem quoque habuit.* §. III. Rever. sacerdotis pleuro-peripneumoniā denati. §. IV. *Nec non pulmo ducis militum, chynico morbo diu afflicti, & acuto demum sublati.* §. V. In saltandi amatore, pleuro-peripneumoniā enecto. §. VI. Præterea & in eo hominis febre ardente denati. §. VII. Tandem & in alio similem morbum passo. §. VIII. Conclusio ex præcedentibus. Præcipitior Lugdunensium conclusio, & minùs vera pro veris magistratui refert, homines planè innocuos in carceris torturæque periculum conjicit, & sæpe inanes eidem magistratui creat labores.

§. I. Finis Sectionis II paradoxon proponebat, imò assertebat de spumoso liquore abundante in suspensorum pulmone; quò autem minùs paradoxon appareat, quædam nova observata enarrabo.

Rude donatus miles, & talis quem locum tenentem appellant, 73 annorum, anno 1773, die 26 Jan. in Nos. pract. susceptus, narrabat se post 24 annos valitudinis integerrimæ, eò petulantiæ cum

Tomi VIII Pars II.

C

commilitonibus pervenisse, ut post eva-
cuata ad ebrietatem pocula, eadem fran-
geret, dentibus conficeret, ac degluti-
ret. Haud insolita hisce in terris petulan-
tia est; gloriantur de eâ etiam nonnulli
nobilium. Quod sibi, ejus protervitatis
tironi, dolorem oris fauciumque, pau-
latim verò in eâdem magistro tam parùm
molestiæ intulit, ut inter socios eminens
omnes, par calicum post compotationem
devoraret: semel tamen contigisse, ut pro-
cacitatis pœnam crudeli morte luisset, nisi
post diuturnam colicam vitri fragmenta,
immisso clystere, alvo exturbasset. Con-
tingisse quoque in ultimo *Austriacorum* cum
Thracibus bello, ut & ter acutè decubue-
rit, & pectus semel vehementer contusus
fuerit: ab hâc contusione superstitem
mansisse tussim, eamque ad mutatas an-
ni tempestates crebram, cum sputorum
tenuium excretione. Multis tandem ab an-
nis dysuriâ atque ischuriâ periodicis labo-
râsse, cum urinâ fabulum gerente, crassâ-
que ac flavâ.

Die 25 Jan. sputis jam ab aliquot re-
trò diebus planè deficientibus, colico
dolore cepit torqueri, febre ac tussi an-
helâ. Purgans antiphlogisticum sumpfit;
quo nihil operante, in Nosocomium ves-
perè illatus est. Continuum inibi conques-

tus ventris dolorem est; ventre primùm nec duro, nec tumido, sensim verò duriore & tumidiore, idque a sinistro umbilici latere potissimum obliquè deorsum. Paucam urinam principio, paucissimam deinde, ultimo calamitatum biduo nullam misit, neque sponte, neque ad inductum catheterem. Albus quidem die morbi tertia prodiit atque continuavit, tussis autem sicca ferè, molesta, jugis, insomnia, colica continuârunt, & immorigera omnibus ægritudo hominem peripneumoniâ & ischuriâ sustulit die undecimo morbi incipiente.

Jecinoris erat immensa adeò moles, ut ad umbilicum, & ad dextri ossis ilei cristam pertingeret; & cùm anteriore non tantum facie, sed & totâ mole omnia ad lumbos usque expleret, causa capiebatur ventriculi intestinorumque mutatae sedis. Dexter ren cum suo uretere sanus: sinister mole ingens, in pelvi suppurans, durus totus, in suâ papillari substantiâ lapillulos numero septem gerebat. Ureter quadruplò non crassior, ut fieri afolet, sed amplior, in viâ suâ mediâ ostendebat lapillum, æquè dein amplus ad vesicam usque. Vesica contracta & indurata sic, ut duas uncias urinæ ægrè capere

posset. Nullus in eâ, sed propè glandem
in urethrâ parvus calculus.

Pulmo dexter multùm, sinister integrè
firmissimèque concretus cum pleurâ. Co-
hæsione patienter solutâ, pulmo nec
tunc, nec in tomos transciſſus conci-
dit: *effluxit autem seri non nihil spumosi*
ea abundantia, ut unquam abundantiū
ex demersorum expresserim pulmonibus.
Aspera arteria dura valdè, & superiùs
veluti *ruischianâ* injectione rutilans. Thy-
roidea glandula penè ossea. Coaluerant-
que in unum corpus tres priores annuli
cartilaginei. Initia bronchiorum, unàque
circumpositas iisdem glandulas calcarea
replebat materies.

Cor ingens. Aorta triplò crassior in suâ
substantiâ, duraque valdè. Ejus semilu-
nares valvulæ osseæ propemodùm duri-
tiei. Polyposa massa alba mollis, non
commista, sed cohærens cum sanguine
grumoso, soluto cor arteriasque ex-
plebat.

§. II. Die 7 Febr. 1773, *studiosum*
poësios 17 ann. ex *Monte aureo* in *Noso-*
comium suscepimus, qui a sex retrò
annis, post gravem pectoris morbum,
tussi, anxietate, sinistri lateris dolore,
febre variâ, corrhyzâ, catarrho fre-

quenter laboraverat. Jam verò faucium ac palati leviore inflammatione a sex abhinc diebus curatus, pleuro-peripneumoniâ laborare cepit: altero die morbi ad nos delatus, præter alia auxilia addhiba, ne per novem quidem venæ sectiones a vehementiâ inflammationis liberari potuit, sic ut principio sexti diei interiret. Urinæ perpetuò aut jumentosæ erant, aut crassum enæorema in globum collectum gerebant. Sputa & pauca semper, & tenuia, & pauco muco subinde commista.

Exiguum omentum. Immensum iterum hepatis, figuram planè singularem, depresso samque intestinis sedem concilians. Copiosa quidem, at minus colorata bilis. Mesentericæ venæ repletæ ultrà morem. Ren dexter bonus; lævus triplò major, durus, compactus.

Dexter pulmo cùm pericardio, tum universæ pleuræ, hîc firmitius, ibi laxius concrevit. Uterque anteriore facie naturalis, laterali ruber, dorsali purpureo-niger, neque confidens. Quâcumque in parte percindebatur, aliquid seri spumosi albescensisque profudit. Cor, vasa majora, polypi, ut in proximè prioris thorace; eâ differentiâ, ut post novem venæ sectiones, quarum ultima crassissimam durissi-

mamque crustam illicò formaverat, ac rubram ejus portionem vix scissilem dederat, tamen concretiones polypofas, & longè majores durioresque cor, ventriculi, sinus, auriculæ, & vasa omnia majora gererent, nec grumosi ac purpurei cruoris sibi cohærentis nisi pauculum haberet; imò in capitis sinu longitudinali merè flavus crassusque polypus cum adhærescentibus ramis ex cerebri venis extractis, citrà vel minimam tubedinem inveniretur: ita ut a posteriore convinceremur eum omnem morbum absolutæ lethalitatis esse, in quo toties educito sanguine inflammatorio, totque diluentibus ac sanguinis tenacitatem solventibus ingestis, plurima sanguinis pars polyposa, adeòque per minima vasa impenetrabilis pertinaciter maneat.

Historiæ huic eamdem notam quam priori adnecto: quamvis enim minorem spumosi seri copiam dederit pulmo, eam dedit tamen, ut majorem in submersis five hominibus, five brutis, aliquandò non invenerimus.

§. III. Rev. sacerdos 70 ann. ter meminit se acutè ægrotasse, ante elapsos ab hinc 20 annos; ab eo verò tempore sibi nihil morbos accidisse, præterquam frequentes admodùm catarrhos; quos mi-

tigare, ac sæpè pellere penitus pulvrey *lapidis de Goâ*, quem conficere noverat, foleret; maximè quandò cum regimine ad sudorem, integro quotannis mense eo lapide sudabat.

Die 13 Martii catarro, seu potius pleuro-peripneumoniâ laborare cepit ad noctem; & cùm ad venæ sectiones & adhibita auxilia alia ingravesceret, in Nosocomium practicum suscipi petivit. Medio die tertio in idem illatus est. Inflammatio tanta fuit, ut coriacea sanguinis crusta nunquam densior, rubraque ejusdem portio nunquam durior fuerit, quam in venæ sectione quintâ. Lateris tamen dolor post hac cessavit. Urinæ paucæ, crebræ, urgentes, paulò colorationes naturalibus, enæorema gerebant crassum, copiosum, suspensum, globum formans. Finis diei quinti idem & vitæ fuit.

In cadavere ingens hernia, dicta *entero-oscheo-cele*; omentum enim non inerat, quia & breve nimis, & cum peritonæo conatum. Celaverat autem hanc, tūm duobus medicinæ studiosis, qui duabus cum dimidio annis familiariter eo usi fuerant, tūm mihi; ne autem tamicosum illum suspicarer, vomitûs absentia, alvusque obsequiosa vetabant. Intestini cœci saccus locabatur ad annulum

abdominis, & ileum, mox antè suum in cœcum ingressum, in prælongum scrotum prolapsum erat ad usque testem, & quidem sic, ut intestinum usque ad testem ab omni cohæsione cum sacco peritonæi liberum esset, ipse verò saccus toto itinere suo arctissimè cum vicinis concretus. Testis bonus, non, ut in similius fit, complanatus. Prolapsi intestini longitudo trium cum quadrante partium ulnæ Viennensis erat. Annulus ita amplus, ut duo digiti intrà illum se commodè movere possent. Brachierium non gerebat; an gesserit quondam ignoramus. Si gesserit, id abjecisse illum arbitror, eò quod per annulum amplum juxta pulvinar brachierii intestinum elabatur facile, & sic compressum doleat. Et quia ex sacci universi cohæsione firmissimâ antequam fuisse herniam conclusimus, neque tamen intestinum cum sacco coivisse deprehendimus: rev. virum frequenter, fortè singulâ nocte, intestinum reduxisse in ventrem credimus.

Ileum intestinum habebat in latere sinistro ventris appendicem seu lateralem saccum, eumque cœcum, in quo recondi nux moschata posset. Colon adeò suo in cursu irregulare, ut faceret tredecim flexus.

Hepar mole minus quidem quam in precedentibus, magnum tamen; & cum ventriculus ingens esset, & a latere lobi jecinoris minoris spatium quidem habebat sese expandendi, minimè vero expandere se ob lobi majoris molem in medio ventre posset, intestinalem formam affectare debuit a latere epigastri finistro, usque ad pylorum. Oesophagus ad duos digitos latos in abdomen descendebat, antequam abiret in ventriculum. Pylorus angustissimus, non spasto, sed præternaturali membranarum crassitudine. Magni ventriculi sacci superficies interna vehementi inflammacione rubebat.

In thoracis cavo dextro unc. xiiij aquæ rubellæ; unc. vij in sinistro. Utriusque pulmonis lobus superior cum pleurâ arctè coaluit. Pro more iterum hic pulmones facie anteriore minus, & per insulas duntaxat, multum ad latera, plurimum ad dorsum inflammati fuerunt.

Aspera arteria perscissa spumam albescentem, eamque copiosam fudit; continuata autem longitudinali sectione, scabebant eadem universa bronchia. Quod autem notandum, nihil concidentes, imo ponderosi pulmones, dum in lamellas divisi conjiciebantur in aquam, partim innatabant,

partim, cum maximè autem eæ dextri pulmonis, fundum, lapidis instar, petebant. Aqua quippè pulmone gravior, obsidens pulmonis cellulositatem; sanguis pulmone & aquâ gravior, opplens ad crepaturam ferè arterias; unà cum pulmonis parenchymate, massam confecerunt, ejusmodi aquæ volumine specificè graviorem. Contenta hæc in pulmonis cellulositate aqua, cùm turbulentibus sub vitæ finem arteriis venisque premeretur, in cava bronchia, trachæamque transudasse videtur; quemadmodùm in demersis ex cavis bronchiis in pulmonum cellulositatem observatur transfire; sic ut aëreo hoc canali loco puri aëris, nunc crassâ ac sebaceâ materiâ repleto, pondus pulmonis adhuc auctius fuerit.

Pericardii tunica exterior inflammata multùm, interna aliquantùm. In eodem liquoris unc. j. 3.

Cor sinistrum vacuum, ferè & dextrum, nisi quod hinc indè grumosi sanguinis quidquam hæreret inter columnas.

Pleura tota utroque in latere inflammatissima.

In encephalo dura mater vix, pia mater valdè inflammata, imò ad posteriores cerebri lobos purpurea. Sub arachnoideâ opacus liquor esse videbatur, qui, hâc pertusâ, limpidus erat. In ventriculis su-

perioribus solita copia seri. Plexus cho-
roidei turgidi, pluribus hydatidibus ob-
fessi. Ventriculus tertius tantillum, quar-
tus nihil liquidi gerebat. Omnia vasa per
universum encephalon, ut arteria basila-
ris, circulus Willisiānus, &c. crasso pur-
pureoque sanguine infarta erant.

§. IV. Die 18 Aprilis 1773 invitabar
ad anatomen viri prænobilis, militis stre-
nui, septuagenarii, qui a quatuor retrò
annis multum tussiverat, sputa reddide-
rat, lævoque in latere dolorem, sæpè ad
animi deliquium usque, externâ vel levissimâ
pressione in leipothymiam ferè exa-
cerbantem, tūm ad motum, & ad cali-
diora, palpitationes ad præcordia & per
omne corpus horribiles toleraverat; quem
demùm febris ardens, ex justâ indigna-
tione orta, intrà quatriuum sustulit.
Pulmones ambo cum pleurâ undique con-
creti, sinister etiam cum diaphragmate;
& dūm sinistri hujus pulmonis concre-
tiones a pleurâ solvebantur, loculi cavi
inter has concretiones alii ichorem, alii
pus referebant. Pulmonis ejusdem lobus
superior crassus, at jam gangrenosus;
inferior lobus ingens, durus, pondero-
sus, ita ut portiones nonnullæ aquæ fun-
dum peterent, cum universo ferè pericar-
dio firmissimè concreverat, parte autem

suâ non induratâ, sed non confidente; spumosâ lymphâ copiosâ scatebat. In dextri pulmonis inferiore, medioque lobo non confidente, sanguis plurimus vix effluens, & siccum ferè pulmonem in transscindendo ostendebat; *lobus vero superior non minorem seri spumosi copiam referebat, quam multi referunt demersorum.* Uncia fortè aquæ rubellæ in pericardio. Inflammatum mediastinum nonnihil erat, diaphragma valdè, pluresque intestinorum longæque portiones. Abscessus in ipsis pulmonibus nulli, etsi tot annis tussiisset, sputaque ejecisset. Polypi ut in prioribus cadaveribus. Undènam dolor in sinistro latere, atque ad minimam pressionem ingens, explicabitur facile ex pressione cordis contrà durum accretumque pulmonem, & a vellicatione omnium inter se concretarum partium?

§. V. Die 27 Aprilis recens elapsi, coram universâ juventute medicâ cadaver aperui hominis 28 ann. qui post frequentes saltationes in pleuro-peritoneum dirissimam incidens, eâdem nec decem venæ sectionibus, nec cæteris remediis cedente, septimo die perierat. Oculi corrugati atque opaci 30 a morte horis, isque qui cadaverum esse solet artuum rigor. Colli pressione ore

atque naribus liquor fluxit. Pulmo dexter duobus in locis cum pleurâ concretus, intermediâ substantiâ quâdam, hîc membranosa, ibi ligamentosa, non lacerandâ, sed percindendâ, rubrisque hinc indè vasis ornatâ. Rubor inflammatorius pulmonum, ut in præcedentibus. Concretio deindè pulmonum, pleuræ, diaphragmatis, pericardii, ope seri transudantis, supremis propè mortem horis. In cavo dextro thoracis erant lymphæ rubellæ unc. $3\frac{1}{2}$, in sinistro unc. $2\frac{1}{2}$.

Pulmones transciissi madebant, serumque manabant omni ex parte; pressi autem seri spumosi fuderunt uncias octo.

Aspera arteria & bronchia omnia, per totam longitudinem percissa, detersaque, superiùs pannum rubrum, inferiùs purpureum referebant. Cor rubrum valdè; valvularum aliæ rubri, aliæ purpurei coloris. Rubra valdè arteria pulmonalis interna, internaque aorta, ad iliacas arterias usque; ibi autem color planè purpureus, non pergens tamen per easdem polypi vitalium viscerum, quales priorum cadaverum. Omnis venæ cavæ sanguis, omnisque axillarium vasorum niger ac dissolutus.

Monstrosum intestinum colon, sic ablatto peritonæo universum explere videba-

tur abdomen, ut nihil ferè præter illud replere ventrem cerneretur. Mesenterium solito rubicundius. Præ mole jecinoris ingenti ventriculus eam intestinalem, qualēm jam suprà notavimus, formam induere debuit.

Polypus venosus in totâ longitudine sinûs longitudinalis. Pia mater quidem tota admodùm, in sinistro autem hemisphærio magis inflammata. Ventriculi vacui.

Ex hâc & singulis sectionibus hominum quos morbus inflammatorius e vivis sustulit, abundè liquet quanta rubri sanguinis copia, post toties iteratas venæ sectiones, nariumque hæmorrhagias, adhuc præsto sit in cadaveribus; quæ longiorum harum sectionis enarrationem non minima causa fuit.

§. VI. Mensis Maii 28 die, hominis cadaver publicè in Nofocomio aperui, qui febre ardente correptus, eam præter morem in diem 15 protaxerat: horis a morte 35 elapsis, & frigidâ in caveâ cadavere per id tempus servato.

Aperto pectore, pulmonis utriusque inferior lobus membranaceis vinculis cohaesit cum diaphragmate ac pleurâ, magis autem sinister: cæterùm inter se mutuò lobi omnes transfudante sero coiverant.

Pulmones facie anteriore valdè rubicundi, laterali validius, dorsali nigerrimi. *Lobi superiores transscissi compressione serum spumosum fundebant modicè, inferiores verò primùm solā transscissione illud transfudabant, deinde autem compressi tantam spumosi liquidi copiam fundebant, ut facile libram medium colligere potuissent, si perrexissem.* In corde & auriculâ dextrâ multus erat sanguis polyposus, flavus, cui sanguis solutus ac niger sic cohærebat, ut in sanguine missò rubra insula cum crustâ cohæret. Aorta à suo principio, per totam superficiem internam usque in iliacas rubra, in iliacis adhuc magis: vena cava pariter & internum cor, pleura modicè, diaphragma vehementer. In utroque pectoris cavo & in abdомine, nonnihil lymphæ rubellæ. Hepar in externâ superficie inflammatum; in utrâque ventriculus, vehementissimè autem quâ parte ingenti lieni incumbebat. Colon tympaniticum, ac figurâ flexibusque monstrosum. In ileo ingens appendiculus, seu diverticulum. In encephalo sola fortè pia mater paulò rubicundior. In fronte & versùs futuram coronalem, plaga florenum magna, ruberrima in Pericranio, adnexâque cellulositate; in fronte externâ nihil.

§. VIII. Die 22 Junii, coram auditribus aperui 19 a morte horis cadaver hominis 42 annorum, qui ab elapsis 18 retrò annis ex equo in durum obstaculum dextro sui thoracis latere præceps datus, malè quidem postliminio pector habuerat, suum tamen semper præstiterat domino famulatum; febrim intermittentem, nec non pectoris acutam semel passus. Pleuro-peripneumoniâ tandem dirissimâ, quæ ne post undecim quidem venæ sectiones cessit, affectus, interiit octavo morbi die.

Costa tertia dextri lateris fracta quondam, ligamentosâ sic coaluerat substantiâ, ut quamdam æmularetur articulationem. Pulmo eo in latere cohæsit per insulas cum pleurâ, mediastino, pericardio, diaphragmate, vinculis latis, robustis, membranaceis partim, partim ligamentosis vasculosisque. In plagis a concretione liberis inter erosum pulmonem, pleramque, puris crassi copia ea, ut siphone quantum potuissemus id exantlan tes, plus librâ colligeremus.

Graves, nec concidentes pulmones, non a pure quo carebant, sed ab infarto sanguine copiosâque lymphâ, sic ut medius lobus inferior in aquam injectus, lapidis instar subsideret. Reliquus pulmo

dexter, totusque ruberrimus sinister, in taleolas numerosas transscissi, sero spumoso manabant, compressi effudere rivatim. Aspera autem arteria à summo suo per totam longitudinem, divisiones, imaque bronchia albâ spumâ plenissima.

Aspera eadem arteria leviter inflamma-
ta ad suum principium, in medio plus, in
bronchiis maximè ut purpurasceret. Utro-
que pectoris in latere pleura, in dextro
autem dirius inflammata. Inflammatum
tendinosâ suâ portione diaphragma; ven-
triculi interna propè cardiam ferè gangræ-
nosa superficies: inflammati etiam valdè
renes, de quorum regionis dolore æger
vehementer in ultimo morbo conquestus
fuerat; urina interim probè secreta sem-
per.

Tympaniticum valdoperè colon intes-
tinum; an indè ponderosum hepar tru-
sum in altum, ut in dextro latere latis di-
gitis duobus altius quam in sinistro assur-
gens, exiguum affecto relinqueret pul-
moni spatium?

§. VIII. Ex his omnibus manifestò
constat supervacaneos creari magistra-
tui labores, ad perquirendos follicitè
ficti homicidii reos, & ejusdem magistra-
tûs necessariam veræ internecionis auto-
res indagandi labefactari solertiam; si

Medici atque Chirurgi legali testimonio perhibent aut hominem submersum esse, sine violentâ morte prægressâ, cuius pulmo aquam spumosam gerat; aut eundem esse truculentâ nece peremptum, antequâm in aquam præcipitaretur, eò quod lymphâ hâc spumosâ ejus pulmo careat. Constitit enim, & eos quos sola demer-
no in aquâ peremit, omni posse carere lymphâ pulmonibus. Constitit illos qui mortui mergantur, haud rarò plenum eâ-
dem hoc viscus habere. Constitit his quos morbis consuetis abstulerit atra dies, pulmonem etiam tantâ hujus spumæ co-
piâ sæpè madere, ut non majori demer-
forum pulmo madeat. Constitit demùm potuisse pulmonem haufisse aquam, &, homine necdùm perfectè mortuo, hanc resorptam intrâ vasa sanguinea fuisse (vi-
de suprà canis nostri xxxvij anato-
men) sic ut spumæ nihil toto in pulmone conspiciatur, in quo tamen intrasset abun-
dè, ut fœces atramenti docuerunt.

Quæ cùm ita habeant se, quotiesne imponimus judicibus locorum, eosque cogimus ut vel inanes in peremptores inquitendi molestias subeant, vel neces-
fariis fortè eosdem indagandi superse-
deant artificiis, si, quod omnia hæc ex-
perimenta subvertunt. sequamur systema?

Si quis seriò omnia revolvit quæ hucusque communicavi experimenta, errorum horum frequentes occasiones esse posse facile per se perspicit. Si v. g. *vir* §. I, aut *juveuis* §. II, aut *reverendus vir* §. III, aut *belli dux* §. IV, aut *pleuro-peripneumonicus* §. V, aut *febre ardente mortuus* §. VI, aut tandem *pleuro-peripmonicus* §. VII peregrinatus, alicubi in diversorio subitâ morte extinctus esset, locique magistratus, violentiæ illatæ suspicione, legalem cadaveris inspectionem exigeret; profectò hoc, quod infirmamus, principio imbuti Medici atque Chirurgi, hominem aquâ suffocatum, absterrsum lectoque repositum esse vel spontè jurarent; forentque in causâ, saltem ubi frequens adhuc viget torturæ insaniam, ut necis suspecti admoverentur ad torturam, hique eidem perferendæ impares, se insontes accusarent, immeritamque sibi mortem consicerent.

Evidem haud is ego sum, qui egregios hosce autores hæc quæ scripserint scripturos fuisse sustineam, si unquam in similia, in quæ ego, cadavera incidissent; potius crediderim incidisse eos in ejusmodi nunquam: hincque mea observata rariora esse autumabunt, quæ vix, aut ne vix quidem, in consueto ordine

naturæ faciant exceptionem. Attamen primum in re tanti momenti etiam rarissimas observationes notabilem facere legis universalis exceptionem, primùm affero; secundò exceptiones has adeò raras haud existere, si intrà quatuor menses in septem cadaverum sectionibus se mihi obtulerint. Ut verò rem in aprico ponam, observationem hanc non modò non in rarioribus, sed in frequentioribus collocandam esse ostendam; hæcque sequentis erit sectionis hujus capitinis materies.

CAPITIS SECUNDI

SEXTIO QUARTA.

Spuma pulmonum frequentissimâ anatomorum experientiâ in iis, qui mersi non fuerunt, demonstrata est.

§. unica. *Confirmatio priorum observationum per XIV anatomicas sectiones Cl. viri Morgagni; & per nonnulla aliorum insignium anatomicorum. Conclusio ex his omnibus.*

§. I. Ut hoc probem, autorem accuratiorem, fideque digniorem, immortali *Morgagno* non novi; undè ab eo, quibus indigeo, petam. Ep. Anat. Med.

XXII, §. 19. *Pulmones ubique multo sero referti hominis, qui per quadriennium anhelus respiraverat maximè ad motum corporis.* Ep. XXI. §. 33. *Pulmo dexter durus, compactus ut jecur; sinister verò fudit aquæ sanguinolentæ & spumosæ non modicam copiam, thorace vacuo.* Ep. VI. §. 12. *Pulmo sinister aëre mediocriter distensus, &c., si secares, multum effundens spumosi humoris.* Ep. XIII. §. 3. *Eminentiss. cardinalis Barbadicus, antistes Patavinus, catarrhis obnoxius, febre dictâ catarrh. epid. moritur. Graves erant ipsi pulmones, sed a catarrhalì materie, quam continebant, multâ passim e bronchiis, quâcumque incideres, erumpente.* Ep. XXX. §. 2. *In homine cancro ventriculi mortuo: ex omni utriusque pulmonis incisi parte serum prodibat.* Ep. XXXIV. §. 18. *Homo ab herniâ omenti & intestini non integri, sed parte suâ diverticulum quasi facientis, cæterum in ventre aperti peremptus, habebat pulmonis partem induratam, pulmones autem ubique fermè humore imbutos.* Ep. XXXVI. §. 17. *Muller ante mortem subitò in magnas anxieties lapsa, multam spumosam & sanguine tinctam materiem expuit. In thorace omnia fana, nisi quod pulmones rubore suffusi multum, cum searentur, mate-*

riam emittebant ejusmodi, qualem novissimè mulierem expuisse scripsimus. Ep. V.

§. 11. In homine ebrio, subitò mortuo, cuius historia vitæ non scitur, pulmones graviores, & spumam si premeres emittentes, sanâ tamen eorum substantiâ. Ep. VII.

§. 11, Figulus, potator strenuus, pleuro-peripneumoniam periit. *Lobus superior sinistri pulmonis in supremâ parte sero turgidus spumoso, ibidemque niger & durus erat, sed ita durus, ut vetus potius vitium quam recens existimares: parte autem reliquâ fermè exsuccus, nec multum dissimilis sani.* Ep. XXI. §. 29. Ancilla

a 3 mensibus minus menstruans, a capto frigore incidit in morbum prioris similem: sub finem ex ore effluebat humor aquæ spumosæ in quâ caro recens lota sit. Die 7 moritur. Excepto superiore sinistri pulmonis lobo, reliqui lobi omnes, quamvis spumoso humore prorsus distenti, naturalem substantiæ modum servabant, ex qua dissectâ is humor prodibat. Ep. XVIII. §.

30. Vir intemperantis vitæ, post magnas in respiratione anxietates, & cordis palpitationes, cum œdemate corporis, 4^o die moritur. *Pulmones dissecando variegati, & spumoso humore scatentes;* & ibid. §. 34. Lotrix a sexennio spirandi difficultate, quæ asthmatis convulsivi spe-

ciem habebat, sæpè in Nosocomium ve-
nerat, eodem demùm malo inibi morie-
batur. Nullus hydrops thoracis. Pulmones
non annexi pleuræ, sed turgidi . . . & re-
ferti humore spumoso: at nihil præterea in-
tus, extrâve, quod morbidum esset, ostende-
runt. Ep. XXI. §. 23. A pleuritide die 4°
moritur homo, cuius nulla anamnesis ad-
ditur. *In sinistro latere pulmo fermè sanus,*
fulvo cæteroquin humore imbutus quâcum-
que secaremus, qui vel uberior ex pulmone
prodibat dextro. Hic verò & major, & gra-
vior, & durior, ubique hepatis substantiam
referebat, exceptis quibusdam non exiguis
tractibus, in quibus substantia erat albida
& quasi ad corruptionem vergens. Epist.
XVI. §. 30. Adolescentuli ultrà tres men-
ses difficulter spirantis, pulmones ichore
spumoso albidoque, si manu comprimeres,
scatere conspiciebas.

Jus igitur sumnum mihi esse videtur
confirmandi omnes eas quas ad priores
sectiones hujus capituli formaveram con-
clusiones. Si aquam eorum pulmo hauriat,
quos post fata merserit unda; si magnis
anatomicis pulmones hominum laqueo
strangulatorum hâc spumâ scatuuisse visi
sint, ut suprà constitit; si aquâ spumosâ
scatuerint pulmones hominum septem,
intrâ paucorum mensium spatium, a me

post mortem publicè examinatorum , quos è medio communes morbi sustulerant ; si denique *Morgagni* minimum hoc decies & quater notaverit ; nihil in posterū aut imprudentius , aut perniciösius referri magistratui poterit , quam quod præsens hæc spuma hominem & submersum in aquâ esse , & quidem viventem , certò indicet ; quodque , spumâ hâc absente , homo demersus violentâ peremptus fuerit , priusquam mergeretur.

Terminaturus hoc caput duo opponi mihi argumenta posse præsentio , quæ nunc prævertere , quām postmodùm subvertere malim.

Ac foret forsitan prius hoc : cùm in prioribus meis operibus similiūm post communes morbos pulmonum non meminerim , jamque paucorum mensium spatio eosdem septies memorem , insoliti quid in naturâ rerum obtrudere me mundo velle : imò inhonestius quid fortè suspicari iū poterunt , qui spumosam hanc aquam in frequentiore anatome nunquam , nisi in iis qui viventes submersi sunt , deprehenderunt ; ac si quid exaggerationis , ne pejus dicam , meus sermo haberet.

Respondeo primò vel ad notas morborum , mortisque causas confirmandas , vel ad novas detegendas , vel denique ad

ad conjecturales examinandas, corpora exenterari, eorumque exerceri anatomen. Intentionem primam alteramque priores nostras sectiones direxisse plerumque; tertiam verò nos in pulmonum phænomena contemplanda reddidisse attentiores, quo quid de novâ *Lugdunensium* sententiâ censendum foret caperemus. Hinc crebrò contigisse ut citrà interni pulmonis examen olim corpora mitteremus; jam verò quo veritas patescat, nunquam ejusdem visceris internum omittamus examen. Disputationes de valvulâ coli ortæ omnes anatomicos in accuratiorem ejusdem examen descriptionemque excitârunt. Nunquam tām crebra mentio, vitiorumque descriptio facta glandulæ pinealis est, quām postquām *Renato Cartesio* placuisse figere in eādem animæ sedem. Clarus anatomicus scripserat se in 2000 quidem cadaveribus vix bis terve inflamatam pleuram adveruisse; quod facile admitto, dūm anatomici intentio ad longè alia converterit sese: eodem modo post multa lustrata olim cadavera non potui sāpē pleuræ affirmare inflammationem, eamdem inadvertenter prætergressus, & aliis conspicuis rēbus in corpore contemplandis occupatus. At verò cùm *Valsalvā* in rem intentus *Morgagnus*, decies &

Tomi VIII Pars II.

D.

quinquies pleuram vidit inflamatam, & eā quidem plagā, unico casu excepto, quam occupaverat in vitā dolor. Parique ego modo, postquam pleuram & inflammari, & prae vasorum defectu inflammari posse negatum fuit, in rem nunquam non intentus, & inflamatam hanc membranam, & vasculosam esse, ipso *Morgagno* crebriùs meis demonstravi auditoribus.

Respondeo secundò, non ita me pulmonem prætervidisse, ut non frequenter in illis id de quo jam sermo fit animadverterim. Quo pacto aliàs *Tomo XIII*, pag. 211, scribere audacter potuisse: *spumosum autem serum ostendi auditoribus pluries, defunctorum variorum per scindendo pulmonem.* Quod ergò sæpiùs quondam, sed modo generaliore nota veram, id nunc & distinctius & continentius notavi.

Alterum quod opponi mihi posset, conclusionis errantis foret accusatio. Ex eo quippe quod pulmo quos demerseram suspensorum, spumosâ lymphâ abundaret, id esse sistema erroneum, quod aquam nunquam in mortuorum pulmones penetrare statueret decrevi; id quod ex eo minimè concludi posse videtur: si enim in non submersis mihi toties sero

spumoso pulmones scatusse visi sint, quo tandem jure ego asseram aquam suspensorum, deinde submersorum subiisse pulmones, quæ adesse in iisdem, eo quo in ægris meis modo, dudum potuerit? Vitiosum proinde meum hoc esse argumentum: suspensus homo, ante anatomen mersus, aquam gessit in pulmone: ergò ipsa hæc demersionis aqua hujus mortui hominis subintravit pulmonem. Penitus subvertunt observata mea posteriora, ut arbitrantur, hanc conclusionem.

Respondeo 1º *Lugdunenses* nostri amici ex priore suâ conclusione alteram & quidem hanc formaverant: ergò demersus omnis, cuius carent pulmones aquâ, morte violentâ peremptus fuit, priusquam præcipitaretur in flumen. Jam contrà experimenta illorum, me mea docuerant illorum in pulmone spumosam aquam inventam esse, quos merseram mortuos. Argumentum proinde eorum secutus, debbam ex contrariis experimentis thesim contrariam ponere; quandoquidem ii ipso, si meis experimentis adstitissent, aquam in mortuorum pulmones intrare posse, pro eo quo sunt candore, ultrò fassi fuissent. Videatur quî hanc objectionem præverterim, *Cap. II. Sect. II. ad finem* §. VI.

Sed 2º cùm viri immortalis *Morgagni*, tūm mea ipsius experimenta & observata, omnia illorum argumenta & conclusiones penitùs subvertunt, quandoquidem non eorum duntaxat quos mortuos submersi, verùm etiam illorum quos morbi communes sustulerunt, pulmo hâc spumâ manaverit. His enim sic toties demonstratis, quâ demùm veri umbrâ sustinere ultrà hoc suum argumentum poterunt: *nunquam in pulmone hominis spumosus liquor invenitur, nisi in illius quem vivum mersit unda. Ergò omnis qui spumosam aquam in pulmone gerit, vivus fuit mersus?*

CAPUT III.

DE HYDROPE IPSIUS PULMONIS.

§. I. *Ex infortunatis experimentis nostris videmur id lucrati, ut in lucidiorem veri hydropis pulmonis, propriè sic dicti, pervenerimus notitiam. Dubium videtur num Hippocrates hoc nomine eum intellexerit, quem nos, morbum; & an non, vel tumores cysticos aquosos, seu hydatidas, vel hydropem thoracis innuerit? neque aut Aretæum, aut Trallianum, aliud quam Hippocratem, subintellexisse liquet.* §. II. Re-

censitis sententiis Mercati, Jacotii, Martiani, Pisonis, Ruischii, Albertini, Boerhaavii, ejusque illustr. commentatoris van Swieten, Simsonis, Maloetii, Tozzetti, id unicè colligi posse videtur, quod si quandoquā apparet velle de nostro morbo sermonem facere, mox, ut Hippocrates, vel de tumoribus aquosis cysticis pulmonis, vel de horum tumorum lymphā, in thoracem effusā, & pectoris hydropem generante, tam in diagnosi quam in prognosi curaque loqui videantur. §. III.
Colliguntur accuratè omnia signa observata unquam in vitâ eorum qui a morte inventi sunt vero cellulostatis pulmonis hydrope laborasse, & qui eundem annum citrâ graviora incommoda, nisi per intervalla, tulerint: multa conveniunt cum phænomenis hydatici pulmonis & hydropis pectoris. §. IV. *Curatio hydropis pulmonis.*

§. I. **Q**UOD anxiè quaerimus, non invenimus sæpè, ut inveniendo quod minimè quærebamus, dampnum frustrati repararemus laboris. Sic ad magnam fortunam viam infortunia sæpè pandunt: ipsique per immensum pelagus errores atque natragia, nos ignotarum regionum divitiis

cumulârunt. Nobiscum comparatum eodem modo est. Curas submersorum & suspensorum quas, idoneo tempore adhibitas, toties vitam consopitam revocantes, universa jam lætatur *Europa*; nos etiam tempore idoneo dudum præterlapsi, an fortè tunc adhuc effectum sortirentur, irritas experti, incidimus, Deo à quo omnia & quo sine nihil sic benignissimè disponente, & in tutiorem gravissimæ medico-legalis quæstionis solutionem, & in morbi cuiuspiam abstrusioris latentiorisque, gravioris nihilominus ac frequentioris illustrationem; *hydropem* volo, non *pectoris*; fusè quippe ille tractatus ab autoribus est; sed ipsius *pulmonis*, cuius verus in medicinâ desideratur hucusque intellectus. Quod ut clarius conversæ incunabulis exorsus, perque sæculorum ordinem prosecutus, docebo quid notum de eo hucusque fuerit, quidque demum ejus notitiæ atque curæ nostri cæterùm inanes addiderint labores.

Hippocrates Lib. II, de morbis, Cap. XXIV, Edit. Chart. Tom. VII, p. 576.
ὑδερον πλεύμονος, *hydropem pulmonis* descripsit, in eoque febris meminit, tussis quoque, & respirationis densæ atque confertæ, pedum aliquando & ventris,

scroti etiam ac faciei tumoris, unguium contractorum, hocque morbo laborantes iisdem quibus suppuratos, remissius tamen ac diutiis affici solere... eosdem non nunquam se existimare curatos, in ventrem humore effuso: verum eadem mala, iisque pejora redire. Num hinc de vero *pulmonis hydrope*, & non potius de eo qui thoracis est *Hippocrates* differat, quandoquidem solitam suam diagnosis & curam *hydropis thoracis* hinc addit, cui convenire, minimè vero *hydropi pulmonis*, haec videntur; non admodum urgeo, judicio potius submitto sapientum. Par mihi dubium est de textu *libri de Internis Aff.* *Tom. VII, Cap. 24,* pag. 655. Illud modò notavit *Hippocrates* quod *hydrops thoracis* ex pulmonum hydatidibus nonnunquam nascatur, inventis quippe a se in varii brutorum generis pulmonibus; quæ scilicet ruptæ pectoris crearent hydroponem. Porro describit in hisce singulis textibus cum symptomata, tum curationem *hydropis pectoris*; *hydropis* vero ipsius *pulmonis*, hydatidas istas de quibus propriè nulla hinc quæstio si exceperis, nec symptomata narrat, nec curationem.

Fugitivum verbum *Aretæo elapsum* est, pag. 94, Edit. Leyd. πρι τοις οπου quale
Div

quid & *Alexandro Tralliano* excidit Lib. V, Cap. IV, nihil verò distinctè utrisque: ut minimè pateat notum iisdem morbum fuisse. Plurimum laboris impendi per volvendæ bibliothecæ medicæ trium posteriorum sæculorum, ut quid lucis mutuarer a majoris nominis medicis; verùm si qui morbi meminerint, vix cognovisse eundem videntur, quandoquidem eum mox cum *hydropo thoracis* confundunt. *Ludovicus Mercatus* nonnihil plus de vero ipsius pulmonis hydropo, eoque ab illo thoracis distincto, obscurè differuit, Tom. II, Lib. II, Cap. IV. *Desiderius Jacotius* autem sæpius in cadavera incurrerit oportet, quorum pulmones spumosum fudere liquorem; suo enim commentario in *Hollerii Lib. V*, text. 62, Coac. expositionem, de sanguinis sputo, utrum ex hepate, an ex pulmone prodeat, discernendo agens, quum leviter, inquit, spumæ permiscetur sanguis, ex gutture, thorace, hepate prodire potest: cùm verò plurimum spumat, è pulmonis vasis effunditur: cùm totus spuma est, ex visceris carne cuius induit similitudinem. Est enim pulmo veluti coagulata spuma.

Prosper Martianus in Comm. ad versum 197, Lib. II, sect. 3, Hipp. de morbis, ipsum parenchyma pulmonis hydropicum

fieri agnoscit, suamque lympham in cavaum thoracis transfusando, gignere pectoris hydrope; ita tamen, ut una consistere sic possit & pulmonis, & pectoris hydrops. Cæterum, inter numerosissimas apud *Bonnetum* historias, vix unam quæ ad scopum hunc nostrum faciat, reperimus.

Carolus Piso, saeculi XVII inchoantis celeberrimus autor, morbum novit, descripsit, curamque adjecit, breviter quidem, ast lucide satis, *Libr. de morbis ex coll. ser. natis, sect. III. Cap. VI.*

Eo ipso senescente saeculo, *Thomas Willis*, cum *Lowero* suo, clarus & insignis, morbum dilucidè apud *Anglos* novit, descripsit, in decursu prosecutus est, & suam curandi methodum evulgavit. *Pharm. rat. Part. II, sect. I. cap. 6.*

Ill. Baro van Swieten, in *Comm. ad §. 1220 Boerhaavii*, nobis ex *Ruischio*, *Albertino*, *Simsone* & *Maloëtio* nonnulla refert, quæ ad verum pulmonis hydrope pertinere videntur: haud tamen sic, ut cadaverum sectione demonstraverint hi autores morbum: *Ruischius* enim non loquitur, nisi de pulmonis cellulostate aëre turgidâ: *Simson* verò fatetur rariùs hydrope pulmonis in cadaveribus inveniri, partim quia facilius curationem recipit, partim quia hydrops pul-

monis pertinacior facilè , ruptâ tali *vo-*
micâ aquosâ pulmonis, in hydrope abeat
 thoracis. An igitur *Simson* directè de
 nostro morbo egit? & non potius de cystico
 tumore aquoso in pulmone ? Tandem
 doctissimus *Maloët* in totâ suâ differen-
 tiatione ne meminit quidem *hydropis pul-*
monis, sed unicè modo saccorum duo-
 rum, plenorū sero, hydatidum in mo-
 rem, qualem & jecur in eodem corpore
 gerebat. Hydatidas atque pulmonum hy-
 dropicos saccos, in laudato aphorismo
Boerhaavii Ill. Baro recensuit: ipsam pul-
 monis fabricam cellulosam lymphâ re-
 pleri, hancque vel in cavum tracheæ ali-
 quandò transprimi feliciter posse, vel in-
 fortunatè in cavum depluere thoracis,
 utrique admiserunt *Boerhaavius*, & *Swie-*
niius; ex professo verò de eodem ne-
 que hi, neque quos laudarunt autores
 egerunt, ut de *hydrope pectoris*, *ventris*,
scroti, &c. egerant.

§. II. Ex omnibus igitur liquet paucos
 extitisse summorum medicorum, qui ex
 anatome morbum noverint; ut certò
 videantur vel oscitanter præteriisse eum-
 dem, vel crebritate observationum pul-
 moni naturalem credidisse quâ exunda-
 ret lympham. Profectò quisquis cum
Morgagnianis observatis mea conjunxe-

rit, minimè rarum esse morbum intelliget, mirabiturque proinde nullibi ferè eundem ex professo tradi, per signa indicari sua, vel suâ diagnosi, prognosi, atque curatione exponi. Per pauci enim ipsum nomen recensuerunt; qui que recensuerunt, ut *Hipp. Gal.* cæterique, aut intellexere eo nomine thoracis hydrozem, aut sive in pulmonum superficie extantes, sive vomicæ in modum in ipsâ pulmonum substantiâ locatas hydatidas, quæ, more vomicarum, vel in aërea pulmonum vasa, vel dorso in cavum exonerare se pectoris possint: si que forsan pulmones in totâ suâ cellulositate posse hydropicos fieri existimarent, ut *Piso*, *Albertinus*, *Simsonus*, &c. id sanè nullâ demonstratione, sed merâ conjecturâ ex quibusdam symptomatibus protulerunt. Si enim cum incipiente partium externalium œdemate difficilior reddetur respiratio, ut *Albertinus*; vel si aut vultus, aut malleolorum tumorem respiratio anhela, vixque tangibilis præ suppressione pulsus concomitaret, ut *Simsonus*; vel si post prægressum aquæ quam plurimum potum, homo respiratione laboraret, cum signorum cujuscumque pulmonum morbi absentia, ut *C. Piso*: hydrozem verum pulmonis adesse conjecta-

runt, cadaverum autem inspectione nunquam probaverunt. In quo igitur illi defecerunt, nos peculiariter in hoc capite versemur oportet, ut morbi natura curaque patescat.

§. III. Hinc quæ alii, quæ nos, in vitâ eorum quos pulmones hydropicos à morte invenimus peculiariter notavimus, hîc recensebo. *Em. Card. Barbadicus* catarrhosus in vitâ fuerat, & catarrhosâ febre epidemicâ perierat. *Vide Cap. II, sect. IV.* Et in cancroso, & in hernioso inventus sic pulmo fuit; vita anteacta cæterùm non additur. *ibid. Mulier* autem cui spumosus à morte pulmo, magnas anxietates passa erat, multamque expuerat spumosam ac sanguine tintam materiem. *ibid. Ebrii hominis* vita anteacta non memoratur. *ibid. Figuli* historia non additur, nisi quod strenuus potor esset. *ibid. Ancillæ, minus a tribus menstruis menstruanti*, & a capto frigore in pleuro-peripneumoniam illapsæ, in morbo hoc ex ore effluebat humor aquæ instar spumosæ, in quâ caro recens lota sit. *ibid. Vir intemperantis vitæ* magnas passus fuerat in respiratione anxietates, palpitationes cordis, & corporis œdema. *ibid. Lotrix* à sexennio spirandi difficultate, quæ asthmatis convulsivi speciem habe-

bat, sæpè Nosocomium consilium cap-
tura, venerat, & eodem morbo ibi mo-
riebatur tandem. *ibid.* Pleuritici historia
non additur. *ibid.* Sed adolescentulus ul-
trà tres menses difficulter spiraverat. Hæc
de ægris quorum pulmones spumâ sca-
tentes invenit *Morgagnus*: jam de nostris.

Noster rude donatus miles *Cap. II*, *sect.*
III, multis ab annis tussi, sputorumque
tenuium excretione laboraverat, inque
lethali suo morbo unicum aderat a sputis
tenuibus spumofisque levamen. *Studiosus*
a sex annis tussi, anxietate, lateris finis-
tri dolore, febre variâ, corrhyzâ, catar-
rho frequenter laboraverat, suâque in
lethali pleuro-peripneumoniâ pauca qui-
dem, sed tenuia ac spumosa, modico
subindè muco mista sputis reddidit. *Re-
verendus sacerdos* ab annis 20 catarrho fre-
quenti vixerat obnoxius, sudandoque fre-
quenter malum mitigaverat. *Belli dux*
præter cordis palpitationem, a quatuor
retrò annis multâ vexatus tussi fuerat. *Sal-
tator noster* se sæpè vehementer eo exer-
citio, in quo peritus artifex audiebat, se
defatigaverat, & catarrho non rarò labo-
raverat. *Febre ardente* in nostro *Nosoco-*
mio defundus ter in vitâ pleuritide de-
cubuerat, antè quadriennium ultimâ. Sed
& antè biennium scabiem unguento re-

pulerat, & consuetam venæ sectionem
hoc anno præterierat.

Et ut tandem de aliis suprà laudatis
viris aliquid dicamus, quamvis suprà
jam nonnulla retuli, egregius *Piso sect.*
III, Cap. VI, pag. 235, ex frequenti
aquæ gelidæ, præprimis autem exæs-
tuante corpore, potu, *adolescentulum sco-*
lasticum in hydropem verum pulmonis
incidisse judicabat, *cùm ex illâ gelidæ po-*
tandæ consuetudine duos ante menses spi-
randi difficultatem pati cepisset, quæ sensim
increbrescens æqualiter sine febre, & sine
tussi orthopnœicâ & stertorosâ quodam
modo videtur jam fieri: nam non nisi cum
alto anhelitu & gravi spirare videtur,
imò auditur, & decumbit semper cum gravi
stertore: ac tametsi corpus exercere potest, a
labore tamen quolibet non mediocriter af-
fectus augescit.

In Inst. Bonon. Tom. I, Albertinus œ-
dematis pulmonis diagnosin formavit,
quando unâ cum œdemate partium ex-
ternalarum statim adsit difficilis respiratio.
Simsonus, Act. Edimb. Tom. V, Part. 2,
œdema seu hydropem pulmonis suspi-
cabatur, si vel vultus, vel circâ mal-
leolos pedes intumescerent, cum respi-
ratione difficiili, pulsuque præ suppres-
sione vix tangibili.

Maloët, Acad. S. R. P. anno 1732, vomicas aquosas in cadavere duas, uncias sex pellucidæ lymphæ continentes invenit, in singulo pulmone singulam. Homo miles fuerat, magnâ difficultate respirandi laborans, cum febre lentâ, nec in dorsum, nec in alterutrum latus cubare valens, præ molestiâ tunc perceptâ pectoris, undè erectus passim esse cogebatur: brachia & manus, cruraque ac pedes obsidebat œdema. Signa hæc multùm convenient cum iis quæ narrantur esse pulmonis in suâ cellulari substantiâ verè hydropici, ut in *Morgagni nostrisque experimentis.*

Targioni Tozzetti Racc. primâ, p. 83, conjecturas habuit præsentis hujus mali ex consimilibus symptomatibus, & ab excretis aliquot libris materiae similis ovi albumini; at vero cum unus a morte examinatus anatomicè non fuit, alter convaluit, uterque homo *Tozzetti* non demonstrationem hydropis aut *cystidis* pulmonis, ut in casu *Maloëtii*, aut *cellularis*, ut in nostris, sed meram conjecturam reliquit.

§. IV. Igitur catarrhosa dispositio diurna, vel sine tumore œdematoso, sive faciei, sive inferiorum crurum, sive corporis ferè universi, vel cum tumore

earumdem partium ; respirandi anxietates validæ , cum spumosâ materie , sanguinis leves notas gerente , sputando ejectâ ; spiritu abundantes potus prægressi ; mensum insolita paucitas ; vitæ intemperantia , quæ respirandi anxietates , cordis palpitationes , & corporis œdema genuerat ; dyspnæa frequens , ac convulsivum asthma simulans , idque demùm lethale ; dyspnæa trium mensum ; annosa tussis cum copiosâ muci spumosi per sputum excretione ; diuturna tussis cum frequenti & anxietate , & dextri thoracis lateris dolore , frequentique febre , catarro , corrhyzâ ; catarrhosa 20 annorum dispositio , quæ annuâ sudorum curatione levati solebat ; tussis multa atque annosa , cum palpitatione cordis ; prægressi inflammatorii pectoris morbi ; retropulsa scabies , &c. hæc ea signa sunt quæ & nos , & alii qui morbi causam non conjectando , sed inspecto cadavere percepi- mus , in vitâ prægressa esse observavimus : reliquorum autem scriptorum , qui ex semel iterumque aquosâ pulmonis vomicâ inventâ , eam postmodum adesse suspicati sunt , signa morbi haud absimilia deprehenduntur iis quæ hucusque recensui- mus.

Et sanè similem casum , quo hæc

nunc tempore scribo, Nosocomium habet.

Mulier ægrarum nostrarum ministra-trix, 28 ann. nupta quidem, sed nun-quam adhuc gravida, cùm a decem re-trò annis pessimâ intermittente febre, eâ-que diuturnâ curata esset, longo tempore comatosa fuit, expergefacienda ut come-deret, mox a pastu iterùm soporosa. Post trium septimanarum spatiū hoc coma cessit universi corporis oedemati: hocque iterùm cephalalgiæ intolerabili, quæ de-mùn curabatur copiosæ materiae flavo-viridis per nares auresque profluvio; ita tamen, ut posthac æquè æstate quam hye-me perpetuò repetentibus, ut vocant, catarrhis obnoxia hucusque vixerit; pau-ca sputa tenuia, mucosa, sanguine subin-dè tincta reddens, cum pectoris ardore, & non infrequentí dolore.

Ineunte Decembri ann. 1772 ejus-modi catarrhum habens, hunc reticuit 14 dierum spatio, munus suum perficiens, suum modo solitum se pati catarrhum cæteris Nosocomii domesticis asse-rebat. Jam verò febris, tussis, anxietas, sputa admodùm cruenta, pulsus suppres-sus, cephalalgia, viriumque defectus tan-tus, ut se mihi sisteret, atque ego illicò libram medicam sanguinis ipsi detrahe-

rem, cuius sanguinis tertium vasculum albam gessit densamque crustam. Porro in corpore hoc phlegmatico, tam fera fuit inflammatio pleuro-peripneumonica, ut plethoricæ instar tractanda fuerit; & ut post quater iteratam venæ sectionem, sputis paucis, iisque aquosis, spumosis, mucosis, ac subinde suppurulentis, alvo per omne morbi tempus crassæ pultis instar, & quotidianâ, sternutatione frequenti per plures dies, & urinis fabulum passim fistentibus, mensis circiter spatio sic de hoc morbo convaluerit, ut primùm major minorvæ & tuñis & anxietas, redeunq[ue] sæpè corporis œdema, eam leviter afficerint, licet ancillare obiret quotidiè munus, & ut tandem ferè omnia symptomata desierint. Hæc profectò signa habet pulmonis hydropis multa, quorum laudati autores meminerunt, eaque jam tot retrò ab annis hucusque. Serosa colluvies post febrem, coma primùm, succedens comati œdema, sufficta œdemati cephalalgia, & cephalagiæ crisis pro parte duntaxat per aures naresque facta, pulmonis œdema, seu hydropeim genuit. Imò ne curata quidem sic cephalalgia per illam crism fuit, quin cephale in modum sæpius affligat fœminam, & vesicante ad nucham admoto conticescere soleat. Mor-

bum hunc bono regimine, moderato motu, auxiliis, expectorando, urinam, alvum ac diaphoresim promovendo agentibus, serosa hæc colluvies verno hoc tempore sic emendata est, ut respiratio bona sit, ni se nimio exercuerit motu, tussis rarefcat, corporis ac vultus præsertim œdema exulet; jamque diathesis serosa ne redeat, ferratis annisi aquis fortunatissimè progredimur.

§. V. Curationem morbi ex laudato mox *Carolo Pisone* petitam huic mulieri adhibui. Quippè ex eodem, elapsis ab hinc fermè quadraginta annis, morbi pectoram notitiam; atque in omnibus serosis capitis, pectoris, ventris, articulorumque morbis illum consulens, opem haud planè mediocrem in *morbis istiusmodi cognoscendis & curandis* me tulisse fateor: undè & auditoribus meis inter principes praticos laudare *Pisonem* soleo. Ne verò idem repetam, & *Pisonis*, & memoratorum autorum omnium curandi leges sic sunt, quemadmodùm mox in §. IV exemplo ostendi: modò aliqua adjungantur, quæ Nosocomium conditio passim vetat, ut aër serenus ac siccus, vel aromaticorum fumo talis, vel potius locatâ in montanis habitatione; sicca cùm lecti stragula, linteaminaque, tūm

corporis indumenta; equitatio, motusque omnis quo respiratio libera sit ac larga; victus siccus; parcus, isque roborans potus, &c.

Cura hæc multum differt ab eâ quæ cæteris pectoris obstructionibus, phthisin minantibus, adhiberi solet: undè plurimum confert hujus morbi signa & singula, & omnia accuratè adnotasse, ne aliena medicina, alieno in casu noxia, alieno adhibeatur morbo.

CAPUT IV.

DE DÆMONIACIS.

§. I. *Ratio hujus dissertationis.* §. II.
Historia fæminæ a dæmone 18 annorum
spatio obsessæ habita, quam fictam No-
socomium deprehendit. §. III. *Notabilis*
impostura similis ex historiographis gal-
lis, multum illustrans hoc negotium.
 §. IV. *Phænomena quæ adesse iis dicun-*
tur, quos obsidet dæmon. §. V. *Diffi-*
cultas ea verane an ficta sint dignoscen-
di? Alia vident hic qui mente præoccu-
pati, alia qui non. Ficti morbi multum
faciunt ad fictas obsessiones diaboli in-
terstinguendas. Methodus num fictæ eæ-

*dem sint an falsæ internoscendi. §. VI.
Quid propriæ de obsessione dæmonum sta-
tuendum sit. Solutio difficultatis forma-
tæ ex sanâ corporis post insultum con-
stitutione. Solutio quarumdam quæstio-
num.*

§. I. INGRATAM planè rem, tædiosamque eamdem ac planè erubescendam, iteratò tractare compellor, quantumcunque hanc *Tomo V* *hujus mei anni operis* abundè tractasse mihi visus sim. *Dæmoniacos* volo, quos *credula gens* multos existere censet, cujusque credulitatem ii, heu nimium! firmant augentque, quorum fuisset antequam suum officium periclitarentur, aut per se, aut per aptos operi viros inquirere, utrum vera dæmonis obsessio foret, an verò aut morbus qui, post maturum examen, nihil videretur præternaturale habere, aut demùm ars merè præstigiatrix esset. Cùm dedecori & ecclesiæ fit, & reipublicæ ludibrio toties a vaferrimis hominibus exponi, mearum partium esse duxi ad hanc rem illustrandam operam omnem navare, in quâ utrum temerarius habendus sim, an bonus ecclesiæ reique publicæ civis, veri, & æqui, religiosique censores dijudicabunt.

§. II. Porrò ut ordine hæc pertracta-

tio ducatur, enarranda historia erit quæ fundamentum jaciat dicendorum. Mulier 41 annor. futoris in agro *Linziano* uxor, ab annis retrò 18 elapsis diabolo obsessa dicta fuit, sic ut primis tribus annis ratiūs, posterioribus quindecim verò neque vel unicum diem noctemque diabolus illam tranquillam reliquisset; ita ut de hâc re nullum videretur dubium superesse ecclesiasticis viris, pietate doctrinâque conspicuis, id sanctè testantibus.

Verno hoc tempore futor viam diu quæsitam demùm invenit, libellum supplicem in AUGUSTISSIMÆ NOSTRÆ IMPERATRICIS ac REGINÆ manus tradendi, quo ejus ergà se, quem & pauperies & obsessa a dæmone uxor dirè premerent, misericordiam benevolentiamque excitaret. His intellectis, AUGUSTÆ nota singulis sagacitas verique amor èo ejus animum impulerunt, ut juberet hanc feminam *Linzio Viennam* transferri, meoque in Nosocomio examinandam sisti. Nosocomium inferebatur 5 Junii proximè elapsi. Tres quatuorve horis quotidiè cum illâ occupatus, testis loquar autoptes; quæ me absente contigere, ex diario Nosocomii exactissimo suppleturus.

Mox illata in Nosocomium maledixit benignissimo SERVATORI, AUGUS-

TISSIMÆ , iisque qui eam *Viennam* duxerant. Reposita in lectum horrendè contorquere se cepit , oculos rotare in omnem partem , ut plerumque nihil nisi eorum album , sed perpetuò motum convulsumque appareret. Omnes faciei musculi modum in omnem conveltebantur. Collum novit ita & in humeros , & præcipue in dorsum flectere , ut simile videbim nunquam. Interea vociferabatur , cantilenas cantabat , aut germanicas , aut incondito sermone non intelligibiles , quasi exoticam linguam æmulari conata. Ad hæc cepit corpus in semicirculum agere , caput ad pedes lecto figens , ventrem in altum : mox extendere fese , & altitudine aut pedis , aut sesquipedis totum corpus in sublime conjicere , idque haud minus celeriter quam frequenter ; forte vigesies , trigesies , & sæpius , sine interpositâ quiete. Post momentum quietis , idem repetivit , moxque demùm imprecations in DEUM , in AUGUSTISSIMUM , in maritum , & hoc modo ultrà horam continuavit.

Interea temporis & rosarium & sanctam crucem in manu habens , ter in terram indignabunda projecit , terque redditam osculata , amplexaque est , imò veniam a DEO rogavit , moxque illi iterum male-

dixit, monens nos prius se, mox iterum
in se diabolum loqui.

Has, & plures aut alias, aut mutatas
hinc indè gesticulationes edidit, pulsu ac
respiratione semper post agitationes sum-
mè naturalibus.

In mediâ interquiete sic fuit, ut mente
ac corpore sanissimam illam dixisses, &
vitam suam totam non planè laudabilem
narrabat, & quæ a diabolo jam 18 annis
patiebatur, quamque ardenter sæpè à
DEO petiisset, ut se à tanto hoste libe-
raret: in mediâ ejusmodi confabulatione,
suas convulsiones imprecationsque re-
petebat.

In prandio ac cœnâ comedit benè,
quamvis à diabolo deglutitionem sibi
impediri diceret. Ab opii grano sex ho-
ris tam benè dormivit, ut ronchus audire-
tur. Expergefit; rosarium aliasque preces
flexis genubus orat. His absolutis, paro-
xyſmum repetit, maledicit DEO, ve-
niāque ab illo petit; communicat
demūm confidenter cum custodibus &
assistantibus, diabolum mox sibi pro suâ
cum illâ familiaritate inter alia sua arca-
na id revelasse, quòd professorem No-
focomii hodiè lubentissimè interimere
vellet.

Interea advenio, audio quæ gesta
erant,

erant, repetentis convulsionis spectator sum, jamque fuci per omnia gnarus, experimentum *Tomi V*, pag. 305 instituo, dæmonem fugo, & quæ quindecim annorum spatio ne unicam quidem diem noctemve se ab insultu diabolico liberam fuisse testata erat, jam ab horâ nonâ matutinâ diem hanc, & alteram & tertiam transegit tranquillè, rationabiliter, devotè; fœmineum manibus laborem ad fallendum tempus exercuit, comedit optimè, & colicam semel conquesta, ab enemate benè habuit.

Ad finem hujus lucidi intervalli familiariter blandèque cum illâ confabulans, conatus sum in eam convincere quòd non esset a diabolo obsessa, cùm vidisset per auxilia nostra totum malum cessare; quod si diabolo autore natum esset, minimè cessaturum fuisset: hoc cùm ægrè admitteret, dixi se melius convictum iri de hâc meâ assertione, dùm, malo fortè adhuc redeunte, auxilium idem adhiberetur.

Hæc minimè placuerunt: undè post mediam noctem leviter affici malo suo cepit: audiens verò curam priorem repetendam mox fore, tranquilla in horam sextam fuit: tunc verò gesticulationes iteravit, ex lecto profiliit, capiti innixa in pavimentum totum corpus in anteriora,

ut pueri solent, projecit, lateraliterque se per cubiculum circumvolvit, viam ad me, remotius stantem, volvendo affec-
tans, veluti me, si perstisset, in ter-
ram projectura. Blando meo hucusque
habito cum illâ sermone in serium minan-
temque verso, composuit se, & exinde
toto quo apud nos adhuc fuit biduo,
nihil ultrà contrà decus, contrà rationem
sanam, contrà bonos mores gessit. Re-
rum actarum gnara AUGUSTISSIMA,
ne consuetæ meæ ægrorum demonstratio-
nes in Nosocomio turbarentur, eam ad
Nosocomium sandi Marci duci jussit: in
quo recusavit primò suæ vafritiei rationem
causamque fateri; tenuissimo demùm vic-
tu, cæterùm sana & summi appetitûs fœ-
mina, demùm coacta, confessa est se ob-
sessam simulasse, cùm ut maritum vexare
perpetuò posset, tùm ut sibi eleemosy-
nas corraderet; artificium autem hoc à
militis uxore se didicisse.

§. III. Priusquam autem hanc histo-
riam absolvam, opere pretium duxi hīc
singularem quamdam historiam intermis-
cere, quam mutuavi ex duobus scriptori-
bus politicis summæ fidei, existimatio-
nisque, Historiographis ac Galliæ orna-
mentis, *Thuano & Mezeræo*. Compendio
traditurus, remitto eos quibus omnia le-

gere volupe fit, ad *Mezeræi Tomum III,*
pag. 1224, edit. Paris. anni 1683, &
ad Thuanum Tom. V, ad annum 1599,
a pag. 869, per sex septemve sequentes.
Hæc historia nostram illustrabit, multam-
que in curando monstrabit paritatem.

Jacobus Brofferius, pannificii sui rustici-
 que laboris pertæsus, circulatoriam vitam
 prætulit, atque cum tribus filiabus, quarum
Martha a dæmone obsessa dicebatur, va-
 gabundè varias urbes adivit, ut suam
 cum filiâ *Marthâ* comœdiam luderet.
 Cùm veram obsessionem esse judicarent
 multi sacerdotum, exorcisarunt quidem
 dæmonem, sed illa exorcismos elusit om-
 nes. Fraude *Aureliæ* ab Ecclesiâ detec-
 tâ, aliorsùm aberrandum erat, ut bellè
 continuaretur. Itum ergo *Andegavum* fuit.
Carolus Miro, reverendiss. urbis antif-
 tes, fictane an vera res esset, modis ex-
 plorare variis contendit. Dùm ad aquam
 cui benedictum est diabolus immaniter
 ferocire visus est, ad aquam verò com-
 munem minimè, permutatâ, ipsâ inficiâ,
 aquâ, ad communem fremuit, ad sacram
 minimè. Exorcismorum librum jubenti
 afferre altâ voce episcopo, dùm clàm
 profanum quemdam librum tradi curasset,
 affertur *Virgilii Æneidas*: magno tunc ap-
 paratu, veluti exorcizaturus, legit: *Arma*

E ij

virumque cano, qui Trojæ primus ab oris, &c.; & mox furorem immanem & horrendas convulsiones Martha finxit. Unde patrem & filiam vehementer corripuit prælatus, & domicilium antiquum laboremque repetere jussit.

Cùm salutare hoc consilium scelestissimus his hominibus displiceret, *Parisiis*, urbe populosissimâ, se majorem fidem habituros arbitrati, mox illuc appulerunt, & ad sanctæ Genovefæ templum primam scenam luserunt, eâque cum arte, ut plebs & potissimum rev. patres Capucini, quos inter pater Seraphinus eminebat, *Martham* a diabolo indubitatò obsessam esse asseverarent. At verò eminentiss. card. *Gondius*, *Parisinorum episcopus*, examinandum fœminam quinque celebrioribus medicis tradidit; *Michaeli Marescotto*, *Nicolao Ellanio*, *Joanni Altino*, *Joanni Rio-lano*, & *Ludovico Dureto*. Cùm neque latinè, neque græcè interrogata quidquam intelligeret, sed gallicè modò, responderunt medici nihil a spiritu, multa ficta, pauca a morbo esse.

Postridiè Duretus, cum Ellanio, infixâ inter pollicem & indicem acu, an sensu doloris tangeretur, tentare voluit: cùm ad ictum non tremisceret, ille & Ellanius, petunt collegas advocari, & in crastinum rem differri.

DE DÆMONIACIS. CAP. IV. 101

Igitur Kalend. Aprilibus magnâ omnium expectatione a Seraphino Patre exorcismi repetuntur; ad quos Martha oculos rotans, linguâ exsertâ, & contortis membris ac toto corpore exhorrescebat: tûm ad hæc verba, ET HOMO FACTUS EST, supinâ desultatione veluti exossato corpore fluctuans, ab altari ad valvas facelli, in quo erant, erepsit. Quâ re perculsis adstantibus, Pater Saraphinus commotior exclamavit: Si quis sit adhuc incredulus, hîc spiritum intûs agentem sistat, & vitæ periculo cum eo luctetur. At Marescottus nihil nisi fictum videns, & imposturam non ferens, ego verò, inquit, periculum in me recipiam: spiritus, si potest, me validior ferat! quibus dictis, statim contrâ obluctanti manus in cervicem injicit, eamque consistere jubet. Illa ubi se captam vidit, cum se amplius commovere non posset, ut imposturam tegeret, spiritum abiisse, seque reliquisse respondit.

Multo dein sermone Thuanus refert, agitatum negotium & inter hosce Medicos fuisse, & inter quinque alias qui prioribus suspecti erant, præcipue quia contrario experimento Martha nunc quibusdam visa erat anglicè latinèque loqui; quos tamen omnes refutabat egregiè Marescottus. Vide pag. 869, 870, 871.

Interim *Henricus IV*, metuens ne fortè hæc præstigiatrix adhiberetur ad tumultus contrà recens *Nannetense Edictum* concitandos, rem supremo *Parisiensi Senatui* dijudicandam tradidit. Exactè *Martham* esse 40 dierum spatio observandam Senatus edixit, serioque a præcipuis urbis Medicis examinandam: *hi verò nihil præternaturale subesse testati sunt*. Hinc senatus tumultum metuens, eoque propriorem, quò templorum suggesta de violatis ecclesiæ privilegiis, hæreticorumque prædominante consilio fortius resonarent, hanc errabundam familiam suum in domicilium remisit, patri pœnâ corporali, ut vocant, indictâ, si *Martham* egredi domo, citrà loci judicis veniam, fineret.

At verò necdum finita res fuit. Vir nobiliss. ac rev. *Alexander Rupifulcaudius*, *sandi Martini abbas*, frater hujus nominis cardinalis, & *Claromontii episcopi*, fortè a fratre instigatus, *Martham Avignonum* primùm, deindè *Romam* duxit, spe fore ut autoritate *Patrum Societatis* hæc fœmina contra gallorum episcoporum, & præcipue contrà sæcularis potestatis sententiam, verè dæmoniaca pronunciaretur. At verò & *res societatis*, carâ suâ de *Gallia* pulsæ, postulavit ne huic negotio se immisceret, quò facilius

Rex in ejus reditum commoveretur; & summus Pontifex, ejusdem imposturæ jam gnarus, omne tentamen suppressit: miserandus abbas autem, exploso toto negotio, ludibrio habitus, veniam à Rege petivit, non obtinuit, breviique confectus inœrore interiit: *Martha* paterque, Xenodochiorum stipe miserè vixere, ac perire.

§. IV. Ex his duabus historiis, eorumque libris qui hanc quæstionem tractârunt, apparet dæmoniacis adscribi 1º horrendas, insuetas ac præternaturales convulsiones, contorsiones, corporis in sublime projectiones, rotationes, convolutiones. 2º Clamores, ejulatus, boatus, balatus, latratus, mugitus, cantus. 3º Linguæ græcæ, hebraicæ, arabicæ, latinæ, canticarumque Europæ nationum, aut enunciationem, aut saltem dum quis eos exotericâ lingua alloquitur, eum ejus intellectum, ut suo patro sermone aptè respondeant ad ejusmodi interrogata. 4º In suis agitationibus cursibusque a nemine posse, citrà summum vitæ discriminem, fisti. 5º Diras imprecari eos Deo, beatæ Virgini, Angelis, cunctisque Sanctis. 6º Furorem summum ad lectionem divinarum rerum, ad auditum Dei, Sanctorum, rerumque

sacrarum nomen vel applicationem, ad exorcismos, &c.

In Gallicâ Marthâ Broffier, & in Austriacâ nostrâ Annâ Mariâ, videmus omnia hæc, verè personata contigisse, ac benè illas fuisse de agendis instructas. Optimum quidem nostrum Ludovicum Duretum duo morabantur, ne imposturam fateretur; indolentia ad puncturam, & rumor de notitie anglicæ ac latinæ linguae, non a se quidem observata, sed ab aliis enarrata; at verò primò nos in nostris fictis dæmoniacis hanc indolentiam plus semel observavimus: ad hanc simulandam obduratus in malitiâ animus eas aptat. Si quis dubitet, videat Tom. V. Rat. Med. pag. 302 & 303, quo pacto scelestissima mulier ter sustinuerit profundam inustionem Chirurgi, indolentiam simulans, ne quâ victum quæreret epi-lepsiam, falsi argueretur. Secundò, Dureto examinandi donum linguarum defuerat, hoc dono Martham donatam esse alii negavere, alii affirmârunt. Novimus abundè quām ingeniosa sæpè rerum fictrix sit mens humana, præsertim si est præoccupata. Qui Linzio Viennam nostram Annam Mariam duxerunt, per omnia sacra testari volunt eam in itinere convulsam,

ac sanctæ Crucis imaginem in humum indignè projicientem, a transeunte sacerdote latinè jussam fuisse a terrâ hanc levaret, osculareturque, & mox executam mandatum fuisse. Nos similia testari potuissimus, si non egissimus pensitatiùs. Verùm per multa latinè apud ipsam dicta, certi eramus ignotam illi hanc lingam esse; deindè intrà horam contigit, ut ter a se se sanctæ crucis projecterit imaginem, terque repositam in lectum osculata amplexaque fuerit; semel vidi non ab eâ projectam Crucem, sed ad latus positam, brevi in manibus sumptam, habitamque honorifice fuisse. Porrò si inter sanctæ Crucis projectionem & amplexum, quis nostrum num latinè aut græcè calleret, his linguis explorasset, hæcque protinus jussa hæc exequi visa fuisset, anne verisimilitudinem nostra affirmatio habuisset de linguarum dono? Jam verò, quod ter apud nos non jussa fecit, ostendit fœminam latini sermonis ignaram sic in itinere fecisse, uti non jussa pluries in nostro Nosocomio fecit.

Sed multos stupendæ corporis contortiones movent, corporis in altum projectiones, horrendæque convulsiones enarratæ, quas solâ malitiâ non posse peragri existimant. Respondeo his hæc nobis ideo

præternaturalia non videri, eò quòd patria illis in variis epilepticis & catalepticis, non fietis conspexerimus: deinde omnia hæc mirifica symptomata & in iis quorum *Tomo V*, *Cap. IV*, memini, apparuisse, qui tamen totam rem se finxisse, & convicti, & fassi sunt.

§. V. Ex datis historiis hisce, ex libris de hâc re agentibus, & ex nostris *Tomo V*, *Cap. IV*, descriptis observatis, constat varias methodos quibus fucusne an sinceritas innotescat, adhiberi solere. Imitatione reverendissimi *Andegavensis* episcopi, experimentum aquæ sacræ, & profanæ lectionis pro sacrâ, feliciter imitati sumus: puncturas, vellicationes, ignes, efficaces sæpè, non perpetuò, licet summa impostura esset, deprehendimus. Linguas nunquam calluerunt; sed ferax imaginatio harum defectum supplevit, ut mox patuit; undè hoc tentamen ritè captum semper irritum est. Si resisti iis sine vitæ dispendio non possit, & nostra, & parisina, & omnes mei priores dæmoniaci imposturam ostenderunt.

Restiti eis currere volentibus, ut confisterent, & meo jussu jacerent sedentque. Hanc *Annam Mariam* in medio brachiorum suorum violento motu composui, ut non moveret se, imò in ulti-

mo paroxysmo omnem motum minis protinus sufflaminavi.

Imposturam prætereà aliud demonstrabat. Dùm in molli lecto jacens , ac linteamine straguloque tecta , corpus in pedis ac sesquipedis altitudinem projiciebat , corporis opercula casum per latera minabantur. Pudor ne denudaretur effecit , ut ter in unico paroxysmo opercula in corpus adaptaret , eisque verum daret , ne caderent , æquilibrium.

Experimentum , seu tentamen aquosum nunc memorabo. Et hanc fœminam , & alias , quarum toties jam laudato *Tom. V* memini , unico momento sic curavimus hoc tentamine , ut de paroxysmo ne gru quidem supererisset. Est cura commendatissima *Hippocrati* in *Tetani* specie. Sex , septem , octo in acie locati , & amphorâ frigidæ aquæ armati stant : mulieri convelli jam ceptæ , aliasve gesticulationes edendi , primus suam amphoram in vultum , nihil tale suspicanti , uno jactu , totam effundit. Terror ab insolitâ salutatione , horor frigore excitatus , conspicitus tot hominum vitris magnis amphorisve ad prosequendam affusionem adstantium , fistit paroxysmum parumper ; sed cum malitia omnium tanta soleat esse ut brevem post pausam gesticulationes re-

E vj

petant, omnes ordine suum officium prætant, ut unico tali experimento aliquando quinque sexve mensuras aquæ profundamus. Tunc resipuerunt omnes; indusum autem togaque madida mutantur, in calefactum lectum reponuntur bene tecti, ac calido jure carnium refocillantur, ne frigus corpora lædat.

Sic passim unicâ vice impostura detesta est, & planè suffocata; maximè si tunc a supremâ potestate minæ seriæ intententur condignæ pœnæ, si vel minimum deinceps advertatur malitiæ indicium. Fuit tamen quæ hoc tentamen secundò institutum fefellerit, & quidem hæc nostra fœmina; cuius nihilominus malitiam minæ intentatæ mox compescuerunt, & penitus suffocârunt.

In singulis nostris dæmoniacis dictis, ut & in fictis asthmaticis atque epilepticis, pulsum à paroxysmo ficto finiente vix mutatum deprehendimus a sanitate, & corporis universi vix læsas ullas functiones; interea dum in verâ epilepsiâ post paroxysmum debilis, inæqualis, multisque modis peccans soleat deprehendi, plurimumque per horas, diesve, miserabilis teneat corpora languor. *Parisiorum Medicorum* qui in causâ Marthæ a parte Ludovici Dureti summi viri stabant, ex bono

DE DÆMONIACIS. CAP. IV. 109

post paroxysmum pulsu, corporisque alacritate, verè dæmoniacam concludebant: *Marescotti* verò ex hisce contrarium oportere confici censebat, fretus autoritate evangelicâ; cùm *Marci Cap. IX* in curatione dæmoniaci legatur sic: *Et cùm videret JESUS concurrentem turbam, comminatus est spiritui immundo, dicens illi: Surde & mute spiritus, ego præcipio tibi exi ab eo, & amplius ne introeas in eum.* *Et exclamans, & multum discerpens eum exiit ab eo, & factus est sicut mortuus, ita ut multi dicerent: quia mortuus est. JESUS autem tenens manum ejus, elevavit eum, & surrexit.*

Neque ineptum hoc *Marescotti* argumentum est. Omnes illi personati homines exercent se paulatim in vafro suo artificio, in quo si principio turbetur non nihil ipsorum corporum œconomia, paulatim nihilominus assuefacti, gaudio sui in malitiâ profectûs, spe eam perficiundi, mundumque egregiè decipiundi, vix tandem a suis gesticulationibus aut defatigantur, aut anhelant. Dum nos fabrorum ferrareorum malleolos tollere, & aliquorū ferre passibus cogimur, jam anhelamus, & pulsum cum respiratione mutatum habemus; interea dum ipsi fabri malleum per horam elatis continuò brachiis agitan-

tes, vix mutati deprehendantur. Nolim verò regulam invariabilem facta a veris distinguendi hanc asserere; corpore enim debiliores, & maximè in imposturâ ad-discendâ tirones, aut ne fraus detegatur meticulosi, facile mutatos habere pulsus, mutatamque respirationem possunt. Cæterum *Marescotti* argumentum admittendum videtur, & crebrò nobis in mentitâ epilepsia, mentitoque asthmate, magno auxilio fuit.

§. VI. Candida hæc gestorum expofitio offendere neminem poterit, neque me de aliquo in religione errore reddere suspectum. Obsessos a diabolo homines multos fuisse, ex sacris Evangelii & Apostolorum Actibus, certus novi, multos quoque prioribus ecclesiæ sæculis, Santosque numerosissimos virtute dæmones ejiciendi claruisse. Tandem nullus dubito, quin hinc indè adhucdum tales habeantur. Hinc veneror preces, exorcismosque ecclesiæ, quibus illa utitur, singulâ vice, quâ sacram Baptismatis sacramentum cathe-cumenis infantibusque confert, & veris applicat energumenis. Est hæres illa sum-mæ benignissimi SERVATORIS nostri in dæmones potestatis: hanc ipsi ut sæpè prius, ita jamjam in cœlum adscensurus, ad mundi usque finem tradidit: *dæmones*

DE DÆMONIACIS. CAP. IV. 111

ejicient. Marci, Cap. 16. At verò hominum vafrorum malitia tanta est , ut & fingant se dæmone obsessos esse , & venerandas ecclesiæ ceremonias , venerandosque ecclesiæ ministros ludibrio expōnant. Hoc porrò prævertere , decus servare religionis sacratissimæ , sacrorumque ejus ministrorum , cujusque , ni fallor , Catholicæ suæ religionis splendorem amantis omnino est. Hæc sola me ratio compulit , ut a tot retrò annis ea mihi indicia compararem , quibus verane res , an ficta esset , probè interstinguerem : quo demùm modo & verè a dæmone obsessi ecclesiæ traderentur curæ , & imposturæ convincerentur personati. Neque rem video dedecentem Medicos esse , quod , cum officio teneantur fraudulentos fictosque morbos a veris discernere , idque reverà per certa tentamina prætent , eadem quoque tentamina in usum apud dæmoniacos vocent , ne scelestissimi homines DEUM religionemque vituperent. Profectò nullus video , quod ob id oporteat liceatve in Medicos stomachari. Si de autoritate ecclesiæ actum esse , quandò supremus Senatus , idque Medicorum operâ , causam *Marthæ Brosieriæ* dijudicabat , non minus ignari , quam fervidi Ecclesiastici clamitabant ,

profectò *Clemens VIII*, summus eo tempore pontifex, sic non censuit, etsi *Martiam* jam *Romæ* se sistentem, examini Ecclesiastico submittere potuisset. Attamen si viri reverendi, quos ob religionis cultum morumque sanctimoniam veneramur, hoc nostrum tentamen male ferant, lubenter id mittimus, illisque reddimus; modò cùm hasce regulas, tūm quas ipfis industria, usus, ac religionis amor, ultrà suggerent, accuratè patienterque in usum vocent. Nihil enim, nisi harum regularum neglectus, in causâ fuit, ut hæc mihi demandata provincia sit. Maximè optandum foret, ut ad sacras ædes, ad quas pia plebs convolare peregrinabunda consuevit, legionesque dæmoniacorum conduci undique solent, debita tentamina virti venerandi præmitterent; ne profanarent istiusmodi personati homines, neve ecclesiæ ministrorum imperitiam simplicitatemque falsè riderent, dum in miraculorum diariis postmodùm nefandum suum vident sacrari vaframentum.

Finem capiti impositurus, duas memorari quæstiones percipio, quæ quidem responsonem vix mererentur; eamdem tamen cum multorum animis altè irradiicatae videantur, omnino poscunt.

Prima eorum est, qui propter frequentes imposturas statuunt neque hodiè existere quos obsideat diabolus, neque olim extitisse: cunctas scilicet curas dæmoniacorum enarratas morborum quidem mirabilium, at verò præternaturale nihil habentium curationes fuisse, quam sententiam eruditis jam olim, maximè verò hoc tempore viris, operum mole notis, vehementer placere video.

Hos potrò primùm rogo an admittant revelationem, nec ne? Hanc si non admittant, eos plango, non negantes diabolicam obsessionem ratus, nisi quia suo materialismo infatuati. Pneumatologiam omnem rident. His mentem sanam apprecati, eos volumus, qui admittunt revelationem, eosdemque precor, ut depositâ præoccupatione, sacra Evangelia cuncta pervolvant diligenter, notamque ad illos affigant qui dæmoniacorum meminerunt locos: centenario plures ejusmodi notabunt, qui sincerè, neque præoccupatè considerati, non permittent unquam illis, ut ad non præternaturales morbos has referant dæmoniacorum historias. Videbunt dæmones id effatos, quod homines, quos obsidebant, ignorabant. In principio certè ignorabat israelitica gens JESUM, & MESSIAM esse, & DEI

FILIUM; utrumque diaboli homines ob-
sidentes, ultrò fatebantur. Ubique cura-
tiones morborum ab illis dæmoniacorum
distinguuntur, distinctèque enarrantur.
Quin & in gloriam suam intraturus SER-
VATOR, in ultimo suo ad Apostolos
Discipulosque sermone, *Marcii*, 16 cap.
Signa autem eos, inquit, *qui crediderint*,
hæc sequentur: in nomine meo dæmonia
ejicient, linguis loquentur novis, & si
mortiferum quid biberint, non eis nocebit:
super ægros manus imponent, & benè ha-
bebunt. Apostolorum igitur, eorumque
qui ipsis prædicantibus fidem amplexuri
erant, distincta potestas fuit in res dis-
tinctas; quæ potestas & hîc, & in totâ
evangelicâ SERVATORIS historiâ, tam
distinctè separatur, ut qui voluerit præ-
fractè negare, & morbos curare, & dæ-
monem expellere, res diversas esse, af-
firmare necessariò quoque debeat donum
linguarum, venenique immunitatem, ne-
que a curatione ægrorum, neque a dia-
boli expulsione quid separatum esse, licet
hic quadruplex, eaque distinctissima in-
ter se potestas promitti videatur; quo
quid dici absurdius possit? Dolendum
profectò in pyrrhonico hoc sæculo &
plurimam gentis eruditæ, revelationem
credentis turbam in absconam hanc opi-

nionem abire , & vel hâc ipsâ se doctio-
rem , se factorum librorum intelligentio-
rem esse opinari.

Quæstio altera eorum erat qui miren-
tur id nunc asseri , quod quantumcunque
olim frequens diaboli obsessio fuisset , ea
tamen nunc inter rariora ponatur : dùm
intereà illi minimè causam capiant , cur
rarum hoc nunc foret , quod frequens
olim : hominum nunc eamdem quam
olim conditionem esse , eamdeinque dia-
bolorum & malitiam & potestatem : vi-
deri proindè sibi & præproperum nimis
esse hoc de raritate obsessionis dæmonia-
cæ assertum , & quæ ad imposturam de-
tegendarum ex hâc assertione laudantur
temeraria.

Hos primùm rogatos volo , quo de-
mùm argumento probent , quod olim in
rerum naturâ contigerit , id perennare ,
quandiu eadem rerum natura perstet ,
oportere ? Utique non ex revelatione ,
minùsque multò ex observatione id pro-
babunt. Et in divinis rebus , & in huma-
nis , non idem perpetuò apparet PROVI-
DENTIÆ ordo. Donum linguarum , do-
num prophetiæ , donum ægros impositâ
manu , aliâve actione , curandi , commu-
nia in primitivâ ecclesiâ erant , jam verò
rarissima observantur. Quid leprâ commu-

nus Judæorum? scatent eâ veteris novi-
que Testamenti codices: uti dæmonia-
corum historiam Evangelium refert, sic
& leprosorum; interea dum nostro sæculo
penè ignotus morbus, nisi hinc indè apud
Indos sit. Ergo nihil solidi ejusmodi argu-
menta habent. Pro omni autem responso
sufficit detecta impostura, ita ut velimus,
nolimus, paucos nostra, paucos patrum
nostrorum memoria extitisse, quos obse-
derit dæmon, ultrò fateamur.

F I N I S.

APPENDIX.

DIE 20 Aug. 1773, fatalis contigit casus ad Paludem propè *Danubium*, in loco quem *Thabor* vocant; qui cùm ad argumentum quo toto capite secundo hujus operis occupabamur mirificè faciat, typis autem illo jam edito contigerit, necessariò hīc memorandus est.

Adolescens 16 annorum, multis ab annis valetudinarius, pertinaci laborans diuturnāque scabie, piscatus hamatilis adeò immodicus, ut ob eumdem pridiē vapulasset; denuò hoc die, horā decimā antemeridianā, vento procellosissimo, in vicinā Palude, binis tribusque pedibus haud profundiore hamans, ab altiore amne pronus in aquam incidit, idque in acutum abruptumque veteris hujus Paludis aggeris palum. Emersit, vociferatusque est. Vedit, atque audivit eum, præteriens fœmina, quæ auxiliari cùm sarcinata non posset, in opem vicinos compulit hortulanos. Convolantes undique hi, oblongum quem casu reperiunt, afferem luctanti cum aquis porrigunt, quo arrepto eum in continentem ducent;

at verò ille genibus tenuis tenaci limo immersus, expedire non potuit se. Non nullis interea vicino in horto uncum quærentibus, altius infigitur limo adolescens, submergiturque. Horæ, ut credunt, quadrante submersum, uncis vesti infixis, in continentem trahunt; signa vitæ nulla edentem, in altum elatis pedibus quatificiunt, & spumosam quidem aquam ore naribusque, ut putant, profluam vident; sed ne vel minima vitæ superstitis signa. Ad hæc vicini suburbii *Leopoldini* Balneator quæritur, cui quo pernicioꝝ adsit, currus junctis raptim equis mittitur. Ejus verò loco duo prodeunt tirones, qui vix conspecto corpore, & feroci vocari mussitant, & neque aut venam tundi, aut alia præsidia artis ad moveri ultrà posse contendentes se subducunt.

Elapso tandem bihorio in nostrum Nofocomium corpus conferri jubet loci judex. Mox conspicitur sinistro in bregmate, notata jam a Chirurgiæ tyronibus contusio, atque epidermidis separatio. Calefacto protinus in lecto variis & rebus & modis fricatur; ex venâ jugulari dextrâ sanguis mittitur, qui rapidus principio, moderatus postliminio, unciarum X copiâ profluxit, tenuissimus, nigres-

cens, morâ bihorii subnigrâ aquâ præcipitatâ excolor, ad ignem, more albuminis ovi, coagulatus. Reliqua artis præsidia, quemadmodùm *Tomo I Rat. Med. cont. part. II*, traduntur, ordine admota sunt; ast verò, ut facilè prævideramus, incassum. Agitato sub experimentis corpore, ore ac naribus multa spuma profluxit, œsophago, ut leviter eodem in sectione vulnerato constitit, oriunda: imò etsi ex asperâ arteriâ prodiisset, spumæ duntaxat, si quæ affuiisset, portio quædam prodiiisset. Galli enim nostri scriptores suâ spumâ evacuari sic pulmonem non posse, evidentissimis experimentis demonstrârunt.

Die 21 Aug. ad 7 mat. cadaver lustravimus a pectore orsi, ne quid mutaretur in pulmone. Pulmo liber uterque. Aortâ, venâ cavâ, superioreque trachæâ, ne quid efflueret, probè ligatis, tûm & separato a diaphragmate pericardio, eximebantur cum corde pulmones. Nulla in trachæâ aqua spumosa, nulla in bronchiis, nulla in loborum, quos numerosas in taleolas divisoramus, vel minimâ portione: neque seri spumosi quidquam percussione tantummodo non prodibat, sed ne forti quidem pressione; nihil enim hâc nisi sanguis exprimeba-

tur. Porrò multus inerat aér illis, irretitusque sic, ut ex quibus expressus sanguis fuisset partes, ne post horas quidem considerent, bullas modò sub externâ tunicâ pressione formantes: quod pulmonis emphysema non a submersione, verùm ab antiquiore hujus visceris in suâ cellulositate dispositione, explicandum est. Ex variis scriptoribus hoc pneumonicum emphysema in hominibus non demersis, unâ cum magnâ ex hâc membranâ aërem explodendi difficultate, adnotavit *Ill. van Swieten* in cap. *Boerhaavii de Hydrope*, ad §. 1220.

In corde vasisque majoribus, crux nigrescenti similis aquæ. Intestina singula inflammata. Colon, postquam ex sinistri ilei cavitate emersisset, quinque flexus ingentes, antequam in rectum abiret, formabat. Et inflammatus pone pylorum ventriculus.

Ad os bregmatis lœvum, tegumenta inter ac pericranium, eâ scilicet plagâ in quâ lœsionem externam videramus, inventa ecchymosis est, multaque pericranii rubedo. In encephalo ambæ quidem meninges ad cerebrum universum rubebant, verùm præterea in ipso contuso loco multam rubri, nigrescentis tenuis-
que

que sanguinis ecchymosin inter se se mutuas continebant. Ventriculorum parietes copiosis vasculis, iisque rubris, scababant.

Hæc igitur anatome nos docet primò : licet in cadavere patuerit invincibilis causa mortis, quia tamen hæc antè anatomen ignorabatur, Chirurgiæ profectò tyronibus, quantum ab ipsis res pependerit, imputandum esse mortem ; quia quidquid in eo casu agendum est, & a magistro discipuli tenent, & lingua vernacula conscriptum de hâc re libellum, dono Augustæ, possident magistri omnes, quem & communicare exponereque discipulis lege jussi sunt. Sin verò planè rudes in hoc negotio hi fuerint, pars culpæ multa redundat in magistrum, quod nec libellum communicaverit cum illis, nec exposuerit, nec, si potuerit, in auxilium accurrerit.

Secundò : ut canes meos mittam, jam hic hominum demersorum alter est, cuius caruerint aqua pulmones : huic autem præterea apoplexiæ extitere in encephalo causæ. Ponamus hanc historiam vel nocte, vel saltem nullis præsentibus contigisse testibus ; & cadaver tandem inventum jussu lustrari magistratus. Qui ejus sunt,

quam refutare conatus sum , sententiæ ; cùm in anatome & vacuum inveniant sero spumoso pulmonem , & haud contemnenda mortis violentâ manu illatæ , indicia , magistratui referent meridianâ luce clarius esse quod hic juvenis morte violentâ prius peremptus fuerit , antequam præcipitatum corpus in paludem sit ; quo quid unquam a veritate alienius ? Interim magistratus amplissimus , magistratus *Lugdunensis* exemplo , in homicidas severè inquiret , in carcerem suspectos conjicit , ad eosdemque convincendos artifacia consueta admovebit . Si quis , quām inanes hi , quām arduos , quamque periculosos , cùm judici concilient , tūm accusatis , labores , mature perpendat ; an gravari , minarique possit , me quāvis oblatâ occasione Gallicanæ sententiæ urgere perniciem ?

At verò totum hoc meum argumentum negotio se facili confodere posse , hujus sententiæ autores fortè arbitrabuntur , adolescentem meum submersione neutiquam vel ob id periisse rati , quod è gurgite in sublime emersus , vociferatus sit ; oppletum proindè aquâ habere non potuerit pulmonem . Hinc eum videri non submersione , sed fluente paula-

tum tussis de encephali vasis sanguine, ex cerebri oppressione verè apoplexiā periisse: quodque proinde aquâ spumosâ vacuus deprehensus ejus pulmo sit, mirabile non esse.

Profectò multam mihi hîc illi suppeditant differendi materiem. Sed iisdem in *Appendice* respondere opportunam non videtur, ne ex *Appendice* novum succrescat voluminosumque opus. Hinc id, quod contendunt, ipsis impræsentiarum omne dabo; modò ex datis concedant necessariam consequentiam.

Scilicet, si hic juvenis, nemine teste, incidisset in paludem, atque elapsis aliquot diebus inventus, legali examini fuisse subjectus, ipsi hi, quos veneror, viri, necessariâ lege pronunciare debuissent *primo*, mortuum illum præcipitatum in aquam fuisse, cùm omni prorsùm aquâ ejus pulmo careret: *secundo*, ex visis atque repertis in capite eumdem fuisse violentâ morte peremptum, priusquam præceps in aquam datum fuisse cadaver. Redentes itaque casum hunc illi suæ *Claudinæ* consimilem, argumenta profectò fortiora ad hanc conclusionem in isto quam in illâ haberent. Interim historia nostra, tot testibus pleno in die

visa atque audita , hanc conclusionem non minùs damnosissimam quām falsissimam esse , omni ex parte toties jam ostendit. Quocumque igitur modo exponere hanc historiam contendunt , eam sententiæ suæ destruc̄tricem semper inveniunt.

F I N I S.

ANTONII DE HAEN,
S. C. R. A. MAJESTATIS
CONSILIARII ET ARCHIATH.
EPISTOLA
DE CICUTA.




PARISIIS,
Apud P. Fr. DIDOT junorem, Bibliopolam, ad ripam
Augustinianorum, propè pontem Sancti Michaëlis,
sub signo Sancti Augustini.

M. DCC. LXXVII.

Cum Approbatione, & Privilegio Regis.





VIRO PRÆNOBILI AC CELEBERRIMO
BALTHASARO LUDOVICO
TRALLE,
MEDICO VRATISLAVIENSI,

*Academiarum Cæsar. N. C. Adjuncto &
Elect. Boicæ Scientiarum Socio, &c.*

MEMINERIS, vir celeberrime, quum in ultimo tuo de inoculatione opere scripisses, observationes Viennenses de cicutæ præstantiâ etiam Vratislaviæ comprobatas esse, quod, datis mox ad te litteris, humanissimè petiverim, ut curatorum illorum historiam, quos cognovisses ægros antè datam cicutam, quibus præter cicutam datum nihil admotumque fuisse noßes, quosque postea, aut egregiè emendatos, aut perfectè curatos lætus salutasses, mecum communicare dignarere: me quippe tūm fore, qui eamdem publicâ luce donaturus, cicutæque futurus encomiastes essem. Æternum enim

A ij

Numen eneor, quod eam mihi mentem
benigus inseverit, ut salute humanâ ni-
hil acceptius, nihil unquam haberem an-
tiquius; ad quam profectò, de quâ lis est
planta, plurimùm conferret, si, quas illi
vires inesse perhibent, reverà possideret.

Eamdem possidere illas, nullus prin-
cipio dubitabam. Pilulas indè paratas,
ultrà sexennium est, dederat mihi illus-
trissimus noster præses *L. B. van Swieten*,
ut in schirro & cancro earumdem vires
explorarem, suppresso quamvis plantæ
nomine, quod publicare necdum sibi li-
cere aiebat: quo autem audax in expe-
riundo essem suam ille fidem, suam inter-
posuit experientiam. Neque profectò vel
hilum hæsitavi, fide munitus tantâ atque
auctoritate. Imò gratias divinæ Providen-
tiæ venerabundus egi, quod denique sum-
marum maximèque formidandarum ge-
neris humani, in eoque amabilis præci-
puè sexûs, calamitatum medelam propi-
tiùs revelâsse.

Experimenta igitur actutum institui,
æquè benè multa, antequam quâ uteret
cicutam esse noscerem. Quod autem ex-
perimenta illa minus favebant, ego insti-
tuebam eadem auctiora, ratus, ne ab op-
timò quidem medicamento expectari pos-
se, ut omnes ex æquo sanaret: & forsitan

eos, qui penitus incurabiles, meas hucusque in manus incidisse, in casu^o tandem, qui sanescerent, qui comprobarent medicamenti virtutes, qui eadem me, quâ cæteros, lætitia perfunderent.

Interea aliorum recenter evulgatis experimentis tanquam propriis meis gaudebam, & ubique laudabam cognitæ tunc mihi cicutæ vires. Eramque ejus in Italiâ præco. Et, si quem cupido tenet noscendi, cur nobiliss. comes *Roncalli Parolino* in epistolâ ad *Cl. Bianchi* conqueratur: *che io non fosse troppo cortese*; caussa est, quod cùm Mantuæ 1760, mense Septembri, ille me officiosâ salutatione honoraret, & in cicutam acriter invehheretur, ego forsitan paulò acriùs ejusdem efficaciam propugnarem.

Atque ita ferè biennio egi. Tandem quum ea experimentorum meorum infelicitas esset, ut quibus cicutam, spatio anni dimidii, anni integri & sesquialterius, dederam, eorumdem nulli sanescerent, plures in deteriora laberentur, unus periret alterque; quum prætereà similes querelæ aliorum aures circumsonarent, penitus, fateor, animus vacillavit.

Interea obstupescens inaudio *libellum* de cicutâ alterum prelo mandari. Itaque ill. *præsidem* adire ego, ipsi infortunia

mea exponere, diaria 23 ægrorum, quos ab initio in curam suscepseram, monstrare obtestari per omnia sacra, nihil ultrà publici juris fieri permitteret, donec quæ a pluribus caperentur experimenta nuntiosiora omnem amovissent hæsitationem. Quippe si, quæ ego infortunia mœrebam, eadem & aliis contingerent, eosdem his præpostoris laudibus indignaturos, nostramque facultatem de famâ, quam celebrem, quam venerandam apud exteros conquerire cœperat, periclitaturam. Interea me non quidem ultrà in Nosocomio, in quo præ locorum angustiâ fœtor cicutæ, cæteris, eâdem non utentibus, permolestus esset, sed foras, eâdem quâ anteà sedulitate experimenta prosequutum.

Non expedit enarrare quis fuerit hujus colloquii finis. Nosse sufficiat indicatum mihi bellum ab eo die fuisse, idemque hucusque non continuare duntaxat, sed ingeminare.

Quin interim, quò in experiundo frequentior, eò essem in curando infortunior, experimentis meis vel ideo fidem esse denegandam contenderunt, quod non ultrà in Nosocomio eadem sub oculis meis instituerem. Homines, ac præsertim quidem pauperculos, a medico

medicamenta accipere, sæpè eadem aut negligenter, aut nihil omnino assumere, vendere aliis, & sic porrò.

Quamvis experimentis in Nosocomio captis æquè fuisset quam extrà illud infelix; quamvis etiam in libellis de cicutâ plura experimenta extrà quam intrà Nosocomium capta legantur, tamen inani hoc prætextui adhuc semel obviam ire volui. Septemdecim ægros, quos similes varii morbi affligerent, qui in *libello primo de cicutâ recensentur*, in Nosocomium meum induxi, cicutam iisdem omnimode applicui, & bis in septimanâ cunctis medicæ studiosis, proficerent, nec ne, examinandos produxi.

Emanante in urbem cicutæ apud hos omnes inertiam, accusarunt me, quo fundamento nescio, ignorantiae methodi veræ cicutam exhibendi. Quâ de causâ humanissimis litteris ill. *præsidem* hortabar, ut horâ sibi commodâ vellet examinare ægrotos meos, tûm qui in Nosocomio degebant, tûm etiam qui extrà illud cicutâ utebantur, ad datam quippè horam omnes illi sistendos: nihil mihi gratius fore, quam ex ipso discere, non vitio cicutæ, sed meo, qualiacunque infortunia conquererer, contingere. Sed neminem vidi, & ne responsum quidem.

Experimenta nihilominus auxi ad numerum CXX.

Quum tandem cancrosarum fœminarum octo mihi periissent, cæterorumque & nemo curaretur, & multi pejorarentur; quumque ex Bohemiâ, ex Imperio, ex Galliâ, Angliâ, Belgio, Italia, similia infortunia, aut litteris perciperem, aut dissertationibus intelligeram impressis, ab experimentis novis desistendum esse arbitratus sum; cicutam & inertem esse & noxiā a prægressis convictus.

Interim videas, quanti faciam tuam, optime Tralles, auctoritatem, dum vix lectis in ultimo tuo opere *Breslaviensium experimentorum encomiis*, protinus & eorumdem historiam abs te peterem, &, sub narratis suprà conditionibus, me evulgaturum illam, tūm laudaturum cicutam esse sponderem. Qui hisce meis adeò æquis atque sinceris votis satisfaceret, tu, amice candidissime, unus esse debuisti, unus esse potuisti, qui, veri amore raptus, & tua propria observata ex diariis depromere, & cunctorum Breslaviensium Medicorum Chirurgorumque, qui cicutâ usi erant, testimonia, proprio ipsorum nomine consignata, colligere, & ad me tantâ cum diligentia & attentione transmittere dignâbare.

Vix accepta , legi eo , sanctè testor , quo promiseram animo. Reperi catalogum undè septuaginta ægrorum. Vidi clarorum virorum , qui cicutam ipsis dederant , alios aliis esse huic plantæ favorabiliores ; teque , vir egregie , minus quam expectâram : vis probè a me notari , non scripsisse te , pag. 234 , vexatissimi argumenti ; vires ejusmodi cicutæ abs te vias , & comprobatas esse , verùm ejusmodi de illâ laudes percepisse , quæ illis quas tu novo huic invento decernere posses , majores esses.

Horum undè septuaginta schirro vel cancro , sive occulto , sive aperto , 36 laborarunt , omnium ergò mediâ parte plures. Laborarunt 6 colli tumoribus , vomicâ 1 , fluore albo 3 , asthmate 1 , ventris duritie ac tumore 3 , teste indurato 4 , venereis denique malignisque ulceribus 15.

Ex illis , qui schirro aut cancro laborarunt , perière 30 miserrimè , & incurabiles 6 manserunt , colli tumoribus laborantium 2 curati ; 4 minimè ; vomica curata ; asthma levius indè creditur ; 3 leguntur ventris duritie ac tumore curati ; 3 curati à duro testiculo , 1 non. Tandem a malignis ulceribus ac fistulis 11 curati , 4 non curati,

Liceat, vir eruditissime, hæc singula-
tèm examinare. Deprehendimus primò ex
eis, qui vero schirro aut cancro laborâ-
runt, nullum, seu nullam (pleræque enim
fœminæ sunt) curatam esse, earumdem-
que $\frac{1}{6}$ miserè periisse. Advertimus quo-
que hoc peculiariter a practicis *Breslaviens-
ibus* esse notatum; scilicet, egregium Chi-
rurgum *Hauptmann* apertè fatentem legi-
mus, *apertum cancerum nunquam se cicutâ
curasse*, nec curatum a quopiam nosse; nul-
lum dexterimum Chirurgum *Beer*, a ne-
mine curatum se vidisse, nec se unquam
ullum curasse; exper. Medicum *Wiche*,
cancro nunquam profuisse cicutam. Ex-
perti itaque idem sunt *Breslavienses* quod
ego, quod Viennæ multi mecum, quod
centeni Medici *Galli*, *Itali*, *Germani*,
Angli, *Belgæ* toties experti sunt.

Si cum hisce adeò universalibus obser-
vatis, omnem omnino excludentibus ex-
ceptionem, conferamus libellos de ci-
cutâ, *primum*, *alterum* & *supplementum
necessarium*, deprehendimus nihil fre-
quentius a cicutâ, quam cancros & schir-
ros aut curari, aut emendari insigniter.
Libell. I, pag. 6. « In strumis schirrosis,
» in indurationibus glandularum, mam-
» marum, & pessimis cancris non exi-
» guos effectus vidi, & expertus sum. »

— Pag. 103. « Indurata & schirrosa in iis-
» dem etiam casibus resolvit , ubi alia
» medicamenta maximè penetrantia nihil
» efficiunt. » Pag. 104. « *Cancro ponit li-*
» *mites , &c.* Acre cancrosum emendat ,
» fœtorem dispellit. Ichorem cancrosum
» in bonum pus convertit » Pag. 100.
» Dexter *F. Leber* pertinacissimos schir-
» ros in diversis corporis partibus resol-
» vit. Cancros plurimos non modò in
» mammis , sed & in facie , ad oculos ,
» nasum , &c. emendavit , & quosdam
» integrè curavit. » Sunt tot ferè schir-
» rorum aut cancerorum curationes , quot
capita libellus habet.

Libellus alter sic infit : « Quò sæpiùs
» cicutam ægris exhibeo , eò majorem
» semper in hâc plantâ virtutem & effi-
» caciam admiror. » Paulòque post : « Opus
» non esse scribi eam ornare encomiis , cùm
» eadem accuratissimè capta experimen-
» ta eloquantur. Nec mirum ; quum libel-
» lus integer innumeros penè referat a
» cancer aut schirro cicutæ personatos
» efficaciâ. Quare & pag. 287 legitur :
» *Cicuta cancrum curat. Id , multiplici ex-*
» *perientiâ convictus , vidi. — Et pag. 291 :*
» *Si fœminæ statim in principio mala sua*
» *detegant , & si Medicus debito tempore*
» *cicutam adspliceret , certus sum , nos intrâ*

» aliquot annos raro visuros mammarum
 » cancrum. Et supplementi necessarii. Pag.
 » 37 : *Cicuta fundit schirros etiam anti-*
 » *quos.* Pag. 40. *Cancerum curat, aut emen-*
 » *dat ejus acrimoniam, pufque bonum in-*
 » *ducit, sopit dolores.* »

Libello de stramonio, &c. p. 111 &
 112, « *Cicutâ dissipari*, ait, *veros inve-*
 » *teratosque schirros, & cancros & ulce-*
 » *ratos.* »

Libello de colchico autumnali, p. 77,
 « easdem canit de cicutâ laudes, addit-
 que : « *Balneum ex cicutâ infusâ para-*
 » *tum, cui totum ægrotantis corpus im-*
 » *mergitur, multum subinde juvat, efficit-*
 » *que ut extractum interne datum longè*
 » *citius schirros & tumores solvat, sanet-*
 » *que ulcerâ cancrofa saniosa.* Pag. 92 :
 » *Medicus . . . propriam uxorem cum om-*
 » *nium stupore ab ingenti mammae cancro*
 » *liberavit.* »

Quid ad hæc omnia, vir carissime?
 Viennæ, ejusque singulari in vico, ci-
 cuta multiplici experientiâ schirros veros,
 antiquos, inveteratos, pertinacissimos re-
 solvit, curat, cancros ingentes exulcera-
 tos sanat. — Dum interim Breslaviæ, Pra-
 gæ, Mediolani, Parisiis, Londini, Amstelodami, tam ii qui cæterum laudant
 cicutam, quam qui eamdem vituperant,

illam in canceris unanimi voce inanem clamitent, in schirris vanam reperiant. Quid, inquam, ad hoc? Cicutam Vienensem, ais, palamque aiunt tecum omnes *Breslavienses* tui collegæ, miranda hæc solam patrare, indigenâ aliarum regionum curari nulos.

Sed *Viennensis* cicutæ libras, ultrâ 500 *Viennæ* emptas, cæteræ regiones devorârunt, nec unquam schirros cancroſve veros se indè curasse, vel ipsi tentur sponte, vel veritate convincuntur. Nonne vestri id unanimi voce clament? nonne idem plures nationes?

Verum urgebis *ex Libello 2, de Cic.* pag. 3, amaras querelas, in hæc verba erumpentis scriptoris: « Doleo summo- » perè, centenas aliquot libras extracti » cicutæ, ex herbâ siccâ parati, me in- » scio, *Viennâ* in alias regiones esse trans- » missas. » Quod nonnulli id semel ex recentis penuriâ fecerunt, dum ad externas regiones plus mittendum esset, quam de extracto ex recenti herbâ parato mitti posset, inficias non ivero; ast verò pharmacopœos sequentibus postmodùm annis ex recenti plantâ extractum parâsse, cùm certissimum est, tûm ex eo patet, quod ejusmodi nihil unquam posteà ab auctore expostulatum sit,

Si ergo unico anno id contigit, id annis posterioribus viribus non potuit derogare cicutæ: quin etiam quo anno id contigit, si minores, magnas tamen vires ejusmodi extractum possidens effectu bono apud extraneos laudatum fuisset.

Objicies mihi secundò auctoris querelas in *supplemento necessario*, pag. 8 & 9. « Extractum verò non ubique ad meam mentem paratur. Sumunt enim succi expressi ingentem copiam, eam in vase cupreo igne satis forti coquunt, fœtor indè ingens longè latèque spargitur, avolat, quod est optimum; præterea nimiùm sollicitè succum & extractum purificant. » Subterfugium hoc æquè ægrè quam ego, præstantissime Tralles, admittes, si mecum cogites, herbæ fœtorem, qui nunc optimus a conquerente auctore vocatur, maximè avolare, dum ad fomenta & injectiones aquâ coquatur; & tamen hujus decocti egregias celebrari, in ejus operibus, vires: deindè nec fœtorem in extracto parando avolare, cùm mures perpetuò redoleat. Et si a vase cupreo nocumentum pateretur, id profectò symptomata à cupro genita demonstrarent.

Sed quid immoremur ejusmodi excoxitatis subterfugiis refutandis, dum auctori urbiique universæ notissimum sit, ex-

tractum cicutæ , quo ego mea infelicia experimenta ceperim , quod ille , egoque ad exteris regiones , ubi nihil effecerit , miserimus , esse planè idem , esse de eâdem massâ , ex eâdemque areâ petitum , ex quâ petitum sit illud , quo ipse in Nofocomio suo , quo alibi , admiranda illa perficere se dicat , quibus cuncti ejusdem scatent libelli . — Cessent itaque aliarum nationum Medici experimenti defectum in cicutam suam patriam refundere : cefset ipse auctor , de cicutæ præparatione conqueri , dum constet , eodem cicutæ extracto , & me & multos exteris , quo ille usus fuerit , usos esse .

Sed hoc pacto conquereris , vir expertissime , non solvi , sed amplificari magis , quod explicandum mihi ænigma proposueras , cur scilicet tot *Viennensium* schirri cancrique curæ laudentur ; interea dum *Viennensium* Medicorum plurimi , dum reliqui per universam Europam Medici atque Chirurgi , cicutam deprehendant esse ad hosce morbos curandos ineptam ?

In rem ingratam atque odiosam me inducis , optime Tralles : quum urgeas tamen , expedire eam conabor . Ac primò quidem , si repetas mecum cancri , schirri , scrophulæ , &c. definitionem , & quânam in re horum tumorum singuli a singulis dif-

crepent, mox defectum insignem reperies
in cicutæ libellis, qui hæc nomina sic
commiscent confunduntque, ut ad singu-
lam ferè historiam indigeant correctione.
Hoc semel admisso, ænigmatis tui solu-
tionem pro parte habes.

Missa ad me fuit, ad convincendum
me, die 3 Jan. 1760, fœmina quæ
cicutæ usu a pessimo exulcerato cancro
liberata dicebatur. Fœminam videram
anteà nunquam, ideòque num vero can-
cro laborâisset, ab eoque biennali cicutæ
usu curata esset, aliorum fide & testimo-
nio credere poteram; ex enarratione au-
tem mulieris haud ita fuisse suspicabar.

Biennio post urgebantur cicutæ patro-
ni, ut curatis per cicutam suis me pervi-
cacem & obstinatum hominem erroris
convincerent tandem. Porrò hi qui in-
tegro quadriennio cicutâ usi, jam nume-
rosum jactabant curatorum catalogum,
aptum hominem, quem ad me mitterent,
non habuere, nisi eamdem hanc fœmi-
nam. Et quod abs te, vir clarissime, no-
tatum velim, ipsa hæc fœmina, quæ, bien-
nio elapso, in laudem cicutæ ad me missa
fuerat, quæ post illud biennium adhuc
unica erat, quam ad convincendum me,
mandato coacti, aptam credebant, hæc,
inquam, ipsa toto hoc ultimo biennio ob-

novam mammæ duritiem cicutam sumperat. Pulchrum profectò ad convincendum exemplum! Quo autem hanc ignominiam a cicutâ amoverent, & in me (quis crederet?) converterent schedulam dederant mulieri, in quâ monebar, mammam mansuetius examinare; quandoquidem eadem, ante duos annos rudiùs a me contrectata, induruisset sic, ut toto hoc tempore cicuta de integro indiguisset. Capis facile inane commentum. Itaque examinavi denuò, sed mansuetè fœminam; &, accuratius repetitâ cum illâ morbi historiâ, convincebar eamdem nec cancro unquam laborâsse, nec quo morbo laborâsse curatam esse. Est fœmina casûs secundi *libelli primi de cicutâ*. Tumores ambulantes, scrophulosos, illa gesserat per annos, varias corporis glandulas, alias post alias, affidentes; loco sæpè motos emplastris, sponteve; renatos ac mole aliquandò duriores cutimque nonnunquam inflammantes. Horum adhuc unum notabilem sub axillâ gerebat. Repeto itaque, si consideres, illos, post millena experimenta, nullum mihi exhibere præter hanc mulierem potuisse; si attendas eamdem schirrosam cancro-simque fuisse nunquam, ænigmatis tui tenes solutionem.

Secundò, præcox gaudium de aliquâ sub cicutæ usu mutatione, quam etiam a naturâ factam cernimus, in causâ fuit, ut curari jam, immò ut curatum clamitarent, quod tale minimè erat.— Sic nuperrimè iterùm contigit, ut fœminæ comœdæ, a cancro per cicutam curatæ, fama aulam expleret urbemque, eaque tamen ipsa, elapsis abindè 14 diebus, cancro mortua sepeliretur.— In *libello secundo* integra cancri cura totis tribus paginis descripta habetur mulieris, cuius maritus lignum jam aptaverat, undè statuam Aesculapio suo conditurus esset, quam condituram mors brevi, ut privatiss litteris novi, insequuta prohibuit.

Et, si legas in eodem *libello secundo* a pag. 262 ad 277, ovantem de curato penè cancro historiam, an crederes, vir doctissime, cancrum paulò post adeò malignum fuisse, ut fuerit ferro amputandus? Nec dubites: in trophæum cicutæ excellentissimus comes maritus, nunc princeps a rege fratre creatus, excisam mammæ portionem *Pragâ Viennam* misit. Vidi, contreftavi, mensuravi illam. Tres pollices Viennenses tumor, jam spiritu in quo ferebatur contractior, quâcunque mensuraretur in parte, in diametro latitudinis habebat; in eâ altitudi-

nis duos. Prudens Chirurgus unà abstulerat papillam , & pollicem latum substantiæ mammæ ab altero papillæ latere , utpotè schirris minoribus refertam.

Tertiò , defectus memoriæ (cur enim odiosiore verbo utar?) in causâ fuit ut , in ægrorum tradendâ historiâ , cancrum exulceratum vocarent , ubi , v. g. mammæ inflammatio in suppurationem octidui spatio abiverat ; & ut ambos pedes fœdissimis ulceribus exesos scriberet , ubi non nisi parvæ pustulæ duæ uni pedi aderant , quas prurientes puella scalpserat , & ubi tertia demùm nascebatur à candela scintillâ , quæ in idem crus , Chirурgo id examinante , infortunatè exciderat . Convictus hâc de re fui , quandò anno fortè sesqui altero ab illâ ita dictâ curatione elapso , eâdem puellâ me conveniens , ejusdemque mammæ novam inflammationem exhibens , præteritam dabant historiam suam . Curante me illicò Chirurgum vocari , qui in *libello secundo* de cicutâ hanc ut exulcerato cancro & cruribus exefis laborantem describi curaverat , juvencula eum de memoriæ lapsu convicit sic , ut defendere ultrà se non posset.

Id generis historiæ plures existant . Lapsus memoriæ fuit , quandò curatas a ci-

cūtā scripserunt duras viscerum obstruc^o
tiones; interea dum ex formulā, quam
mihi tradi curaveram, paulūm extracti
cicutæ, cum copioso sapone Veneto, &
gummi Amm. mistum, datum fuisse intel-
ligerem.

Lapsus memoriæ fuit, quandò, cicutâ
in ulcere gangrænoso nihil proficiente,
cortex Peruvianus miranda præstítit, &
nihilominùs non huic, sed illi, egregiæ
emendationis laus adscripta fuit.

Lapsus memoriæ erat, inter integrè a
cancro curatos recensere, eorumque cu-
rationis famam undique spargere, quos
dijo cancro enectos, dudùm recondide-
rat tumulus. Evidem testimonia com-
plura possideo.

Sic omnibus ad ænigma respondisse vi-
debor; tibi autem, vir celeberrime, ut
sentio, necdùm. Difficillimus enim in cre-
dendo urges me, ut respondeam ad innu-
mera testimonia cancrosi, v. g. ichoris in
pus album bonum mutati, decrescentis
mox doloris, sedati cujusvis symptomati-
atis, redditūs cùm somni deperditi, tūm
appetitūs prostrati, universique corporis
torofitatis; quæ sub usu cicutæ animad-
versa, omnia redditum sanitatis manifestè
demonstrant.

Magna profectò narras, optime Tral-

les, sed audi & alteram partem. Primò hanc ichoris in pus conversionem id per se non demonstrare probabo; deinde docero, non omnium observatis bona hæc signa cicutæ concomitari usum.

Primò, belladonna Turnefortii, atropa Linnæi, solanum furiosum, solanum maniacum, *σπιργόν μελανκεράσον*, ex clarorum virorum consilio & præscripto, a me data cancrofis, eundem effectum edidit, fœminarum cum interitu. Vide experimenta mea hâc plantâ facta, *Rat. Med. Tom. 2.*

Secundò, neque ego ichoris in pus conversionem observavi tam frequentem in his quibus cicutam dedi ego, nec in illis quibus per alios eâdem datâ adfui, ulceraque inspexi; neque idem alii ita observârunt. Nonne & id mecum vestri *Breslavienses* agnoscunt? In eorum testimoniis plures ægri recensentur, quibus omnia in aîbitu exsudans ichor erodet; alii quibus a cicutâ ichor niger; alii iterùm ulcus multò sordidius, latiusque serpens. Appetitûs autem prostrationem in omnibus suis acerbè conquestus est clar. Chirurgiæ professor Neubaur. Textorique ipsi tuo, annon cùm tumor major, tûm sordidius ulcus, tûm novus sanâ in mammâ tumor, & in plerisque glandulis,

observabantur, interea dum cicutæ affiduum faceres copiosumque usum? Et annon matronæ tuæ schirrus a Viennensi cicutâ in pessimum se convertit carcinoma, &, ut ultimis litteris notas, jam occidit? Et in alio numquid non pro pure sanguinolentus a cicutâ ichor? Omnes tandem vestri nec bonum corporis habitum restitutum cancrosis, nec sæpè etiam vim dolores sopientem, somnumque conciliantem se expertos testantur. Videas ergo quām parūm hæc omnia cum libellis de cicutâ conveniant.

Et ut pauxillūm adhuc in hoc argumento immoremur, quandò auctor sic vim sopientem dolores, ac somnum cenciliantem, cicutæ extollit, quandò in *supplem. necessario*, pag. 40, ait: *Sopit dolores*; quandò ibidem, pag. 66, scribit. *Sæpè mingendi dolores opio citius sistit*; cernimus tamen illum opio frequenter indiguisse. Lib. I, p. 33, 51, 56, 57, 75. *Libello secundo*, pag. 12, 14, 48, 49, 103.

Quin & incomprehensibile, ac planè paradoxon videtur, id statuisse. Præterquam enim quod nec in meis, nec in *Breslaviensium* pluribus, ea vis cicutæ confirmata fuerit, si consulam auctorem, quanam dosi, à cicutæ extracto,

hanc vim edi putet, video à granis 2 de die observâsse eamdem, & sic porrò à granis 4 ab 8, a 12, a 20, 30, 60, 120, 180, 240, idque haud rariore admodum casu, sed frequenti. Si granum opii consuevit homini blandum conciliare somnum, erunt alii qui indigeant duplā dosi, riores qui triplo, quadruploque, rarissimi qui quintuplo, qui sextuplo uno die indigeant. Cicutæ autem dosis cur adeò immensè augenda sit, ex comparatione cum cæteris paregoricis haud facile capitur.

Et in ægris, qui carentes dolore, somnoque gaudentes, cicutâ propter exultationes indolentes utantur, quo manet vis sopiens? Numquid quis inculpatè sumet opii dosin consuetâ quinquaginta duplo majorem? Utique vir mihi notus, qui antiquâ atque pertinaci exulceratione versùs tempus dextrum minimè dolente laborans, suasque tres extracti cicutæ dragmas trimestri spatio quotidiè abliguriens, ut citrà ullam emendationem, ita quoque citrà ullum auctum somnum, eam copiam assumpsit.

Itaque si primo tempore cicutæ granis 4, 8, 10 bonus somnus adeò frequens erat, cur in libellis posterioribus præsentatur ejusdem semiuncia, quæ ex prio-

ris libelli calculo grana opii 24 imò 30 continere debet; cur, inquam, soporiferi remedii tam enormis in die unâ præscribitur dosis, citrà vel minimam indicatam cautelam, ut ratione peregorici fieri oportebat?

Auget paradoxi mirabilitatem hocce observationum par. *Lib. de cicutâ* 2, pag. 234. Miles, multa a cicutâ sperans, unciam extracti medium quæ pauxillatim adsumenda fuisset, die unico abligurit. Nullus indè somnus, sed alvus per triduum quinquagesies.

Secundò, formula cujusdam Nosocomii & publica testimonia certiores nos reddunt de cujusdam Medici audaciâ, qui, a consuetâ cicutæ extracti dosi nihil lucratus, integrum ejusdem quotidie libram, longo tempore, formâ pilularum, vel in mixturis, decoctisve solutam, singulis ægris propinavit, absque tamen vel minimâ mutatione in somno, vel in excretionibus. Ubinam hæc virtus soporifera? æternus debuisset obrepere somnus.

Sed hâc occasione pro ænigmate ænigma tibi liceat, vir clarissime, propone. Explices mihi, quî demùm intelligam sequentia. *Lib. I*, pag. 103. Hoc remedium nullam corporis actionem, secretionem,

cretionem , aut excretionem turbat , agit modo insensibili , nec alvum , nec vomitum , nec sudorem movet. Hæc scribabantur , dum triennii tempore innumera dederat experimenta cicuta , ut ejus effectus jam certò certius constare deberent.—Videamus *supp. necess.* pag. 35. « Rarò tamen alvum movet , & raris simè vomitum ; quandoquè transpirationem auget , sæpè autem urinam copiosam & glutinosam prolicit. Etiam ipsi auctori , tomo 2 , pag. 284 , urina a cicutâ copiosior. Iterum *supp. necess.* pag. 35. In plurimis tamen ægris nullam excretionem sensibiliter auget »—Mox verò , pag. seq. » Auget secretiones , undè sæpè aures , nares , os faucesque ficas reddit , humidas , transpirantes. — Pag. 38. » Producit sputum , ut jam mouerat , lib. I , pag. 107. « Cicuta non impedit sputa , sed ea potius movet , pergit supplem. *necess.* pag. 27. « Prodiit urina copiosa cum multo glutine , p. 66. » A granis duobus quotidiè extracti sumptis urina copiosissima , cum multo glutino sedimine : dum verò uno die à cicutâ abstinet , pauca est urina , nec videtur sedimentum. » Si hæc ita se haberent , cicuta profectò potentius diuretica famoso oxymelle colchicato foret,

Dùm hoc mihi , vir clarissime , expli-
cabis , simul addas , obsecro , aliquam su-
per diætâ elucidationem. *Lib. enim 2,*
pag. 291. « *Cicuta nunquam strictum exi-*
» *git vitæ regimen. Admittit ea omnia*
» *quæ ægri ventriculus facile digerit , &*
» *quæ in bonum nutrimentum transeunt.*
» *Neque interdicitur vinum , neque vitan-*
» *tur acida , prudenti & moderatâ co-*
» *pia sumpta. » Et supp. necessar. p. 64.*
Acida pro condimento conceduntur , præ-
dominantia verò minus conducunt : vi-
num bonum iis qui assueverunt , non
nocet. Assueverunt autem penè Austriaci
omnes , ideòque nullis eorum cancro la-
borantibus & cicutâ utentibus nocet. At-
tamen lib. I , p. 105 , cancrofis & schir-
rosis mammis nocere acida vinosa , &c.
In tantâ secum contradictione adhuc ig-
norat observationem planè memorabilem
*clarissimi *Breslaviensis* , quem veneror ,*
amici , quam legi attonitus , certò scilicet
se scire , in cicutæ usu nihil nocentius esse
carne ejusque jure. Profectò observatio-
nem ejus falsam nostrorum Medicorum
nonnulli clamabunt , qui cancros pessi-
mos personare se gloriantur , juribus car-
nium , quibus cicuta incoixerit. Quamvis
multa tibi , vir celeberrime , respondi ,
ut satisfecisse videri possim , tamen ad-

huc hæsitantem te percipio , & serio ro-
gantem , cur , præter libellorum aucto-
rem , tot clari apud ipsum laudati viri ,
aliique venerandi Medici , cancros cura-
tos se vidisse apertè testentur , dùm in-
tereà numerosi per Europam Medici ,
vestrique omnes Breslavienses , utut qui-
dam cicutæ dediti , id constanter negent .

Resp. prima. Non omnibus Medicis
maximèque junioribus licuit adeò felici-
bus esse , ut duros tumores ritè internos-
cere noverint . Itaque ut hunc errorem in
nonnullorum libros irrepisse suprà de-
monstratum fuit , sic in eumdem inci-
disse , multorum data , typisque evulgata
testimonia manifestè arguunt .

Resp. secunda. Dùm multi , auctoritate
perculsi , nihil fidentius assumerent , quam
verè curari schirros & cancros : dùm fal-
lentem passimque mendacem sub cicutæ
usu emendationem suspicerent , mox illi
se curare cancros , eosdemque propè cu-
ratos esse altâ voce clamitârunt : multo-
rum tamen eorum in honorem asserere
teneor , fuisse tanti candoris plures , ut ,
dùm deceptos se viderent , præcox asser-
tum revocarent , quemadmodùm voce
nonnulli apud me , litteris alii , illud re-
verà revocârunt . De animi aut levioris
aut perversi hominibus , qui , ut magis

placeant, aut altius promoteantur, causus subornent, h̄ic sermonem facere non convenit.

Sed tertio, historia medicinæ nobis res ejusmodi suppeditat, ut statui opporteat, plures eximios viros citrā ullum detrimentum honoris in hunc errorem labi potuisse.

Egregius *le Dran* refert nobis fœminæ cancrum, qui, si fuisset amputatus, 7 vel 8 libras pondere æquâisset, in gangrenam abiisse, totâque suâ mole bidui spatio de corpore fuisse separatum. Magnâ hæmorrhagiâ prægressâ, pus bonum apparnisse purumque ulcus: labia ulceris, elapsò 4, 5 septimanarum spatio coire, bonamque renasci carnem cœptam esse, formatamque cicatricem, quâ ulcus, quod vix pollicem latum integrè tegi speraretur: corpus cæterūm esse perfectæ sanitatis: ut natura id quod ars, si pótis fuisset, facere debuisset, præstitisse per se ipsam videretur. Verùm enim verò cuncta iterūm immutata fuisse. Subnasci quippe in medio relicti ulcusculi cœptum esse tuberculum, quod pedetentim cicatricis æquaret magnitudinem, & minore quam mensis spatio in priorem excresceret magnitudinem.

Ponamus, cicutæ sub usu, naturæ ope-

râ tale quid fieri; an tu, vir amicissime, an ego, an omnes nobiscum effectum adeò stupendum cicutæ adscribere gravaremus? Erraremus tamen.

Cancro mammæ domicella Ultrajecti affecta ex summis virtis, celeberrimis Ultrajectinæ Academiæ professoribus, nihil sibi auxilii supereesse, præter amputacionem, intelligit; eâ tamen lege, ut propter alium sub axillâ tumorem operationem non subeat, nisi consultis prius *Leydensis* Academiæ oraculis, Albino, Gaubioque. Igitur Lugdunum Batavorum proficitur, hos consulendi causâ. At operationem propter illum axillæ tumorem dissuadet uterque. Pallians autem unguentum magnus præscribit Albinus. Repetit illa domum, uni Deo rem committens, nec unquam usâ unguento.

Elapso aliquo temporis spatio, contigit ut celeberrimus Gaubius ab ægro Ultrajectum invitatus fortè fortunâ Chirurgum videat, qui secum Albinoque confulentem virginem fuerat comitatus: a quo hic mox percunctari adhuc ne virgo vivat? Et viventem exclamare ille & circa cujusque sanatam opem. Attonitus, vixque præ gaudio se possidens, amicus ille hominum Gaubius, eam invisere tendit, ab eâdemque, ut monuerat Chirur-

gus, percipit, nullo auxilio unquam adhucbito, nec Albiniano quidem unguento, mammam, haud diu post iter Lugdunense, detumescere cœptam tandem unâ cum axillæ tumore paulatim ad perfectam rediisse sanitatem.

Ex illâ mirandâ historiâ ipse clar. Gaubius, nosque cum eo omnes concludimus, in cicutæ laudem nos eamdem enarraturos fuisse, si, quo tempore citrâ ullam medicinam juvencula curaretur, hanc ipsi herbam dedissemus.

Acad. Reg. Soc. Paris. anno 1703, consulatur. Vir nobilis in fossam cum equo præcipitatus, testiculum læsit. Labentibus quatuor exindè annis, testem sensim crescere atque indurescere, indolentem tamen, percipit. Anno quinto tumor cùm ingens, tûm durus, acutè dolet. Scrotum empiricus aperuit, quosdam liquores injecit; incassum autem his tentatis, oportuit ut vulnus denuò consolidaretur. Resolventia emplastra non profuerunt. In consilium vocati Chirurgorum *Parisiorum* celeberrimi, amputationem quidem proposuere, sed quibusdam de causis periculi vacuam haud esse addiderunt. Dubiæ aleæ committere se ille nolens, *Lugdunum Gall. petit*; convocatosque ibidem celebriores in arte ma-

gistros, ejusdem reperit cum Parisiensibus sententiæ esse. Ille verò nihil horum. Domum reversus exactâ diætâ usus est, & subinde rhei tantillo. Spatio anni necdum decurso, moles, durities, dolor, testem relinquunt, sic, ut illo equite nihil sanius.

Similem morbum si, adeò inopinatò, dum cicutam exhiberemus, consanescere cerneremus, an dubitaremus cicutæ curæ adscribere laudem? Annon probabile magnos in arte nostrâ viros sic ferè inevitabiliter posse errare.

Sed est & alia ratio nostri hâc in parte erroris. Tumor nec schirrosus, nec cancrosus, origine, incremento, duratione, magnitudine, duricie, asperâ inæqualitate, dolore ac purpureo cutis colore, potest nobis cancrosus videri, ut cancrosus curari, qui neutiquam cancrosus fit. *Tom. III, Rat. Med. a pag. 323 usque ad 330*, historias complures enarravi, quæ cùm mihi tûm aliis schirri ac cancri larva imposuerunt, quas ne longus sim quæras ibidem. Sed cogita mecum hydaticum tumorem, quem ibidem schirrum, qui in cancrum vergeret, mentitum esse videas, a naturâ resorberi cicutâ interim exhibitâ; an facile nobis condonandum non foret, quod primo impetu

cicutæ laudem tribuerimus ? Profectò nemo nobis vitio hoc vertere posset ; modo quod honestos , quod candidos viros decet , eâ essemus ingenuitate , ut , quandò posteà experimentum , in millenis aliis , qui schirros canctrosque referrent , tumoribus , falleret , quandò etiam ejusmodi tumoris amputatione de errore convinceremur ; quandò denique ipsorum lympham posse resorberi clare intelligemus ; ut inquam , tunc nos primo illo impetu præmaturiùs exultasse fatremur . Annon credis , vir clarissime , celeberrimi *Morgagni* uxoris , cuius ibidem memini , tumorem , strumosamque ibidem *Valisnerii* puellam , ad hoc tumorum genus referri meritò posse ? utique purgantia , eaque repetita , imò spontaneæ diarrhææ , plus simplici vice ejusmodi tumores mihi videntur abstulisse . Et miles , cuius memini , qui , sive a cicutâ , sive errore diætæ , sive spontè , alvum quinquagesies tridui spatio deponendo enormes suos omnium fere colli glandularum tumores amiserat , annon quoque id genus tumorum habuisse videtur ?

Atque ita tibi , vir honoratissime , sufficienter respondisse videor ad ea , quæ ad schirrosos & canctrosos tumores , seu veros , seu falsò sic creditos , seu tandem

eosdem mentitos, spectent. Jamque proprius animi candor viros in arte graves eò redegit, ut cicutæ in his tumoribus curandis efficaciam ignaviùs tueantur, tuerique imò vix audeant ultrà. Ne tamen hæc planta eamdemque, quam toutes sæculis superioribus subierit, subeat denuò sortem, laudant eamdem in ulceribus fistulisque malignis, faucium, linguae, labiorum, genæ, juguli, colli, crurum, brachiorum, universarumque denique corporis partium. Video plures vestrûm velle hâc saltem in parte patrocinari eidem.

Æquum est & cicutæ vires in hisce morbis examinare, ut demùm tibi, vir existimatissime, omni ex parte obediisse videar.

Plura tentavi hujus generis experimenta cum cicutâ, quæ mihi pro votis non cesserunt; tentavere vestrûm plures sine successu; *Viennensium* simile tentamen sæpè frustrà fuit. Attamen & vestri & nostri felicem gavisi sunt tentaminis sui effectum, haud omnino rarum, quem an cicutâ, quâ cicutâ, ediderit, examinandum est.

Liceat examini huic præmittere, quæ nuper *Tom. V Rat. Med. Cap. 6, §. 2* scripsi. « In morbis cutaneis, antiquis,

» ulcerosis, in ulceribus spinæ ventosæ
 » fœdissimis, in tumoribus arthriticis,
 » continuamus id, quod superioribus an-
 » nis innui, pulchras observare, aut emen-
 » dationes, aut curationes eorum, quos
 » consueta artis auxilia haud levaverant,
 » ope sollicitæ continuæque applicatio-
 » nis aquæ calidæ, sive putæ, sive, ne
 » forsan pauperes eam præ nimia simpli-
 » citate negligant, repudientve, medi-
 » catæ redditæ à malvâ, parietariâ,
 » chærophyllo, althæâ, sem. lupini, &c.
 » vetustiores, viros in arte graves, hâc
 » in parte imitati, qui, dum consuetis
 » unguentis, & emplastris ejusmodi ma-
 » la, aut difficultius, aut nullatenus cu-
 » rari cernerent, foimenta aquosa, red-
 » dita ejusmodi vegetabilibus medica-
 » mentosa, vehementer laudârunt: Dios-
 » corides, inquam, Dodonæos, Clu-
 » sios, Lobelios, Sanctorios, & novis-
 » simum auctorem præclarum Morgagni,
 » qui epist. 37, §. 3, calcaream po-
 » dagricorum materiam solâ aquâ calidâ
 » fuisse resolutam refert. »

Ut hoc probem, unam adferam alte-
 ramque historiam: juvencula annos nata
 24 me cum suâ matre convenit 17 Febr.
 1759, genam suam sinistram exhibens,
 ab anno ætatis octavo, scilicet a 16 an-

nis, fœdè exulceratam, sic quidem, ut jam indè oculo suo, quem vehemens inflammatio frequenter occupabat, valdè metueret. Octennium erat, quod incassum fibi esset ptyalismus per mercurium tentatus. Pædore prætereà anxia & tussiens, menses habens raros, alvumque segnissimam, ope medicâ undique egebatur. Exploravi itaque, indè usque ad anni 1760, 25 Martii diem, omnia artis interna externaque auxilia, quæ nota mihi in arte erant, & quibus nonnunquam ejusmodi mala cedere videram. Sæpè sæpiùs spes curæ affulsit, totiesque iterum evanuit. Omnimaximam spem faciebat dragma lapidis medicamentosi Crollii, cum lib. II aquæ mista: verum neque etiam hinc constantia curæ. Itaque a 28 Martii die 1760 cicutæ extratum dedi, augendo quotidiè dosin, donec ad dragmas ejusdem duas pervenerim, eamque dosin diu continuarem. Faciem autem primò emplastro de cicutâ texi, eoque incasso, decocto cicutæ diu noctuque multo tempore fovi. Bimestri elapso, ob febrim quotidianam prurientesque totius corporis pustulas, aliquantis per hanc methodum interrumpere debui; febre cum pustulis devictâ, resumpsi. Cogit deindè vomitus sanguinis & œ-

dema crurum desistere parumper. Sed his mutatis in melius, ad eamdem methodum redditum est. Sub diu protracto cicutæ usu, & tumor ad axillam nascebat, & fluor uteri albus, quod utrumque iterum sub ejusdem continuato usu cepit. Tandem quod sub prioribus medicandi modis dolueramus, idem & hic, ut nunc læti exsultaremus, nunc iterum spem omnem curæ abjiceremus. Cum nihilominus remedii fama me animaret, tertiam hanc ejus resumptionem a 18 Febr. 1761 ad 7 Aug. protraxi. Tunc verò cachexia universa, & non minus dolentia quam irregularia catamenia, à cicutâ abstinerre, urgentibus maximè occurrere symptomatis jusserunt. Mense Octobri a genâ versùs labii inferioris tam internam quam externam partem, subnascebantur bullulæ instar phlyctenarum, quibus succo semper vivi majoris & melle rosaceo profui. Tandem corpore nunc emendatiore ad diem 28 Jan. 1762 faciem fovere cœpi chærophylli siccati decocto, sic ut calidè totâ die ac nocte applicaretur, & sponsa eo madida continuò, non ablato apparatu, renovaretur. Unde intrà 14 dies mutatio adeò insignis, ut quotquot aderant medicinæ studiosi mecum obstupescerent, breviique postea ulcus cernerent

integrè curatum, cicatrice inferiùs tantum paulò rigidiore, & novâ cute cum antiquâ minùs concolore. Sæpius verò postmodùm indiguit medicinâ, priorum cachexiæ symptomatum nunc his, nunc illis redeuntibus, ulcere autem benè clauso.

Puero similiter a longo tempore pertinaciterque affecto solus usus aquæ cum malvâ coctæ, interpolatis purgantibus, curam publicè perfecit.

Puella rustica, propter tumidas induratasque atque hinc indè foedè exulcentes universi colli glandulas, æstate anni 1761, cicutæ extracto & fomento in nostro Nosocomio incassùm tractata, tandem cicutæ valedicto, simili, quâ prior, methodo sesquianno posteà decurso curata est, domumque remissa. Recidivam cessantibus mensibus passa rediit in Nosocomium finiente Octobri 1764. Spatio hoc trimestri, aquosis emollientibusque tantum fovendo ulcera, & menses restituendo, curatam remisimus.

Horrenda manuum crutumque elephantiasis, eaque quinquennii, epoto decocto althææ, partibusque affectis eodem diu ac noctu fotis, balneisque, eosque hâc hyeme curata est, ut vas, libras octo liquidi capiens, deciduis crustis tuberibus-

que expletum fuerit. Renascens crusta eodem auxilio decidit. Si morbus non curetur, id quod ignoro, saltem ab aquæ calidæ usu fotuque capit insigne levamen.

Sed ut hæ curæ successere mihi, ita plures omnem meam operam luserunt; id quod & cicutâ utentibus vestris nostrisque practicis, pari modo contigit.

Attamen mecum, vir clarissime, censes, opinor, id evidenter ex dictis constare, quod, si ejusmodi curæ nonnunquam perficiantur, eæ perficiantur unico aquæ calidæ fotu, sive ea pura fuerit, sive cum uno altero de simplicium cocta. Sed corpora vides uno atque alio tempore huic curæ faventiora. Sic juvencula mea non curabatur olim fotu cicutæ, curabatur autem postmodùm chærophylli decocti fotu. Et, quum constet experientia multiplici, non herbam, sed aquam adduxisse salutem, contingere potest, ut prius applicatum, vel chærophylli, vel althææ, vel malvæ decoctum nil prospicit, postliminio verò prospicit illud cicutæ, & vice versa, ut, hoc primum applicato, non curetur morbus, applicato verò illo deinceps, curetur. Aperte id juvencula, plures alii, evincunt.

Vera proinde ratio patet curationum, quæ cicutam famosam reddidere. Capi-

tur unde *Anglus* ille, contractus atque rigidus totus, cuius restitutio publicas explebat novellas, ad suarum redierit usum partium. Intelligitur cur Parisiensis medicus celeberrimus *Maloët*, *Acad. Reg. Soc. Par.* anno 1728, exsiccationem & contractionem summam cruris, ex quo nata ankylosis erat, ob eamque jam decreta cruris amputatio, tam feliciter reddiderit sanitati. Curam huic similem pro parte jam absolvi balneo aquæ, bis die adhibito, pauculum lavendulæ aquæ addendo. Nec *Cl. Maloët*, nec alii, nec ego ad similia indigemus cicutâ: &, qui similia fotu & balneo cicutæ perfecisse se gloriantur, concedere demùm nobis debent, vi aquæ, & non cicutæ se ea perfecisse.

Quæri tandem possit, *an cicuta nemini unquam mortalium noceat?* Negatur audacter. Sæpius repetita legitur negatio. Utinam demùm id adfirmare seriùs ocyùs non cogeremur! Profectò completa illa omnium totius corporis partium insensibilitas, quæ, nullo ejusmodi morbo prægresso qui simile quid gignat, nata sub usu cicutæ, & pertinax observata *Breslaviæ* fuit, pene cancroso bonum pus jam dante; quemadmodùm aliqui eorum, qui

cicutâ in cancro utuntur, antè mortem experiri solent; ulcere cancroso præ deficiente pure, aut ichore jam sicciori; id quod passim illis contingere cernimus, qui a cancro per cicutam curati dicti, brevè moriuntur; an, inquam, cicutam suspectam reddere non possit?

Socraticum per artus gelu, multis septimanis molestum & ad mortem usque perseverans, in publico civitatis ministro, sub usu cicutæ genitum, bini clari & seniores urbis Medici mecum gemebundi viderunt.

An autem publica, eaque ferè quotidiana exempla non prostent, quæ demonstrent schirrosis & cancrosis mortem a cicutâ accelerari? Luculentâ 30 ferè annorum praxi edoctus, fœminas complures, quas dirum hoc malum affigebat, curâ, ut vocant, palliativâ, bono regimine, per plures minoresque annos in vitâ servabam; quod idem mecum omnes practici se fecisse lætantur: ex quo verò cicuta percrebuit, vidimus has fœminas omnes, quibus & ego, & alii cicutam constanter dedimus, miserè, solitoque citius perire. Quin & nonnullis, indirectè saltem, me cicutâ vehementer nocuisse, est quod acerbè

dolere nunquam satis possim. Quum enim principio ægrè ferretur, me mammæ tumorem mobilem, eumque in corpore unicūm, enucleando curâsse, ac si cicutam suâ private gloriâ intendissem, debui deinceps omnes ejusmodi fœminas cicutâ tractare, pereuntesque cicutâ videre, quas ferro alioquin sanas integrasque conservaturus fuisset. Horrorem profectò omnium per Europam Medicorum animis incutiat oportet memoria tristis millenarum mulierum, quas ab elapso retrò septennio hæc planta aut longè præmaturius occiderit, aut unico salubri ferro detraxerit.

Nunc ipse per te, æquissime ac candidissime Tralles, judices velim, utrum cicuta nocuerit mortalibus, nec ne?

Atque ita abundè me ad omnia tua respondisse arbitror. Interim, vir amicissime, miserandam meam cogita sortem, quem, quod torrenti me opponam, odium iniquè prosequitur, calumniæ impunè lacerant, & omne deserit tutamen. Vivo nihilominus, & tranquillus. Omnipotentis in sinu recumbo. Illi, illi, inquam, unicè debeo, quâ ducor, animi fortitudinem, majorem debiturus, dum quæ impendunt mihi supervenerint. Non

enim cedam ultroneus. Professoriam spar-
tam, quoad licuerit, ornabo. Vale, ama
me, perpetuòque in tuis habeto.

Dabam Viennæ 3 Feb. 1765.

FINIS.

**ANTONII DE HAEN,
DE MAGIA
LIBER.**

ЛІБАН ІСІ ШКОТКА
А. ПОЛАМЕСС
Я ЗІ СУД

ANTONII DE HAEN,
S. C. R. A. MAJESTATIS
CONSILIARII ET ARCHIATRI,
NEC NON
MEDICINÆ IN UNIVERSITATE
VIENNENSI
PROFESSORIS PRIMARII,
PLURIMUM ERUDITORUM SOCIETATUM
SOCII,
D E M A G I A
L I B E R.




PARISIIS,

Apud P. Fr. DIDOT junorem , Bibliopolam , ad ripam
Augustinianorum , propè pontem Sancti Michaëlis ,
sub signo Sancti Augustini.

M. DCC. LXXVII.

CUM APPROBATIONE , ET PRIVILEGIO REGIS.



EMINENTISSIMO PRINCIPI
ANTONIO EUGENIO,
VICE-COMITI,
S. R. E. CARDINALI
AMPLISSIMO,
ANTONIUS DE HAEN.

*MEDICAS meas qualescumque
lucubrationes tibi, CARDINALIS
EMINENTISSIME, dicare ausus
fui, & partim quidem quod non in
solis medicis, verum etiam in di-
vinis Codicibus, in sacrosanctæ Ec-
clesiæ doctrinâ, inque fontibus theo-*
a iiij

vj E P I S T O L A.

*logicis, haud omnino oscitanter ver-
sarentur; quorum sine ope aut in-
telligere, aut exponere eum qui de
magia faciendus erat sermonem,
æquè vanè quam arroganter susce-
pissim: partim quod occasio nulla
videretur opportunior tibi sinceras
meas de tuâ erga me humanitate, be-
nevolentia, familiaritate atque existi-
matione gratias publicè testificandi.*

*Morem porrò iis penè cunctis fa-
miliarem, qui summis in Ecclesiâ
reve publicâ viris suos dicant de-
dicantque labores, in condignas illis
laudes exspatiandi, tenuior hæc mea
dedicatio minimè imitabitur; cum
quod laudum humanarum sis osor
acerrimus, tūm quod ad tuas, EMI-
NENTISSIME ECCLESIÆ PRIN-
CEPS, laudes, pro dignitate cele-
brandas, non meâ rauçâ tenuique fissi-
tulâ, sed tubâ grandinosâ foret opus.
Vale, & ultra merita amare me perge.*

Dabam Viennæ XIV Kal. Oct. M. DCC. LXXIV.



P R Æ F A T I O.

MATERIEI per tractationem edo, cuius vel titulus ipse forsan offendet; siquidem post toties recusam magiam, post acres adeò & serias, de eādem vel existente, vel non existente lites, eò demùm nunc vergit complurium sapientum opinio, ut neque unquam extitisse, neque hodiè extare, imò neque existere posse, hæc ars detestanda videatur; eòque magis, quòd ipsa hæc negans opinio, ad tranquillitatem reipublicæ conservandam tutissima multis appareat, & ad innumera judicia iniqua, rogosque immeritos præveniendos aptissima.

Si hæc opinio veritati niteretur, digna profectò foret, quam ulnis amplectemur ambabus, quam rostris unguibusque defenderemus.

Nullus ultrà magiæ rumor , nulla magorum atque fagarum suspicio foret ; æternâ tandem oblivione sepelirentur criminalia ecclesiasticorum politicorumque tribunalium acta , omnino numeroſa quæ non niſi in judicum opprobrium , universique generis humani dedecus , extare dolemus .

Minimè verò hujus erit felicitatis & usûs hæc eadem opinio , si illi , quâ fine stabile nihil , veritas defit . Et qui extantem credunt , qui omnipotentis Dei honori ac majestati , Ecclesiæque autoritati , detrahi per inficiantem sententiam arbitrantur , suam utique vindicabunt ; veritique ne , si opinio negans invaluerit , alicubi terrarum impunè exerceatur magia , metuque pœnarum soluta increbrescat , nullum non movebunt lapidem , ut quidquid hâc in quæſtione & verum , & demonſtatum habetur , clarâ in luce collocetur . Utinam

modò demonstrari sic magia posset , ut quæ in tribunibus per negantem sententiam nunc suppressa creduntur , non videantur in innocentium detrimentum repullulare ! Utinam ea esset hujus demonstrationis vis , ut maleficorum rumorem , atque suspicionem , longè certius suffocaret , quàm hucusque opposita sententia potuit ! Porrò hoc factu impossibile esse nullus video , quin perfici facili negotio feliciter reor posse .

Exemplum hîc liceat ex medicinâ petere , & ad melancholiconrum me convertere gentem . Centeni centenos mihi morbos quibus impetri se conqueruntur , enarrant tantâ emphasi , tamque serio , ut ni admisero , irascantur , ni credidero , inhumanum me appellant ineptumque medicum . Nihil interim mihi compertius est , quàm quidquid hæc queribunda plebs omnis effutit , aut totum , aut pro

parte saltem, non nisi luxatae phantasiæ esse progeniem. Alterutra proindè ineunda mihi via est: vel enim, quo unico iectu præscindam totum, veram melancholiæ negabo; vel sic melancholiæ ipsis admittam, ut desinere discant eadem abuti. Si viam elegerim priorem, veritati detrahiam, cum verâ melancholiâ nihil certius existat, meosque imaginosos homines, quibus vera melancholia in confessò est, potius agam in furem: posteriorem autem viam si prætulerim, morbum melancholicum, eumque polymorphum illis dabo & explicabo; ne verò explicitatâ ipsis veritate abutantur, blando prudentique sermone conabor vim imaginationis paulatim infirmare, inque curæ spem erigere, sic ut ipsi tandem quantum melancholiæ verè existentis amplificatione a vero aberrarint, sibique nocuerint, velint, nolint fateantur.

Hunc in modum magiam trac-
tare, & oportet, & mihi animus
est. Existere eamdem reor. Pro-
bare id conabor sic, ut ad super-
stitionem, atque credulitatem ho-
minum diminuendam, & demùm
tollendam, longè efficacior hæc
demonstratio futura sit, quàm un-
quam ab ejusdem negatione spe-
rari potuisset. Multa quidem pro-
mitto, sed promissi vadem habeo,
eumque eximum, virum reveren-
dum *Fredericum Spee*, qui ineunte
sæculo XVII diversis in locis saga-
rum nonnullas ad rogum usque
concomitatus est. De hoc autem
Jesuitâ egregio quædam hîc me-
memorare oportet.

Edidit anno 1631 suppresso no-
mine libellum 459 paginarum in-8°,
cui titulus : *Cautio criminalis, seu*
de processibus contra sagas liber, ad
magistratus Germaniæ, hoc tempore
necessarius, tûm autem consiliariis
& confessariis principum, inquisito-

ribus, judicibus, advocatis, confessariis reorum, concionatoribus, cæterisque lectoru utilissimus. Posuit autem pro epitome, sive summâ totius libri, verba *Salomonis Eccl. III, v. 16*: Vidi sub sole in loco judicii impietatem, & in loco justitiae iniquitatem. Tum & ex *Psalmo III v. 10*: Et nunc reges intelligite: erudimini, qui judicatis terram.

Liber hic magnæ famæ in Germaniâ fuit, ast, quod miremur, adeò in vicinâ Galliâ exiguae, ut neque *Ludovicus Moreri in Dictionario edit. 1740*, nec ejus editum anno 1749 *Supplementum*, autrem ejusque librum cognoverint. Æternæ verò memorie eundem sacravit eruditissimus vir *G. G. Leibnitz*, *Essai de Théodicée*, n° 96, 97, edit. Amst. 1747, Tom. I, p. 158.
« Hujus egregii viri, autoris quippe libri cui titulus, *Cautio criminallis*, &c. memoria, ait *Leibnitzius*, grata adhuc debet esse eruditis,

» judicioque præditis viris. Multæ
» famæ ejus opus fuit, pluresque in
» linguas conversum. Rescivi a
» magno electore *Moguntiæ*....
» hunc rever. virum cum tempore
» rabiei in magos esset in *Franco-*
» *niam*, horumque plures esset ad ro-
» gum usque comitatus, quos eo
» crimine immunes esse censeret,
» tantâ in eos pietate commotum
» fuisse, ut eâ etiam temporum ini-
» quitate, in quâ ejusmodi testimo-
» nium periculo non vacabat, hunc
» librum, ast anonymum ederet,
» qui profuit profecto multùm,
» mentemque sic mutavit huic....
» Electori, ut, vix autoritatem
» adeptus, ne qui ultra cremaren-
» tur interdixerit, imitatoresque
» habuerit duces *Brunopolenses*,
» maximamque principum ac ma-
» gistratum *Germaniæ* partem. »
Liber LII Capita, seu *Dubia* con-
tinet, quæ eum in modum resolvit
autor, ut necesse sit utriusque fori

judices, qui moderato animo hæc perolvunt, de eo planè convinci, quod cuicumque, sive accusantium, sive accusatorum de magiâ examini sit supersedendum, donec facti major probabilitas, ac ferè certitudo, constiterit aliundè. Hæc quoque magni Estii sententia erat, de quo viro plura in operis mei tertîâ parte.

Porrò si hic Liber, Leibnitzio teste, plures Ecclesiæ reique publicæ principes ac magistratus, sic illustravit, ut judicum inquisitorumque superstitioni, præoccupationi, avaritiæ, ac rabiei in sagas indomabili, frenum injicientes, rogos penè extinxerint omnes; id profectò non fecit, quod omnem negaret, magicam artem, sed quod contra religionis, autoritatis & experientiæ cujuscumque viros, eamdem sic existentem affirmaret, ut citra temeritatem, ac præposteri judicii notam, ut ait, negari non posset.

Quapropter in Ecclesiæ ac rei-publicæ emolumentum optandum foret, ut ipsum hunc *Spei* librum reges omnes, ac magistratus universæ *Europæ*, in suam singuli linguam verti, & singulis tribunibus in normam agendi, quam ultra citraque pergere nefas truderent. Cessarent brevè digni nostri autoris exclamationes, quòd *sub sole* cum Salomone *vidisset in loco judicii impietatem.*

At verò si tam præclarum sit *Spei* opus, inquiet quis, cur aliud nunc publico obtruditur? Inanis omnino videtur ac superfluus esse labor. Haud ita putaverim. Jam ferè sesquialtero sæculo *Spei* ossa tegit humus, memoriaque viri, quæ in tribunalibus debuisset æterna esse, ita periit, ut per aëta criminalia, ipsi longè posteriora, utrum vel ipse, vel ejusdem libellus unquam lucem viderint aliæ regiones dubitarent. Suppressa qui-

dem superstitione judicatum, non delata; damnata illorum avaritia, non eradicata fuit. Supremâ potestate ad hæc iterum obdormiscente, vitia hæc repullularunt, *Spanosque* suffocarunt labores. Planè invitus hoc demonstro. Sæculum fortè elapsum erat, quod laudatus *Moguntinus* Elector *Joan. Phil. de Schoenborn*, tunc verò adhuc *Hyperbolensis* episcopus, omnis sagarum examini *Hyperboli* superfedere jussisset, ac magicos interdixisset processus; quandò anno 1749, die 21 mensis Junii, *Maria Renata*, septuagenaria, vestalis *Unterzellensis*, ut saga, *Hyperboli* combusta est. Quid porrò indè? Repullulanti malo, funditus æternumque eradicando credi cettum est in *Italiâ*, & sensim alibi, nihil potentius fore, quām omnis magiæ negationem; utpote quā concessā, omnis maleficorum accusatio, omnis eorumdem combustio.

tio, sponte fatiscerent. Hic nunc est rerum status: tota de magia quæstio ex eo consideranda est. Quantacumque laude *Speanum* opus ornavi, quantumcumque emolumentum ex eodem merito expecto, non ex æquo nunc & abusus magiae tollet, & eamdem docebit existentem; id quod conjungi oportere utrumque superius ostendi ab illis, quibus magiam refringere animus est.

Dico itaque quam hic oppugno opinionem, præterquam quod citra injuriam erga Deum, sanctissimamque nostram religionem, defendi posse vix videatur, planè nihil probare, cum nimium probet. Nimis in confessio apud eruditos, haud sanè paucos, est hanc diabolicam artem existere: indubitatis experimentis cum docti, tum indocti, idem per omnia sæcula agnoverunt: ipsique judices, quorum furorem taxavimus, ad ejus-

xvij P RÆFATI O.

modi extrema nunquam pervenis-
sent , nisi aliquando veros malefi-
cos indubiis deprehendissent argu-
mentis. Neque enim inter *Spren-*
geri , *Institoris* , *Delrii* , aliorum-
que deliramenta , fidem ac verita-
tem nonnullarum historiarum infi-
cias facile ibis. His ergo si omnem
magiam injuriâ neges , mox extra-
vagari , & quod graviter in uno
fallaris neque ullam in cæteris
fidem mereri certò videbere : sic
ut quò magiam pertinaciùs nega-
veris , eò sis eosdem redditurus obf-
tinatiores. Veritatem enim persua-
dere conaris , negando veritatem ;
quosque de veritate rei convince-
re studes , his ipsius originationem
negas. Qualisnam hic persuadendi
modus ? Quæ spes unquam convin-
cendi ? Simplex veritas est , nec se
defendi unquam erubescit , nec
mutilata defendi amat. Verùm ita-
que fac homines intelligent : ex
vero clarè perspecto qui obfuscant

contaminarintque illud, quot falsa, incerta atque indecora illi commiscuerint, quot victimas innocentibus furori suo mactarint, quis eumdem corrigendi evitandique sit modus, fac intelligent, & convincantur.

Hic demum meus erit magiam tractandi modus, ad quem nonnulla experientia me duxit. Erat mihi, unà cum ill. L. B. Van-Swieten, ab aug. nostrâ Imperatrice ac Reginâ datum in mandatis ut tres fœminas rogo, quod sagæ haberentur, damnatas, ejusque jussu ex *Croatia* in meum Nosocomium ductas, an veræ sagæ essent, nec ne examinaremus. Nos ambo de magiâ existente convicti, has fœminas hoc crimine immunes esse iudicavimus; easdem proinde ut innocentibus, & munificentiae regiae suæ participes, suis ædibus familiisque Augusta restituit. Aptos profectò nos ad hoc examen non mu-

tilata, sed integra veritas reddidit;
& ut ejusmodi millenas absolvere-
mus, aptavit. Fatendum interim
est intricatum sæpè negotium esse,
gravemque, ac nonnunquam mul-
tiplicem esse quæstionem, quæ
haud a supremâ duntaxat potestate,
sed & a rever. ecclesiasticis, at-
que privatis hominibus, medico
proponatur; ita ut haud omnino
mediocrem oporteat eum in hâc
materie operam locare. Hâc de
causâ eamdem ab incunabulis re-
petii, & veritatem rerum integrum
per omnia sequutus, ad postremam
hanc ætatem perduxī; a *Rever. Pa-*
tre Spee in eo dissimilis, quod ille
iis scribens temporibus quibus
pauci existebant qui magiam ne-
garent, eamdem non probavit, sed
ut demonstratam præsupposuit: ego
verò in eam incidens temporum
conditionem, in quâ opinio negans
cùm vulgatior fit, tûm expurgan-
dis tribunalibus ineptior, sic ma-

giam propono, ut primum quid
veri in eâ sit, tâm apertè ac fusè,
quàm fortè fecerit quisquam expo-
nam; & deindè ex hoc capite ritè
probato, omnem superstitionem,
quamcumque temerariam suspicio-
nem, omnem in putatios magos
sagasque immanitatem ac furorem,
averruncem; sic tamen ut si rariore
casu alicubi ejusmodi execranda
impietas committeretur, ea contra
divinarum, ecclesiasticarum, ac
politigarum legum intentionem
impunitate minimè gauderet, quâ
gavisura foret, si opinio negans
prædominaretur,



ORDO OPERIS.

EXORDIUM.

MAGIÆ species , ac singulæ speciei definitio. Motæ de eâdem existente vel non existente lites. Operis divisio. Pag. i

P A R S I.

C A P. I.

Argumenta illorum qui magiam , nunc descriptam , verè existentem contendunt ; ac primò quidem ea quæ ex utroque Codice sacro petuntur. §

C A P. II.

Argumenta eorumdem ex Doctrinâ , Consuetudine & Legibus Ecclesiæ , Patrumque Doctrinâ. 31

C A P. III.

Magiam verè existentem confirmare videntur medicorum inclytorum experientia ,

ORDO OPERIS. xxij

*virorum sapientum observatio , accurra-
tissimorum historiographorum intemerata
fides.* 46

P A R S I I.

C A P. I.

*De præcipuis scriptoribus qui magiam , ue-
rè existentem artem , negaverunt.* 63

C A P. II.

*Objectiones quas recensisti Capite proximè
priore autores contra magiam fecerunt ,
& primò quidem ex sacrâ Scripturâ. Sub-
junguntur ad singulas responsa.* 78

C A P. III.

*Responsio ad objectiones contra magiam ,
petitas a doctrinâ , consuetudine & le-
gibus Ecclesiæ , sanctorumque Patrum
autoritate.* 88

P A R S I I I.

C A P. I.

Elucidatio quorundam quæ primâ & se-

cundâ parte dicta sunt : undè quid , au-
ditâ utrâque parte , tuid credendum sit
spontè patet.

176

C A P. II.

*Quàm prudenter & circonspectè auditio ma-
giæ rumore , incedere oporteat : & an
signa dentur quibus magiam veram a
suppositâ internoscere possimus ? Sapien-
tissima Estii monita. Spei declamatio de
judicum furore in homines de magiâ
falsò plerumque accusatos.*

194

C A P. III.

*Eviētum cùm sit , quamvis rarius , nonnun-
quam tamen , morbos magicos dari , an
eosdem medicus certis signis a morbis na-
turalibus discriminat ? De triplici eorum-
dem curatione discussio.*

202



DE



DE MAGIA.

P A R S I.

P R O C E M I U M.

Magiæ species, ac singulæ speciei definitio. Motæ de cādem existente vel non existente lites. Operis divisio.

TRES quæstiones sunt, quæ & ad *Theologiam* potissimum, & pro parte ad *Jurisprudentiam* propriū spectare, quām ad *Medicinam*, videntur; quibus nihilominus intermisceri etiam *Medicos* haud per raro oportet. Ac prima quidem hominum a dæmone obsessorum est: hanc, quā *Medicus*, solvere conatus sum *Rat. Med. Part. XV, Cap. IV.* Altera magiam spectat; quæ hoc opere pertractatur. Tertia novorum miraculorum examinat veritatem: de hâc tertiatâ fortè posteà,

A

si Deus dignetur conservare vitam viresque.

Magia, Goëtia, Theurgia, diversa nomina sunt, diversam aliquando, sæpè eamdem habentia significationem. Videatur hîc contrà *Porphyrium Platonicum* S. Pater *Augustinus*, Lib. X, de Civ. Dei, Cap. IX, de Moysis miraculis loquens: « Hæc, inquit, & alia multa humanis juscemodi, fiebant ad commendandum unius Dei veri cultum, & multorum, falsorumque prohibendum. Fiebant autem tem simplici fide, atque fiduciâ pietatis, non incantationibus & carminibus, nefariæ curiositatis arte compositis, quam vel *magiam*, vel detestabiliore nomine *goëtiam*, vel honorabiliore nomine *theurgiam*, vocant: qui quasi co-nantur ista discernere, & illicitis artibus deditos *alios damnabiles*, quos & maleficos vulgus appellat (hos enim ad *goëtiam* pertinere dicunt,) *alios autem laudabiles* videri volunt, quibus *theurgiam* deputant; cum sint utrique ritibus fallacibus dæmonum obstricti, sub nominibus angelorum. »

In Edit. Op. Aug. Venetâ anni 1764, adjecta hæc nota est: « *Goëtia* genus magiae est, quæ fit per excitationem mortuorum, sic dicta a planctu circâ sepul-

» *cra. Theurgia* verò, quasi *divina operatio*, appellatur ea quâ dii, seu dæmones, certis sacrificiis & ceremoniis, Paganorum opinione bonis, invocantur. *

Ne autem nominum & horum, & aliorum, continuâ repetitione sermonem tædiosum reddam, confusumque lectorem, *Magorum, Divinorum, Pythonum, Augurum, Sagarum, Strigum*, & quæ plura id genus sint, nomine eos appellabo, qui quodam, quod aiunt, sive implicito, sive explicito pacto, cum Angelo prævaricatore inito, res nonnullas, Deo permittente, perpetrant quæ vires excedunt humanas, seu in emolumentum mortaliū, seu in eorumdem detrimentum: qualia narrantur esse morbos hominibus pecudibusque aut inferre, aut auferre; quid rescire a mortuis; excitare, moderari, auferre ventos, tonitrua, fulgura, grandines, pluvias; annunciare futura; per aëra nunc imaginariè, nunc verè vehi a diabolo; impedire consummationem matrimonii; indicare res perditas; infanda cum dæmone exercere, & quæ plura talia.

Undè primùm quæritur an detestanda ejusmodi ars, hoc definita modo, verè extet?

Veros magos dari, eo quo explicui
A ij

sensu , affirmant plurimi , multi autem negant : quod autem in hoc mirabile , utriusque , & qui affirment , & qui negent , iisdem argumentis , eodem fonte scaturientibus probari , atque ipso sole clarius evinci , suam singuli sententiam statuunt . Utriusque Testamenti pagina , scilicet divina & apostolica traditio , & ecclesiæ universæ sive in Conciliis adunatae , sive per suas apostolicas traditiones instructæ , sive sua per orbem universum unitâ patrum , doctorum , ac theologorum voce loquentis , sententia ; historia omnium sæculorum , ipsum demum cum judicum testimonium , tum accusatorum sive confessio , sive negatio , fundamenta argumentandi utrisque præbent .

Desperandum profectò hinc foret , nisi & in theologicis , in physicis , & in medicis , visum jam pluries esset , ut eorum , qui iisdem armis instructi manus conserrent , alter alterum vinceret , ac justam de hoste victoriam reportaret . Igitur quid Scriptura sacra , quid traditio , quid historia profana , experientiaque docuerit eos qui affirment , primâ parte sollicitè inquiram . In parte alterâ quid cuncta hæc sacra , profanaque adminicula eis qui veram magiam negent , persuaserint . In tertiat denique , auditâ parte utrâque , ju-

dicum discretis sapientibusque lectoribus
relinquam.

PRIMÆ PARTIS

CAP. I.

*Argumenta illorum qui magiam, nunc
descriptam, verè existentem contendunt;
ac primò quidem ea quæ ex utroque Co-
dice sacro petuntur.*

§. I. IN referendo eo quod ex sanctæ Scripturæ *vulgatā editione* affertur, ope-
ræ pretium erit textūs origines consulere,
ne qua aut offendio, aut negligentiae ac-
cusatio sit. Magiam enim & Catholici ne-
gārunt, & Acatholici: *vulgatæ* priores
acquiescunt, posteriores minimè. Hinc
usui venit nunc mihi, in quod juvenis
haud mediocrem operam locavi, lingua-
rum orientalium studium, quodque proin-
dē diu inter cæteras lucubrationes semise-
pultum, ad incudem revocavi.

Primus locus sanctæ Scripturæ inveni-
tur *Libr. Exodi Cap. VII & VIII.* Cùm
Aaronis virga in colubrem mutata esset:
*vocavit autem Pharaon sapientes & malefi-
cos: & fecerunt etiam ipsi, per incanta-
tiones ægyptiacas, & arcana quadam,
similia.* Cùm *Moyses & Aaron* aquam in

6 DE MAGIA.

sanguinem mutassent, feceruntque similiter malefici Ægyptiorum incantationibus suis. Cùm iidem sancti viri ranas produxissent, fecerunt autem & malefici per incantationes suas similiter, eduxeruntque ranas super terram Ægypti. Cùm tandem Moyses & Aaron scinipes produxissent, feceruntque similiter malefici incantationibus suis, ut educerent scinipes, & non potuerunt . . . & dixerunt malefici ad Pharaonem: *digitus Dei est hic.*

Nomina hæc tria in textu hebraïco חֶרְטָמִים & מַכְשִׁפִּים, חֲכָמִים incantatores, magos, genethliacos, præstigatores, promiscue significant. Quod autem hic legitur feceruntque similiter, scriptores qui magiam negant, censem sic intelligendum esse, quod magi non idem per omnia, ut Moyses & Aaron fecerint, sed quid, quod utcumque videretur simile esse: textus hebraicus ubique tamen habet: בֵּן וַעֲשֵׂה & fecerunt sic, ut Moyses & Aaron. Apparet ergo magos, Deo permittente, auxilio diaboli, & serpentes, seu dracones, & ranas, non creatas a diabolo, sed ejus ope raptim collectas, exhibuisse Pharaoni, ut indurarent cor ejus: aquas verò recenter effossas, & necdum rubras, (fluvius enim Nilus, ejus-

que rivi , nec non omnia stagna , *Moysis* & *Aaronis* opera jam rubuerunt penitus , & putruerunt ,) rubro quoque colore infectas putridasque , *Pharaonis Ægyptiorum* que adstantium oculis , ac naribus , apposuisse : quæ autem amamus eo modo & rubra & putrida ne a summo quidem præstigiatore , physices ac chemiæ etiam summè gnaro , unico momento , perque regnum universum , præstari posse .

Quod si quem suspicio hîc tenet ac si , ad magorum firmissimam assertionem , & *Pharao* rex , & *Ægyptiaci* aulici , processque , se serpentes , se ranas , se aquas colore rubras , atque odore putridas , vehementi vi imaginationis videre credidissent , qualem vim imaginationis *Paracelsus* olim , & suo sæculo *Baco Verulamius* , & hoc sæculo *Andreas* statuerunt , de quâ postea latius ; negamus hujus possibilitatem . Et quidem primò statuimus : ut vis firmissimæ hujusmodi , indebilisque imaginationis , aliquem inter mortales occupet , oportere eundem hominem nervis tenerimum esse , nec per omnium sæculorum exempla tantæ imaginationis vim non nisi in paucis eorum , quos hypochondriacos , hystericasque medicina vocat , animadversam esse . Adeoque rogamus quâ autoritate , quâve ratione vere

physicâ , statuere audeant , quod & raro ,
& in perpaucis duntaxat , per tot sæcula
observatum est , id universam gentem cum
hypochondriacam , tum ab hypochondriâ
remotissimam , tantoperè invasisse ,
ut inter tot hominum millones ne unicus
quibus extaret , qui regem , qui regni pro-
ceres , populique duces , de fuso monuis-
set ? Secundò . Si *Ægyptios* , a puero ad
senem usque , vis adeò enormis imagina-
tionis excæcasset , ut serpentes , ranaeque
quæ non aderant , adesse crederent ; ut-
que aquam colore odoreque carentem ,
& rubram , & putrem vocarent ; cur non
continuavit hæc imaginationis vis , à magis
in cæteros propagata , ut æquè sciniphas
jam se videre , quemadmodum olim ra-
nas serpentesque sibi fortiter imagina-
rentur , præsertim cum magi nunc idem
quod priùs molirentur , tentarentque sci-
niphes producere ? Tertiò . Si rariore casu
atrabiliarii hominis phantasia eousque læ-
sa est , ut , quod minimè adest , juret
adesse , idemque velit singulis persuadere ;
ejus profectò mens nullis aliis idæis , hanc
delentibus , aut per longum tempus , aut
per omnem vitam , occupari consuevit :
incredibilis imaginationis vi serpentes se
videre universa *Ægyptus* rata , mox oblita
serpentum , non nisi aquas rubras putres-

que videt, olsacitque; breve post, ac si nunquam, aut serpentum, aut mutatæ aquæ idæam concepisset, nunc nihil nisi ranas contuetur. An unquam *ὑποχρεωτάτων* idæa ejusmodi obfirmata, brevi tempore in aliam, æquè fortem, convertatur, novisse illos oportuisset, qui mœsti laborum recordantur, quos ad mutantam hypochondriacorum phantasiam læsam frustraneos quondam admoverunt. Nec dicant debiliorem idæam fortiore pelli, adeoque idæam serpentum deletam ab eâ aquarum; hanc iterum a superveniente idæâ ranarum: nam, fatentibus ipsis, prima serpentum idæa non potuit, nisi invicibilis esse: ergo quod de alterâ tertiacque fabulantur, suis ipsorum principiis adversatur.

Si verò sint qui putent magos neque produxisse aut serpentes, aut mutatas aquas, aut ranas veras, neque easdem imaginationi *Pharaonis* Ægyptiorumque repræsentasse; sed potius eorum oculos sic fascinasse, ac si reverâ talia viderent; his dico primò ejusmodi explanationem verbo divino adversari, quod dicit, repetitque, magos non fantastico apparatu, sed ipsâ suâ naturâ verè existentia animalia produxisse: quid enim clarius exprimere textus posset? *Eduxer-*

runtque ranas super terram Ægypti. Qui magiam negantes historias similes referunt in suis scriptis, eâ utuntur prudenter, ut addant hoc vel illud contingere visum esse, magos hæc vel illa ignaræ plebi, vel phantastico homini, falsò persuasisse. Verbum Dei simplicius enarrat magos hæc fecisse, magos fecisse quæ Moses cum fratre fecisset, magos eduxisse ranas super terram Ægypti. Respondeo secundò quemadmodum qui, ut scopulum evadant, in alterum impingentes nihil lucrati fuerunt, ita quoque qui nefateantur magos similia produxisse, præferunt sic ejusmodi potestatem diaboli, in phantasiam omnium vasti hujus regni incolarum, ut postmodum, urgentibus aliis argumentis, hanc potestatem totam negent: undè eorum inconstantia nihil hic probat, ut in parte alterâ constabit.

Concludimus itaque ex hoc textu, Dei justissimo judicio permisum Angelis prævaricatoribus fuisse, ut ipsorum operâ magi quædam efficerent, quæ superarent vires humanas; haud verò ultrà tertiam Ægypti plagam: ad quartam enim, & sequentes sex, visum Deo fuit hanc ipsis negare potestatem.

§. II. Censemus magiam veram designari *Deuteronomii Libri Cap. XIII. Si*

surrexerit, inquit Deus, in medio tui prophetes, aut qui somnium vidisse se dicat, & prædixerit signum atque portentum, & evenerit quod locutus est, & dixerit tibi: Eamus, ut sequamur Deos alienos, quos ignoras, & serviamus eis: non audies verba prophetæ illius, aut somniatoris: quia tentat vos Dominus Deus vester, ut palam fiat utrum diligatis eum. Prophetes quippe ille, vel somniator, Dei operatione, & revelatione, futura vaticinabatur, eaque vera, quibus Deus populi sui erga se fidem probare volebat. Sed de hac difficiili quæstione, quomodo magi futura, quæ Deo soli nota, verè vaticinari queant, latius posteà.

§. III. Legitur *Deuteronomii Cap. XVIII, v. 9.* Quandò ingressus fueris terram quam Dominus Deus dabit tibi, cave ne imitari velis abominationes illarum gentium: nec inveniatur in te qui lustret filium suum, aut filiam, ducens per ignem, aut qui ariolos sciscitetur, & observet somnia atque auguria, nec sit maleficus, nec incantator, nec qui Pythones consulat, nec divinos, nec quærat à mortuis veritatem. . . . Gentes istæ, quarum possidebitis ieram, augures & divinos audiunt.

In hebreo est: Nec inveniatur in te
Avj

transire faciens filium suum, & filiam suam in igne, divinans divinationes. Divinationes, **נִסְמָךְ** vel in bonam sumuntur, vel in malam partem. In bonam *Ezech. XXI, v. 21, & Prov. XVI, v. 10*, significantes sagacitatem, & veluti ab oraculo sapientiam: in malam verò, & Deo abominabilem, ut h̄ic. *LXX* *Interpretes* habent quoque μαντευούσιος μαντείων, *divinans divinationem*, idque diversimodè: est enim ἀξιομαντεία, divinatio per securim, aut asciam: ἀσφαλτεία, quæ est ex astrorum contemplatione futurorum prædictio: βελομαντική, seu παρδομαντική, quam *Scapula* ex *B. Hyeron.* in *Cap. 21 Ezech.* exponit id divinationis genus esse, ubi mittuntur sagittæ in pharetram, & commiscentur inscriptæ nominibus singulorum, ut videatur cuius sagitta exeat, & quæ priùs civitas debeat expugnari. Νεκρομαντίον, vel νεκροῦ μητέρα vaticinatio ex evocatis mortuis; responsum quod inferorum umbræ evocatæ de futuris reddunt. Οἰονομαντεία, vaticinium ex auspiciis, seu ex avibus. Πυρ μαντεία ignispicium. Στερεόμαντις, ex cuius pectore dæmon responsa dat. Ψυχομαντεῖον, locus ubi animæ sacrificiis evocatæ responsa dabant consulentibus. Hæc semel explicanda erant, ne conti-

nuò in sequentibus ea repeteremus. Quod autem *divinans divinationes* in nostro textu pravis fuerit abominandiisque artificiis usus, arguit data mortis a Deo sententia. Redeainus ad textum hebraicum.

Præstigiator בָּשְׂרֵב Buxtorfius in hoc nomen exponit ejus significationem, ut hominis qui mirâ dexteritate oculos spectantium eludit: verùm secundùm *Aben-Esra*, & *Rabbi Salomonem*, explicat magis in malam partem, ut qui ex nubibus, tempestate & astris, prophetam agit; & quidem pravâ, vel arte, vel intentione, cùm occidere ejusmodi *præstigiatorem* Deus jubeat.

LXX habent: Κανδονίζων, ominatus. Codex Alexandrinus: κανδονίζων, & ominatus. *Scapulæ augur est*, Schrevelio ariolus. LXX autem Interpretes vocem בָּשְׂרֵב in malam partem accepere: nec mirūm, cùm mortis pœnam illi indixerit Deus. Ut profectò mirer hanc vocem ab iis qui negant magiam, in bonam partem accipi pro pantomimo, sive gesticulatore.

Et Augur וּמַנְחָה accipitur in malam partem pro *augurari pravo artificio*, ut hīc, quia morte punitur. Accipitur & in bonam partem pro *inspiratione propheta-*

Balaam , famosus in *Moabitide* regio-
ne vel magus , vel propheta Dei , (de
hoc enim multa est eruditorum dissensio)
quem Deus hâc occasione suo vaticinari
spiritu voluit , vilis ac vendibilis animi
homo , quem ob id *Israëlitæ* , regni *Moa-*
bitidis potiti , occiderunt ; hic , inquam ,
dùm in suo a Deo sibi inspirato vaticinio
in hæc verba erumperet : *Non est augurium*
in Jacob , *nec divinatio in Israël* , eadem
verba adhibet de auguriis & divinationi-

bus magicis, quibus anteà divinas insigni-
verat inspirationes. נָחַשׁ & קְסֻפָּה Græ-
cias textus pariter οὐνομὰς & μαρτεῖα.
Sunt ergo eadem sacræ Scripturæ verba,
quibus exprimitur modus, quo homini-
bus, aut revelentur secreta, aut superantes
humanam naturam vires suppeditentur a
Spiritū Sancto: & quo abdita pandendi,
ac naturam superantia patrandi potestas
impiis hominibus datur, non a Spiritū
Sancto, sed diabolico; quando, quam-
diù, ac quantum, ipsis permittit Deus.

Et maleficus וּמַכְשֵׁף. Significat כְּשֵׁף
in *Pihel præstigiis usus sum*. Dicitur de
iis, qui mutant & transformant res natu-
rales ad adspectum oculi. Sic *Aben-Esra*
in *Exodi VII. LXX* φαρμακός. Is est qui
vel medicamenta, vel venena parat; pos-
teriorē sensu accipiendus hoc loco vide-
tur. Idem ille, qui in textu hebraico *præstigia-*
tōr dictus est, & in Vulgatā *incanta-*
tōr. Unde videntur magorum nonnulli
venena cognovisse, quibus homines in-
cantarent.

Nec incantator; hoc mox vidimus. *Nec*
qui pythones consulat, nec divinos. Hebr.
וּחֶבֶר חֶבֶר. Significat חֶבֶר & societa-
tem conjunctionemque, & incantatio-
nem, vel adjurando factam. Non capio cur

linguæ hebraicæ peritissimus *Arias Montanus* hunc textūs locum reddat jungens junctionem, ut & in *Psalmo LVIII*, v. 6. Vix enim significationem habere videtur: maximè dūm idem ipse *Isaiæ XXXVIII*, v. 9, hanc vocem ipsam per *incantatores*, alterā scilicet ejus significatione, interpretatus sit. *Buxtorf.* & quos excitat Rabbini cum eo, reddunt *incantans incantationes*. LXX ἐπαίδων ἐπαίδην, . . *Incantans incantationem*. Ab ἐιδω, vel potius ab αἰδω. cano; & cum præpositione ἐπὶ, *cantum laudabilem quemcunque cano*, vel & *cantum pravum*, seu *incantationem*, undē ἐπωδος *incantator*. Jam de *pythonibus*.

Nec qui pythones consulat. Hebr. אָוֹב לְאַשְׁר consulens, vel interrogans *pythonem*. אָוֹב *pythonem* significat, ait *Buxtorfius*, » qui responsa dando diabolicis artibus homines a Deo avocat. *Levit. XX* significat & *utrem*. Hinc *pythonis* significatio juxta *Aben-Efram* quod ex tumido ventre, quasi utre, oracula depromitteret, undē & γναθινός *ventriloquus* dictus fuit. » Sed plura de hoc, ubi de *pythonibus* *Saulis* & *Pauli* sermo erit.

Nec ariolos. Hebr. יִדְעֵנִי futurorum

divinator a verbo **יָדַע** scivit, agnovit, percepit, undè *sciolus* dictus, vel qui sat benè aliquid novit. *Buxtorf.* « Apud veteres legitur: Iiddioni est, qui ponit os animantis **יָדַע** in os suum, & os illud postea ex se loquitur . . . species divinationis prohibitæ Lev. XX. v. 21. » LXX habent *τερατοκόπι*. *Térapē* signum plerumque portentosum, & licet sæpè naturali sensu sumatur, multoties tamen de insolitis monstris & prodigiis dicitur. Itaque *τερατοσκοπ* homo est, qui ex rebus prodigiosis futura concludit.

Nec quærat a mortuis veritatem. Hebr.

וְזֶרֶשׁ אֶל־דָמָתִים Et sciscitatus a mortuis. LXX habent: ἐπερωτών τές νεκρές. Sciscitans, percunctans mortuos: quo sensu referunt textum *Libri I. regum*, sive *Samuelis Cap. XXX. v. 8.* Καὶ ἐπηρώτησε Δάβιδ δὲ τὸν Κυρίων, λέγων. Εἰ παταδιέξω ἐπίστω γεῖθ' οὐ τελεῖ; Et sciscitatus est David a Domino, dicens: An persequar raptiores istos? Unde hoc quoque in sensu, notante *Scapulā*, ἐπερωτῶ Θεόν, pro percunctari Deos sumitur. Ergo *Chananai* secundum *Hebraicum* textum percunctabantur a mortuis; secundum *Septuaginta* percunctabantur mortuos; & secundum

Vulgatam percunctabantur, vel quærebant
a mortuis veritatem.

Morem detestandum hunc Istræliticæ
genti, tempore priui sui regis haud in-
frequentem fuisse *ex Lib. I. Regum* mani-
festum fit; ut posteà latius patebit.

Nec tempore regum posteriorum im-
munes hoc criminè fuisse videntur Judæi.
Isaiæ Cap. VIII. v. 19. Et cùm dixerint ad
vos : *Quærite a pythonibus, & a divi-
nis, qui strident in incantationibus : num-
quid non populus à Deo suo requiret pro
vivis a mortuis?* Et ferè sic in *Hebræo* est.
LXX verò videntur utrumque hunc elu-
cidare. *Nonne gens requirit à Deo suo ?
Quid ergo pro vivis requiret à mortuis ?*

Perpetuavitque sese hic nefandus mos
per varios populos, usque in ecclesiæ tem-
pora; ita ut celeberrimus *Van Espen, Juris
Eccl. Part. III, Tit. IV, Cap. III,* hanc
magiæ speciem finiente sæculo II. cepto-
que tertio, invenerit communem fuisse;
excitatque quoque *Tertullianum, Libro de
Animâ, Cap. 57*, sic scribentem : « Pu-
» blica jam littera est, quæ animas etiam
» justâ ætate sopitas, etiam probâ morte
» disjunctas, etiam promptâ humatione
» dispunctas, evocaturam se ab infero-
» rum incolatu pollicetur. » Sed de his
ad *Samuelem* mox pluribus.

§. IV. Levit. XIX, v. 26: *Non augurabimini, nec observabitis somnia.* Et v. 31: *Non declinetis ad magos, nec ab ariolis aliquid sciscitemini, ut polluamini per eos.* Et Cap. XX, v. 6: *Anima quæ declinaverit ad magos & ariolos, & fornicata fuerit cum eis, ponam faciem meam contrà eam, & interficiam illam de medio populi sui.*

In nullo horum trium, quos collegi, textuum, Deus adversùs magiam præmunit, eamdem negando existentem; sed ab eâdem & existente, & abominandâ deterruit. Alio profectò, qui magiam existentem negant, non eo quo Deus modo, absterrent ab eâ populum; nam populi simplicitatem, credulitatemque, tanquam veram idææ magicæ originem causati, eumdem falsè rident, quod confugiat ad rem, quæ neque extiterit unquam, neque existere possit. Cùm igitur Deus magiam tam populari argumento non confoderit, sed populum suum ab eâdem & toties, & tam severè, dehortatus fuerit, an non dissidere debemus iis, qui alio quâm Deus modo, deterrere homines a magiâ contendunt? Sed clarius hoc patet versu ult. Cap. XX. Libr. Levit. *Vir, sive mulier, in quibus pythonicus, vel divinationis fuerit spiritus,*

morte moriatur Hebr. *Et vir, sive mulier,*
cum fuerit in iis אֹוב pytho, vel יְדֻנִי
divinans spiritus, mortendo morietur.
Græce Καὶ ἀνὴρ, καὶ γυνὴ, ὃς ἂν γένηται
αὐτῶν εἰγνασπιουσθεῖς, οὐτέ ἐπαίδος, θαυμάτων
διανατεσθωται αὐτοφτέροι. Vir, vel mulier,
quiscumque eorum, pytho, vel incantator sit,
morte moriantur ambo. Sic dixerat Deus
Exod. XXII. v. 18: Maleficos non patieris
vivere. Hebr. תְּחִירָה לֹא מַכְשִׁפָּה. Sagam
vel præstigiatrixem non vivificabis. LXX
φαρμακὸς & πριωτότοκος, seu, ut Codices
Alexandrinus, Aldinus, & Complutenses
habent, ἢ πριγώστε, veneficos non finite
vivere. Veneficos magorum nomine in-
telligi suprà patuit.

Qui magiam negant, an sic hanc le-
 gem composuissent? Deus nullibi dicit:
 si quis falsò se pythonem, se divinato-
 rem, se veneficum appellat, morte punia-
 tur; sed, qui fit talis: in quo fuerit spi-
 ritus pythonicus, in quo fuerit spiritus
 divinationis. Nostri adversarii utique in
 suâ lege scripsissent: qui eo aut dementiæ,
 aut pravitatis pervenerit, ut sc̄ talem vendi-
 tet, qualis nusquam, vel quis fuerit, vel
 esse possit. Cùm igitur Deus in singulis
 hisce textibus eos spiritum magicum verè
 habere asseveret, quo titulo illi oppo-

fitam ferant divino sententiam? Profectò qui magiam verè existentem statuunt, si errarent, nonne jure afferere, quod tamē nefas, possent, sui causam erroris a divinâ lege petendam esse, qui ipsis magiam nunquam ut imaginarii quid, verùm, ut rem verè existentem, semper proposuerit? Nonne id indè consequeretur, quòd magiæ omnis inficiatores, in suis legibus magiam, ut rem imaginariam, statuentes, longè prudentiores Deo essent? Præsertim cùm nihil efficacius fuisset ad hominum animos à magiâ avertendos, quām si Deus eosdem præmonuisset quòd diabolica ejusmodi ars nulla, imò impossibilis esset?

§. V. Sequitur Pythonissæ Endoranae historia, i. Reg. Cap. XXVIII. *Et vidit Saül castra Philistium, & timuit, & expavit cor ejus nimis. Consuluitque Dominum, & non respondit ei, neque per somnia, neque per sacerdotes, neque per prophetas. Dixitque Saül servis suis: Quærite mihi mulierem habentem pythonem, & vadam ad eam, & sciscitabor per illam. Et dixerunt servi ejus ad eum: est mulier pythonem habens in Endor.*

Hebr. אֹב־אָשָׁת בְּעִלָּת. Quærite mulierem, dominam pythonis, pythonicam eruditam, expertam valdè. LXX Γυναικα

*Ιγγασπίου θον. Mulierem de ventre loquen-
tem. Videmus nomina magica promiscue
sumi, nam quæ h̄ic Pythonica excellens
quæritur, artis magicæ præstare suprema
debebat.*

*Mutavit igitur habitum suum, vestitus-
que est aliis vestimentis, & abiit ipse &
duo viri cum eo, veneruntque ad mulierem
nocte, & ait illi: Divina mihi in Pytho-
ne, & fuscita mihi quem dixero tibi. He-
braicè & græcè, eodem modo. Jussit
ergo rex magicam artem suam in actum
vocaret, & cùm eum quem indicaturus
esset exsuscitare de sepulcro deberet,
credidit certò, quæ id præstaret, existere
artem.*

*Et ait mulier ad eum: Ecce tu nosti
quanta fecerit Saül, & quomodò eraserit
magos & ariolos de terrâ: quare ergo insi-
diaris animæ meæ, ut occidar? Confirmata-
tur, quod mox notavi, pythonum, ma-
gorum, ariolorum, cæt. nomina promis-
cuè sumi. Hoc ipso in capite *Liber. I. Reg.*
sive Sam. legitur mox ab enarratâ morte
Samuelis prophetæ: *Et Saül abstulit ma-
gos & ariolos de terrâ (a).**

[a] Posset h̄ic fortè reddi *Sagas seu Pythonicas*, quia in plurali fœmineo scribitur οἱ πτυχαι. Sed in secundâ declinatione inter numerosas a-

Si meliores chronologicos sequamur, *Saul* magos & ariolos biennio antè mortem, fortè consilio *Samuelis*, deleverat de suo regno: persuasus tamen intrà tam breve temporis spatium exterminari funditus tenacem adeò gentem non sic potuisse, quin hinc indè superstites nonnulli essent, aut saltem relaxatâ lege quosdam rediisse, jubet quæri num inveniendus eorum quisquam foret, & maximè an optima saga, an mulier potenter pythonica, invenienda esset?

Quæri solet cur, quos antè biennium magos sagasque pepulerat *Saul*, nunc consultaturus eosdem advolet? Credibile fit *Sailem* persuadente idem vi divinæ legis *Samuele*, hoc fecisse, ut Dei iram, quam per inobedientias suas in se contraxerat, non nihil placaret; minimè verò quod ipsi magiam nullam esse persuasum esset: jam verò penitus repulsum a Deo, & tamen suæ populique sortis prænoscendæ avidum, quod divino Spiritu ul-

generali regulâ exceptiones & hæc est, quâ ^{רֹאשׁ} fœmineè terminetur in masculino plurali. Hinc non mutavi. An tamen, quia non virum, sed mulierem potenter Pythonicam quærit Rex, hic textus *Sagas* seu *Pythonicas* intelligit, & divinorum nomine *magos*? Tanc pluralis fœminei hic non esset exceptio.

trà non posset, immundo spiritu prænoscere cupivisse.

Persuasus, inquam, de magiæ efficaciam ita fuit, ut ad hanc sagam magistrum accedens, quemadmodum suprà jam constitit, non priùs an, quod rogatus sit, præstare eadem posset, roget; sed ut, quod jussurus sit, præstare jubeat. Pari ratione saga doctrix mortuum exsuscitare jussa, pro excusationis ratione non prætendit mandati impossibilitatem, sed ex regis prohibitione pœnam mortis. Sic ut & rex, & saga, mortuum excitari per magiam posse crediderint.

Et juravit ei Saül in Domino dicens: Vivit Dominus! quia non eveniet quidquam mali propter hanc rem. Dixitque mulier: Quem suscitabo tibi? Ad hoc iuramentum mortis depoñit formidinem, paratamque, ut quem Saül jusserrit exsuscitet, se exhibet. Quàm certa, quàm secura de suæ artis potestate esse non debuit; cùm, eâdem in promissis fallente, iratus is, quem, quis esset, ignorabat, deferre illam, ut magam, a se magiæ convictam, ad regem debuisset? Qui ait: Samuelem mihi suscita. Cùm autem mulier vidisset Samuelem, exclamavit voce magnâ: Videmus hîc id fieri, quod Deut. XVIII. Deus adeò severè prohibuerat, veritatem

veritatem quærere a mortuis. : adeòque non prohibere hīc inanem hoc faciendi jaftantiam , sed ipsam veritatis a mortuis exquisitionem ; ut hīc iterūm fit.

Disputatum est , utrum magi mortuos verè præsentes , an verò phantasticam duntaxat exhiberent imaginem , ei similem , quæ hominem , quibus in vitâ notus fuerat , voce , staturâ , vultuque referret ?

Sunt qui prioris opinionis dantur , qui posterioris sint. Et ipsi illi qui prioris sunt sententiæ , negare solent hoc erga *Samuelem* locum habuisse : sic ut vel dæmonis operâ umbra prophetæ tantùm exhibita fuerit , & Deus eâ occasione verba , ab hâc veluti umbrâ in aures Regis sonantia , suâ omnipotentiâ , Angelorumve ministerio produxerit ; vel si verè *Samuel* fuerit , eum jussu Dei , non magicâ vi , exsuscitatum fuisse.

Ita Libro de animâ *Tertullianus* , « sic in illâ specie magiæ , inquit , quæ jam quiescentes animas evellere ab inferis creditur , & conspectui exhibere , non alia fallaciæ vis est operatior. Planè quia & phantasina præstatur , quia & corpus affingitur , nec magnum illi (diabolo) exteriores oculos circumscribere , cui interiorem mentis aciem

» excæcare perfacile est. » Sic ut diaboli quidem opus *Tertullianus* in hâc historiâ agnoscat, sed non nisi *Samuelis* phantasma apparuisse arbitretur.

S. Pater *Augustinus*, Tom. XI, edit. *Venetæ* anteà laudatæ, quâ semper utar, in Libro cui titulus: *De octo Quæstionibus Dulcitii Liber unus*, Quæst. VI, utrum *Samuel per Pythonissam* verè fuerit de inferno evocatus? argumentis utrinque prolati, integrum cuique reliquit negantem affirmantemve sententiam amplecti.

Porrò hoc iis licitum temporibus erat, quandò *Liber Jesu filii Syrach. Ecclesiasticus dictus*, necdùm ab omnibus Catholicis existimabatur canonicus. Ubi verò post sæculum VI, sensim dubium hâc de re sublatum est, ac præsertim postquam ab Ecclesiâ in *sacro-sancto Conc. Tridentino* ut canonicus pronuntiatus est, quin *Samuel* apparuerit ipsus, ultra dubitare non licet. Sic enim *Eccl. Cap. XLVI, v. ult.* legitur: *Et post hoc dormivit (Samuel,) & notum fecit Regi, & ostendit illi finem vitæ suæ, & exaltavit vocem suam de terra in prophetiâ delere impietatem gentis.* Idem de verbo ad verbum græcus textus; hebraicus, si extiterit olim, periit nobis.

Igitur verè *Samuel* fuit, qui num sagæ

operâ , an peculiari Dei dispositione apparuerit , jam supra quæsum fuit. Qui Dei dispositione unicè id contigisse censem , & sanctis indignum fore aiunt , & diabolo impossibile , in mundum ab eo revocari. Quin id falsum esse manifestò argui putant ex ipso illo terrore , qui invasit , conspecto *Samuele* , sagam : quo postremo quoque argumento id constare autumant plures , ipsam pythonissam vim nullam magiæ esse credidisse. Ad hoc elucidandum textus continuandus est.

Quum autem vidisset mulier Samuelem , exclamavit voce magnâ , & dixit ad Saül : Quare imposuisti mihi ? Tu es enim Saül. Perterrita saga fuit , non quod videret Samuelem , sed quod ex Samuele resciret ignotum eousque sibi virum ipsum regem esse , qui fortè tantummodo , an saga esset , tentaturus venisset ; jamque eam ipso actu quod saga esset convictus , morte puniturus esset. Exclamavit voce magnâ , & dixit ad Saül : Quare imposuisti mihi ? Tu es enim Saül. Confirmatur hæc expositio responso Regis. Dixitque ei Rex : Noli timere. Quid vidisti ? Firmat mori timidam animam , modò quæ viderit annunciet.

Et ait mulier ad Saül : Deos vidi adscendentes de terrâ. Hebr. אֱלֹהִים Elohim ,

Dii; in sing. אלה Eloha vel Eloah, Deus.
 Verum Elohim, Dii, centies in sing.
 pro Deo ponitur, ut in initio Geneseos:
*In principio creavit Elohim, Dii, cælum
 & terram. Sed & Elohim Angelos signi-
 ficat.* Psalm. VIII. *Minorasti eum paulò
 minus מְאֵלָה יִ- ab Angelis.* Ita & Ps.
XCVIII, & Job. I, v. 6. Sic ut necesse
 non sit concludere Deos Deumve intelle-
 xisse fœminam: imò neque Angelos vel
 Angelum; nam Exodi *XXI & XXII,*
 & Ps. *LXXX, Elohim* magistratus, ju-
 dicesque vocantur. Ipsaque idola *Jud.*
XVI. III Reg. II. Imò Moyses in plurali
Elohim vocatur *Exod. IV.* Et vitulus au-
 reus *Ex. XXXII,* & Arca fœderis *I Reg.*
IV. Quod autem pythonissa intellexerit
 voce *Elohim* unam modò personam,
 eamque neque Deum, neque Angelum,
 sed virum spectabilem; primò ex eo li-
 quet, quòd legatur *vidisse Samuelē*, &
 viso eo conclusisse illum, qui se ignotus
 convenisset, *Saulē* esse. Secundò quòd
 rogante rege: *Qualis est formæ?* respon-
 derit: *Vir senex adscendit, & ipse amic-*
tus est pallio. In græco codice Vaticani
exemplaris: *Virum video erectum, adscen-*
dentem de terra, qui diploide indutus est.

Ex totâ igitur historiâ conficitur id, ut
 saga viderit ab initio *Samuelē*, eumque

se videre confirmaverit; ut non expaverit viso eo, sed per eum cognito Rege, tanquam flagrante, ut vocant, delicto, ab eodem deprehensa; tandem ut per Regem nunc pacata, haud ultra, etiam si pergeret videre *Samuelem*, quid timuerit: *Samuel* enim à *Saüle* petitum exhibere, intentio ejus magica erat, universique augurii finis.

*Et intellexit Saül quod Samuel esset, & inclinavit se super faciem suam in terram, & adoravit. Dixit autem Samuel ad Saül: Quare inquietasti me, ut suscitarer? Confirmatur iterum hoc *Samuelis* sermonem eum verè exsuscitatum fuisse, eum verè apparuisse, eumque ipsum qui loquetur esse. Quemadmodum etiam in fine sui cum Rege colloquii: *Cras autem tu & filii tui mecum eritis. Hebraica & Vulgata sic, uti etiam græcus Complutensium codex; Vaticanus verò: καὶ ἀνιώσου, καὶ οἱ υἱοί σου, μελάσσου, πεσεῖται. Et cras tu, & filii tui tecum, cadent.* In hâc ultimâ traductione nulla difficultas est; est autem in reliquis textibus, nisi subintelligamus: *in regione mortis mecum eritis.**

§. VI. *Philippica pythonissa examinanda* tandem est. Habetur historia Actor. Cap. XVI. *Factum est autem euntibus no-*

bis ad orationem, puellam quamdam habentem spiritum pythonem, obviare nobis, quæ quæstum magnum præstabat dominis suis divinando. Hæc subsecuta Paulum & nos, clamabat dicens: *Isti homines servi Dei excelsi sunt, qui annunciant vobis viam salutis.* Hoc autem faciebat multis diebus. Dolens autem Paulus, & conversus, spiritui dixit: *Præcipio tibi in nomine Jesu Christi exire ab eâ.* Et exiit eadem horâ. Videntes autem domini ejus quia exivit spes quæstus eorum, apprehendentes Paulum & Silam, perduxerunt in forum ad principes, &c. Vulgata editio & græcus textus hîc per omnia conveniunt.

Ex hâc historiâ concludimus: 1º Philippicam puellam spiritu pythonico præditam fuisse; qui spiritus, quemadmodum in prioribus constitit abundè, & divinatorius spiritus est, & magicus, & diabolicus, futura, præsentia, præterita enuncians. 2º Diabolicum hunc spiritum testimonium veritati reddidisse, quemadmodum in Evangelio pluries: id quod cùm veritati præjudicaret a spiritu mendaci laudari, hincque veluti diaboli, non nisi sua laudantis, opus videri; & in Evangelio Servatorem, & hîc Paulum, ejusmodi testimonium prohibuisse, ut sacræ Religioni & indecorum & detrimentsum.

3º Puellam hanc , diaboli multisci operâ , multa quæ laterent pandisse , & plura magica edidisse , cùm legatur multum lucri dominis suppeditasse suis , & cùm , expulso spiritu , tanti lucri præcisam spem omnem esse dolorent , manus in *Paulum* & *Silam* conjecisse . Nisi enim multa vera aut pandisset , aut præstasset , brevi actum de ejus famâ fuisset , nec magnum quæsum dominis suis conciliaisset . 4º Non agi hîc , ut quidam volunt , de eâ aptitudine , astutiâ , calliditate , quâ in foris ac nundinis polleant mimi , seu ludii , ut potè nullum habente cum Religione commercium ; verùm de spiritu divinatorio , quo diabolus sacram Religionem , ut suum opus , prostitueret , risuique exponeret ; de spiritu , quem in nomine Jesu *Paulus* exire protinus juberet , & quo expulso omnis quæsus dominorum actutum cessaret .

PRIMÆ PARTIS

CAP. II.

Argumenta eorumdem ex Doctrinâ , Consuetudine & Legibus Ecclesiæ , Patrumque Doctrinâ .

§. I. **Q**UI magiam , ut verè diabolicam artem , propriè dictam , existere credunt ,

B iv

non aliud eos credere , quām universa Scripturæ utriusque pagina pluries statuerit , totiesque repetiverit , ex primo *Capite* manifestum fit. Ubi verò hi a sacris Bibliis convertunt se ad primitivæ Ecclesiæ leges consuetudinesque , ad conciliorum antiquissimorum canones , ad sanctiones imperatorum , principumque , qui partim ut sanctam Ecclesiam hāc in re juvarent , partim quia magiæ crimen etiam ad publicam potestatem spectat , & salubres contra eamdem , & severas condidere leges ; dùm tandem SS. Patrum ad hæc omnia doctrinam adjiciunt ; gaudent affatim & Ecclesiam potestatem sic ea loca sacræ Scripturæ intellexisse , ut exposita eadem *primum Caput* dedit , & autoritatem publicam tūm propriâ experientiâ , tūm veneratione Scripturæ sacræ , atque traditionis Ecclesiæ , ad easdem suas leges accommodasse.

Cui hæc singula congesta videre volupe est , adeat is celeberr. virum *L. B. Van-Espen* , *Part. III* , *Tit. IV* , *Cap. III* . Eo enim in loco gesta ecclesiasticæ atque politicæ potestatis , a primis Ecclesiæ sæculis , usque in hæc posteriora , concinno ordine referuntur : gesta , inquam , quæ uno omnia ore magiam , ejusque partes singulas , tanquam diaboli ope perac-

tas, ac quoddam hominis cum diabolo pactum inclientes, pronunciant. Describit *Espenius* noster singulas nefandæ artis species, fortilegium, aruspicium quo Mathematici, tunc sic dicti, astrologi quoque & Genethliaci comprehenduntur, maleficium, necromantiam. Nomina hæc canonicè exposita ab autore, hîc inserere non est opus, cùm in horum singulis diabolicum agnosci commercium spontè fateatur; de quo commercio solo tota nostra existit disceptatio. Laudat hîc concilium *Ancyranum*, quod celebratum ad annum 314 videtur, cuius XXIV Can. legitur: « Illos qui Gentilium more » divinos consulant, homines ad se vo- » cantes ad maleficia seu detegenda, » seu solvenda, quinque annorum pœni- » tentiam agere debere, & quidem tri- » bus annis prostratos, & duobus nec- » dum sancto sacrificio admissos. » Ad- diderim ad hoc concilium aliud dictum *Illiberitanum*, quod ad annum 305 re- fertur, cuius Canon VI sic habet: « Si quis » maleficio interficiat alterum, eò quod » idololatriâ perficere scelus non potuit, » nec in fine impertiendam illi esse com- » munionem. »

Porrò notari præprimis oportere vide- tur, hunc canonistarum principem, om-

nes Ecclesiæ principumque leges, tam ad damnandam magiam, quam ad magos quoscumque, sive poenitentia ecclesiasticis subjiciendos, sive ad eosdem a potestate politicâ igne cremandos, referentem, nullius unquam seu legis, seu dissertationis meminisse, quibus alii & ecclesiastico-rum errorem, & principum deceptio-nem, vel ex eo demonstrarent, quod nulla existeret dæmonis in res creatas, hominesque potestas, quodque nulla da-retur ope diaboli magia, adeoque hæc non nisi præstigiatrix ars esset. Si enim id verum foret, quod in eorum dissertationibus, qui veram magiam negant, audacter scriptitatum fuit, scilicet *Ecclesiam nunquam magiam veram admisisse*; leges utique dissertationesque extarent, contrariæ prioribus: & quia consuetudine generali conciliorum particularium actus & ad ecclesiæ alias, & præprimis ad romanam mitti solebant; & hæc duo con-cilia ad alias ecclesiæ, ac præcipue ad romanam, proinde missa erant; Ecclesia, *Ancyrani* saltem tempore, pace tranquillâ in Occidente gaudente; pontifex roma-nus, & aliæ ecclesiæ reclamassent con-tra utriusque synodi de magiâ errorem, eumque mox in alio concilio correxisserent. Porro cum nihil simile tunc contigerit,

palam fit, quemadmodum *Illicheritanos*, *Ancyranosque* patres, ita universam ecclesiam credidisse. Evidem ut passim in aliis negotiis, ita & in hocce fatetur, imò innuit *Espenius*, homines quosdam præoccupatione mentis errare, extravagarique posse; verum hæc ad ecclesiæ ipsius doctrinam non pertinent: ut postea constabit latius.

Profectò ab ipsis prioribus ecclesiæ sacerulis, ecclesia prævaricatorum Angelorum malitiam, in homines invidiam, nondique voluntatem, tūm & Dei, per omnia æquè sapientis ac justi permisso, potestatem constanter agnovit. Unde exorcistas singulis in locis constituit, eosque deinde inter *quatuor Ordines minores* disposuit. Hinc dæmonum in homines potestatis gnara, a baptisandis eosdem adjurando repellit; jubetque hos renunciare diabolo, omnibusque diaboli & operibus & pompis: id quod ab ecclesiâ, præter alias significationes, etiam de magiæ renunciatione intelligi *Daniel Sennertus*, acatholicus quidem, sed egregius medicinæ scriptor, *Pract. Libr. VI, Part IX, Cap. VIII*, optimè explicuit. « Et non sine causâ, inquit, de magiâ agens, » ab antiquâ Ecclesiâ institutum, ut baptisandi renuncient diabolo, & omni-

»bus operibus ejus.» Eruditissimus hic medicus hanc ipsam Ecclesiæ ceremoniam, ejusque talem significationem, impio *Paracelso* opposuit, qui *Libro de occultâ philosophiâ*, medicos in universitatibus benè edoctos medicinam oportere deinde magos sagasque consulere, ab iisdemque magiam addiscere contendebat.

Si præterea legamus orationes quas a remotissimis sæculis universa per orbem Ecclesia Dei in administrando regenerationis sacramento, in benedicendo aquæ, sali, cæterisque eduliis, fundere Deo solet; si attendamus ad preces, quibus ad mensam Deum rogat, ut benedicat assumendis; preces, inquam, quas ad prandium, cœnamque, per 17 sæcula fundi solitas, intoleranda recentium hominum protervitas abrogare contendens, jam, insalutato Deo, se ferarum more saginat: si denique attendamus ad morem Ecclesiæ, se adversùs diabolum muniendi, cuius, sæculo secundo finiente, jam meminit *Tertullianus* in apologiâ, ad omnem ingressum & egressum, ad cibos potusque, ad dormiendum & evigilandum, frontem crucis signo, ut ait, terendi; si, inquam, ad singula hæc animum advertimus, an non cum *Vincentio Lirinensi*, autore sæculi V inchoantis, *Libro contra hæreses*,

Cap. III dicente: « In ipsâ catholicâ Ecclesiâ magnoperè curandum est, ut id tentemus, quod ubique, quod semper, quod ab omnibus creditum est; hoc enim verè, propriétéque catholicum, an, inquam, cum hoc autore, quod vera magia extet catholicam Ecclesiam statuere, fateri non cogimur?

Sed ultra pergendum est. Per ipsos SS. Patres luculenter confirmari hanc consuetudinem, sententiamque Ecclesiæ, certò certius est. Juvat hic aliquorum meminisse, ac præcipue *S. Augustini*, quem summi pontifices, quem concilia, universæ Ecclesiæ catholicæ & testem, & vocem appellârunt.

Libr. de Civ. Dei X, Cap. XVI: « Quibus igitur Angelis, inquit, de beatâ & sempiternâ vitâ credendum esse censemus? utrum illis, qui se religionis ritibus coli volunt, sibi sacra, & sacrificia flagitantes a mortalibus exhiberi, an iis, qui hunc omnem cultum uni Deo creatori omnium, deberi dicunt? » Qui hic nequaquam magicum pravorum Angelorum cultum, sed solam, in quâ hi adorabantur, idolatriam intelligentes, magiam negant, ostendunt se minimè attendisse ad *S. patris distinctionem*, quam hoc ipso capite inter & cultum Dei, &

falsorum Deorum, & pravorum Angelorum fecit.

Qui negant aliquam, sive expressæ conditionis, sive pacti, cum dæmone mentionem prioribus Ecclesiæ sæculis factam esse, audiant *Augustinum hoc ipso Libro Cap. IX*, dicentem : « Quamquam » *Porphyrius* admoneat utendum alicujus » dæmonis amicitiâ . . . cavendum tamen » dæmonum societatem expressâ quodam- » modò confessione. »

Libr. VIII, Cap. XIX, de Civ. Dei :
» Omnia miracula magorum quos rectè » adversarius censet esset damnandos, » doctrinis fiunt & operibus dæmonum. »

Libr. XXI. de Civ. Dei, Cap. VI, cui titulus : *Quod non omnia miracula naturalia sint, sed pleraque humano ingenio modificata, pleraque autem dæmonum arte composita*; agens de iis quæ pro miraculis habentur, quia non ea ingenium humanum comprehendit, & tamen naturalia sunt; deque his, quæ tām apud Ethnicos, quām apud Christianos vera miracula fuerunt; « addimus, ait, ad istam » lucem (in Veneris templo) inextinguibilem & humanarum & magicarum, id » est per homines dæmoniacarum artium, » & ipsorum per se ipsos dæmonum multa » miracula : quæ si negare voluerimus,

» eidem ipsi, cui credimus, sacrarum lit-
» terarum adversabimur veritati. »

Memorabile autem est, quomodo magiae omnis originem explicat eodem in loco *Augustinus*. « Illiciuntur autem dæmones ad inhabitandum per creaturas, quas non ipsi, sed Deus condidit, delectabilibus pro suâ diversitate diversis, non ut animalia, cibis, sed ut spiritus signis, quæ cujusque delectationi congruunt, per varia genera lapidum, herbarum, lignorum, animalium, carminum, rituum. Ut autem illiciantur ab hominibus, priùs eos ipsi astutissimâ caliditate seducunt, vel inspirando eorum cordibus virus occultum, vel etiam falaciis amicitiis apparendo, eorumque paucos suos discipulos faciunt, plurimorumque doctores. Neque enim potuit, nisi primùm ipsis docentibus, disci quid quisque illorum appetat, quid exhorreat, quo invitetur nomine, quo cogatur. Unde magicæ artes, earumque artifices extiterunt. »

Serm. XC. n° V, pag. 490 edit. Ven. *Augustinus* quid *vestis nuptialis* sit expōnens, non sitam hanc esse docet in sacramentorum usu, cùm hisce & mali abundantur; nec in jejunio, quo & se mali macerent; neque etiam in miraculis:

» Hæc enim non soli boni faciunt &
 » mali: sed aliquando non faciunt boni.
 » Ecce in vetere populo magi *Pharaonis*
 » miracula faciebant, *Israëlitæ* non facie-
 » bant: in *Israëlitis* solus *Moyses* & *Aaron*
 » faciebant, cæteri non faciebant, sed
 » videbant, timebant, credebant. Num-
 » quid meliores magi Pharaonis, mira-
 » cula facientes, quàm populus Israël,
 » qui miracula facere non valebat, & ad
 » Deum tamen populus pertinebat? »

De Trin. Libr. III. pag. 65, Tom. XI.

» Est unus creator Deus, ex cuius inef-
 » fabili potentatu fit etiam, ut quod pos-
 » sent hi Angeli si permitterentur, ideo
 » non possit, quia non permittuntur. Ne-
 » que enim occurrit alia ratio cur non
 » potuerint facere minutissimas muscas,
 » qui ranas serpentesque fecerunt, nisi
 » quia major erat dominatio prohibentis
 » Dei per Spiritum sanctum: quod etiam
 » ipsi magi confessi sunt dicentes: *Digi-*
tus Dei est hoc. Quid autem possint per
 » naturam, nec possint per prohibitio-
 » nem, & quid per ipsius naturæ suæ con-
 » ditionem facere non sinantur, homini
 » explorare difficile est, imò verò impos-
 » sibile, nisi per illud donum Dei, quod
 » Apostolus commemorat dicens: *Aliis*
dijudicatio spirituum. »

Et ibidem pag. 61. Postquam de veris miraculis, manu Dei peractis, multa disseruerat, tandem sic pergit: « Hic video quid infirmæ cogitationi possit occurtere: cur scilicet ista miracula etiam magicis artibus fiant? Nam & magi Pharaonis similiter fecerunt & alia similia. Sed illud amplius est admirandum, quomodò magorum illa potentia, quæ serpentes facere potuit, ubi ad muscas minutissimas ventum est, omnino defecit? Sciniphas enim muscularæ sunt brevissimæ, quâ tertiâ plagâ superbus populus Ægyptiorum cædebatur. Ibi certè deficientes magi, dixerunt: *Digitus Dei est hoc.* Unde intelligi datur, ne ipsos quidem transgressores Angelos, & aëreas potestates, in imam istam caliginem, tanquam in sui generis carcerem, ab illius sublimis æthereæ puritatis habitatione detrusas, per quas magicæ artes possunt, quidquid possunt, valere aliquid, nisi datâ desuper potestate.»

Ostensâ deinde ratione ob quam id permittit Deus, pergit: « Nec ideò putandum est istis transgressoribus Angelis ad nutum inservire hanc visibilium rerum materiem, sed Deo potius, a quo haec potestas datur, quantum in sublimi & spiritali sede incommutabilis judicat....

» Nec sanè *creatores* illi mali Angeli di-
 » cendi sunt, quia per illos magi, resis-
 » tentes famulo Dei, ranas & serpentes
 » fecerunt ; non enim ipsi eas creave-
 » runt. . . . Sicut ergo nec parentes crea-
 » tores hominum, nec agricultas *creatores*
 » frugum, quamvis eorum extrinsecus
 » adhibitis moribus ista creanda Dei vir-
 » tus interius operetur ; ita non solùm
 » malos, sed nec bonos Angelos, fas est
 » putare *creatores*, si pro subtilitate sui
 » sensus, & corporis, semina rerum ista-
 » rum, nobis occultiora noverunt, & ea
 » per congruas temperationes elemento-
 » rum latenter spargunt, atque ita gignen-
 » darum rerum, & accelerandorum incre-
 » mentorum præbent occasionses. Sed nec
 » boni hæc, nisi quantum Deus jubet ;
 » nec mali hoc injustè faciunt, nisi quan-
 » tum justè ipse permittit. Nam iniqui
 » malitia voluntatem suam habet injus-
 » tam, potestatem autem non nisi justè
 » accepit, sive ad pœnam suam, sive ad
 » aliorum, vel pœnam malorum, vel
 » laudem bonorum. »

Et Tom. II, Ep. 137, ad Volusianum.

» Nos legimus magos Ægyptiorum artium
 » istarum (magicarum) peritissimos, a
 » Moysi famulo Dei fuisse superatos ;
 » cum illi quædam mira nefandis artibus

» agerent, ille Deo simpliciter invocato,
 » machinamenta eorum cuncta subverte-
 » ret. »

Libr. III, de Doctrina Christ. p. 47, 48,
 de cognitione naturæ animalium, ligno-
 rum, herbarum, lapidum B. Pater agens;
 » De quo genere superiùs egimus, inquit,
 » eamque cognitionem valere ad ænig-
 » mata scripturarum solvenda docuimus:
 » non ut pro quibusdam signis adhibeant-
 » tur, tanquam ad remedia, vel machina-
 » menta superstitionis alicujus: nam &
 » illud genus jam distinctum ab hoc li-
 » cito & libero separavimus. Aliud est
 » enim dicere: tritam istam herbam si
 » biberis, venter non dolebit; &
 » aliud est dicere: istam herbam collo
 » si suspenderis, venter non dolebit. Ibi
 » enim probatur contemperatio salubris,
 » h̄c significatio superstitionis damnatur.
 » Quamquam ubi præcantationes, & in-
 » vocaciones, & characteres non sunt,
 » plerumque dubium est utrum res quæ
 » alligatur, aut quoquo modo adjungi-
 » tur sanando corpori, vi naturæ valeat;
 » quod liberè adhibendum est: an *sig-*
nificativâ quâdam obligatione prove-
niat; quod tantò prudentius oportet
 » cavere Christianum, quantò efficacius
 » professe videbitur. Sed ubi latet quâ

» causâ quid valeat, quo animo quisque
 » utatur interest duntaxat, in sanandis
 » vel temperandis corporibus, sive in me-
 » dicinâ, sive in agriculturâ. »

Ex *Tertulliano* jam supra locum citavi, quo patuit eum ejusdem mentis circa magiam fuisse. Et ante *Tertullianum* medio saeculo secundo *S. Justinus* martyr, in primâ suâ apologiâ pro Christianis ad *Antonium Pium*, conqueritur, quod Gentiles solos Christianos persequerentur, interea dum homines pravos & diabolicos, aut tolerarent, aut afficerent honoribus, ut v. g. *Simonem Samaritanum*, qui tempore imperatoris *Claudii* multas operaciones magicas, dæmonum quibus obsidebatur ope, perfecerat, divino honore Romæ cultus erat.

B. *Hieronymus in vitâ S. Hilarionis Eremitæ*, edit. *Antverp. Plantin. 1579*, Tom. II, pag. 108. « De *Gazensis* Em-
 » porii oppido, inquit, virginem Dei
 » vicinus juvenis deperibat: qui cum fre-
 » quenter tactu, jocis, nutibus, sibilis,
 » & cæteris hujusmodi, quæ solent mo-
 » rituræ virginitatis esse principia, nihil
 » profecisset, perrexit *Memphim*, ut con-
 » fesso vulnere suo, magicis artibus redi-
 » ret armatus ad virginem. Igitur post
 » annum doctus ab *Æsculapii* vatibus,

» non remediantis animas, sed perden-
» tis, venit præsumptum animo stuprum
» gestiens, & subter limen domus puellæ
» tormenta quædam verborum, & por-
» tentosas figuræ, sculptas in æris *Cyprii*
» lamine, defodit. Illicò insanire virgo,
» & amicto capitis abjecto, rotare cri-
» nem, stridere dentibus, inclinare no-
» men adolescentis; magnitudine quippe
» amoris se in fugam verterat. Perducta
» ergo a parentibus ad monasterium, se-
» ni (Hilarioni) traditur. Ululante sta-
» tim & confitente dæmone: vim susti-
» nui, invitus abductus sum: quam benè
» *Memphis* somniis homines deludebam!
» O crucis! ô tormenta quæ patior!
» Exire me cogis, & ligatus subter limen
» teneor: non exeo, nisi me adolescentis
» qui tenet, dimiserit.... Noluit autem
» sanctus, anteà quam purgaret virginem,
» vel adolescentem, signa jubere perquirri:
» ne aut solitis incantationibus recessisse
» dæmon videretur, aut ipse sermoni
» ejus accommodasse fidem; afferens fal-
» laces esse dæmones, & ad simulandum
» esse callidos. »

Constatit igitur cuique, nisi me ani-
mus fallat, sæculo æræ Christianæ II,
III, IV & V, magiam & ut artem, &
ut artem diabolo præceptore edoctam,

ejusque auxilio cultam , Ecclesiæ visam fuisse : Ecclesiam credidisse angelorum prævaricatorum potestatem quamdam , Deo & justè , & misericorditer id permittente , in sublunaria corpora hominesque , mansisse : sic ut non modò eâdem homines tententur , verùm etiam labantur sæpè , haud in communia peccata duntaxat , verùm etiam in familiare quoddam cum his spiritibus immundis commercium.

PRIMÆ PARTIS

CAP. III.

Magiam verè existentem confirmare videntur medicorum inclytorum experientia , virorum sapientum observatio , accuratissimorum historiographorum intemerata fides.

§. I. **H**ISTORIÆ magiæ perhibentur plurimæ , quarum vel nolle vades esse , vel manifestissima falsitas est. Veritatis cultus & amor , raræ in mortalibus aves ; nec mirūm , cùm *Psalmo 115* mendax dicatur homo omnis. Ita ut , quemadmodum in materiâ quâcumque aliâ , ita quoque in magicâ , fides historica multâ historiaruin emendatione indigeat. Eâ de

causâ eas omnes missas faciam , quas *Plinus secundus* , quas *Valerius Maximus* , aliique ethnici scriptores tradiderunt , nec non ferè omnes sequentium sæculorum , quæ vel ab unico teste non spectatæ prorsùs fidei , vel ex aliorum enarratione , traditioneque consignatæ litteris fuere.

Ac primùm quidem ea *Simonis magi* nota est , quem præter ea quæ sacra scriputura notat , etiam primi Ecclesiæ patres , ut paulò ante ex *S. Justino martyre* constitit , ope dæmonis multas magicas artes exercuisse , statuerunt : optandum fuisset , ut qui totam hujus magi historiam fabulosam scribunt , priùs consuluerint *Tillemontium* , qui memoriarum Ecclesiasticæ Historiæ suæ Tom. I , Part. II , in vita S. Petri , Cap. 34 , ejusdem historiæ veritatem , innumeris adductis tūm patrum , tūm historicorum testimoniiis , doctè ac eruditè confirmat , assertque nullo nimis solido fundamento nonnullos de eâ re dubitare. Vid. quid de *Simone Fleury* , Libr. I & II , habet , ut Parte II , Cap. II , Object. IX , ostendam .

II. Inter veteris Ecclesiæ historias ea *Apollonii Thyanæi* præprimis notanda est , qui primo Ecclesiæ sæculo , vel sub finem *Tiberii* , vel initio imperii *Caligulae* ,

innotescere cepit, mirabilis per omnia philosophi, quem propter doctrinam, & mira gesta, ethnici Apostolis, imò & Jesu Christo parem, hostemque opponere ausi sunt. Nihil hīc ex fabulosā ejusdem historiā referam, quam ex *Damidis*, fidelis *Apollonii* discipuli fragmentis, *Philostratus* 120 postinodūm annis adornavit; verūm ea modò quæ historicorum accuratissimus & prudentissimus *Fleury* de eo tradidit.

Contigit primò *Ephesi*, ut in mediā ad populum concione aves proximæ sylvæ advolarent, unaque præcipue convocarent cæteras. « Nihil est, inquit, casu » modò contigit, ut juvenis per talem » in urbe plateam transeuns, partem effu- » derit, quod gestabat frumenti. Avis una » indè saginata reliquias convocat. » Con- volantes illuc auditorum nonnulli, spar- sum in plateā frumentum reperiunt.

2º *Smyrnā Ephesum* ad pestem aufe- rendam vocatus, ad *Herculis* fanum ju- bet senem mendicum lapidibus obrui, ut hostem deorum; sic ut demùm sub lapi- dum acervo sepultus senex esset. Acer- vum amovere jussit, ut viderent quod- nam animal occidissent; invenerunt non senem, sed canem; pestis autem actutūm cessavit.

3º In ejus oratione ad *Athenienses* ridet affatim juvenis auditor. Obsessum eum dæmone dixit orator. Imò mox obsessi signa juvenis dat. *Apollonius exire* dæmonem de juvēne jubet, eâ conditione ut in signum exitū proximam statuam subvertat. Exiens dæmon statuam subvertit, juvenisque benè habet. Ad quod prodigium *Fleury* sic commentatur: « Si cum dæmonibus *Apollonius* commercium habuit, cuius ipsum etiam ethnici accusarunt, illos cum eo collusisse facile credimus, sicque hominem obsedit & reliquise, quo ipsi fama cresceret, eoque modo miracula Christianorum, qui quotidie dæmonia ejiciebant, obscurarentur. »

Obiter notare hīc debedo, præstantissimo nostro historiographo veram magiam difficulter admissam fuisse, ut latius *Cap. II* patebit. Eamdemque ob causam eum primum & alterum *Apollonii* portentum conjecturā quāpiam ad causas naturales referre conatum; tertium verò diaboli cum eo commercio adscribere tandem coactum fuisse. Non video autem, si in unico ejus facto de ejus cum diabolo commercio convincamur, cur in cæteris horum simillimis factis nobis, ad naturales causas detegendas, vim tantam faciamus.

C

4º Ad *Corinthi* isthnum « hæc terræ ,
» inquit, prominentia abscindetur , vel po-
» tiùs non abscindetur. » *Nero* postmodùm
incepit quidem opus , sed prosecutus non
est.

5º Sponsa consularis mortua aperto lecto
defertur ad sepulchrum , sponso sequente
lacrymis perfuso. *Apollonius* accedens ju-
bet sisti mortuam , daturum se finem la-
crys mis spondet. Rogat nomen puellæ ,
tangit , & quædam verba missitat. Ad
hæc veluti evigilat illa , loquitur , repe-
titque lares paternos. Refert *Fleury* fuisse
qui dubitarent verène mortua esset spon-
sa , halitu de vultu percepto : credidisse
alios ex leipopsychiâ , vel syncope , fri-
gore roris , seu nebulæ cadentis , eam re-
fuscatam fuisse. Verùm an , percepto
inter deferendum vapore de facie avo-
lante puellæ , non declarassent , qui hoc
advertissent , viventem illam ? An non
mox pompam stitissent funeralem , ante-
quam accederet philosophus ? Sed repe-
tam hanc historiam *Parte II , Cap. II.*

6º *Apollonius* ex *Asti* Romam venit
purgaturus se a congestis in se accusatio-
nibus coram *Domitiano*. In carcerem cum
Damide discipulo conjectus , illi dixit
nihil ultrà se toleraturum mali : morti tra-
ditum non iri. Petente *Damide* quando-

nam liberaretur? A meo judice, ait, hoc ipso die; a me ipso, hoc momento; protinusque ipsi pedes ostendit catenis solutos. Jam haud ultrà magum credidit præceptorem, sed divum esse, *Damis*, cùm citra sacrificium, citra preces, citrave verbum ullum, hoc prodigium contigisset. Ad hæc verò *Fleury*: « Ac si dæmones non possent citra hunc apparatus agere: sed sic saltem credebatur. » Eodem die in carcerem commodiorem missus est; eodem die coram imperatore se se defendit, & sic quidem ut ab eo absolveretur, eâ lege ut maneret ad privatum cum illo colloquium. Interim disparuit ex auditorio, *Domitiano* vehementer ob id commoto. Adjungit historia antequam coram imperatore admitteretur, quæsitum per omnes vestes ejus fuisse, an non alicubi quædam aut chartulæ, aut alii characteres laterent?

7º *Apollonius* qui ante meridiem ex auditorio Romæ evanuerat, circà vesperam *Puteolis* fuit, quæ urbs propè quinquaginta leucis *Româ* distat. Hoc *Fleury* citra diaboli auxilium fatetur impossibile videri.

8º Quandò anno 96 *Domitianus* interficiebatur, *Apollonius* orationem *Ephesi* ad populum faciens, idque, quod no-

tandum inter 11 & 12 ante meridianam horam, veluti in perorando perturbatus, mox percute *Tyrannum*, vociferebatur: post aliquod silentium, macte amici, ait, hodiè *Tyrannus occisus est*; sed quid dico hodiè? per *Minervam!* hoc ipso momento *occisus est*. Quid indicare vellet, Ephesi intellexere quidem, impossibiliorem autem rem, quam ut illi, tam immenso itinere *Romā* remoto, fidem adhiberent. Hoc videns, neque miror, inquit, vos fidem non adhibere factō, quod tota urbs *Roma* nondūm scit: sed jam, aiebat paulò post, *internecionis fama urbem implevit*. Nuncii deindē in Asiam venerunt, totamque historiam narrarunt sic, ut ad *Apollonii* assertiones omnes exactè conveniret. Anno sequenti summo senio mortuus est *Apollonius Thyanæus*, statuis illi a morte erectis, divino honore cultis.

§. II. Haud minùs certa historia *Albicerii*, civis *Carthaginensis* est, quam ex *B. Aug. Iº Libro contrà Academicos*, *Cap. VI*, tradam. Disputatio de sapientiæ definitione cùm *Augustinum*, *Alypium*, *Licentium*, atque *Trygetium*, totos occuparet; dixissetque *Augustinus*: sapientiam esse rerum humanarum divinarumque scientiam; « hic *Licentius*, pergit » *Augustinus*, quem post istam definitio-

» nem diù putabam quæsitum esse quod
» diceret , subjecit statim : cur ergo ,
» quæso , sapientem non vocamus flagi-
» tiosissimum illum hominem , quem ipsi
» benè novimus per innumera scorta so-
» lere dissolvi : *Albicerium* dico illum ,
» qui apud *Carthaginem* multos annos
» consulentibus mira quædam & certa
» respondit ? Innumerabilia commemo-
» rare possem , nisi & apud eos loquerer
» qui experti sunt , & paucis nunc satis
» fit , ad id quod volo . Nonne cochlea-
» rium (mihi autem dicebat) cùm domi
» non inveniretur , tuo jussu percuncta-
» tus , non solùm quid quæreretur , ve-
» rùm etiam nominatim cuius res esset ,
» & ubi lateret , citissimè verissimèque
» respondit ? Item me præsente , (omitto
» illud quod in eo quod rogabatur , nihil
» omnino falsus est ,) sed cùm puer , qui
» nummos ferebat , certam eorum par-
» tem , cùm ad eum pergeremus , furatus
» esset , omnes sibi numerari jussit , coë-
» gitque illum ante oculos nostros quos
» abstulerat reddere , priusquam omnino
» ipse , aut eosdem vidisset , aut quantum
» sibi allatum fuerit , audivisset ex nobis .

» Quid quod doctissimum & clarissi-
» mum virum *Flaccianum* mirari solitum
» esse abs te accepimus , qui cùm de fundo

» emendo esset locutus, ad illum divi-
 » num rem ita detulit, ut quid egisset,
 » si potis esset, ediceret. Atque ille sta-
 » tim non modò negotii genus, sed etiam,
 » in quo ille vehementer clamabat admi-
 » rans, ipsum fundi nomen pronuntiavit,
 » cùm ita esset absurdum, (hoc nomen)
 » ut vix ejus *Flaccianus* ipse meminisset.

» Jam illud sine stupore animi non
 » queo dicere, quod amico nostro, disci-
 » pulo tuo, sese volenti exagitare, flagi-
 » tantique insolenter, ut diceret quid ipse
 » secum tacitus volvebat? *Virgilii* versum
 » eum cogitare respondit. Cùm ille obstu-
 » pefactus negare non posset, perrexit
 » quærere quisnam versus esset? Nec *Al-*
 » *bicerius*, qui grammatici scholam vix
 » transiens vidisset aliquandò, versum
 » ipsum securus & garrulus canere dubi-
 » tavit. »

§. III. Ab historiâ ecclesiasticâ tran-
 seamus ad profanam; a medicis scripto-
 ribus ducentes exordium.

1. *Alexander Benedictus*, medicus *Vero-*
nensis, cuius priora opera æstimatissima
 anno 1505 edita sunt, *Libr. VII. Prax.*
Cap. XXV. « Vidisse se narrat duas mu-
 » lieres vicinas, uno die malis medica-
 » mentis potionatas, quæ mirificis posteà
 » vomitibus exagitatae fuerunt; alteram

» acum crinalem ingentem, in modum
 » hami implicatam, cum capillo mulie-
 » bri plusculo, cum resegmentis unguium
 » revoluto, rejecisse magnis conatibus,
 » quæ sequenti die mortem obiit: alte-
 » ram capillamentum mulicbre, vitri frus-
 » ta, cum canis caudæ pilosæ tribus frus-
 » tis arefactis, ita ut benè integræ caudæ
 » quantitatem, si in unum compositæ fuis-
 » sent, adæquassent evomuisse. »

2. *Antonius Benivenius*, medicus celeberrimus *Florentinus*, edidit anno 1507 libellum *de abditis nonnullis ac mirandis morborum & sanationum causis*, cuius Cap. *XXVI* narrat, cùm educationem teli hamati nullâ arte humana possibilem intellexisset miles, eum « *advocasse ariolum*, qui duobus digitis plagæ superpositis, & carminibus nescio quibus insuffratis, *telum ex osse redire jubet*: quo, et si absque ægri corporis noxâ, non tamen sine utriusque animæ dispendio, obtemperante, miles ille paucis post diebus ritè curatus convaluit. »

3. *Joannes Fernelius*, è doctoribus Galliae medicis, atque archiatrorum comes, qui circà annum 1526 occipit scribere, in doctissimo suo opere *de abditis rerum causis*, *Libr. II, Cap. XVI, pag. 802*, demonstravit magicam artem verè existere

ex sacrâ scripturâ, traditione, & propriâ suâ experientiâ; in eosque, qui hanc negabant, gentilitatis de eâdem sententiam refert, quæ nisi verissima constitisset, notissimarum Romanarum legum, ab ipsis XII tabulis inceptarum tantam non habuisset necessitatem. « Vidi, inquit, » scriptâ chartulâ collo subnexâ, universi » corporis iâterum unâ nocte detergeri: » vidi & febres verbis, ceremoniis qua- » dantenùs profligari. » Sed usu didicerat vir sapiens non juvandi, sed lædendi potiùs causâ, cacodæmonem hæc portenta suorum ministrorum edere, cùm morbi sic curati revertere soleant: hinc- que eum simulare sæpè curam ejusmodi » cuius admiratione perversas hominum » mentes irretiat, sibique infidelitate sub- » jungat; hoc unum præprimis annitens, » ut ab his, quos seduxerit, divino cultu » & honore dignetur. »

Quo eodem modo *J. C. Scaliger, Exerc.*

349. « Malus dæmon ista facit, non ut » hominem faceret potentiores, sed ut » ipsum deciperet credulitate, atque so- » cium haberet tūm impietatis, tūm æ- » terni exilii. Igitur ipse agit dæmon; » stultus ille, ac vecors putat suis se ver- » bis agere. »

4. *Cornelius Gemma, prof. Lovaniensis,*

scripsit *de naturæ divinis characterismis Libros duos*, editos anno 1575. In *Libr. II*, *Cap. IV*, longè plura & mirabiliora sursum deorsumque, a juvenculâ 15 annorum, per integrum ferè annum dimissa esse, testis refert oculatus.

5. *Ambrosius Pareus*, quatuor regum *Gailiæ consiliarius & archichirurgus*, in operum omnium anno 1582 editorum, *Libro XXV, a Cap. XXV usque ad XXXI*, plura habet quæ existentem magiam confirmant, ex aliorum quippe petita testimonio pleraque, sed auctoritatem magnam legitimè probatis factis accedere arbitratur, quod tot sapientes nationes contra hanc artem diabolicam tot leges condidissent; profectò minimè condituræ, ni de ejusdem veritate convictæ fuissent. Hæc verò missa faciens, memorabo duxat id quod *ibid. Cap. XXX* scribit. « Haud ita pridem præsente rege *Carolo IX*, præsentibus summis belli dictatoribus *Mommoranceo, de Retzio & Lanziaco*, nec non archiatro *Mazillio*, cæterisque testibus, vidi sagum multa edenterem quæ vires humanas multis sanè supererent parasangis, fatentemque audivisse hæc diaboli perficere operâ; ab eo vehementer torqueri se, verùm post triennium ab illo liberandum fore. »

6. *Baptista Codronchius*, medicus *Imolensis*, cuius prima opera anno 1591 primam lucem viderunt, narrat *Libr. II*, *de morb. veneficis*, post varias historias mirandarum ac vomitu ejectarum rerum, tandem filiam suam *Franciscam* admirando adeò morbo laborasse, ut propter natam veneficii suspicionem, quæcumque in lecto essent perlustrarentur: adeòque in culcitrâ inventa esse ciceris semen, grana coriandi, frustum carbonis, ossisque humani, aliquid ignotum cuique, prætereà plumas quibusdam filis tam artificiosè insertas, ut pileo, sicuti moris est, imponi facile potuissent. Fuere etiam eodem in lecto inventa frustula duo nucis siccæ, & ossis albi, novem vel decem ossa piscium, quæ in formam pectinis fabricata cum quibusdam corollis, ex variis rebus paratis, mirè intertextis. In ignem verò cùm hæc omnia projecta essent, mutataque domus & omnia, absque vel minimo auxilio adhibito puella convaluit.

7. *Zacutus Lusitanus*, cuius prima opera prodiere anno 1629, *Prax. Med. mirab. Lib. III*, *Obs. XXXIX*, postquam historiam virginis nobilis narrasset, quæ ubi ignobilem juvenem, se pereuentem, repulerat, tam horrendo morbo, enormique præternaturalium rerum vo-

mitu laboraret, ut incantata crederetur, sic prosequitur: « Parentes rei novitate & periculo filiæ cominoti, consulunt ariolos, sagas, sortilegos, magos & incantatores. Ex iis unus se eam sanitum, propositâ multâ mercede, constanter pollicetur, dicens ut adventante paroxysmo vocaretur. Sic factum. Nam cùm accessio velociter invalefecit, con- vocatur ipse; qui super caput ægræ prius abrasum, me præsente, imposuit papraceam chartam albissimam in quâ scriptæ erant binæ litteræ T M, & im posita erat ungula asini semicombusta; & ille nescio quæ verba ad aurem ob murmurans, illam ab insultu, & omni symptomate, in posterū liberavit.»

8. Doctissimus medicus *Daniel Sennertus*, ab experientiâ, eruditione, fide, commendatissimus, quid ad hanc rem demonstrandam præstiterit, in sequentibus multa dicendi oportunitas erit.

9. In *Gallia* initio sæculi XVII, testimonio *Lazari Riverii*, apud omnes in confesso erat conjugium ac conceptum impediri per magiam posse: & sub ejusdem sæculi finem concludimus *Galliam* totam veros extare magos credidisse, eò quod rex *Lud. XIV* solemni edicto eos-

dem morte puniendos esse per universum regnum sanciverit.

§. IV. Quum de re agatur quæ, fero-
cissimè impugnata nunquam satis pro-
pugnari potest, curiositas me prehendit
examinandi cum in sacris litteris magiam
apud idololatras gentes familiarissimam
fuisse *Cap. I* constiterit, an apud easdem
haec tenus coleretur. Non igitur, ut volunt
scriptores multi, an unicè perstaret cum
idololatriâ; nam eamdem in populo Chris-
tiano heu nimium viguisse sat superque
jam vidimus ac doluimus; sed eo fine ut
an apud barbaras gentes magia, nullis le-
gibus coërcita, nullis pœnis repulsa, fre-
quentior ac famosior foret. Bibliothecam
igitur meam percurrens, *Asiæ, Africæ &*
Americæ itineratores notavi, ordineque
pervolvi: *Barlæos*, aio, *Nieuwhofios*,
Dapperos, *De Bruinios*, *Schoutenios*,
Montanos, *Kæmferos*, *Dumontios*,
Dampierios, *Waferos*, reverendos patres
Hennepin & Labat, *La Martiniere*, *Maar-
tens*, *de Vries*, aliquosque complures. Vix
hic meta dabatur. Quamvis enim singu-
lam historiam summatim contraherem,
opus tamen meum 30 paginis volu-
minosius proditurum deprehendi; idque
iis duntaxat notatis, quæ itineratorum

eruditiores, exactiores, prudentioresque,
& hos inter adhuc ii præcipue, qui ad
hosce populos magiæ omnis inficiatores
ingressi, indubiis verò, numerosisque ex-
perimentis contrarium edocti, fideliter
ista, quæ a se visa essent, conscripserant.

Vix fando sum quantus me horror
hæc scribentem invaserit. Obstupui,
steteruntque comæ, & vox faucibus hæ-
fit. Pluriesque pergeremne, an desisterem,
animo suspensus, perfeci tamen. Revol-
vens postmodùm opus, intellexi quidem
convincientiora quidem magiæ existentis
argumenta, necdùm fortè alibi sic col-
lecta haberi, abundèque eadem ad om-
nem litem determinandam sufficere; ve-
rūm ab alterâ parte gravis me tenuit me-
tus ne aliis, sive simplicioribus, sive ma-
litiosioribus, hujuscemodi nefandorum
enarratio detrimentosa foret. Paulatimque
menti cepere ea observari præcepta, quæ
in similibus rebus S. Spiritus nobis B. Pauli
calamo dedit *Rom. XIV, & Cor. VIII,*
ne scilicet etiam illa quæ alias licetè tu-
tòque facere potuissimus, tunc facere-
mus, quandò fratribus nostris, pro quibus
Christus mortuus est, essemus offendiculo;
& quidem sic, ut dicat apostolus: *Qua-*
propter si esca scandalizet fratrem meum,
non manducabo carnem in æternum, ne

fratrem meum scandalizem. Itaque animo dubius editurusne hæc, an suppressurus essem; certus si dimonstrandæ veritatis necessitate compulsus ea ederem, mecum Tertulliano quem *Libr. de animâ*, Cap. **XIII**, de concubitu loquendi necessitas urgebat, fidenter monere lectores posse: « Ne itaque pudeat necessariæ demonstrationis; » formidans tamen, quem facere ex iisdem nonnulli abusum possent, operæ pretium duxi conscriptum, ut erat, opus, virorum sapientum, optimorum criticorum, summorumque pariter theologorum judicio subjicere, ab illorumque pendere oraculo: præsertim quia hanc totam quæstionem pertractare, citra multum librorum theologorum auxilium, non potueram. Porro viri hi gravissimi singula justâ lance librantes, in suppressionem inclinarunt. Suppressi itaque eosque lectorum, quos offendere hæc minimè possint, ad itineratores laudatos remitto.



P A R S I I.

C A P. I.

*De præcipuis scriptoribus qui magiam,
ut verè existentem artem, negaverunt.*

§.I. **I**NGENS est clarorum virorum agimen, qui magiam negent, ecclesiasticorum, juridicorum, politicorum, medicorum, philosophorum: quorum præcipuos, temporum quibus florebant ordine, recensabo.

1º *Henr. Corn. Agrippa*, natu *Coloniensis*, theologiæ, jurisprudentiæ ac medicinæ apprimè gnarus, singulam illarum publicè professus, vir per omnia singularis, regibus principibusque æquè inconstanter, quām vehementer, aut acceptus, aut odiosus, carcerum haud paucorum incola, satyricus homo, indigus, litigiosus, vagus, professione magus, tandem post variū denique carcerem anno 1535 obiit. Brevi ante finem magiam repudiavit, ejusque vanitatem ostendit. Est autem summi momenti testimonium hominis famosi olim magi, & tandem magiæ prostituentis vanitatem.

2º *Conradus Wolfharti*, *Lycostenes* dictus, qui usque ad annum 1561 vixit. Inter plura ejus opera extat *prodigiorum & ostensorum Chronicon*, in quo dæmoniacorum & magorum vaframenta pluribus, iisque notabilibus exemplis prostituit. Quæ inter notabile illud quod de *Margaretæ Ulmer*, civis *Eslingensis* filiæ, præstigiis tradidit. Hanc enim & medici urbis, & *Tubingæ* famâ clarus *Leonardus Fuschius*, & tandem imperatoris *Caroli V* ac Hungariæ regis *Ferdinandi* archiatri, omni sollicitudine examinantes, si quam unquam, hanc saltem artificia diaboli demonstrare, publicis actis testati sunt; dum interea elapso ab inde quadriennio magistratus lepidum fucum manifestum fecit.

3º *Joannes Wierus*, dictus *Piscinarius*, *Henrici Cornelii Agrippæ* famulus quondam & discipulus, *Cliviæ* ac *Julii* ducis archiater, scripsit Libros VI. de dæmonum præstigiis, de incantatoribus, de lamiis; & Librum apologeticum in pseudomachiam dæmonum. Magistri Agrippæ senescentis exemplo, sagas mortis eripere suppicio conabatur, merâ imaginatione, nullo vero cum dæmone commercio, easdem agi ratus.

4º Cancellarius Anglii regni *Baco Ver-*

rulamius, oper. omn. a pag. 947 ad 966
in Cent. X Hist. nat. sive *sylvæ sylvarum*,
in imaginationis vi, in imaginationis in
alia corpora operatione, inque ejusdem
manifestis, efficacibusque in alia effluviis
adeò diffunditur, ut videatur, idque ma-
ximè pag. 948 & 949, magiam penitus
excludere, inanemque ostendere. Editio
mea *Francofurtana* est anni 1665.

5º I. G. *Godelmannus*, juris professor
Rostockiensis, eodem, quo *Wierius* fun-
damento, eripere a mortis suppicio *sagas*
molitus est.

6º Rever. Jesuita *Fredericus Spee*, de
quo in *Præfatione*, *sagas* ferè omnes in-
nocenter deflagrati, integro Libro, testa-
tus est, propriâ experientiâ convictus.
Ad *Dubium XI* enim sic fatur : « Si &
» mihi aliquid lector concedit, fateor *me*
» *ipsum nonnullas superioribus annis in*
» *diversis locis ad mortem comitatum fuisse*;
» de quarum innocentia tām minimè
» etiamnum vacillo, quām nihil uspiam
» studii & industriæ, penè nimiæ, quod
» non adhibuerim ad veritatem detegen-
» dam. Stimulavit me curiositas, quid
» enim dissimulem? & penè ultrà metam
» traduxit, ut in re incertâ certum ali-
» quid cognoscerem; neque aliud tamen,
» nisi ubique innocentiam, deprehendi. »

Et ad finem *Dubii XXX* in hæc verba erupit : « Ego id cum juramento depono, » me quidem hactenùs (ut confessarium) » nullam ad rogum duxisse, de quâ, *omnibus consideratis*, prudenter statuere » potuerim esse ream. Idem ego, a duobus aliis accuratis theologis audivi. Neque tamen non omnem industriam adhibui, quâ ad veritatem penetrarem, » ut dixi suprà ad Dubium XI. »

7º *Christianus Thomasius*, director & professor jurisprudentiæ, *Hallenfis*, sub finem elapsi sæculi, hujusque principio florens, per ea quæ de magiâ inter sua opera hinc indè interspersit, in eamdem veluti imaginariam sic invectus est, ut inter ejus inficiatores meritò recenseatur.

8º *Rever. Claudius Fleury*, *Hist. Eccl. Tom. XIX. Libr. XCII. §. 4º*, postquam enarrasset varias in papam *Joannem XXII* conspirationes, pontificisque ipsius querelas de magicis in se per annos 1317 & 1320 tentaminibus, sic prosequitur : « Physices ignorantia in causâ » erat cur plures naturæ opera suprà » eamdem transcendere crederent. Cùm » autem fide constet à Deo sæpè permisum dæmonibus fuisse ut homini prodigiis imponerent, atque extraordinariis nocerent modis ; citrà examen sup-

» posita magia ut vera ars fuit, creditæ
 » que certæ regulæ, quibus dæmonum
 » ope & secreta nonnulla patescerent,
 » quædam infausta in homines immitte-
 » rentur: planè ac si Deus non potuisset
 » semper diabolos aut finere, aut impe-
 » dire ad hæc præstanta, & ac si pacta
 » cum spiritibus malignis rata habuisset.
 » Profectò si prætensam magiam attentiùs
 » contemblemur, non nisi beneficia (em-
 » poisonnements) superstitionibus, impos-
 » turisque sociata deprehendimus. »

9º Rever. Pater Campanella, Calaber, è S. Dominici familiâ, finiente XIV sæculo & incohante XV florens, Libros IV *de sensu rerum & magiâ* scripsit, ostenditque omnem magiam non nisi naturæ operam esse.

10º Reginaldus Scotus anno 1602 tractatum de magiâ edidit. Vix datur au-
 tor, qui majore cùm exemplorum, tûm argumentorum numero, & vi, totam magiam profligare conatus est: putavit enim se SS. Scripturarum, Conciliorum, SS. Patrum, Legumque civilium autori-
 tate, nec non ipsis de magiâ accusato-
 rum testimoniis & juramentis, magiam ridiculam, imò planè impossibilem orbì universo demonstrasse; solùm verò aut odium, aut avaritiam, aut ignorantiam,

prætensam hanc artem genuisse: consimili autem hoc luculenter vafrorum horum hominum confessionibus, qui diaboli simulantes concursum, summâ quidem astutiâ & dexteritate res prorsum mirandas, minimè autem præternaturales, effecissent: ejusmodi fuisse pythonissam anni 1535, quæ *sancta Virgo Cantiana* vulgò audiret, & *Alidam Norinton* anno 1574 in *Westwel*, & *Joannem Stikelbau*, anno 1572, in *Maidston*, quos nefarios omnes fuisse, insignisque artificii impostores, juridicum examen demùm ostendisset: eoque vehementius in populum *Anglicanum* invehitur, quod non modò ante mutatam religionem, verùm post eamdem mutatam, licet *Henricus VIII*, & sūi regni anno quinto *Elisabetha*, hanc superstitionem confodere sapientissimis legibus annisi essent, adhuc & ille, & ipsi ejus prædicatores tantâ credulitate laborarent.

110 Eruditissimus ac reverendus *Jacobus Meyer*, commercio litterarum cum *Erasmo Despautero* aliisque eruditis clarus, in *annalibus Flandriæ ad annum 1459*, magos non existere, sed inhumana criminazione fingi exemplis ostendit.
 « *Atrebatii*, ait, horrendum quid contingisse legimus. Complures fuisse inhu-

» maniter igne crematos, qui de nocte
» occultas coitiones habuere cum dia-
» bolo, unde magnam accepere pecu-
» niam viri primarii, mulieresque com-
» plures. Indiciis crematorum deprehensi,
» pars capti, & saevissimis tormentis ad-
» moti, alii vi pecuniæ redempti, non-
» nulli solum verterunt. Quidam vero
» adeò in pœnis constantes fuerunt, ut
» nihil confiterentur. Fuisse referuntur
» quidam ex judicibus adeò detestabiles,
» ut quosdam sibi inimicos indicari cu-
» raverint, tanquam consciens, reis in
» tormentis ad hoc coactis.»

12° Quæ eruditus iste ecclesiasticus ad annum 1459, hæc fusiùs descripsit *Jacobus Clericus*, toparcha in *Beauvoir*, per annos 1459, 1460, 1461, in *historia sui temporis*, sive *diario earum rerum quæ Atrebati & in locis finitimiis contigeruut*. Accusabantur magiæ *Dionysia*, civis cuiuspiam impudica uxor; vir, quem vulgo vocabant *l'Abbé de peu de sens*; illustrissima domina *Joanna d'Auvergne*, cum tribus suis pedissequis puellis; chirurgus *Huguet*, & scabinorum minister *Joannes Le Febvre*.

Ab inquisitoribus hi accusati, pluries torturæ admoti, demùm confessi sunt se easdem magicas artes exercuisse, quas

ipsis in torturâ, alias, post alias, inquisitores enumerabant: monente enim magistro *Gillis Flamen*, jurisconsulto, ut annuerent modo ad singula; fore tunc ut haud ultrâ admoverentur ad torturam; exiguum quippe pœnam alicujus mulctæ, leviorisque religiosæ peregrinationis, quæ infligenda esset, præ immanni totiesque repetitâ torturâ præferendam esse. Itaque deinceps, quæcumque proponebant inquisitores, sponte, veluti si commississent, fatebantur. Brevi autem posteà tanquam magi ac sagæ damnabantur tradebanturque scabinis, a quibus, cum bonorum confiscatione, rogo, damnati sunt.

Hanc verò dūm pronunciari sibi sententiam audiebant, horrendum quot diras advocato imprecarentur, qui suaserat, torturæ evitandæ gratiâ, ut, quæ ignorabant qualia essent, quæ nec cogitaverant, nec audiverant unquam, ideo sponte tantum faterentur, quod non nisi modicâ pœnâ mulctarentur! Singuli Deum testabantur nunquam ejusmodi crimina a se commissa esse, & quantumcumque piè ac christianè mortem subirent, suam nihilominus innocentiam, ac judicum, suam hæreditatem invadentium, exclamarunt vafritem.

Capit. IX & X ejusmodi plura enat-

rantur, additurque fuisse, qui decies & quinquies torturam, eamque aliquoties omnium sœvissimam, & quidem bis die admotam sustinuissent: contigisse quoque, ut hisce, qui negabant constanter, carnifex stricto gladio adstaret, obvelatis que, tanquam decollandis, luminibus, comminati inquisitores essent, ni mox fatentur, caput truncatum iri.

Interim Romæ degente *Atrebatenſi* præſule, vicarii ejus è carcere dimisere multos, quos inter unus qui post torturam octavam, aliis, qui post decimam & quintam, (in quarum ultima plantæ pedum comburendo sic consumptæ, ut pessimè indè haberet,) innocentiam tuiti semper erant.

Tandem causa domini *de Beaufort* ad supremum Parisiensium senatum delata, senatus amplissimus hic annihilavit per delegatos suos processum integrum *prope quadraginta accusatorum*: in perpetuam autem rei memoriam primò diem publicæ resipiscentiæ spectabili prorsùm pompâ, religiosissimè instituit; & postmodùm, ob urbem, ab ejusmodi tyrannide libertam, publicas agere festivitates & gaudia jussit.

13° Anno 1601 prodiit in *Gallis*, ubi idem qui alibi, in magiam furor, oratio

advocati regii, *Ludovici Servini*, in causâ fœminæ, quæ de magiâ accusata, cùm in denudato corpore quædam stigmata viserentur, quæ utut a variolis, aliisque pustulis, imò a nævis maternis oriri, vel relinqui solent, tamen in his, quæ de magiâ suspecti habentur, stigmata a dæmone impressa, & ignarum vulgus, & stolidi judices esse censebant, damnata ad aquæ tentamen fuit. Jamque siquidem ligatis manibus pedibusque, ter ab altitudine 7 vel 8 pedum in aquam præceps data, ad singulam vicem fluminis repetret superficiem, (quod impossibile citra diaboli opem præoccupatæ plebi videtur,) patibulo damnata fuit: sed cùm vita torturis sic confracta esset, ut in patibulum non perduraret, post mortem tamen & suspensa fuit, & igne concremata. Senatus supremus *Parisienſis* damnavit latam atque execuſioni mandatam sententiam, vetuitque ne postliminio hoc per aquam tentamen, ad magiam quasi detegendam, judices adhiberent.

14º Eruditus medicus gallus *de S. André*, gallicum tractatum, epistolari formâ, edidit anno 1725 *de magiâ ac maleficiis, magis, satisque*, quo conatus est magiam subvertere omnem. Primò plurima falsa proferri censet, tam ab iis qui se magos dicant,

dicant, quam ab illis, qui magiæ incusent priores. Multa a magis sagisque proferri quæ metæ imaginationis vi tribuenda esse videantur: eosdem a diabolo sic disponi suâ in phantasiâ posse, ut verè hæc contigisse jurent, quæ in somno & vividissimo & protracto, menti obverfarentur: plerasque demùm magicas historias quas, aut ex antiquioribus monumentis eruisset, aut ipse examinasset præfens, aut denique a fidis percepisset amicis, vel omnino falsas, vel minimè præternaturales, habendas esse.

Itaque plura, quæ videri poterant supergressa naturæ vires, sic ipse explicat, ut in naturæ terminis omnino sita esse sibi viderentur. Hinc, *Paracelsi ac Verulamii* exemplo, multus admodum est in expoundâ dilatandâque imaginationis suspendâ vi, inque determinatâ vafrorum hominum nocendi voluntate: nec parciōr in explicandis spiritibus est, qui malevolorum de corpore in propinquos, sive homines, sive res, quo noceant iisdem, exhalent: tandem modicus non est in expoundâ virtute spirituum, post irritationem exhalantium de hominum rerumve corporibus illis quibus nocuerant malefici in ipsa maleficorum corpora retrogradorum; idque, si credere fas est, ad

multorum, imò centenorum milliarum distantiam.

Exspatiatur dein egregius *Andreus* per historias acicularum, cultrorum, gladiorumque fragmenti majoris minorisve; globorum ferreorum, insectorum, laciniorum vestium, pilorum, &c, quæ vomitu, alvo, abscessu vario, de corpore humano, eoque illæso, ejecta perhibentur. Hic eruditus vir totam bibliothecam medicam percurrens, exempla cunctorum sæculorum profert, quibus evidens fit ejusmodi res variis humani corporis è partibus expulsas fuisse, absque vel minimâ sive ægrorum, sive medicorum de magiâ suspicione, imò cum eorumdem corporum excretionis naturalis persuasione.

Quin ipsum hoc omnino naturale autor esse censet, quod magi sagæve, quando ex pratis illa beneficia, quæ ad pecus necandum, frugesve corruptendas, occultaverant in iisdem, auferunt, sæpè moriantur. Vulgus quidem credit hos a maligno spiritu, quod suum opus destruant, necari; nihil autem plus esse secundum naturam censet *Andreus*, quam ut subfossis in rebus fermentatio suboriatur, cuius subito explosi vapores eos, qui effodiunt, afficiunt atque præfocant. Ex quibus omnibus concludit nihil indignius vero phi-

lo sopho ac physico esse , quām cum imperito vulgo opinari res enarratas & naturæ transgredi potestatem , & angeli prævaricatoris opus esse.

15º Vir illustris *Scipio Maffeus* , contrà egregium *Tartorottum* , anno 1748 de nocturno *Lamiarum congressu* scribentem , epistolam *Veronæ* edidit anno 1749 , *Artis magicæ dissolutæ* titulo ; in quâ singulare sententiâ veram quidem ante Christum natum magiam extitisse fatetur , eamdem verò post Christum natum ita exulasse , ut quidquid de illâ in diebus novi Testamenti perhibetur , meræ fabulæ sint.

16º Prodierunt anno 1770 duo Tomi in-quarto , aucti autem & emendati anno 1771 , viri eruditissimi *Constantini Francisci de Cauz* , in academiâ Roberetanâ *Quirini* , titulo hoc : *De Cultibus magicis , eorumque perpetuâ ad ecclesiam & rem publicam habitu*. Censet præclarus autor se hoc sole ipso evidentius reddidisse , quod ars magica neque extet hodiè , neque extiterit unquam. Præter omnia quæ priores magiam negantes autores , quæque maximè clarus *Andreas scripto* tradiderunt , noster stupendæ eruditionis scriptor historiam dictæ sic magiæ , dictiæque sic cum satanâ pacti , per omnia sæcula ex utriusque sacræ Scripturæ paginâ ,

ex conciliorum testimonio, ex SS. Patrum autoritate, ac tandem ex sæculorum barbarorum cùm supremâ ignorantia, tûm stupidissimâ simplicitate, sic se credit refutasse, ut ultrà nemo sanæ mentis existere possit, quin magiam, vulgi sensu intellectam, dari neget.

17º Prodiit haud ita pridem, scil. 1772, in *Galliis opusculum eruditum eruditii abbatis De la Chapelle*, cui titulus: *Relatio historiarum stupendarum de dictis ita pythonibus, seu ventriloquis, quæ haud ita pridem in Galliâ observatae sunt; cum examine causarum phænomeni mirabilis, & cum ejusdem ex variis tam venerandæ antiquitatis, quam temporum nostrorum exemplis, confirmatione: examinata ab Acad. Reg. Scient. Parisinâ, ac deputatorum academiæ testimonio confirmata.* Lectu utilis & jucundus hic tractatus genuina pythorum, ut saltem opinatur autor, nobis præbet aliquot exempla, quibus pythosimum omnem merum, sed singulare naturæ opus esse censet: ut proinde funditus ea eorum argumenta ruant, qui eumdem citra dæmonum opem exerceri non posse arbitrabantur; & ut deplorandus generis humani error, quo ventriloquos, magos, sagas, ariolos, haud citra pacatum implicitum expressumve cum diabolo

initum, artis suæ experimenta edere posse, creditum fuerat, planè dispellatur: siquidem in his omnibus quidam habitus a naturâ deprehenditur, quem industriosi homines callidè exercentes, eò demùm perveniant, ut in operibus suis naturam longè superare videantur.

18º Agmen claudit præclarum *Vindotonensis universitatis lumen nobilissimum Paulus Josephus a Rieger*, consiliarius aulicus actualis, nec non juris publici ecclesiastici olim prof. ordinarius, in præmissâ *Parte II. Spec. Corp. Jurisprud. Eccl. Dissertatione de magiâ*, anno 1773... Multâ eruditione, pro more suo, inclitus autor tractat universam hanc materiem, per singulas ejusdem partes: scilicet, magiam ethnicam, judæis haud ignorantem, cultam quoque christianis; divinationem, ad quam & astrologiam refert; auguria; necromantiam; sortilegium; sortes sanctorum; magiam strictè dictam, ejusque species, ut incantationem, præstigium, vanas observantias, earumque species. Leges deinde tam ecclesiasticas quam civiles, contrà singulas magiæ partes, per decursum sæculorum recenset: quibus omnibus cunctas imaginariæ artis fabulas funditus everti arbitratur. Transit tandem ad magiam quam ethnico-chris-

tianam, seu semi-christianam appellat: cuius leve quoddam principium saeculo XIII deprehendit: saeculo XIV auctiorem quidem, sed adhuc plebeiam magiam; saeculo XV autem multum propagatam; tum saeculo XVI autoritate stabilitam; & tandem saeculo XVII penitus confirmatam. Totus sub finem est in refutandâ descriptæ hujus artis possibilitate, respondetque ad omnia argumenta quæ ad illam stabilendam ex sacris Bibliis, ex SS. Patribus, ex ipsis accusatorum, seu spontaneis, seu torturâ expressis confessionibus proferri solent.

SECUDÆ PARTIS

CAP. II.

Objectiones quas recensui Capite proxime priore autores contrâ magiam fecerunt, & primò quidem ex sacrâ Scripturâ. Subjunguntur ad singulas responsa.

§. I. ERUDITOS viros omnes veneratus, ob idque horum neminem privatim non nisi raro circumspectèque aggressurus, oportunius esse existimavi, ad certa quædam capita singula singulorum revocare argumenta objectionesque, & ad singula ordine respondere. Quemadmodum au-

tem priori in capite feci, ut non modo quos adversarii nostri scriptores laudarint, recensuerim, verum pluribus autoribus horum numerum compleverim; ita in hoc capite haud consueta tantum eorum qui magiam negant argumenta enumerabo, & objectionibus respondebo, verum numerum horum iis, quae præterviderunt illi, diligenter supplebo; ne in inquirendâ veritate cuiquam, vel minimæ etiam parti defuisse videar. Ac primùm quidem discutienda argumenta sunt, quæ contra sacræ Scripturæ autoritatem formantur.

OBJECTIO I.

Hanc autoritatem ad probandam magiam artem hi qui magiam negant, perperam adhiberi arbitrantur, censemque sacram Scripturam in allatis Parte I textibus non nisi de idololatris, de impostoribus, deque ceremoniis atque cultibus loqui, qui ad idololatriam aut inducendam, aut confirmandam propagandamque unicè spectabant.

RESPONSO (a).

In hisce textibus referendis *Vulgatam*

(a) Ordo quidem exigeret ut omnes objectiones Capite singulari recenserentur, &

editionem ubique cum fontibus *hebraico* ac *græco* conferentes, vidimus in non-nullis textibus, & idololatriæ & magiæ mentionem jungi; in aliis solius magiæ mentionem fieri, in aliis iterum solius primum magiæ, deinde magiæ, tamen idololatriæ junctæ, quam in idololatriam præcipitantis. Sic, etsi mirum non foret magiam & idololatriam perpetuò in textibus junctas esse, cum magia vera & exquisita, etiam apud Christianos, detestanda maximè idololatria erga diabolum sit; tamen magiæ & prohibitio, & punitio, pluribus sacrī in textibus, laudato loco inveniendis, ab iis idololatriæ adeò discretæ enuntiantur, ut evidens sit magiam, quam magiam, quam per se solam existentem damnari ac puniri, adeòque ab idololatriâ propriè dictâ rem diversam esse.

OBJECTION II.

Magi Pharaonis non fecerū idem quod *Moyses & Aaron*, sed quid simile dantur: sic ut diabolus, vel imaginationem

Capite altero *responsiones*: verum cum aliis *responsiones* ibi appositissimæ locari videantur, ubi *objectionis* vis recens præprimis ac vivax in memoriâ est, consuere *responsiones* ad *objectiones* debui.

Ægyptiorum adeò vivam excitaverit, ut serpentes, ranas, rubrasque aquas reverà contuerentur; vel fascinaverit eorum oculos, ex aëre formando corpora quæ serpentes, &c. referrent.

RESPONSIo.

Ad hanc objectionem respondi, explicando textum *Exodi Cap. VII.* Cùm verò de imaginationis vi brevi nova sequatur objectio, simul ad hanc latius respondebitur.

OBJECTIO III.

False illud **בְּשַׁׁעַר** *Exodi VII & VIII* interpretatur quis sic, ac si magi idem quod *Moyses & Aaron* fecerant, fecissent: nam ubi sacer textus ter hâc phrasî usus est ad serpentes, ad ranas, ad rubras putidasque aquas, quodammodo a magis repræsentatas, mox ubi *Moyses & Aaron* sciniphas, scinipes, pediculos, produxerant, *hebraeus* textus quartâ vice eâdem phrasî quàm *Vulgata* reddit, *Et fecere magi similiter*; usus est: ac pari modo *græcus* textus in singulis horum quatuor locorum: *Ἐποίησεν δὲ ὦσαύτως οἱ Επαοιδοί*. Ubi nihilominus constat eosdem nihil fecisse, & ad suam gignendorum

pediculorum impotentiam exclamasse quod hinc *Dei* digitus, manus, virtusque subesset. Ergo cum hinc nihil fecerint, ubi textus dicit: *Et fecere similiter*, nihil quoque fecere, nec veros serpentes ranasve produxerunt, ubi ter dictum fuerat: *Et fecerunt similiter*; sed ex aere aliisve elementis aliquid composuere simile, aut oculos *Ægyptiorum* fascinaron, aut eorumdem commoverunt imaginationem.

RESPONSI O.

Habet profectò phrasis ista aliquam difficultatem explicandi in hoc quarto loco, nec facilè quacunque explicatione hæc difficultas tollitur: sive enim serpentes veros, veras ranas, veras putridas rubelliasque aquas produxerunt, sive phantasticè tantum repræsentarunt, aut oculos fascinarunt, aut imaginationem moverunt, cur sacra Scriptura ad *sciniphas*, seu pediculos a sanctis viris Dei productos, dicit magos similiter fecisse, ubi nec veros, nec fictos, imaginariosve sciniphas exhibere potuere *Pharaoni*? Ergo in utrâque explicatione, licet in quarto loco dicatur iterum: *Et magi fecerunt similiter*; certum semper est in tribus prioribus prodigiis aliquid magnum, seu ve-

rum, seu fictum illos exhibuisse; in quarto verò nihil omnino. Ergo secundum utramque explicationem, in tribus prioribus prodigiis magi & tentarunt, & effecerunt quod tentaverant; in quarto tentarunt, nec effecere quidquam. Sic ut hoc quarto loco intelligendum ab utrâque parte sit, magos fecisse similiter, ut priùs, tentando; sed non, ut priùs, efficiendo. Igitur hæc difficultas per se eam non infimat quæ hujus phraseos data fuit expositionem. Cæterum particula יְהִי idem facere, idem fieri, in sacris significat. Vide Gen. I, v. 7, 9, 11, 15, 24, 30. Hic certè וַיְהִי factum est sic, non apparentur quid simile, sed id ipsum quod Deus jussérat, creatum fuisse significat. Reliqua solutio hujus difficultatis data est Part. I, Cap. I, ad text. Exod. VII, ad quam remitto lectorem.

OBJECTIO IV.

Ex Libri Sapientiæ Capite XVII, v. 7, demonstratur magorum Ægyptiorum artem merè illusoriam fuisse, ac derisoriam, illisque contumeliosam. *Et magicæ artis appositi erant derisus, & sapientiæ gloriæ correpiio cum contumeliâ.* Hebraicus fons, si extiterit olim, nobis periit; Græcus autem sic habet: Μαγοῦς δὲ ἐμπαιραντας

κατέκειτο τῷ χρήσει, καὶ τὸν εἰπιφρονίον αὐλαγόνειας ἐλεγχός εἴρηται. Magicæ autem artis derisus appositi erant, & suæ de sapientia jactaniiæ redargutio contumeliosa.

RESPONSO.

Non videtur ab his, qui hunc versum *Capitis XVII* objiciunt, integrum caput lectum fuisse. Loquitur *Salomon* de terrificâ trium dierum apud *Ægyptios* nocte, quam in diem convertere suâ magiâ frustâ tentabant, vel respicit ad *sciniphum* plagam, ad quam Deus haud ultrâ magis, seu spiritibus immundis, permisit vera sua miracula imitari. Unde sive hic *Sapiens* de tertîâ plagâ *sciniphum*, sive de nonâ tenebrarum loquitur, ostendit Deum, qui diabolo aliquid permiserat, nunc illum cohibuisse; minimè verò magos diaboli ope effecisse unquam nihil.

OBJECTIO V.

Ad magicam artem stabiliendam perperam adhibetur Cap. XIII. *Deuteronomii*, in pag. 15, Part. I, Cap. I. §. II. Nam totum fictum hîc esse, quod de falso prophetâ Deus hîc dicit, Deus indicat ipse: *Propheta autem ille*, ait, *aut fidei formiorum interficietur.*

RESPONSO.

Sic quidem in Vulgatâ habetur , minime verò in textu *hebraico* , aut *græco* חֲרָם *Somnians somnia* , ut in hujus textûs principio , hâc solâ exceptione , quod littera ה , accusativum designans , desit , ubi Vulgata ipsa non *somnium fingentem* , ut hîc , sed *somnium videntem* , ponit . LXX habent : Καὶ ὁ Πρόφητας εἶπεν , οὐ τὸ εἰρύματος εἰρυματάζειν εἰπεῖν , εἰπεῖν αὐτοθαῦται . *Et propheta ille , vel ille hoc somnium somnians , ille morietur.* Conferentes ergo omnes inter se textus , intelligimus non finxisse hoc somnium prophetam illum , sed hoc somnium , eventu comprobatum , verè somniasset .

OBJECTIO VI.

De pythonissâ *Saülis* est , quam statuunt nihil fecisse nisi ceremonias ineptas , præ terrore , dum simulacrum *Samuelis* conspexisset , exclamasse , adeoque se *Samuelem* per sua præstigia minimè exspectasse fassam esse : prætereà vel umbram duntaxat apparuisse *Samuelis* , vel si ipse met fuerit , non sagæ , ut patuit , sed peculiari Dei dispositione solâ eum appa-

ruisse. Sed ad hæc omnia puto in *Part. I,*
Cap. I, §. V, sufficienter responsum esse.

OBJECTIO VII.

De *Philippicā* puellâ est, quæ *pytho-*
nica *Cap. XVI. Act. Apost.* dicitur.

RESPONSI O.

Ad hanc historiam *Part. I, Cap. I,*
§. VI, responsum satis fuisset, nisi in
scriptis quorumdam legeremus, hanc
puellam non fuisse verè *pythonicam*, sed
dæmone *obsessam*; ad quod responden-
dum paucis est: paucis, inquam, quan-
doquidem dæmoniacorum non est mul-
tū lucri divinando comparare: quidquid
enim hi faciunt, *Tom. XV Rat. Med.*
Cap. IV, clarè, ni fallor, ostendi: *divi-*
nare μαρτύρωμεν, ut textus sacer dicit, eos
qui non magi, sed duntaxat obsessi a dia-
bolo essent, nullibi in sacris legitur. Et
quid plura? Scriptura hanc puellam *py-*
thonem spiritum habuisse asserit: qui spi-
ritus nullibi dæmoniacos obfidere legi-
tur, sed verè magicus est, ut toties jam
in parte primā patuit. Quod si omnino
dæmoniacam hanc puellam fuisse velint,
tunc quoque & pythonicam unà fuisse,
atque adeò a dæmone & obsessam, &

fatidicam, fateantur oportet, cùm ea præstiterit, quæ dæmoniaci præstare non soleant.

OBJECTIO VIII.

Nulla ars magica est, nec esse potest, si eam Deus irritam fecit. Atqui hoc se fecisse dixit ipse Deus Isaïæ XLIV : *Ego sum Dominus . . . irrita faciens signa divinorum, & ariolos in furorem vertens*; cùm nempe vident omnem suum laborem inanem esse. Hebr. בְּנֵר אֶתְוֹת Infringens, dissipans signa, &c. Ergo nulla omnino ejusmodi ars existit.

RESPONSO.

Altera pars ejusmodi versiculi prophætæ totam hanc difficultatem solvit: sic enim prosequitur Deus: *Convertens sapientes retrorsum, & scientiam eorum stultam faciens*. Si nulla *magia* existat, quia eam Deus irritam facit, non existit eamdem ob causam *sapientia*. Utraque ergo existit, sed hanc & illam Deus sistit, dissipat, ubi æterna sua decreta exequitur, quidquid artificio suo *magi*, quidquid astutiâ prudentiâque suâ *sapientes*, in contrarium moliantur. *Non est sapientia, non est prudentia, non est consilium contrâ Dominum*. Prov. XXI, v. 30.

SECUNDÆ PARTIS

CAP. III.

*Responsio ad objectiones contra magiam ;
petitas a doctrinâ , consuetudine & le-
gibus Ecclesiæ , sanctorumque Patrum
autoritate.*

OBJECTIO I.

§. I. **Q**UEMADMODUM ex sacris Bibliis, sic & ex doctrinâ autoritateque ecclesiæ, sanctorum ejusdem doctorum, probare conantur multi, ac ferè omnes magiæ veræ negatores, nullam eamdem esse : Si quidem extent plurimæ ecclesiæ leges generales latæ cùm in omnem magiam, tūm & in singulas ejus species, quæ magiam negent. Occupant hæ leges magnam librorum adversariorum partem, eò quòd ex iisdem palmarium contrâ existentis magiæ sententiam argumentum peti censeant.

RESPONSI O I.

Ex perpetuâ Ecclesiæ Catholicæ ad nostra usque tempora consuetudine, ceremoniis, precibus & decretis, nos, cum canonistarum principe *Van Espan*,

dudum coacti fuimus fateri, ab eadem ecclesiâ magiam, ut verè diabolicam artem & creditam, & prohibitam suisse.
Vide Part. I, Cap. II.

RESPONSI O II.

Ex reipublicæ legibus contra nummos adulterinos, eorumque fabros ineptè omnino conficerem, neque veram monetam, neque ejusdem existere fabricatores: è contrariò ex his legibus meritò concludo cùm propter nihil, nihil fiat, ideo veram monetam existere, quia contrà falsam, ut verè existentem, respublica & leges edidit, & pœnas indixit. Hisce porrò ad nostram quæstionem relatis, ex ecclesiæ legibus contrà falsam magiam datis, magiam veram dari potiore jure conficio, quàm ex iisdem legibus eam non existere conficiunt adversarii.

OBJECTIO II.

Ecclesiam leges condidisse affirmant, non in verè existentem magiam, sed tantummodo in putatitiam, in ostentariam, splendorem religionis sacratissimæ obfuscantem, pietati adversam, atque dæmoniacæ in christianos potestatis assertione religioni probrosam. Cùm in hoc verse-

tur negotii omnis cardo, audienda suis in legibus Ecclesia est. Laudant concilii Toletani primi regulam contrà *Priscillianistas*: *si quis astrologiæ vel mathesi existimat esse credendum, anathema sit*; adduntque ad hanc Toletani synodi regulam *sancti Leonis* papæ verba hæc: *quoniam qui se talibus persuasionibus dedit, a Christi corpore totus abscessit.*

RESPONSIΟ.

Anathema sanctus synodus dixit his qui magiæ credunt, arti diabolicæ, arti in quâ diabolus divinis colitur honoribus: an potuit artem detestandam tales non condemnare, non anathema eidem credenti dicere? An ejusmodi homo non ideo anathemate dignus, quod, ut *B. Leo* ait, *a Christi corpore totus abscesserit?* Acclamamus utrique sententiæ, sollicitè autem quærimus an magiam veram non existere & synodus, & pontifex, pronuntiarint? Nos è contrariò arbitramur eamdem, ut verè existentem, ab utroque damnari.

OBJECTIO III.

Canon objicitur nobis 9. XXVI, q. v.
Si quis clericus, monachus, vel secularis, divinationem vel auguria crediderit obser-

vanda... cum his qui eis crediderint, ab Ecclesiæ communione pelluntur.

RESPONSO.

Nihil justius est quām eos de Ecclesiâ pelli, seu excommunicari, quibus pro Deo diabolus est. Sed an hoc canone demonstrare quis vult veram magiam non dari? Condonet mihi, veram magiam ab Ecclesiâ hoc canone agnitam esse credenti.

OBJECTIO IV.

Magiam nihil nisi imaginarii quid esse definitissime dicitur concilium Agathense, suo canone 42 qui sic se habet: *Quod maximè fidem Catholicæ Ecclesiæ infestat, aliquanti clerici, sive laïci student auguriis, & sub nomine fictæ religionis, per eas quas sortes sanctorum vocant, divinationis scientiam profitentur, aut quarumcumque scripturarum inspectione futura promittunt. Hoc quicumque clericus, vel laicus, detextus fuerit vel consulere, vel docere, ab Ecclesiâ habeatur extraneus.*

RESPONSO.

Hic nihil video dici a synodo, quod magiam imaginariam esse declareret, sed ab Ecclesiâ separari omnes qui vel ma-

giam colant, vel proximas illi superstitiones exerceant.

OBJECTIO V.

Ad ostendendam artis magicæ inanitatem affertur concilii *Laodicæi* canon VI : *Si quis maleficio interficiat alterum, et quod sine idololatriâ perficere scelus non potuit, nec in fine impertiendam esse communionem.*

RESPONSO.

Ego prorsùm contrarium hīc a concilio affirmari intelligo : statuit enim adeò potentem artem magicam esse, ut quis diaboli auxilio, verāque erga diabolum idololatriâ occidere alium maleficio possit.

OBJECTIO VI.

Eundem in finem canon XVI ejusdem concilii laudatur : *Qui magicis falsitatibus in grandinariis tempestatibus credunt, sciant se fidem christianam & baptismum prævaricasse, & ut paganum & apostatam, id est, retrò abeuntem, & Dei inimicum, iram Dei graviter in æternum incurrisse.* Putant adversarii hīc omnem magiam penitus confodi, cùm *magica falsitas* appelletur a concilio ; adeòque hujus synodi sub finem IV sæculi celebratae,

& totius antiquitatis veneratione honoratæ patres credidisse, id omne quod de magiæ virtute atque potentia imperitum vulgus credit, ridiculum ac falsum esse: quod, num sic se habeat, videamus.

RESPONSO.

Ac primò quidem mentem hujus concilii hanc fuisse ideò cum *Van Espen* negamus, quod Ecclesia ab omni tempore magiam potentem artem esse crediderit.

Secundò. Ubi concilium hoc rationem dat, cur hos damnet, qui *credunt magi-
cis falsitatibus & grandinariis tempestati-
bus*, si nullam existere magiam credidis-
set, primariam rationem, & ad moven-
dos christianorum animos potentissimam,
petitam scilicet ex magiæ ineptitudine
& vanitate, omisisset; hanc rationem
autem non dedit. Ergo non credidit con-
cilium totam magiam imaginariam esse.

Tertiò. Criminis magnitudo, seu enor-
mitas a concilio determinata, solius veræ
magiæ est, non verò imprudentis cre-
dulitatis eorum qui magiam veram, quæ
tota tantum imaginaria sit, esse credant.
Constat *S. Hieronymum*, *S. Augustinum*,
magiam stupendam artem esse credidisse:
statuuntne idcirco hi magiæ negatores
sanctissimos hosce patres *fidem christia-
nam & baptismum prævaricasse*, & ut

paganos, & apostatas, Deique inimicos, iram Dei graviter in æternum incurrisse? Idemne de *Espenio* innumerisque aliis affirment? Ergo magnitudo criminis aper- tè declarat patres hujus synodi & veram efficacemque magiam dari, & in talem se sententiam unicè ferre voluisse. Et demonstratur ejusmodi mentem ipsis fuisse ex canone XXXVI. qui de exercitio veræ magiæ agit.

O B J E C T I O V I I .

Synodus Quinisexta seu Trullanum concilium, ex 211 episcopis Constantinopoli in loco Trullo dicto collectum, eos qui nubes fugare dicuntur, & imprecatores, canoni qui est de sexennio subjicit. In his autem perseverantes, nec mutantes senten- tiā, nec fugientes hæc perniciosa & eth- nica instituta, omnino ejiciendos ab Ec- clesiâ definivit. Qui existentem veram ma- giam negant, hunc canonem sibi faven- tissimum arbitrantur.

Et plures leges, textus, canonesque huic similes, quibus suam stabiliri senten- tiā putant, in nos congerunt. Novell. Leon. LXV. *Sacerdotes admonere fideles populos jussit (Ecclesia) ut noverint ma- gicas artes, incantationesque, quibuslibet infirmitatibus nihil remedii posse conferre.* Addunt hisce Karlomanni leges, hæc

omnia vocari *paganias*, & *paganorum observationes*. Leges alias civiles, permultasque easdem, in magiam credentes compellunt, magiæ negantes vires, imposturamque declarantes. *Ferunt magos suis maleficiis aëra posse conturbare*, & *grandines immittere*, *futura prædicere*, *fructus & lac auferre*, *aliisque dare*, & *innumerā a talibus fieri dicuntur*. Et iterum: *Diversa finguntur solummodo portenta*. Et iterum in aliâ lege: *Si quis a diabolo deceptus crediderit, secundum morem paganorum, virum aliquem, aut fœminam strigam esse, & homines comedere, & propter hoc ipsam incenderit, vel carnem ejus ad comedendum dederit, vel ipsam comedenterit, capit sententiâ punietur*.

Instant hîc adversarii, atque ex omnibus hisce apparere aiunt legislatores & ecclesiasticos, & politicos, definivisse magiam non esse, sed *dici*; magos sagasque non existere, sed *videri*; magos mala non inferre, sed *perhiberi*, *ferri*, ac si hæc facerent; portentaque edere dicuntur, tantummodo *fungi*: nec posse eos infirmitatibus suâ arte mederi: qui credunt ea illos posse, quæ affirment præstare, capit sententiâ puniendos esse: tandem qui magos veros strigasque existere credat, eum secundum paganorum observationes

atque mores hæc credere: immo totam magiam ut *Canon VI conc. Laodicæi* ait, per omnia ad paganismum, adeoque ad idololatriam pertinere.

RESPONSO.

Primò. Leges tam ecclesiasticæ quam civiles, ut suprà patuit, magiam veram crediderunt, & sic uti nos descripserunt. Vide responfa omnia priora in *hoc II Capite*. Ergo tempora fuere, in quibus plerique patres in variis conciliis, plerique quoque principes & legillatores veram magiam existere crediderunt, sicuti nos; tempora iterùm, quibus episcopi & principes multi, fortè propriâ experientiâ destituti, aliorumque relatu duntaxat instructi, eum se enunciandi modum per *videri*, *perhiberi*, *dici*, elegerint. Dico *secundò*: Quod & *figi* talia statuerint, minus vel ideò miror, quod in historiâ magiæ, atque in accusatorum responsis, sæpè occurrat ejusmodi fictio, quâ multa se præstaturos vafri homines sponderent, nec efficerent quidquam, nisi quod calliditatem naturalem minimè excederet. Hoc adeoque verum, ut in pluribus magorum confessionibus jam *Sennertus* adverterit, alii que cum eo, diabolum sæpè torquere sagas & magos, ut nonnunquam in viginti operationibus

operationibus ille vix bis tenax promissi fuerit. Hinc non minus ii qui magiam veram admittunt, quam qui negant, fallacem hanc esse rentur artem; eoque magis, quod attentiùs consideremus malitiam dæmones exercere suam non posse, nisi quantum, & quando, & ubi id permittit Deus. Adeoque Deo non permitente, hominemque suis fidelibus angelis defendantे, credibile admodum est dæmonem in magicis operationibus frequenter deficere; ac proinde artem magicam fallaceim appellandam esse.

OBJECTIO VIII.

Magiæ efficacis inficiatores autoritatem multam suæ opinioni dari à sancto Agobardo, sub finem octavi sæculi, bonaque noni partem, archiepiscopo Lugdunensi, cuius hæc verba objicere nobis solent: *Tanta jam stultitia oppressit miserum mundum, ut nunc sic absurdæ res credantur a christianis, quales nunquam anteā ad credendum poterat quis suadere paganis, creatorem omnium ignorantibus.* Invehitur vehementer zelosus hic archiepiscopus in eos qui grandines, tempestatesque posse credunt excitari a magis, eosque & falsos testes Dei, & mendaces vocat, qui admirabile & valde terribile opus Dei, Deo

auferant, ut homini tribuant. Et cùm omnes asseverarent hanc grandinandi potestatem magorum, nec tamen quisquam eorum id vidisset, sed aliorum duntaxat percepisset relatu, *Agobardus* voluit demùm per illos relatores ad ipsos eos cognoscendos examinandosque ascendere, a quibus, ut a testibus oculatis, se hoc percepisse affirmantibus, perciperet, nunquam verò ad eorum vel unicum, qui vidisset ipse, pervenit.

RESPONSO.

Dignissimus hic *Lugdunensium* præsul, cui ideò non præfigo titulum *sancti*, qui illi a claris viris, qui contrà magiam scripsere, præfigitur, eò quòd in solâ dioœcesi suâ *sanctus* habeatur, in historiâ autem ecclesiasticâ simpliciter *Agobardus* scribatur; hic, inquam, zelosus & actuosus archiepiscopus, justè quidem invectus fuit in judices, qui ad innocentiam inter duos litigantes, mutuòque se accusantes, detegendam, juberent aut mutuos in se stringere gladios, cùm *Gundebadius* rex Burgundorum *duellum* suâ autoritate permisum declarasset; aut per ignem, qui innocentem adurere non deberet; aut per aquam, in quam quis præcipitus mergi non deberet, si ejus quo

accusabatur criminis reus esset; meritò, aio, horum omnium & vanitatem, & illicitum exercitium, in foro criminali strenuè oppugnavit: nimio verò impetu magiam aggressus est. Falsam enim hanc in multis expertus, falsam dixit universam, imò impossibilem; sic ut vel is, qui eamdem minimè exercens, imò detestans, existentem tamen crederet, injuriam Deo faceret, paganisque deterior esset.

Hæc porro in *Agobardo* minimè miramur; in *Agobardo*, inquam, prælato præjudiciis & vehementiâ animi pleno, quo eum titulo *Historia ecclesiastica* recentet, cujusque specimina adhuc sub vitæ finem dedit, in controversiâ de *divinâ psalmodiâ contra Amalarium*. Vid. *Fleury*, Tom. X, Libr. XLVII.

Quemadmodùm verò in millenis aliis occasionibus tantam experimur veritatis vim, ut etiam suî confessionem vel invitâ extorqueat, sic & in *Agobardo* agnoscimus. Dum S. viri *Jobi* historiam explicat, sic scribit: *Cùm diabolus, inventor mali, & caput omnium malorum, accusator frâtrum, accusasset B. Job apud Dominum, expetissetque eum tentandum, quatenus tentando ita verum esse ostenderet, quasi mentem viri Dei melius nosset, quam conditor ejus, Dominus justus ad*

confundendum diabolum, misericors ad exaltandum fidelem famulum suum, concessit illi potestatem, primum quidem in rebus omnibus, deinde verò in filiis, post etiam in salute corporis, ac deinceps in suastione conjugis, postremò autem in exprobratione & nefariâ despeçtione famulorum. Sic diabolus victus & confusus recessit, servus Domini viator & triumphans excrevit.

Et in alio loco, refutaturus eos qui obiecabant verba Davidis, Ps. LXXVII, *Immissiones per angelos malos: sciendum est, inquit, quod vindictarum aut probationum stagella per ministros malos exerceat Deus, qui voluntatem quidem nocendi de se habeant, potestatem autem ab illo excipient, in quantum ille vult.*

Quid jam fortius, quid crebrius, clamant illi qui fatentur veram magiam existere, quam quod diabolus nullam habeat in homines elementaque potestatem, nisi quando, quantumque illi permittit Creator? quodque, eo permittente, diabolus vim habuerit excitandi *Sabæos*, ut *Jobi* furarentur boves & asinos? gignendi de cœlo ignem, qui & oves, & earumdein combureret custodes? convocandi tres *Chaldaeorum* turmas, ut *Jobi* camelos raperent, custodesque trucidarent? exci-

tandi atque determinandi quatuor ab angulis ventos, ad perdendam unā cum domo omnem Jobi familiam? & tandem, (quod benè attendendum,) in singulo infortunio, ubi æquè homines occidebantur, quam aut rapiebantur bestiæ aut occidebantur, unicum hominem semper servandi, qui nuncius deferret calamitatem ad sanctum virum, ut ad desperationem eum, Deique maledictionem duceret? Et rectè hoc *Agobardus*, & nos omnes, a diabolo factum esse, Deo permittente, statuimus: quid enim aliud ea sacræ Scripturæ verba significare possunt: *Dixit ergo Dominus ad satan: Ecce universa quæ habet in manu tuâ sunt; tantum in eum non extendas manum tuam.* Igitur permissione Dei, potestatem diabolus habuit perdendi occidendi omne quod Jobi erat; boves & asinos per *Sabæos*, oves per *ignem cœlestem*, camelos per *Chaldaeos*, ædes prolesque per *ventum enormem*. Supererat sancti viri corpus & valentudo. Hanc turbandi auferendi potestatem Deus negaverat. Interim callidissimus generis humani hostis capiebat citra hanc nullam adesse spem animam Jobi perdendi; cum hâc fore maximam.

Igitur hanc potestatem conatur totis viribus Deo veluti extorquere. Deus, cu-

jus consilia a suâ voluntate non ab eâ diaboli pendebant, qui que hâc vice prophetæ corpori nocendi potestatem illi permettere decreverat, hanc permisit illi, ne occideret tamen vetuit: *dixit ergo Dominus ad satan: Ecce in manu tuâ est, verùm tamen animam illius serva.* Egressus igitur satan à facie Domini, percussu Job ulcere pessimo à plantâ pedis usque ad verticem ejus.

Cum Agobardo ergo agnoscimus diabolum efficere, nolente Deo, nihil posse; Deo permittente, quædam posse facere, sed nihil ultrà; Deo permittente partem tantummodò rei, eam facere integrum diabolum non posse. Intelligi sic, cur omnes christiani firmiter semper crediderint, credantque, angelos malos hominibus ex se nocere nunquam posse: ubi nocent, hoc vel ad homines puniendo, vel purificandos a Deo permitti: habere proindè potestatem angelos pravos in hominum facultates & divitias, in ignem provocandum, in tempestates excitandas, in morbos fanis hominum corporibus infligendos. Dum igitur optimus iste præsul, dum Laodiceæ synodi patres, dum alii, ut, v. g. *sæc̄lus Joannes Damascenus*, declamant in eos qui magicis operationibus fidem adhibent, eosque apostol-

tas quodammodo vocant, convincimur per temporum historiam hos sanctos viros ad fidem veram revocare illos voluisse, qui & sagis magisque longè plus quam præstare possent, adscriberent, & divinam tribuerent diabolo potestatem, ac si, citra Dei permissionem, quæcumque vellet ageret.

Inficias autem ire nequimus peccatum in eo ab *Agobardo* fuisse, quod sæpè sic scripserit, ac si christiani omnes hanc indeterminatam cacodæmonum potestatem credidissent, magiæque extendissent efficaciam. Sed cum magnis viris id commune habuit, ut præoccupatione animo veritatem aliquando præterierit, ut jam suprà notavimus. Pulchrum autem videre est, quanta sit simplicis veritatis vis, quando ejus mens a præoccupatione liberior in *Jobi* historiam commentatur, idque super ea profert, quod Ecclesia credidit, quod nos cum illâ ingenuè semper fassí sumus, ut mox constitit.

OBJECTIO IX.

Auctoritas inclyti historiographi *Clau-dii Fleury*, magiam negantis, quemadmodùm ex ejus verbis in *Partis II Cap. I, n° 8*, relatis, constat, nonne multùm

nos promoveat oportet? nonne ingens pondus eorum adjicit qui cum illo magiam negant argumentis?

RESPONSO.

Imò nullum opinor. Si contra opinionem quamcumque universalem unus alterve insurgat, num ideo illam hic labefactat? Si hoc esset, quidnam certi haberemus unquam? Etenim nulla ferè non dicam opinio, sed perspicuis rationibus fulcita sententia est, quæ impugnatorem, e primoribus etiam viris, experta non sit? Si igitur magiæ affirmatio firmo fundamento innititur, ejusmodi sententia contraria vim nullam habet: ut ille, sic opnari viginti alii possunt, inconcussâ manente veritate. Attamen primum, an magiam *Fleury* negaverit, examinandum est. Fortis est, fateor, duraque, quam laudato mox loco profert, sententia, magiæque negatrix. Adde, sicut *Part. I*, *Cap. I*, *Sect. III*, retuli, eum *Apollonii Thyanæi*, magi famosi, pleraque prodigia, a multis miracula vocata, per causas naturales explicare conatum esse. Quid quod postquam *Libr. I. Hist.* narrasset Neronis ad descendam magiam fervorem, attamen, inquit, vera nunquam in-

venit promissa magorum, ita ut ex hoc Neronis exemplo fortissimum nascatur de hujus artis falsitate argumentum?

Atque hoc quidem *Claudius Fleury*: & palmarium id ejus videri argumentum potest, quod homines præ physices ignorantia plura naturæ opera naturales exceedere vires, quæ eam minimè excederent, arbitrati, ejusmodi artem dæmoniacam existere crediderint. *Hinc supposita*, inquit, *citra examen magia*, ut vera ars, certæque regulæ creditæ, & ad secreta nonnulla detegenda, & ad mala quædam immittenda, idque dæmonum ope: ac si Deus non semper potuisset ad hæc efficiunda aut permittere, aut prohibere dæmonem, & ac si pacta cum malignis spiritibus rata habuisset.

Quod physices ignorantia hic quid possit, haud est cur dubitemus: magnetis, electricitatis, chemicarumque operacionum complurium portenta, ideam magiæ facile ingenerare physices ignaris possunt: sed nullas physices regulas nosco, secundum quas explicare possem cur, cœlo sereno, mox, ad hominis imperium, pluvia aut grando cadat in determinatum locum, sic ut extra eundem cadat nihil. Constitit tamen hanc verissimam historiam esse. Nullas regulas physices capio,

secundum quas, ad nodum in linteo enodatum, summam tranquillitatem, mox & magnus & secundus ventus excipiat, qui quæsitus fuerat, idque repetitò. Exempli tamen certissimi res est, historiasque verissimas, benè multas, multoque mirabiliores, afferre hîc possem, nisi, quemadmodùm ad finem *Cap. III, Part. I,* monui, me metus alios offendendi easdem suppressimere coegisset. Ut igitur ejusmodi enumerandis pluribus exemplis superseedam, an non in vitium planè oppositum truimus, si omnia phænomena, quæ in mundo observantur, legibus exponere naturæ contendamus; nec verum quid agnoscere, nisi quod per has leges explicetur, velimus? ut absurdâ ex uno extremo, longè absurdiora ex altero extremo prodibunt. Est modus in rebus.

Dum tamen plutes sententias & animadversiones incomparabilis nostri historiographi attentè prosequor, vix eo induci possum, ut illum magiam penitus negasse credam. *Simonem magum Libr. I, §. XXIV,* « tantam sibi admirationem operationibus magicis conciliaffe scribit, ut ipsi, veluti Deo, statua erigetur, cum inscriptione: *Simoni Deo sancto.* » Et *Libr. II, §. XXXIII,* « volaturum se, cœlumque petiturum

» cùm promisisset, in altum verè subli-
» mavit se, *dæmonibus vectus*; » oranti-
bus autem, & J. C. invocantibus Petro
Pauloque, dæmones perterriti aufugerunt,
& cadens magus, crus fregit utrumque.
Commentatus in magi *Apollonii Thya-*
næi potestatem dæmoniacum liberandi,
Si commercium cum dæmonibus haberet,
inquit, *cujus vel ipsi eum accusabant pa-*
gani, facile credi potest dæmones cum eo,
in hominem intrando, exeundoque ex homi-
ne, collusisse, quo ei autoritatem conci-
liarent, ad obscuranda christianorum, dæ-
mones quotidie fugantium, miracula vera.

Postquam prodigium *Apollonii*, a *Do-*
mitiano & senatu invisibiliter disparendi
& elabendi, causis naturalibus explicate
conatus esset, *Quod verò nunc sequitur*,
inquit, *possibile citra dæmonis opem non*
videtur: scilicet *Apollonii* transpositio in-
ter meridiem ac vesperam *Româ Puteo-*
los, itinere proindè quinquaginta leuca-
rum. Occasione autem querelarum *Apol-*
lonii de lassitudine post hoc iter: *Etiam*
hoc affirmatur, ait, *loco a diabolo motis*
extraordinariam supereesse debilitatem.

Hinc, ut quæ de magiâ egregius hic vir
censuerit aperiam, videtur mihi in ma-
giæ historiâ pervolvendâ mortalium igno-
rantiam, credulitatem, calliditatem, va-

E vj

fritiemque expertus, & hisce vitiis, ut veritatem obnubilantibus, indignatus, tam severum instituisse hujus artis examen, ut quod reapse verum esset, ipsi tamen dubium ingereret, metumque incuteret, ne si qua impostura forte subfasset, eamque admississet, veritatem, præcipuum historiæ ornamentum, offendere: ita tamen ut si facti cujusquam veritas numeris omnibus absoluta ipsi apparet, hoc inter vera candidus adscriberet; ut in *Apollonii*, & magis in historiâ *Simonis Samaritani*, clarè patet. Hinc inter magiæ inficiatores injustè numeratur.

OBJECTION X.

Ad stabiendam artem magicam frustrà SS. Patrum *Hieronymi* & *Augustini* adhibetur autoritas; siquidem ambo id quod ad eam stabiendam scripserant revocarunt. Et quidem prior in epistolâ ad *Nepotianum*, alter autem in *Liber. II*, Cap. XXX. *Retract.*

RESPONSO.

Respondeo utrumque falsum esse. 1º Quia B. *Hieronymus* juvenilem suum stylum, minimè vero sensum epistolæ carpit. Cum ergo solum stylum suum condemn-

nat, prætereaque nihil, quâ tandem fronte magiam retractasse scribitur adversarius? 2º Ipsí adversarii indicant S. Patrem, in suâ ad *Nepotianum* epistolâ, retractasse ea quæ ad magiam stabiliendam quondam scripserat; ipse autem *Hieronymus* ostendit se revocare nihil, nisi juvenilem stylum in epistolâ ad avunculum suum S. *Heliodorum* dominantem, in quo de magiâ scripsit in vitâ S. *Hilarionis* abbatis periundum est. Ergo B. *Hieronymus* suam de magiâ sententiam minimè retractavit.

Multò minus ea S. Aug. retractavit quæ de magiâ scripserat. Retractasse tamen aiunt loco mox laudato. Sed quod huc pertinet ne hilum quidem ibidem reperimus. En totum. *Per idem tempus accidit mihi ex quâdam disputatione necessitas, ut de divinatione dæmonum libellum scriberem, cuius titulus iste ipse est. In ejus autem loco quodam, ubi dixi: Dæmones aliquandò & hominum dispositiones, non solum voce prolatas, verùm etiam cogitatione conceptas, cùm signa quædam ex animo exprimuntur in corpore, totâ facilitate perdiscere, rem dixi occultissimam audaciore asseveratione, quam debui: nam pervenire ista ad notitiam dæmonum, per nonnulla etiam experimenta*

compertum est : sed utrum signa quædam dentur, ex corpore cogitantium illis sensibilia, nos autem latentia : an aliâ vi, & eâ spiritali, ista cognoscant, aut difficilimè potest ab hominibus, aut omnino non potest inveniri.

Itaque toto hoc textu *S. Aug.* modum quo rem explicuerat, leviter taxat, rem verò ipsam minimè, imò per experientiam hanc denuò confirmat. Hoccine retractare vocatur? Quæramus ejus retractionis libros ad illa scripta, in quibus de magiâ ex professo egit, num in iis circa magiam se retractavit? An in *Lib. I*, *Cap. I*, *Retract.* revocavit ea quæ de mago *Carthaginensi* in *Liber. contra Academicos* scripsicerat? Nunquid in *Libro II*, *Retr. Cap. XLIII*, illa revocavit quæ de magiâ tam solemniter in *Libris de Civ. Dei* affirmaverat? Num retractavit unquam *sermonem XC*? an *Libros de Trinitate*? an *Librum de Doct. Christianâ*? Hi tamen erant, qui artem magicam apertè profitentes, revocandi aut saltem castigandi fuissent, si sanctus pater mutatus sententiâ fuisset, quo tempore suas edebat retractationes.

O B J E C T I O X I .

Magiæ omnis si quis Patrum unquam,

eversor *B. Chrysostomus* fuit, *Homil. VIII* in *Coloſſ. Serm. XLIII* in *Matth. XXII* in *Genesin*; quibus in eos invehitur qui dæmonum cum hominibus concubitum credunt, qui ad certas intentiones phylacteria, etiam ipsum Evangelium gestant, &c.

RESPONSO.

Resp. primò. Hominum dæmonumque mutuum concubitum alii verum, alii magorum sagarumque phantasiā, à dæmone excitatā, imaginarium modò esse crediderunt: quæ sententiarum explicatio duplex; etiam duplex est in quæstione de nocturnis sagarum per aëra itineribus: in diversa ergo circa hasce pluresque alias quæstiones abeuntes scriptores, magiam ipsam admittunt, nec in *Chrysostomi* textibus quidquam contrarium apparet. Non negant magiam, sed ex eâ excipiunt vel concubitum cum dæmone, vel nocturnas per aëra in diffita transpositiones, vel utrumque; quod aut negant, aut dubitanter admittunt; inconcussā interim magiæ certitudine. Phylacteria autem *S. Chrysostomus* intelligit vel ipsas res sacras, ut puta *S. Evangelii* verba, vel characteres, vel fructus, aliasve res quas superstitione quâdam, ac si aut per

se , quod minus malum , aut cum Angelorum pravorum auxilio , quod omnium pessimum , efficaces esse homines autumabant , ob idque ad collum aliasque corporis partes admovebant.

Et quidem ultimo modo pessimo , si non omnes , saltem plures , hæc externa corpori applicuisse illi videntur quos beatus hic Pater corripuit. Sic enim & *Van Espen* videtur credidisse Tom. IV , Part. III , n^o 32. *Et Sanctus Joannes Chrysostomus* , inquit hic doctor , *Homil.* 43 *in Matth.* Cap. XXIII , *invehitur in eos qui suā ætate phylacteria sua ad collum suum appendebant , vel partem aliquam Evangelii scriptam , quasi virtus Evangelii in litterarum figuris sita fuisset. Neque dubitat idem S. Doctor , Hom. 8 in Epist. ad Coloff. comparare aliquatenus martyrio contentum harum vanitatum , quasi vitam potius amittere , quam has superstitiones vanitates adhibere malint.* Si enim nullam magiæ efficaciam esse credidisset S. Pater , æqua ejusdem non fuisset contempsum magiæ inter martyriumque comparatio. Martyr mortem evadit sacrificando idolis ; certò , ni sacrificet , moritus. Christianus si non mortem , saltem mortis periculum evadit superstitione magicâ usus ; ni utatur , periturus. Ut nunc qui

negat adolere simulacro , martyrii coronam obtinet , sic ille qui potius mori quam magiam invocare malit , præmium meretur martyrii. Ergo credit Chrysostomus hæc phylacteria magica esse ; & morbi curam a magicis ceremoniis , sacris quidem , ut in hisce sæpè fit , verbis conceptis , diabolico tamen auxilio peractis , expectari & , Deo permittente , aliquando obtineri. Sic constat ejus comparatio : si enim in propositione primâ dixisset : *Martyr mortem evadit , sacrificando idolis , ni sacrificet occidendus.* Et in alterâ : *Christianus evadere mortem nunquam potest ejusmodi ceremoniis , nunquam enim Deus permittit diabolo curandi morbos potestatem , undè sive magicis ceremoniis usus fuerit , vel non fuerit , nec plus , nec minus , aut morietur , aut servabitur.* Ergo qui maluit mori potius quam fœdari per magiam , palmam martyrii meruit. Quis non videt conclusionis absurditatem ? Conclusio justa non est , nisi supponatur diabolicam existere artem , quâ , Deo justo suo judicio id permittente , morbis eximantur nonnunquam ægrotantes. Huic , quandoque efficaci , qui renunciet , qui mori malit quam suâ in diabolum fiduciâ Omnipotentem offendere , is verè dignus coronâ martyrii est.

Cum autem hic de phylacteriis & amuletis sermo fiat, erunt haec parum per explicanda. Vel collo appendunt, vel gestant in perā, vel certis apponunt corporis plagis homines multi, sive scedulae inscriptas, aut sacris verbis, aut impiis, aut ignotis characteribus; sive infecta, & animalia, bufonem, ranam, anguillæ partem; pannos variæ coloratos, maximè quos rubros tinxit cochinellæ succus; ungulam alces; medicamenta, ut camphoram, radicem Ningzing Asiaticam, chelidonium minus, semen agni-casti, castanea sylvestria, saponem venetum, &c. Porro apponendi gestandique intentio examinanda est. Qui hisce utuntur spemque utilitatis aut curationis habent, eò quod per res ejusmodi magos curare morbos credant, vehementer in Deum peccant, a quo solo exspectanda cura morborum: qui verò vel directe, vel indirecte opem diaboli, magorum per amuleta ministerio, hic exspectant, horribile peccatum committunt: qui verò credunt ea quæ ex vegetabilium, fossiliū, animaliumque regno petuntur, vi quadam naturali per inspirationem, aut inhalationem, vel per aliū quemcunque naturalem modum in solida fluidaque corporis humani agere, mutare, & ex-

statu morboso in sanum convertere posse ; hos , quamvis forsitan longè plus naturæ viribus adscribant quām in hisce rebus inest , non video plus peccare , quām si res similes , vel per os ingererent , vel ope clysterum injectionumque per alia corporis loca admitterent.

Et sic demùm reperio totum hoc negotium a B. Augustino intellectum & explicatum fuisse , *Libro de Doctr. Christ.* ubi de amuletis sermo est , sic aiente : *Aliud est dicere : Tritam istam herbam , si biberis , venter non dolebit ; & aliud est dicere : Istam herbam collo si suspenderis , venter non dolebit. Ibi enim probatur contemperatio salubris , hīc significatio superstitionis damnatur. Quamquam ubi præcanticiones , & invocations , & characteres non sunt , plerumque dubium est , utrum res quæ alligatur , aut quoquo modo adjungitur sanando corpori , vi naturæ valeat : quod liberè adhibendum est ; an significativa quādam obligatione proveniat : quod tantò prudentius oportet cavere Christianum , quantò efficaciùs prodeesse videbitur. Sed ubi latet quā causā quid valeat , quo animo quisque utatur interest duntaxat , in sanandis , vel temperandis corporibus , sive in medicinā , sive in agriculturā. Atque hæc de phylacteriis & amuletis.*

OBJECTIO XII.

Magiæ falsitatem omnis qui præoccupatæ mentis non est clarè perspicit in judicium testimoniis, magorumque confessionibus: ita ut sapientes judices non nisi deliramenta horum in examine detegrent; sagas in lecto totâ nocte custodibus servantes, easdem mane asseverare audirent, se eâ nocte longo itinere a diabolo latus in conventum magorum sagarumque fuisse eos, qui simul convenissent nomine singulos judicibus appellasse, cùm interim hos quos nominabant, noctem in lecto tranquillos transgisse, æquè quām priores, compertissimum esset: jussos a judice magos, ut verè magicum specimen ederent, fore tunc ut carcere demitterentur, nunquam id potuisse: tandem horum complures confessos fuisse solâ intentione ostentationis, terroris, gaudii, & omnium maximè lucri, se & diaboli commercium, & initum cum illo pactum, & mirabilia a se ideò patrata, de industriâ finxisse & jactasse.

RESPONSI O.

Respondeo per antithesin: magiæ efficaciam numero longè plures judices te-

tati sunt, ob ea quæ ipsis magi sagæque affirmarent; ob ea quæ singuli seorsim primùm examinati, denūm verò omnes simul collecti, alii de aliis affirmarent, & vel facta magica, vel itinera nocturna, singuli singulorum sic confirmarent, ac primùm privato in examine singuli & de se & de aliis confessi essent. Magos aliquandò jussos magiam veram sic exerceisse, ut judices, principesque qui aderent, de magiæ virtute stupendâ convicti essent, ut in præcedentibus manifestò constitit: magos complures mortem subiisse, qui ad rogum usque adhuc sperassen fore ut diaboli auxilio eriperentur, magiamque nunquam negarent. En argumentum contra argumentum: qualenam autem alterum refutet, responsa ad seq. objections pudent.

OBJECTIO XIII.

Magorum ac sagarum plerique vix religionis principia a limine salutarunt; ab indigentibus parentibus, ignorantibusque, pessimè educati, egestateque confecti, dum a suorum similibus divitias per magiam comparare se posse, diabolumque hinc Deo præstare audiunt, facile in hoc facinus alliciuntur. Adde quod, præ crassâ sacræ religionis ignorantia,

eorum plerosque tam parùm futuræ felicitatis tangat desiderium , ut in prosperitate terrenâ spem omnem locent felicitatis , & quidquid ad eamdem obtinendam aptum arbitrentur , id unicè amplectentur . Adde hos homines passim hypochondriacos esse , atrabiliarios , quibus tetræ ideæ versari præ oculis solent , & quibus præprimis tanta vis imaginacionis est , ut iteratò facta , seu a dæmone , seu a sceleratis hominibus repræsentatio , totam animam indelebiliter sœpè occupet . Quanta autem vis imaginationis sit ab uno homine in imaginationem alterius , viceque versâ ; imò quantam vim habent exhalationes , seu transpirationes per vividissimam imaginationem motæ , corpore expulsæ , perque atmosphærā in corpus ac cerebrum alias hominis immisæ , atque acceptæ , ex eo solo concludi potest , quòd *Verulamius* , *Paracelsus* & *Andreas* eam vim solam abundè sufficere ad omnia miranda magorum per causas planè naturales exponenda crederent , & magiam , quâ magiam , quâ artem diabolicam , ex mundo proscriberent . Quippe vera sic credere , vera esse jurare magos , & sagas , quæ unicè debeantur imaginationi : posse enim eos in somno sic a diabolo disponi , ut inconcussa ea

credant esse , quæ somno tali vividissimo atque protracto videre sibi visi sint. Incredibilem præterea esse vim imaginatio- nis & determinatæ in vafris hominibus nocendi voluntatis potestatem : enormem quoque spirituum exhalantium de cor- pore hominum malevolorum , tam in propinquos vel homines , vel res , quibus nocere in animo habent ; stupendamque virtutem spirituum irritatorum & exha- lantium de hisce vel rebus , vel homini- bus , quibus malefici nocuerant , atque in ipsa maleficorum corpora retrogradorum , idque haud in viciniâ duntaxat , verùm etiam ad plurium , imò ad 100 millia- rium distantiam : ita ut ridiculi esse vi- deantur illi qui naturæ legum in male- ficorum operationibus ignari , virtutem pravorum angelorum ad easdem expli- candas convocant.

RESPONSO.

Resp. prima. Facilè concedimus de ple- bis Ecclesiæque fæce , sagas multas & magos esse ; eâ conditione tamen ut ejus- modi , si non nostrâ , saltem avorum me- moriâ , in principum , in eruditorum , in nobilium ordine extitisse concedant , qui hoc objiciunt ; sed sint cuncti egeni , stupidi , fide moribusque corrupti. Hos

profectò hostis generis humani tantò faciliùs suum in rete capiet.

Resp. secunda. Gratis asseritur omnem hanc immensam turbam magorum & sagarum atrabiliariam esse : atrâ bile, seu melancholiâ correptos plures fuisse ex historiâ quidem patet, maximè cùm diuturnos carceres, sævasque torturas iteratò sustinuissent ; quibus vel jocosissimi mortalium atram sibi bilem consciscerent ; sed simul audaces homines, a melancho-liâ remotissimos, per omnes actus suos responsionesque historia magiæ nobis præbet abundè.

Resp. tertia. Imaginationis miram ac stupendam, nec raro delendam vim esse nemo non novit, nemo aliquando non dolet : verùm tantæ virtutis, extensionis, amplificationisque eamdem esse, ut vi imaginationis in lœdendum hominem, pecus, atque frumentum determinatæ, humores corporis moveantur ; ut nata exindè transpiratio characterem vivæ hujus imaginationis sibi impressum, secum intimè commistum gerat ; ut hic stupendus character absolutè præpediat, ne, quæ aliàs transpiratio mox ab atmosphærâ absorbetur & annihilatur, jam spirituali imaginationis motæ impressione integrâ in absorbente atmosphærâ conservetur integra

tegra per atmosphærā , vento quantumcumque adverso , deferatur a motu , semel ab imaginatione hominis nocituri immisso , in distans plurium passūm , multarum orgyiarum , imò non unius , sed centum milliarum ; quis adeò demens ut hæc gratis afferentibus gratis concedat ? An , qui magiam negaturi , ejusmodi titivilitia gravi apparatu proferre audent , bonorum argumentorum non ostendunt penuriam ? An non miserandum eorum est qui , ut rem captu difficilem , veram tamen , explodant , aliud quid tam sibi , quām nobis captu impossibile obtrudere satagunt ?

Profectò si omnis incantatio vera , non per diabolicam magiam , sed per explicitam mox vim imaginationis unicè peragatur , oportet eam inexhaustam immensamque esse . Mota imaginatio magorum Ægyptiacorum , ranas sibi repræsentantium , emanavit cum transpiratione rani formi non in *Pharaonem* Ægyptique principes solos , sed in urbis *Taneos* , ac vasti regni incolas omnes , & quidem sic , ut neque puer aut senex , neque vir aut mulier , in totâ Ægypto esset , qui non ubicumque locorum ranarum legiones cerneret , easdem diu noctuque audiret coaxantes , atque insilientes in se & sen-

tiret, & videret; dum interim nulla in regno rana adesset, nisi consueto ante hanc plagam more. Nonne ad negandum quod supra naturam in magiâ inventiunt, imaginationem suam, inconstanter illam, errabundamque corruptæ naturæ nostræ facultatem, adeò supra naturam extollunt, ut longè plus difficultatis in magiâ explicandâ sibi consfiscant, quam nobis ejusdem per auxilium diaboli patratæ expositio pariat?

Cùm jam tertiâ vice argumentorum ordo me iis respondere jubeat, qui a magorum, præsertim autem Ægyptiacorum, operationibus satanam planè excludentes, totum eorumdem opus ad causas naturales referre contendunt; adnectere hic deheo ipsam textûs Libri *Exodi* de magis *Pharaonis* expositionem Rever. *Messenguy*, quem, ut SS. Bibliorum haud minus doctissimum quam piissimum commentatorem eruditî existimant. Est in *Tom. II, Cap. V.*

« Hoc, atque similia relata a sacrâ Scripturâ facta, an operationes magiæ dentur dubitare non permittunt. » Veri magi dantur; homines scilicet commercium habentes cum dæmonibus, horumque ope res nonnullas efficientes, quæ naturalem hominum su-

» perant potestatem. Id quidem negari
 » non potest, quod quidam effectus ma-
 » giæ adscribantur, qui vel extra imagi-
 » nationem incensam, vel extra nefan-
 » dam mentitorum magorum impostu-
 » ram, vel extra errorem atque ignoran-
 » tiam illorum qui, quidquid limitatio-
 » ris sui intellectus cancellos excedit,
 » causis supernaturalibus tribuere solent,
 » nullibi planè existunt. Verùm enim
 » verò intellectus perperam superioris
 » dicti, ac periculose admodum incre-
 » dulitatis indicium foret, id omne aut
 » imaginationi, aut imposturæ, aut igno-
 » rantiæ, aut alteri cuicumque naturali
 » causæ adscribere velle, quod sacra Bi-
 » blia ad magiam, dæmonisque opera-
 » tionem indubitanter referunt. Sin enim
 » autoritates adeò manifestas explicatio-
 » nibus violentis, & traditioni ignotis,
 » eludere fas esset, licentia opinandi ef-
 » fræna fieret; neque vel unica, quam
 » sacra Scriptura refert, veritas existe-
 » ret, quam temeraria philosophia suis
 » argutiis, seu sophismatibus non labe-
 » factaret. . . . Sufficiat id nobis probè
 » nosse, quòd Deo placuerit permettere
 » ut ii, qui ministri & instrumenta dæ-
 » monis erant, divina Moysis miracula
 » ad certum quemdeim terminum imita-

» rentur; quòdque dæmonis artificio at-
» que potestate hæc efficerent. »

OBJECTIO XIV.

Falsò tribuitur magia virtuti diabolice, èd quod operâ magorum dicuntur homines evomere ranas, bufones, scorpiones, anguillas, clavos, cultros, gladiorum enormes portiones, linum, stupam, aciculas, ossa integra, ligna, lapides, &c. non semel modò, sed pluries, imò per menses annosque.

Nam 1° hæc omnia plebis debentur inscitiæ & credulitati, quâ astuti magi sagæque abutantur, ut dum ejusmodi animalia, corporaque supponere mirâ suâ astutiâ atque dexteritate norunt, ignarum vulgus eosdem virtute naturam superante pollere existimet. Hujus facinorosæ suppositionis rerum exemplis historia scatet, eventusque quotidiani confirmant.

Sed 2°, si admitteremus omnes hasce historias verissimas esse, ne minimum quidem magiam diabolicam esse probarent. Bibliothecam historiæ & naturalis & medicæ pervolvendo, & hæc, & longè alia animalium insectorumque genera, ferrum, æs, plumbum, cultrorum, gladiorum, sagittarum, vitri fracti frusta

haud exigua, acus, aciculas, &c. vel vomitu, vel alvo, vel utero, vel pulmone, vel vesicâ urinariâ ejecisse legimus, quas ejectiones philosophi & medici non nisi naturalibus adscripsere causis: ita quidem ut insecta & animalia ex semine exilissimo, ignoranter seu inspirato, seu deglutito, & per fotum nutrimentumque domicilii nutrito exclusa, excretaque fuerint, & metallorum lignorumque frusta à pueris, ab amentibus, imò ab hominibus vafris ad pecunias colligendas deglutita, naturali modo e corpore eliminentur.

RESPONSI O.

Resp. ad primam solutionem. Astutiam atque dexteritatem præstigiatorum frequenter miremur oportet, eamque haud raro ad stupendos ejusmodi vomitus alvosque exhibendos admotam fuisse, ex verissimis novimus experimentis. Verùm quoque indubitatiſſimis experimentis novimus, corpora ejusmodi mirifica multò majora quam ab homine deglutiri potuissent, & adeò dum evomerentur, inviatum angustiis hærentia, ut ab adstantibus medicis digito extrahenda essent, certò certius humano de corpore produisse, ut *Part. I, Cap. I,* constitit. Non

concludamus proinde ex fictis vera non dari, sed vera extare, quia fingitur. Suum non negat pantomimus exemplar. Neque astuta virtutis simulatio nulla mortalium pectora verâ virtute ornari docet; imò potius simulatio prototypi veritatem demonstrat.

Resp. ad secundam solutionem. Clari viri qui vel legerunt, vel ipfi viderunt, per varias corporis vias heterogenea corpora, in objectione enumerata, eliminari, idque modo penitus naturali, nimirum concludunt, si ejectionem similium omnem soli tribuant naturæ. Vidi cum ipsis, ab infantibus puerisque deglutita, & vomitu denuò reddita ligna, ossa animalium, nummos, glomeres ferici, pannos; ut profectò aut deglutiri, aut vomitu ejici, præ mole, rigiditate, aspre-dineque potuisse mirarer. Minimè verò inde consequitur id quod quæcumque similia horum perhibentur, modo æquè naturali contigerint. Hoc tamen ut nobis persuadeant autores nonnulli mirificè se torquent. Concedimus in morborum historiis multa *primum* nimiâ credulitate pro veris dari, quæ arte præstigiatrice naturali prodierint: *Secundò* multa vera esse quæ de deglutitis ejectisque enumeratis rebus enarrantur. Ipse dedi historiam mi-

litis, cui cum suis combibonibus id moris fuisset, ut ad noctem omnes ebrii sua singuli pocula vitrea dentibus ruditer comolirent, ac deglutirent. Vide *Tom. XV.*

Rat. Med. Cap. III. Alius militis, qui nummorum aureorum bonam copiam, ne eam fibi furarentur hostes, deglutierat, diu retinuerat, & tandem artificioso valde vomitu denuò expulerat, *Tom. I,* *Rat. Med. cont. Part. II, Cap. VII.* Infantis demum magnum numimum degluttientis, ac post 63 dies alvo reddentis.

Ibid. Tertiò. Spontè quoque fatemur infectorum, etiam majorum, ovula ignoranter posse deglutiri, & ubi exclusa fotaque creverint, per superiora, aut inferiora eliminari; ita ut quidquid naturali modo explicari possit, ad supernaturalem minimè referamus. Laudamusque vehementer omnes qui, quoad ejus fieri possit, nihil omnino ad supernaturales causas referant, quod explicari intelligique per naturales possit.

Verùm enim verò post centenos sic expositos casus, id minimè consequitur, ut non contigerint, quos legibus naturæ non explices. Provoco ad historias a me *Part. I, Cap. III, §. III,* enarratas. Si, qui has prodiderunt autores, testes fuerint autopti; si iidem sapientiâ, eruditione,

judicioque eminuerint, multam merentur a nobis fidem: si similia phænomena observata sint instrumentis atque characteribus in lecto inventis, & ablatis iisdem, mox cessaverint; si apud alios omnia symptomata, per menses continuata, mox siluerint, ex quò maleficus multâ pecuniâ illectus, magiâ magiam ad lectum solverit; si, post eductionem acutorum vulnerantiumque corporum, mox salus citra incommoda vulneraque redierit; utique fateamur necesse est, quemadmodum in multis imposturam, sic quoque in non paucis inconcussam prædominari veritatem. Atqui ita se res habet, ut historiæ verissimæ, loco mox laudato enarratae, fidem faciunt. Ergo non omnium negatio, sed prudens fictorum a veris requiritur distinctio.

Exemplum hujus egregium dedit nobis anno 1755, Clar. vir. *Paulus Valcarengi*, in *Dissert. epistolari ad episc. Veronensem*, de juvenculâ Veronensi, quæ saxa, lapides variæ molis & figuræ, frusta vitrea & ferrea, acus, catenas ferreas, &c. jam 13 annis, per superiora & inferiora eliminabat. Sic enim naturalem hanc omnem operationem esse rostris unguibusque defendit, ut tandem finem hoc modo imponat: *Nolle tamen quempiam un-*

quam inde fortasse deducere me idèò quod
in allatis circumstantiis naturales solas
sufficere causas opinor, nulloque modo
dæmonis hîc actionem admitto, id semper,
& in aliis quibuscumque casibus; sentire
velle. Dementis enim & scelesti hominis
hoc esset, sacrisque paginis è diametro op-
positum: quod idèò a me alienum est, atque,
favente Deo, in posterum quoque futurum
semper confido. Et quia egregii Mercklini
sententiam tam apposítè hîc refert Val-
carenghi, nequeo quin eamdem hîc in-
feram. « Credulitate laborant, inquit Mer-
» cklinis, & in excessu peccare videntur:
» equidem inter morbos nullum prorsùs
» ad incantationem accersere decet,
» etiamsi abstrusissimis & insolentissimis
» symptomatibus stipatus; nisi eum ex
» naturalibus, vel potius præternaturali-
» bus causis deducere nullo modo licue-
» rit, adeòque omnem naturalium causa-
» rum potestatem transgredi, ac superare
» deprehendimus; tunc enim de superna-
» turalibus, seu transnaturalibus cogitan-
» dum: alias socordis & simplicis inge-
» nii indicium esset ad supernaturalia con-
» fugere velle, ubi naturalia suppetunt. »

Hîc quoque viri, neque creduli, ne-
que præoccupati, magni Hoffmanni, mo-
dus dijudicandi erat, *Tom. IV, Diff. de*

potentiam diaboli in corpora. Pro fundamento dicendorum Plinii Historici hanc ponit sententiam : « Quemadmodum multa fieri non posse , priusquam facta sunt , judicantur ; ita multa quoque , quæ antiquitus facta , quia nos ea non vidimus , neque ratione assequimur , ex iis esse quæ fieri non potuerunt judicamus : quæ summa insipientia est. » Applicat deinde hanc Plinii sententiam ad disputationem de magiâ , & æquè eos damnat qui nimium diabolo & incantationibus sagarum tribuunt , eaque , quæ ex merè necessariis & physicis causis fluunt , hisce adscribunt ; cum alii contra planè nihil potentiae diaboli concedant , imò operationes ejus in corpora penitus negent . . . Certè in rebus facti solâ autoritate est nitendum . . . Jam autem num majori unquam autoritate historia factorum firmata & corroborata sit , quam ea quæ docet varios effectus diaboli in corpora naturalia , & hominis , meritò anceps hæreo. Gravis hæc gravis autoris sententia est.

OBJECTIO XV.

Si quid veri magia haberet , si magorum constarent cum dæmonibus pacta , an non cerneremus sagas magosque divites , quod Deo , summo bono renun-

ciantes, angelo prævaricatori, principi potentissimo, se totos dent, divinosque deferant honores? E re infernalis hujus principis esset, eos divitiis cumulare, quò & fideles ipsi manerent, & exemplo verboque multos alios a Deo apostatas, qui sibi superbissimo spiritui cultum divinum præstarent, redderent. Interim an pauperior, an egestate pressior, an miseriis cumulatior, gens tellure geritur, quam ea sagarum magorumque? Vix videretur inanitatis magiæ clarior esse, validiorque demonstratio.

RESPONSO.

Resp. prima. Si magiæ existentis demonstrationem omnia hucusque dicta derunt, non dantur oppositæ sententiæ demonstrationes.

Resp. secunda. Noruntne, qui hoc obiciunt nobis, sic omnes maleficos, ut non nisi egenam totam hanc plebem esse tutò asseverent? Nos profectò, illosque illorum pars plurima latet, cum suo tenebrarum principe tenebras amans, quo certius diutiisque noceat. Cæterùm historia nos docet viros principes, homines sapientiâ, divitiis, summisque dignitatibus inclytos magiam excoluisse.

Resp. tertia. Etsi verùm sit eorum, qui

judicū in manus incidunt, plures multa premi egestate, minimè hoc ad artem negandam facit. Fallax spiritus suos fallaciā pascit, captosque in rete tenet; lucro pauculo spem facit majoris. Spe semper allecti, alacriter suā impietate pergunt. Exempla hoc aliis in rebus confirmant. An nostrā alchemisticā gente pauperiem noris? An dilapidatis cùm propriis, tūm divitum, quorum crumenas emunxerint, pecuniis, eò ardenteres in lapide philosophico quærendo obstinatoresque non videris? Simulatum quandōque lucri tantillum summas in spes erigit animos; cùm autem spes longa corpora ad longævitatem disponat, longam alchemistarum vitam magnus *Boerhaave* hinc explicabat. Interim egeni vivunt, pauperes moriuntur. Si in arte fallaci, atque impossibili, spes sic obcœcat hominem, quid in magiā non debet facere, quandō subindē quid lucri miseris suis afferat cultoribus? Ipsāque hâc spe diabolus illos sibi arctius devincit, ut impietate in Deum, injustitiā, odioque in proximum, eò securiūs pergant.

O B J E C T I O X V I .

Abundē constitit per ea quæ *Part. II,*
Cap. I, fusè dicta sunt, magiam maxi-

mam originis partem præjudiciis cùm vulgi, tùm judicum, ipsorumque *inquisitorum fidei* debere; constitit millenos homines magiæ reos habitos esse, qui, quid magia esset, ne unquam quidem audivissent: constitit judicum sæpè avaritiem insatiabilem criminaciones, a præjudicio & ignorantia natas, multiplicasse: constitit denique accusatorum confessiones, astutiâ, & horrendâ inauditâque crudelitate extortas, ab iisdem tamen suam innocentiam per omnia sacra testantibus, centies revocatas fuisse. Ita ut ne umbra quidem magiæ post hæc omnia supersit, soliusque & ignorantiae, & barbariei, & auri sacræ famis figmentum sit.

RESPONSO.

Resp. prima. Historia magiæ ista a magiam negantibus tradita, hyperbolam in eo sapit, quod vera quædam exagerando, & necessaria tacendo, falsam nobis rerum exhibeat effigiem. Quandò temporum illorum calamitatem lugent, cur complurium cùm ecclesiasticorum, tùm ciuilium judicum eruditionem non attendant? non laudent æquitatem? non mansuetudinem, integritatemque extollant? Cur confessiones citra blandimenta minaque, citra torturam aut crudelitatem

omnem factas, atque maleficorum, sive obduratorum, sive resipiscentium testimonio ipso confirmatas, callidiusculè reticent?

Resp. secunda. Neque si exaggeratio judicum ignorantiae, crudelitatis, avaritiaeque, nulla hinc peccaret, an probaret id quod objectio profert argumentum? Qui hoc modo ratiocinantur, videant quò præcipitent se. Quandò anno 64 *Romanam* flammis in suī oblectamentum *Nera* imperator consumpsérat, ac incendii culpam in Christianos, jam undique odiosos conjiciens, numerosissimos illorum, tanquam incendiarios, crudelissimæ morti exposuerat; an Romani, qui innocentiæ Christianorum convicti erant, benè conclusissent nec extare, nec extitisse unquam incendii crimen? Si *Verres*, si *Mezentius*, si *Nero*, *Domitianus*, & id genus centeni alii homines quos odio habebant, quorumve inhiabant possessionibus, furti, cædis, proditionis crimine accusaverint, mortique tradiderint, qui omnes tamen fuere innocentes; an qui hanc gentem innocentem plorabant, si nullum unquam furtum, nullum læsæ Majestatis crimen, nullum homicidium extitisse conclusissent, nonne risissemus illos? Et ut aliquid proximiū in rem di-

cam, non sine animi dolore & mœrore fatemur tempora extitisse, quibus hominum haud sanè pauci hærefoes accusarentur, inquisitorum ignorantia, crudelitate, auri cupiditate, ad falsam suâ accusationem adigerentur, & vel morti, vel bonorum confiscationi, vel exilio adjudicarentur, atque ad sententiæ executionem usque integræ suæ fidei Deum testem invocarent. Numquid ergo secundum hoc suum principium, & jure quidem, conficient hæresin nullam vel extare, vel extitisse unquam? ut igitur cum tantâ orthodoxorum falsâ hærefoes accusatione & damnatione, hæresis tamen extitit semper, ita similis conclusio & de magia erit.

OBJECTIONE XVII.

Ipsa historia magica nihil apertius docet, quam quod mera impostura, ridicula japhantia, arsque planè præstigiatrix sit. Et sacræ paginæ hoc ipsis hisce verbis testantur; hoc credidit Ecclesia vetus; hoc multoties asseruerunt Ecclesiæ patres, doctores, historiographi; quemadmodum toties contra adversarios nostros, quidquid reclamaverint hi, demonstratum fecimus. Opus tamen est novis hoc confirmare demonstrationibus, ut

convictus quisque sit auguria, incantationesque individuas idololatriæ comites esse, & ut olim, ita adhuc apud idololatras gentes, ut ut ridiculas, perpetuò exerceri.

Primò consulendus hīc *Kämpferus* est, tam in *historiā Japoniæ*, quām in *Amœnitatibus exoticis*. In *Hist. Jap. Libr. III, Cap. V*, ordinem religiosum *Jammabos* sacerdotum montanorum describit, se morbos magicè curare contendentium, idque pilulis confectis ex chartâ in quā monachus ad enarrationem ægrotantis inscribit characteres, hanc in idoli locat altari, miris gesticulationibus sacram facit, confecetasque ex eādem pilulas, *Goof* dictas, cum aquâ de flumine, aut fonte, non minore superstitione haustâ, porrigit ægro. Quam inanem atque fallacem hanc prætentam magiam ipsi ducant *Japonenses*, vel ex eo liquet, quod suum *Goof* non sumant, nisi quandò, irritâ consuetâ patriæ medicinâ, morbus in desperationem tendit. Quantūm ad cæteras decantatæ *Japonensium* magiæ partes attinet, in revelandis arcanis, in accusatorum culpâ innocentiaque detegendâ, in corporibus adversùs arma & ignem armandis, nullam unquam demonstrationem deprehendit.

In *Amœnitatibus exoticis politico-phy-*

sico-medicis Fasciculo III, Observ. XV,
idem Kämpferus exhibet nobis Persarum,
& ulterioris Asiae Indorum magiam, in
quâ pag. 651 dei Wisthnu festum, cui
cum variis Europæis adstitit, describit.
In hoc festo Malabarico vestales virgi-
nes, huic festo peculiariter sacras, sa-
cerdotes populo primùm proferunt mo-
destas, reverenterque, quemadmodùm
ad sacra decet, incedentes: mox dein ge-
nios pravos in easdem, ut aiunt, immit-
tunt, sic ut nullæ hîc desint dæmoniacorū
gesticulationes. Tandem quo idoli
majestatem potestatemque plebs resciat,
adoretque, vestales horæ spatio in tem-
pto, præsente nemine, morantur, elap-
sâque horâ has æquè quām principio
modestas, compositas, reverentesque,
exhibent populo sacerdotes.

Verùm *Kämpfero*, cæterisque *Euro-*
pæis visum, hoc probabile fuit, electua-
rium ex herbis insaniam, convulsionem-
que inferentibus, compositum, vestali-
bus datum fuisse; undè dæmoniacarum
consimiles redditæ fuerint: in templo
*verò, quemadmodùm *Indo-Batavus* quis*
per ostii foramen vidisse se putat, por-
rectum virginibus antidotum fuisse. Et
Obs. XVI, totus est hic itinerator doc-
tus in ligaturâ, sive conjugalis copulæ

impedimento *Indorum*, ac potissimum
Macassarorum describendo; notatque
 Christianis orientalibus, iisque ditioribus,
 moris esse, ut magus, vel saga matri-
 monialibus ceremoniis adsit ipse, vel ipsa,
 quæ diligare, si maleficus quis ligasset,
 actutum posset: quibus ceremoniis ipsum
 se interfuisse asseverat quidem; at verò
 vanas modò gesticulationes, falsas sup-
 positiones, meraeque imposturas esse,
 cunctas hasce ceremonias arbitratur.

Vidit itidem *Kämpferus* commune il-
 lud spectaculum *Indorum* in deæ *Rauni*
 honorem, quæ ipsa olim heroina, non
 nisi fuso cruro, ludisque palæstricis,
 solere delectari dicitur. Septem igitur
 nobiles athletæ à machinâ peraltâ duabus
 uncis ferreis, per musculos dorsi adactis,
 suspendebantur, alter post alterum, unâ
 manu gladio, alterâ ingenti clypeo mu-
 niti. Tribus continuis vicibus templum
 hâc mobili machinâ circumvecti, forti-
 ter arma, lanistarum more, vibrabant;
 tûm etiam caput, axillas & crura, his-
 trionum lepore, veluti per aëra natantes,
 motabant, ne minimum quidem ex suis
 actionibus, & ex crudeli cruentâque sus-
 pensione doloris indicium præbentes. Cla-
 rus autor totum valido narcotico, neuti-
 quam verò causis supernaturalibus ullis,
 tribuit.

Secundò. De Nigritarum magiâ plures testes à magiæ defensoribus laudantur. Verùm invenimus testes haud sanè paucos, qui & longitudine temporis quod apud ipsos triverint, & commercio quod continuò cum iisdem habuerint, autoritateque, quâ iisdem complures annos præfuerint, majorem cæteris fidem merentur. Porrò rident hi cunctam illorum magiam, tanquam mera idololatrorum sacerdotum præstiglia, licet hæc vero cum dæmone commercio fieri censeat plebs credula.

Sic *Wilhelmus Bosmann*, qui longâ annorum serie, *Batavæ societatis Indiæ occidentalis* autoritate, præfuit Nigritis ad *aureum*, ut vocant, *littus in Guineâ*, *Epistola X*, longè latèque describit nobis ru-dis hujus *Africani* populi auguria; falsè autem ridet sacerdotum, aut magorum calliditatem, quòd in fictis suis, sive auguriis, sive auspiciis, mille adhibeant imponendi artes, ne fucum plebs subolfaciat. Ut *Bosmannus*, sic *Joannes Morgan*, Anglicus scriptor, *historiæ Barbariæ Tom. I, Cap. V*, relatâ infelici expedi-tione *Africanâ* imperatoris *Caroli V*, ejusdem ita infortunatæ in causas indaga-vit, cùm ipso in loco esset, idque eò attentiùs examinavit, quòd classis navalis

imperatoriæ clades maleficio tribueretur. Historiam hanc ex Gallico autore *Lau-gier de Tassy*, atque ex *Algerinorum relatione*, diabolo adscriptam traditurus, in antecessum nos præmonet anilibus fabulis quam veritati similia cuncta esse, quæ perhibent illi.

Doctus vir *Joannes Egede*, in Libro de eâ *Americæ septentrionalis* parte, quæ *Vetus Groenlandia*, seu *Fretum Davis* vel *Davidis* appellatur, Cap. XVII, de religione, seu potius superstitione, *hujus populi*, apud quem *Daniæ regis* jussu Missionarii munere 15 annorum spatio functus est, multa nobis retulit eorum, quæ incolæ de suis & magis, & exorcistis secum communicaverant, hosque didicit ab illis esse distinguendos in viros spectabiles, cum spiritibus cœlestibus conversantes, momentoque temporis ex ædibus in summos cœlos raptos, ubi a viris sapientibus, prædecessoribus suis instruuntur de agendis, & in magos, ac maximè in sagas, quæ suâ magicâ arte hominibus nocere in vitâ bonisque contendunt: priores multo honore donisque gaudere; posteriores vilipendi, imò quandoque, ut societatis humanæ pestes, morte plecti. Porrò utriusque generis articia autor, post 15 annorum

experientiam, non nisi mimica & lucrificabilia esse arbitratur.

RESPONSO.

Resp. prima ad singulas objectionis patres simul. Qui retulere has observationes autores se magiae negatores declarare minimè verentur, adeoque testimonia paucillulūm suspecta reddunt. Concessis verò quæ volunt omnibus, consequitur id, ut vera magia haud ex æquo apud singulas idololatras gentes exerceatur; utque sint, apud quas planè præstigiatrix duntaxat sit; sicuti ex prioribus constitit esse, quæ veram eamdem possideant co-lantque. Verùm vix admittere negantem ipsorum sententiam possumus, propter ea ipsa, quæ ipsis inter narrandum hinc indè elapsa sint. Quæ ordine hīc enarrare operæ pretium erit.

Ac primò quidem *Kæmpferus* in suā primā historiā relegendus est. Eò quòd *Japonenses* suas sacras pilulas non sumant, nisi in summo moriendi periculo, credit nullarum virium easdem esse, cùm alias maturius adhibituri essent. Non video conclusionem justam esse; nam videtur hoc medicamentum magicum non nisi supremo morbi discrimini reservari, hincque maturius non assumi: quia verò tunc

assumunt *Japonenses*, idque perpetuò; an non indè juvamen sæpè habere videntur? Profectò usus absolevisset, si sacerdotum ars merè ludicra foret.

In alterâ historiâ idem itinerator ac medicus, censet *vestalibus virginibus* electuarium ex herbis, convulsionem fatuamque generantibus, porrectum fuisse, ut insanirent: & quod dæmoniacarum more insanientes, inque aditum templi reductæ, intrà horam sapientes modestæque in populum remitterentur, dato adscribit antidoto. Quo utroque & insaniam, & sanam mentem faciente medicamine, sacerdotes credit fucum populo facere, ac si ipsi genios pravos in vestales immisissent, & dei *Wishnu* potentia tanta esset, ut fugatis dæmonibus sana cuique mens rediisset. Ad confirmandam autem suppositionem suam, quàm mirificæ ad cerebrum corpusque turbandum sint potiones *Malabarorum*, expertum se narrat in se ipso sociisque suis fuisse, dum ab illâ gente convivio excepti, ludicum omnino exhiberent spectaculum.

Nullam ergo magiam diabolicam dari ratus *Kämpferus*, cùm videret *vestales juvenulas* ex seriis modestisque mox dæmoniacè furibundas, audissetque hoc a sacerdotum cœtu cacodæmonibus, a se

in easdem missis adscribi; quod ipse fieri negabat posse, maluit electuarium insanum pro causâ suspicari; cuius suspicionis nullam vel minimam rationem habebat, nisi quod cæterum tam subito, inque singulis natam insaniam, tamque subito suppressam capere non posset. Quod verò biennium in *Japoniâ*, hemipolis ferè regni transfigens, nunquam suam sine ullo fundamento captam suspicionem, vel minutissimo experimento, potuerit probare, est profectò quod miremur; quodque gentis in eodem cultu, cum iisdem terrificis, stupendisque ceremoniis, perseverantiam & fidem expertus, nec ad falsitatem demonstrandam tanto tempore aptus, sententiam non mutaverit, est quod capere nequeamus.

Verùm *pueLLas vestales*, insanientes antidoto dato resipuisse vir *Indo-Batavus* vidit: ergo per vim antidoti intelligitur anteà insaniens venenum exhibitum fuisse, sufficienterque probatur.

Nisi me animus fallit, non video hoc exindè consequi. *Indo-Batavus* ille narravit antidotum datum *vestalibus* in aditu templi: aditum autem hunc adeò spatiōsum fuisse, ut universi templi tertiam amplitudinis partem coæquaret: in tam vasto ædificio unicam modo lampadem

splenduisse : ac tandem se non potuisse ; nisi per ostii foraminulum , quid videre. Conclusionem relinquo lectoribus.

In *tertiâ* historiâ , ubi negat copulæ conjugalis ligaturam , nullam suæ negationis rationem afferens , mero ratiocinio se rem confecisse putavit.

Sed in *quartâ* *Kämpferi* historiâ quid memorabile se offert nobis. Vidimus enim clarum hunc autorem eam opii adscribere virtuti ; quod an credibile , videamus. *Primum* notandum est athletas illos septem a peraltâ machinâ pendere , duobus uncis ferreis , in dorsi musculos infixis. *Secundò* eos sic suspensos unâ manu clypeum , alterâ gladium vibrare fortiter debere , ita ut unci in dorsi musculos infixi , & eosdem , & tendines , & nervos convellere lacerareque , ac varias & sœpè notabiles hemorrhagias , vehementesque convulsiones creare debuerint. *Tertiò* athletas in horrendum hunc modum pendulos , circum integrum templum circumvehi ter solere ; sic ut motus ille continuus , atque diutinus avellere & dilacerare dictas partes vehementer debuerit , corpusque totum in enormes agitare convulsiones. *Quartò*. In ternâ hâc circum templum circumduktione eosdem caput , axillas , cruraque motitare ,

ac

ac lepore histriorum veluti per aëra natare debere; undè dolores, convulsiones, delacerationes vehementer augentur oportuit. Nihilominus athletarum horum nemo vel signum dat, aut molestiæ, aut convulsionis, aut doloris, aut deficientis crux; nemo vel in ipso immanni sacrificio hoc, vel postea, vulneribus convulsionibusque periit.

Causisne igitur naturalibus miranda hæc phænomena, an supernaturalibus tribuenda sint? quæritur.

Naturalibus Kæmpferus censet: *In circum, inquit, qui suspendendos stringebat, me continuò intrudens, video a brachmane propinari ex nucis cocos putamine haustum aliquem, procul dubio narcoticum, qui dolores sopiret, quos a Deo templi præside aboleri credebat populus. Interroganti mihi respondebat sacerdos: succum esse lansjes, quem adversùs sitim & deliquium propinarent. Lansjes est nux cocos imatura, liquorem dulcem continens, qui successu temporis coagulatur in nucleum.*

Credidit ergo Kæmpferus non verum succum *cocos*, sed narcoticum propinatum fuisse suspendendis. Condonarem medicinæ ignaro hanc suppositionem: qui verò condonabo eam medico, qui virium simplicium apprimè gnarus, nosse debuif-

set narcoticum esse non potuisse, quo crudelissimi, continuò post narcoticum assumptum millies renovati, & non ferendi mortalibus dolores ita sopirentur, ut ne minimum quidem, sicut ipse scribit, ex actionibus & cruentâ suspensioue præberent doloris indicium? An ejusmodi existat in rerum naturâ narcoticum, seu opiatum, quod crudelissimos dolores consopiat, causâ dolorum atrocissimorum & continuâ & assiduò renovatâ? Experimento novimus quām parūm formidanda narcoticorum dosis dolores cancrofosos, v. g. uteri, aut sopiat, aut saltem leniat, quia perseverat causa doloris. Ut ne a granis 72 opii quidem, pluribus consequentibus noctibus datis, utero cancrifam mulierem ne vel minimum oculis somnum vidisse viderim. Ast, inquies, narcotici vis aucta adeò fuit, adeòque liberalis data ejus dosis, ut debuerit soporare dolorem. Igiturne hæc enormis opii copia sopivit dolores, ut ne renovatâ quidem assiduò causâ, vel minimum perciperentur; & interea non affecit vel hilum cerebrum, cùm nobiles athletæ toto ceremoniarum tempore clypeum gladiumque vibrarent, atque corpus singulosque artus, histrionico more, perpetuò agitarent, corporisque proprii pon-

dere magis magisque transfixos musculos
dilacerarent? Igitur autor noster, qui op-
timè novit a narcoticis id quod præten-
dit præstari non posse, hoc subterfu-
gium unicè ideò quæsivisse videtur, ne
in hâc idololatriæ pompâ diabolicam ag-
nosceret operam. Tutius credidisset, fide
sacerdotis, esse nucis *cocos* succum, qui
copiosus, lacteus, dulcis, blandicie fa-
tuus, fitis restinguens ardorem est, ut
pluries gustavi & expertus sum.

Imò verò, inquies, ipse *Kämpferus*
testatur se pluresque sociorum convivio
apud *Benjanos* exceptos, tali narcoticō
potionatos fuisse, ut omnes fatui, in ca-
chinnos soluti, per nubes & irides vehi-
sibi visi essent, donec hesternam crapu-
lam edormivissent. Demus & hoc: an
illustris noster itinerator cum sociis cru-
delissimâ torturâ cuin athletis vexatus fue-
rit, ut putet se effectus ejusmodi, atque
illi ediderant, edidisse? An athletæ in
cachinnos continuos durantibus istis cere-
moniis solverentur, ut illi? Nihil ergo
simile inter hosce & illos fuit.

Sed crudelissima hæc idololatriæ cere-
monia & magis communis apud gentem
hanc est, & aliis comitatata exercitiis,
quam quidem *Kämpferus* notat. *Dapper*
in *Asiæ descriptione*, pag. 160, nobis re-

ligionem *Brahminorum* enarrat, ac omnia vota, ac pœnitentias, quas pro peccatis suis, seu sacerdos, seu ipsi sibi imponunt, etiam eleganti tabulâ repræsentat, & hanc nobis, ut frequentem pœnitentiam aut votum, effigie monstrat. Hic nulla mentio alicujus aut potûs, aut medicamenti: hic pœnitens longo tempore ab uncis, dorsi carnes penetrantibus, suspensus aëra scuto gladioque verberat, in deorum laudem hymnos cantat, & *sclopetum* sæpiùs onerat & explodit. Et fœminæ, æquè quam viri, hoc, sive voti, sive resipiscentiæ exercitium subeunt: voxque una cunctorum est, nihil aut percipi inde doloris, aut prava symptomata sequi.

Meritò igitur jure concludo, non posse causis ullis naturalibus hoc idololatricum exercitium adscribi, sed diabolicum opitulari auxilium. Atque hæc sat superque de *Kæmpfero*,

Objectionem petitam ex *Bosmanno* & *Morgano*, paucis expediam. Per omnia constat utrisque animam esse omne negandi magicum. Fortè jure etiam negarunt, cum tot imposturis sæpè magia simuletur. Hoc nunc quomodò probaverint audiamus. Historias suas enarrant, & nullâ datâ ratione imposturas vocant,

affatim rident, & ad alia transeunt. Ergo quod ex hisce objicitur nobis, profectò nullius est ponderis.

Tandem ad objectionem ex missionario Egede petitam, dico eum ita negasse magiam, ut vel in dubium vocare eam, vel admittere aliquando visus sit. Quid enim aliud, postquam negare magiam visus esset, hæc ejus animadversio significet? Quamvis hæc omnia asseverant incolæ, ait, haud facile inducor ut credam in hisce, seu vaticiniis, seu exorcismis, aliquod verum intercurrere cum diabolo commercium. Quantum enim mihi appareat, videtur mihi & circulatoria eorum ars esse, & præstigiatrix, & mendax, quā apud illos callidissimi, cum laute solvi ipsis soleat, abutuntur. Negari tamen penitus non potest, quin diabolus cum iisdem cooperetur, præstigiatorumque princeps sit, quo miserandas hasce gentes sibi captivas teneat, neve Deum verum agnoscant prohibeat. Qui igitur negat magiam & non negat, his contra veræ magiæ sententiam laudari, neque opponi nobis debet. Dicit tamen, inquires, haud facile induci se ut diaboli credat intercurrere commercium. Hoc dicit, vel quia rationes habet, vel quia magiam veram non dari ferè credit. Nullam autem rationem dat cur

diabolum ad magiam *Groënlandarum* non admittat; nullamque rationem, ob quam vel facta ipsa neget, vel per causas naturales explicet: ergo mentis præoccupatione videtur ferè negare diaboli ad magos concussum, sic tamen ut de suâ opinione dubitare valdè nonnunquam videatur.

OBJECTIO XVIII.

Nunquam magis dæmoniaca magia radicitùs evulsa est, quàm viri doctissimi *de la Chapelle* eleganti tractatu. Scatet quippe historiis antiquorum, recentiumque dierum, quibus evincitur solius naturæ opus & exercitium esse omne *ventriloquorum* portentum. Sic quidem, ut, cùm extiterint, extentque ventriloqui, quorum mentein, non detestanda cum *principe & rectore tenebrarum harum* conventio, sed verus religionis, verus *patris lumen* cultus & amor explebat, error nullo modo condonandus sit velle gastriloquos dæmonis operâ agi. Si itaque nullo modo dæmonum, sed singulare naturæ opus sit, an secundum sæculorum elapsorum ignorantiam, illos quos pythones natura fecit, vivis ultra licet comburere flammis? An unà non cadit omnis de verâ magiâ error, eò quòd, sicut pythonum, ita ma-

gorum augurumque omnium, artificium deprehendatur esse πολυδιάρητός naturæ opus?

RESPONSO.

Laudamus eruditæ viri *de la Chapelle* opus, cuius epitomen lubens dedissem, ni argumentorum historiarumque vim infirmasset extractum: undè potius ad opus ipsum mitto lectorem. Gratias ipsi referre ecclesiastici, politici, jurisconsulti, medici ac physici debemus, eò quod, quidquid de hâc materie, & utile, & necessarium scitu erat ex tenebris eruerit, & in tam clarâ luce collocaverit, ut haud parùm indè didicisse ultrò fateamur. At verò cùm non in omnibus cum illustri auctore convenire, neque indè id quod ille per omnia concludere possimus, licebit nobis eas rationes proferre, quæ, ne hucusque assentiamur, præpediant.

Operis enim conclusio ea est, ut cum pythonem omnis omnino magia diabolica è terum naturâ exulet, neque ullus in posterum aut magus, aut saga, aut incantator morte puniendus sit. Huic verò conclusioni quænam fundamenta substraverit auctor, inquirere operæ pretium est. Porro argumentum suum sic format.

Ventriloquos creditum fuit non na-

turæ , sed satanæ auxilio tales esse , ob
idque mortis supplicio dignos.

Atqui ventriloqui non satanæ , sed na-
turæ viribus ventrioliquum exercent.

Ergo per omnia sæcula perperam cre-
ditum fuit eos & diabolo agitari , & morte
dignos esse. Huc ejus redit totum opuscu-
lum.

Singulas ponderemus propositiones.
Majorem censeo sic esse distinguendam :
Ventriloqui , qui hâc suâ arte neminem un-
quam , aut seducere , aut lædere contenden-
tunt , neque quod naturæ vires superet
unquam aut fecerunt , aut facere tentave-
runt , crediti sunt & diaboli potestate
agere , & mortis rei esse : nego majorem.
Ventriloqui , qui hâc suâ potestate alios
lædere , alios ad impietatem seducere co-
nati sunt , quique prodigia viribus huma-
nis certò certius superiora ediderunt ,
diabolicâ potestate egere necisque digni
habiti sunt : concedo majorem.

Ad minorem respondeo quoque distin-
guendo : Qui non a dæmone , sed naturâ
& industriâ ventriloqui dicebantur , ex-
titerunt semper , sed numero paucissimi :
concedo. Ventriloqui omnes ab orbe
condito , in dies usque nostros , non dæ-
monis , sed propriæ naturæ viribus
exercuerunt ventriloquium : nego mi-

norem. Et pariter distinguo consequen-
tiam.

Distinctionis autem rationes hasce
dabo.

I. Leges in *pythonas* latæ ideo hos
mortis supplicio plectunt, quod suâ arte
vel ad idololatriam, vel ad dæmonum
cultum homines seducere studeant; vel
quod simul perficere ea conentur, ac
reapsè perficiant, quæ nemini mortalium
per naturæ vires perficere datum est.
Evictum hoc primâ mei operis parte
fuit.

II. *Pythones* appellantur in legibus om-
nes magi & sagæ auguresque; ita ut nunc
hoc, nunc alio horum nomine recensean-
tur. Idem & in primâ hujus parte pro-
bavi.

III. Doctus & sagax autor per omnes
suos labores non potuit, in universâ
trium sæculorum totius *Europæ* historiâ,
ultra 12 aut 13 homines, naturâ indus-
triâque *pythonas* detegere: qui profectò
ad eamdem conclusionem de *pythonum*
omnis mundi ætatis miriadibus forman-
dam, nihil prorsùm faciunt. Rectène ab
his paucis concludat ad omnes?

Ponamus regnum quoddam vastissimum
adulterinâ monetâ infame esse: ponamus
prætereà in eodem regno, post sedulam

inquisitionem , genuinas monetas numero duodecim inventas esse : justone concluderem nec esse ibidem , nec fuisse unquam , ne vel unicam quidem adulterinam monetam ?

Si contingeret me apud gentem populosissimam esse quam , aut otiosam , aut ebriosam , aut proditoriam , aut maledicam vetus fama veraque ferret ; ego autem in historiâ gentis a ter centum retroactis annis duodecim homines detegarem , qui vel laboriosi , vel sobrii , vel sinceri , vel veridici fuissent ; an jure concluderem falsam esse quæ huic nationi inusta esset infamiam ?

Imò si longè numerosiores invenissem qui vitioso gentis charactere vacarent , intempestiva mea conclusio foret . Per solas suas naturæ æstutiæque vires ad discunt multi vafri homines tam vividum referre epilepsia simulacrum , ut epileptici reverà esse benè multis videantur : quorum multa exempla in *Rat. Med. Tom. V & XV* , cum publico communicavi . Igitur , detectâ toties fraude , sapienter concludam neque veram existere , nec unquam extitisse epilepsiam ? An quod ab omni retro tempore , hodie dumque , tot fint a dæmone fictè obsessi , ritè confesso nulos verè obsessos unquam fuisse ?

Vide quid *Tom. XV* de dæmoniacis notavi.

Igitur egregius autor duodecim suos, quos pythonas vocat, per naturam industriamque eò pervenisse ut possent, si vellent, multis veri specie imponere; posse quoque ad pravas intentiones eâ quâ pollent facultate abuti, tutò concludere, multosque fortè horum similes ante 1000, 2000, 3000 annos extitisse, aliisque impossuisse, conjectare quidem inculpatè potest: ultra verò nihil: quod enim ultra conficere ex iisdem contendit minimè indè consequitur.

IV. Nimius est ad cæteros magos omnes a suis pythonibus saltus. Si egregius scriptor reverà probasset, non modò suos duodecim trium sæculorum omnis orbis notos pythonas, verùm etiam quotquot ab origine mundi per universi orbis plaga ejusmodi extitissent a naturâ duntaxat, neutiquam verò ab angelo pravo, hâc pollere facultate; si hoc, inquam, jam probasset, jus indè nullum, nullam causam habuisset cur idem, sine ullo prævio argumento & demonstratione de magiâ, affirmaret. Multò autem minus nunc, cùm nihil, nisi suos duodecim nihil commune cum cacodæmone habe-

G vj

re, unicè probaverit. Hunc igitur hiatum supplere tentabo.

Potuisset utique probare facile magos multos vocari, naturæque excedere vires dici, qui nihilominus solis agant naturæ facultatibus: imò & illorum qui magorum affectarent nomen, fassos tandem suisse id quod tanto cum hominum stupore perpetraffent, soli suæ astutiæ, calliditati atque intrepiditati debere. Potuisset nobis mirificas enarrare momorum actiones, qui lusu chartarum, qui certâ chartarum electione, distributio-ne, confusione, collectione, attonitos reddunt adstantes; qui tam callidè norunt manum dirigere adstantis, ut hic per omnia juret, se quod manu tene-ret extra fenestram projecisse, dum interim ille id quod alterius manus continebat, mirandâ dexteritate suâ clam sic prehenderit, ut fucum subolfacere ne attentissimi quidem spectatorum potuerint. Hoc enim candidè fatendum est, quamvis apud æruscatores & præstigatores diaboli concursum perpetuò secludere nolle, eosdem tamen tam portentosâ propriâ calliditate edere, ut vel prudenterissimi viri removere ab animo supernaturalis concursus suspicionem vix possint.

Hisce similibusque exemplis , milenos falsò pro magis , aut haberí , aut habitos fuisse probare liquidò potuisset autor noster , quemadmodùm idem de suis probaverit pythonibus. At verò , hoc probato , superesset illi , ut idem de omnium ævorum per universum orbem magis ac sagis probaret : quo penso laborioso absoluto , legitimè tandem veri quid conclusisset. Sed nullo argumento contra magiam prævio , ex suis duodecim , quos ita vocat , ventriloquis , ad ventriloquos omnes concludere ; quin , ac si levissimi res negotii esset , omnem magiam sub eâdem conclusione comprehendere , nescio an sit severioris logices præceptis consentaneum ?

V. Haud exiguus nodus autori solvendus manet , injustâ planè morte plexos pythonas pronuntianti , quos non ecclesiasticæ civilesque leges duntaxat , verùm ipsa lex divina mortis addixit supplicio. Miror ab ipso difficultatem hanc , quam saltem indicare debuisset , fuisse prorsùs dissimulatam. Cùm enim suis duodecim numero ventriloquis , omnis ævi ventriloquos similes esse censeat , & ventriloquos morte plectendos esse Deus jubeat , difficultatem hanc agnoscere , & , si potis fuisse , solvere debuisset.

VI. Quid si in toto suo opere nihil probarit? Hoc ego demonstrari liquidò posse reor. Titulus operis *de ventriloquis* est: opus ipsum ne hilum quidem *de ventriloquis*, unicè verò *de bessonis* agit. Aliud quippe est loqui, ut vox ipso de ventre videatur oriri auditoribus; aliud iterum est & vocem naturalem edere, & mox vocem simulare, quam vel ex valde sublimi, vel de profundo, vel utrovis latere, 20, 50, 100 abinde passibus edi putas. Hanc duplēcēm adeò diversam loquendi facultatem *vir doctus de la Chapelle* in omnibus suis; hanc scriptorum nulli memorarunt in pythonibus, nec sacri, nec profani. Ipse Deus nobis *Isaiæ XXIX, v. 4*, verum descripsit quo loquuntur pythones modum. *Humiliaberis, de terrâ loqueris, & de humo audietur eloquium tuum;* & erit quasi pythonis *de terrâ vox tua, & de humo eloquium tuum mussitabit.* Εγερπιμωτός, inquit *Scapula*, « quasi diceretur *ventriloquus*: sic vocatur qui vel quæ in ventre dæmonem habet, responsa interrogantibus dantem: magus & ariolus, apud Græcorum Bibliorum interpres. Galenus vult apud *Hippocratem* ita appellari eum qui clauso ore loquitur, quasi ventre loqui videatur. » Cùm & *Scapula* nos ad *Hippocratem* re-

mittat, & *D. de la Chapelle* hâc occasione quoque laudet *Hippocratem*, hîcque reverà negotio haud parum lucis afferat, ipsum audiamus æquum est.

Epidemicorum Libr. V, & iisdem penè verbis *Libr. VII*, sic habet ille: *Polemarchi conjugi*, per hyemem anginâ laboranti, guttur intumuit cum multâ febre, & sanguis missus est, faucium suffocatio desiit, febris perseveravit. Sub quintum diem tumor ad lævum genu cum dolore subortus est, eique ad præcordia quiddam coacervari videbatur: κατὰ τὸν καρδίνα δικεῖ τὸ συλλέγειν, αὐτῷ; & veluti aquæ immersi respirant, ipsa respiravit: καὶ ἀνέπνεεν ως ἐκ τῆς θελαπίδαι αναπνέσον, καὶ ἐκ τῆς σύνθετης φύσεως, ὡσπερ αἱ ἔγγαστρι μυτοὶ λαγόμενοι, τοιστό τι ξυρέβαινε. & ex pectore levem strepitum sonorum edebat, quemadmodum ventriloquæ dictæ edere solent; simile quid contingebat.

Consulens interpretes, *Galenum*, *Hollerium*, *Duretum*, *Prosperum Martialem*, *Foësiūm*, *Charterium*, aut nihil, aut pa- rum admodum inveni, quod textum hunc clariore in luce quam per se est collo- caret. *Charterius*, magisque eo *Foësius*, delestanunt se textum, non ut ego verbo tenus in latium transferendo, sed pa- raphrasi ad sensum magicum referendo;

sic ut qui græcum textum aut ignorant; aut non consulunt, concludere debeant *Hippocratem* suas ventriloquas dixisse fatidicas mulieres, quæ *pythone* afflatæ, ventre oracula fundunt. *Galenus*, qui in suo exemplari non *ventriloquas*, sed *ventriloquos* legit, simpliciter eos sic vocari scribit, qui ore concluso loquantur, eò quòd videantur ventre sonum edere, & loqui. Inclytus *Haller* in suo *Hippocrate*, ut *Galenus*, *ventriloquos*, non *ventriloquas* reddidit, cæterum textum simpliciter tradidit. *Foësius*, *Charterius*, pulchrum meum *Aldinum* exemplar, in græco *ventriloquas* habent.

His verò missis, ad textum interpretibus non egemus, quem practicæ observationes mihi clarè explicuerunt. Duo *Hippocrates* dixit: primò *Polemarchi* conjugem respirasse, velut illi qui in aquam demersi sunt respirare solent: secundò, eam ex pectore levem strepitum sonorum edidisse, quemadmodùm *ventriloquæ dictæ* edere solent.

Porrò causam utriusque hujus phænomeni claram *Hippocrates* reddidit. Anginâ hæc mulier hyeme laborans, ante quintum morbi diem faucibus liberatur; haud bonâ tamen crisi, sed crudæ atque morbosæ materiei intra humores resorptu;

undè & notat febrim acutam continuasse. Errabunda hæc in humoribus materia, primùm ad genu sinistrum metastas in seu transmigrationem meditatur moliturque: at verò, sive ineptitudine loci ad recipiendum, sive abundantiam materialis loci superantis capacitatem, sedem demum figit in pulmonibus sic, ut vox ferè suffocetur. In hoc autem consimilibusque casibus, dum ægri volunt loqui, vocem audivit *Hippocrates*, vocem & nos aliquandò audivimus, veluti imo de ventre prodeuntem, qualem & ille, & ego, & mecum multi, ab hominibus post submersionem loquentibus edi deprehendimus. Quantum ego judicare & concludere in hominibus submersis potui, haud ipso in ventre, sed in pulmone formatur tunc sonus; quandò scilicet aëris, sive inter copiosam materiem quæ de oppresso pulmone continuò in ejus cavum aëreum transffudat, sive cum aqua quæ subiit cavum aëreum pulmonis sic irretitur, commiscetur, comprimitur, laxatur, ut sonorus fiat, editoque expirationis ad loquendum motu, vox jam in pectore formari incepta, cum exiguo laryngis orisque adminiculo profundum ingratumque sonitum edat.

Quod hīc aquam in demersorum pul-

mones admittam , multos offendere potest , qui eamdem subire pulmonem demergentium negent. Puto verò hoc extra omnem dubitationis aleam me posuisse , per multa mea *Tomo XV Rat. Med.* communicata cum publico experimenta.

Sed aliud hīc notandum est. In impeditā valdē respiratione per aquam , pus , mucum cavum aëreum opplentem , conatus æger vocem edere , edere quandoque observatur illam *in inspiratione*. Optimè hanc loquendi per inspiratum facultatem notavit vir illustris *Hallerus* , *Tom. III, El. Ph. Libr. IX, Sect. III, §. I*, cùm in singultu , in tussi pertinaciore , ac præcipue in ventriloquis , hoc manifestum aliquandò esse scribat. Malè igitur negatur vocis per inspirationem possilitas. Si memet exercere in hāc arte vellem , ventriloquus fierem ; edere enim vocem inspirando intelligibilem , debiliorē tamen eā quām expirando possum , eamque raucam valdē , citò defatigantem , multoque profundiore origine audiui meo apparentem. Ita ut plures concurren̄ causæ ventriloquii in demersis ægratisque possint.

Hoc porrò totum est quod de ventriloquis *Hippocrates* habet , & quod nostri autoris sententiam minimè probat. Intel-

lexit medicinæ parens vocem in hoc phænomeno ex profundis, veluti de imo ventre, exaudiri; & quotquot in ejus *libros Epidemicorum* commentati sunt, sic intellexerunt. Sic quoque judicarunt qui de *pythia Delphicā* scripserunt, quæ tripodi diductis cruribus insidens, ventre fatidicum spiritum hauriebat, quo mente incitata ac furens oracula edebat. Vide *Ciceronem Libr II, de Div.* Hæc denique mens lexicographorum in vocem ἡγεμονίας est, SS. Patrum quoque, & illustriorum in sacrâ Bibliâ commentatorum.

Meretur hîc legi *Spicilegii biblici Tomus II, Alexii Symmachi Mazochii, Metrop. Eccl. Neap. canonici, & in regio gymnasio Neap. sacrarum Scripturarum interpretis.* Habetur ibi dissertatio secunda ad illud *Isaiæ Cap. 38.* *Sicut pullus hirudinis sic clamabo, meditabor ut columba.* Caput IV hujus dissertationis dicatum totum *ventriloquii* explicationi est, quod haud alio modo explicari posse quam nunc explicitum a nobis fuit, ex sacris probat profanisque scriptoribus.

Ergo per omnia constitit eruditæ abbatis de la Chapelle observationes per se, & pulchras, & ad historiam naturalem atque politicam utilissimas & necessarias

esse, ob idque gratias nos ipsi multas debere; at verò nihil ea ad quæstionem de pythone pertinere: cùm exhibeat nobis homines biglossos, qui non ventre aut imo pectore, sed per peculiarem naturæ aptitudinem, artificiosè excultam, aliam præter communem vocem, veluti è longinquo, & a 20, 50, 100, pluribusque abindè passibus oriri visam, fingere queant. Historia quippe, tām sacra quam profana, de hominibus iis unicè agit, quibus artificiosè loquentibus, nemo unquam testatus est se ex elatâ ædium templorumque parte, sive ex vicinis montibus, nemoribusque vocem percipere, sed imo de corpore prodeuntem. Si igitur evictum est nihil ad pythonas hanc dissertationem facere, multò minus ad divinos, ariolos magosque, eam facere spontè consequitur.

OBJECTIO XIX.

Magiæ diabolicæ assertio damnanda ob id est, quòd sacratissimæ religionis fundamenta penitus subvertat. Et sanè nihil probatu facilius. Miracula volo. Hæc a Deo fiunt, eoque solo, sive per se ipsum, sive per sanctos angelos suos, sive per pios homines, ad sui Evangelii divinitatem evangelizantiumque missionem, tūm post-

modum ad veritatem doctrinæ orthodoxæ adversus heterodoxam demonstrandam, sanctorumque suorum innocentiam prætantiamque manifestandam. Porrò miraculorum ruit omnis autoritas, si, quemadmodum tota pars hujus operis prima ponit, & satan ea facit, & cooperatores ministriique ejus incantatores. Jam enim miracula æquè idololatriam quam verum Dei cultum, æquè impietatem quam religionem, æquè flagitia quam virtutes, æquè impiorum quam piorum, falsorumque prophetarum quam verorum autoritatem missionemque confirmant.

RESPONSO.

Palmarium argumentum primâ fronte videri posset, sed proprius inspectum facile ruit. Dico itaque *primò*: Si verissima, si demonstratissima ea sunt, quæ magiam admittere nos coegerunt, falsa eadem reddere ne validissimæ quidem objectiones possunt. Quod semel verum undique constitit, verum æternum manebit. Igitur qui validissimam putant se confecisse objectionem, sponte coguntur in hâc quæstione idem præstare, quod in non paucis aliis quæstionibus, cùm sacris, tûm profanis, laudabilissimâ humilitate præstant, admittendo veritatem, licet haud ea, quâ

optassent perspicuitate ac facilitate , argumenta contraria resolvere possint.

Secundò. Objectio verum quidem narrat , sed non omne verum quod narrandum erat ; reticet enim veri partem. Agnoscamus Dei , miracula dicto modo edentis , hanc esse voluntatem intentionemque ; sed unà novimus , per multa scripturæ Patrumque testimonia , Deum judicio vel misericordiæ , vel justitiae , prævaricatoribus angelis permettere , ut prodigia edant , quæ non angelicas , sed humanas supererent vires. Porrò est hæc potentia stupenda angelorum , ut toties eamdem jam mirabundi conspeximus in divinis *Ægyptiis* , in occisione exercitūs *Affyriorum* regis , in Christi temptatione , in historiâ *Simonis* , *Apollonii* , aliorumque magorum : quæ cùm vires humanas multis supererent parasangis , miracula audiunt. Anne *Antichristus Matth. XXIV* , ejusmodi editurus miracula est , ut etiam electi , si fieri posset , ducerentur in errorem ? Quàm stupenda miracula non prædixit *B. Joannes in Apocalypsi* ab eodem filio iniquitatis , ejusque pseudo-prophetis perpetranda , ut in errorem orbem ducant universum !

Tertid. Non miracula sola veritatem Evangelii demonstrant , sed & ipsius evan-

gelicæ doctrinæ admirabilitas , atque præstantia præ philosophorum vel æstumatissimorum placitis , & vita sincera , divinaque , non unius , paucorumve , sed millenorum Christianorum primi ævi in regionibus singulis urbibusque . Hæc omnia sic præmuniverant Christianorum animos contra pseudo-prophetarum miracula , ut angelo de cœlo aliud Evangelium fortè , ac per impossibile annuntianti , anathema dixissent omnes . *Epist. ad Gal. Cap. I.* Qui demùm in Ecclesiâ ætate grandiore miracula videbant , eò magis in verâ fide confirmabantur ; cùm præter hæc quæ miraculis pondus addidisse mox diximus , etiam hæc miracula in eâ fidelium societate fieri viderent , quæ miraculis condita , miraculis aucta esset .

Ut autem totum hoc negotium breviter expediam , duces sequar cum *Guilielmu[m] Estiu[m] Duacensis* universitatis saeculo XVI cancellarium , virum maximâ profectò ob doctrinam pietatemque in rebus theologicis autoritate pollentem ; quem sibi sequendum quoque *Sennertus noster* in hâc quæstione proponebat : tûm *Petru[m] Mariu[m] Gazzaniga* , è prædicatorum ordine SS. theologiæ in *Vienensi* universitate professorem Cæsareo-regium , ejusdemque universitatis verum

lumen atque ornamentum, in tractatu
de Fide, Spe & Caritate, Parte I, de
Fide. Diff. I, Cap. IV, V & VI.

Miracula igitur dividam in ea quæ contra naturam, in ea quæ supra naturam, & in ea quæ præter naturam fiunt. Miracula quæ *contra naturam* sunt, vocantur illa quæ naturæ legibus opponuntur, ut est statio in medio suo cursu regressusque solis, *Josuæ & Ezechiae* temporibus, futurorum notitia atque prædictio. Miracula *supra naturam* illa appellantur quæ, non opposita quidem naturæ legibus sunt, ejusdem vires tamen superant, ut exsuscitatio mortuorum est. Si natura per se, aut medici, adstantesve, hominem in syncope jam mortem vultu, frigore, pulsusque referentem exsuscitant, non superant naturæ leges; sin verò verum mortuum exsuscitent, has leges superant: nulla natura agere hîc amplius potest. Tandem miracula *præter naturam* dicuntur, quæ differunt modo, vel tempore agendi. Si medici curant hominem a febre continuâ putridâ dierum 14 spatio, agunt secundùm consuetas naturæ leges; sin autem ictu citius, curatio hæc præter naturam est. Hominem deferri a loco in locum, hominum, jumentorum, navium, artificiosorum ac mechanicè constructorum currûm

currūm ope , secundum leges naturæ omnino est ; eumdem verò in decimâ diei parte itinere multorum dierum transferri , præter naturam est. Juxta naturæ leges homines multam faciunt atmosphæræ mutationem , in eamdemque operationem , purificando eam a miasmate pestifero , quo artificio pestem *Hippocrates* a suâ patriâ amovit , rogis ingentibus in montium hiatu , quo pestifer aër in *Græciam* transvehi potuisset , accensis : quo iterū artificio electricitatis gnari fulmina in ædes convocare , ab iisdemque amovere sciunt. Hæc , inquam , & centena similia horum , secundūm naturam faciunt ; minime verò secundūm naturam agunt , qui ad determinatum tempus , in determinatum locum , ad determinatam quantitatem , in ventos , inque pluvias grandinesve atmosphærām disponant , ut per tot exempla summæ fidei autores demonstrarunt , quorum in fine *Partis I, Cap. III,* memini ; quorumque testimonia communicassem , si , ut ibidem monui , eadem jussis de causis non suppressissem.

Primum miraculorum genus nulla , neque humana , neque angelica potestas edere potest. Non enim *Josue* , sed ad hujus vota Deus sistebat solem. Futura solus Deus novit prædictaque. Unde &

hoc contra naturæ leges. Ita *Isaïas XLI* zelosus sui honoris Deus alloquitur falsos prophetas, idola, & per illa loquentem satanam, veluti cum illis coram judice quopiam litigans : *Propè facite judicium vestrum, dicit Dominus : afferte, si quid forte habetis, dixit rex Jacob.* Accedant & nuncient nobis quæcumque ventura sunt : priora quæ fuerunt nunciatae, & ponemus cor nostrum, & sciemus novissima eorum, & quæ ventura sunt indicate nobis. Annunciare quæ ventura sunt, & sciemus quia dii estis vos : benè quoque aut malè, si potestis, facite, & loquamur, & videamus simul. Soli itaque Deo futura patent, & creatorum entium si cuiquam pateant, contra eorum naturam est, eo unico ipsi revelante, qui solus novit.

Revelavit autem futura Deus, primò sanctis suis per omnia sæcula prophetis, apostolis, nonnullis ex primis Christianis, & quibusdam posteriorum sæculorum sanctis. Secundò, revelare futura ipsi placuit etiam hominibus de quibus verine fuerint, an falsi prophetæ dubium est, ut avaritiâ ducto *Balaam*, & ut illis de quibus *Matth. VII.* *Multi mihi dicent in illâ die : Domine, Domine, nonne in nomine tuo prophetavimus ? & in nomine tuo dæmonia ejecimus ? & in nomine tuo mul-*

tas virtutes fecimus ? Et tunc confitebor illis : quia nunquam novi vos : discedite a me , qui operamini iniquitatem. Tertiò , cùm etiam indubitatisimis exemplis constet diabolum per magos futura prædixisse , & cùm futura nemo nisi Deus noscat , concludere indè oportet Deo in adorandis judiciis suis placuisse , ut nonnunquam futura spiritibus immundis revelaret. In secundâ miraculorum specie resurrectio mortuorum Dei solius est opus : undè quæritur an , quæ legitur a magis facta mortuorum exsuscitatio sit quoque , ut futurorum notio , a Deo , in fines ipsi soli notos , dæmoniis concessa ?

Potuisse Deum hoc facere certum est ; rariùs autem fecisse ex magicâ historiâ concludo. Quandò *Part. I , Cap. III , §. II* , historiam *Apollonii Thyanæi* agitabam & mortis puellæ quam suscitasse dicebatur hic magus , dubium , hærentem *Fleuryum* considerabam , eò quòd vaporem de corpore exhalasse , antequam ad id accederet *Apollonius* , nonnulli opinarentur ; quæ ratio cùm non videbatur valere , promisi me in hâc ipsâ *Parte II* casum repetitum. Promissis stabo. Ne verò in longius sermo protrahatur , lectores meos peto , ut , quæ in *Rat. Med. parte XIII* , sub finem experimenta col-

legi, adeant, ibidemque videant quoties contigerit ut homines per horas, per integrum, immò per alterum tertiumque diem verè mortui visi, postliminio vixerint: ut proindè evictum id esse videatur, quod vita per tantum temporis spatiū penitus evanida extinctaque apparereat, ac nihilominus & adsit, & resuscitetur. Igitur callidissimus dæmon, angelico suo intellectu, eum hominum immensè superante, vidisse potuit eo in corpore relictas superstitis vitæ scintillas, & cum movendis humoribus sit, eosdem in motum duxisse, quo tempore adduceret *Apollonium*; ut eo veluti miraculo vim miraculorum quæ in sanctissimæ Religionis augmentum Christiani, Dei virtute, faciebant, obscuraret enervaretque. Sic omnia gentilium, hæreticorum ac magorum hujus generis miracula dicta explicari posse censeo, ut necesse ferè nunquam sit illis eam supra omnem naturæ potestatem a Deo peculiariter concessam, concedere.

Ut igitur quod de hoc secundo miraculorum genere censendum sit paucis dicamus; Deus mortuos in vitam exsuscitavit solus, ut in novissimo die omnes, a mundo condito eousque mortuos, exsuscitaturus est, & quemadmodùm Uni-

genitum suum, nostrî amore mortuum, die tertio resuscitavit. Hanc tamen potestatem per prophetas, apostolos, virosque sanctos exercuit aliquandò. Rarò verò constitit Deum eam virtutem dæmonibus concessisse; Rarò dico, cùm tex-tus *Deuteron. XVIII*, & *I Samuelis*, sive *Regum Cap. XXVIII*, hanc potestatem a Deo ipsis aliquandò concessam fuisse, eruditorum non sanè paucis ferè persuaserint. Vide quæ hæc de re scripsi *Part. I*, *Cap. I*, §. *IV & V*.

De tertio miraculorum genere sufficienter supra dixi. Dubium autem sæpè fit, utrum quod præter naturam fieri dicatur, non sit quoque supra eamdem, veluti ea quæ de ventis tempestatibusque excitandis ibidem relata sunt?

Undè fortè miracula commode dividi in ea posse videntur, quæ vel humanas vires exsuperent, haud verò angelicas; vel quæ humanam superent angelicamque potestatem. Ultima ergo hæc contra omnes naturæ leges ab eo fiunt, quia hasce naturæ leges condidit sic, ut, cùm infinitus sit, easdem pro voluntate mille mutare modis possit: ita ut hæc miracula contra eas naturæ leges sint, quas eousque Deus, quandiu illas conservatas volebat, in creatarum rerum ordine

atque conservatione observabat. Quæ supra naturam huianam , non verò supra angelicam potestatem miracula sunt, hæc aut per se , aut per homines , aut per res creatas quascumque angeli patrant. Quæ per præternaturalem potestatem homines faciunt, ea vel bonorum malorumve angelorum adjumento faciunt , vel independenter ab utrisque , solâ Dei voluntate ac virtute. Quocumque verò modo perpetrat miraculum homo , non perpetrat id , nisi vel Deo citra ministerium angelorum quorumcumque hoc per illum edente , vel per angelos bonos id per eum efficiente , vel per angelos pravos id in eo permittente. Undè consequitur id , ut magi & sagæ per se nihil , unicè verò id efficere queant quod vocare miraculum solemus , si Deus justo suo judicio id aut concedat , aut permittat ; ita quidem ut miraculosum ab illis fiat nihil , si Deus neque illis potestatem hanc dederit , neque diabolo , ut hæc per illos edat , concesserit.

Causam sic capimus cur sagæ toties confessi in carcere fuerint sibi aliquandò contigisse , ut ex viginti vicibus vix bisterve promissis satanas steterit : hoc autem , cùm ipsis sæpiùs ex ejus fallaciâ contingat , quo eas sibi addictiores red-

dat, atque ad nefanda magis flagitia prius cogat, saepius tamen fieri videtur, eo quod summus noster protector hostem illum nostrum, ne nobis, nostrisque aut familiis, aut facultatibus noceat, planè impedit, humillimis maxime precibus invocatus; quemadmodum hæc omnia *Psalmo XC* nobis promisit. Facit tunc Omnipotens id quod spoponderat aliâ occasione *Isaiæ XCIV*, v. 25. *Irrita faciens signa divinorum, & ariolos in furorem vertens, quod sua signa frustrâ posuerint.*



P A R S I I I.

C A P. I.

Elucidatio quorundam quæ primâ & secundâ parte dicta sunt: undè quid, auditâ utrâque parte, tutò credendum sit sponte patet.

LONGA fuit argumentorum utriusque dissentientium circa magiam partis discussio, difficultatumque explicatio: verum merebatur tanti momenti res, ut plenâ in luce collocaretur, atque utrum neganda, an admittenda ars magica esset, medicis de eâdem consultis constaret.

Hunc in finem *Pars prima* in suo *primo Capite* dabat textûm sacrorum Bibliorum examen, qui ex *Vulgata editione* prolati, & cum fontibus cùm hebraicis, tûm græcis collati, magiam ut artem præceptore angelo prævaricatore edoctam, eodemque promotore cultam & provec tam clare proponere videbantur. *Caput II* examinabat Historiam ecclesiasticam Ecclesiæ consuetudinem & ritus, sanctorumque patrum ac summorum

theologorum doctrinam ; quæ itidem nos magiam , quâ talem ab universâ Ecclesiâ perpetuò habitam fuisse convicit.

Duo hæc , quamvis sufficere ad omnem , aut errantein , aut hæsitantem animam illustrandam firmandamque viderentur , ne quid tamen necessariæ demonstrationi deesset , *Caput III* indubia experimenta collegit , quæ vel incredulissimos convincant magiam diabolicam verà extare , demonstrarique talem , qualē & Scripturarum infallibilitas , & Ecclesiæ huic infallibilitati innixa doctrina , consuetudoque nos docuerant.

Confectum itaque negotium primâ fronte videbatur ; proprius tamen consideratum , necdùm confectum erat ; non quòd sufficienter necdùm inclaruisset quod ejusmodi validis superstructum fundamentis esset , ut his innixi , in nullis difficultatibus hæsitemus ; verùm quòd negantium magiam argumenta tantum pondus multis habere viderentur , ut quæ nos in primâ parte demonstrata censueramus , hoc illi vel alio modo explicandum , vel dubium , vel denique falsum esse arbitrarentur.

Benène hi ? Non opinor . Vel constabat ex sacrâ Scripturâ & Traditione magiam veram dari , vel non constabat . Si

non constabat, debuissent h̄ic agnoscere, quod aliis in rebus spontē facere consueverunt, difficultates in rem semel demonstratam minimē ejusdem tollere veritatem. Accuratiūs ergo erat illis, difficultatum suarum pondere permotis, doctrina biblica & ecclesiastica examinanda, ut, num tanta autoritas totque experimenta suis non præponderarent difficultatibus intelligerent? Hāc verò in parte defuerunt. Obruti objectionum suarum ponde-
re, earum verisimilitudine obfuscati, rei-
que stupendæ veluti impossibilitate moti,
sententias sacræ Scripturæ, sanctorum
Patrum Ecclesiæque modificandas esse
limitandasque crediderunt, per nonnul-
los eorumdem ipsorum textus, qui obs-
curiores in se, aliam Scripturæ tradi-
tionisque mentem fuisse, videbantur in-
nuere. Idque magis, quōd imposturas adeò nefarias, adeò etiam enodatione difficiles, easque numerosissimas dete-
xissent, ut magiam omnem negandam
cuique physico esse decernerent.

Jam verò quid de sanctorum Scriptu-
tarum irrefragabili testimonio? Alii, ut
mox monui, ratiociniis nonnullis, &
textibus minùs claris, hæc testimonia de-
bilitarunt: alii hoc & impermissum &
impossibile rati, magiam usque ad natum

Servatorem admisere, eo vero nato negare illam se tutò posse crediderunt. Pautuit hoc in historiâ magiæ, paucis ab hinc annis agitatæ in *Italiâ*.

Erratum verò ab utrâque parte fuit. Qui magiam veram admittunt ad usque tempora Christi, a magiam omnem negantibus facile refutantur: cùm, si eamdem olim existentem concedant, nullum habeant argumentum negandi præsentem. Quidquid enim de sacrâ Scripturâ, veluti cum ærâ christianâ omnem magiam terminante protulerint, v. g. ex B. Joannis Epist. I, Cap. III. *In hoc apparuit Filius Dei, ut dissolvat opera diaboli*: Ex B. Pauli Epist. ad Coloss. Cap. II, v. 15. *Expolians principatus & potestates, traduxit confidenter palam triumphans illos in semetipso*: ad Corinthios Epist. I, Cap. XV. Cùm tradiderit regnum Deo & Patri, cùm evacuaverit omnem principatum, & potestatem, & virtutem: Et Joan. XII, v. 31. *Nunc princeps hujus mundi ejicietur foras*. Quidquid, inquam, hi ex ejusmodi textibus, ut magiam antè natum Servatorem quidem existentem, ab ejusdem verò ortu extinctam arguunt, quandoquidem Ecclesia hosce textus, & de gratiâ novi Testamenti animas à diabolî tyrannide liberante, & de tradito regno

Deo Patri post generalem resurrectionem semper intellexit, minus æquè eosdem secundum suum systema explicuerunt. Unde cum singula hæc Scripturæ verba nihil de magiâ, tanquam ad novum Testamentum extinctâ testentur, magiæ iniciatores rectè concludunt, illos qui ante Christum natum magiam agnoscent, nullo argumento eamdem post Christum natum negare posse.

E contrario qui nunquam eam extitisse volunt, impingunt undique in sacras paginas, a quâ difficultate expedire sese conabantur priores. Quum itaque adversum hos universa Biblia sacra pugnant, cum Ecclesiæ ritus, cum Patres antiquissimi, *Justinus*, *Tertullianus*, *Chrysostomus*, *Hieronymus*, *Augustinus*, &c. veram magiam dari docuerint, quo demum pacto defendere hi suam cogitent opinionem?

Indignum quidem Deo esse arbitrantur, qui per se gubernat omnia, suosque infinites dirigit, hominum animas, corporaque, ventos, pluvias, grandines, tonitru, fulgur, telluris pecorumque sive sterilitatem, sive fœcunditatem, quod ille ad voluntatem suam suaque judicia perficiunda diaboli operâ uti vellet. Quæ enim participatio justitiae, cum iniquitate? Aut quæ societas lucis ad tenebras? Quæ

autem convenientia Christi ad Belial? II.

Cor. VI.

Respondens Deum omnipotentem, omnium quæ sunt in cœlo & in terrâ autorem & arbitrum, ad exequenda adoranda sua judicia nullius indigentem auxilio, velle tamen sæpè angelorum hominumque ope uti; quemadmodùm id tota Scriptura sacra centenis in locis ostendit. Potuerat omnipotens solâ suâ voluntate delere exercitum *regis Assyriorum*; uti voluit angeli ope. Potuerat solus servare in tempus a suâ adorandâ providentiâ præfinitum, omnia regna; placuit iphi singulis, ut apud *Danielem* legimus, angelum præficere custodem. Potuerat universum orbem Evangelio per se subjicere, fidem infundendo in corda hominum; placuit verò illi interiorem divini hujus doni distributionem exteriori apostolorum apostolicorumque virorum ministerio, ut ita dicam, alligare. Nihil Deo indignum hîc video.

Saltem Deo indignum foret, aiunt, si ad voluntates suas exequendas diabolorum & iniquorum hominum operâ uteretur. Usus est *Judæ proditore*, veluti *Petro*, *Andräá*, *Jacobo*, ad prædicandum regnum Dei civitatibus *Judæ* facienda que miracula: iniquissimo *Balaam*, &

pontifice *Caiphā* usus est, ut *Eliā*, *Elīsæo*, *Isaiā*, *Daniele*, ad summa arcana & mysteria redemptionis hominibus revelanda. Et, ut de diabolo exempla afferam, cur ille, qui per se *spiritum principibus aufert*, qui per se *Achitophelis consilium*, petente *Davide*, infatuavit, diaboli tamen operâ uti voluit, ut hīc *III Reg. Cap. XXII*, ore pseudo-prophetarum *Achab*, regem *Israēlis* ad pugnam incitaret. Prætereà numquid Deus, ostensurus nihil unquam posse hominem a virtute dimovere quem ipse suo potenti brachio protegat, uti non voluit pravâ satanæ voluntate, permittens illi ut totis viribus tentaret, ac variis violentisque modis excruciatet sanctum virum *Jobum*, cuius tamen admirabilem patientiam, ipsum, si voluisse, potuisse iisdem calamitatibus, solo nutu voluntatis suæ in eum immisis, probare, ac notam omnibus facere?

Ex *Job* autem Libro parùm probari posse contendunt, ut potè sic mystico & parabolico, ut nunquam extitisse *Jobum* credibile fit.

Novi, mirorque, inter Christianos esse, quibus hoc quorundam *Rabbinorum* commentum placeat. Et vetus Testamentum, & novum, teinerarium ac mendax

hoc ostendit. Apud *Ezechielem Cap. XIV,*
v. 14. Deus dicit : *Si fuerint tres viri isti
in medio ejus, Noë, Daniel & Job : ipsi
justitiâ suâ liberabunt animas suas ; v. 16.*
*Tres viri isti si fuerint in eâ, vivo ego di-
cit Dominus ! quia nec filios nec filias li-
berabunt, sed ipsi soli liberabuntur.* Idem
v. 18, repetit. Iterum *v. 20.* *Et si Noë,
Daniel & Job, fuerint in medio ejus, &c.*
Ergo Job extitit ; alioqui eodem jure di-
cere quis posset Librum *Geneseos*, pro-
phetias *Ezechielis* ac *Danielis* mysticos
ac parabolicos libros esse, quorum He-
roes nunquam extitissent. Maximè verò
huc facit textus ex *Epist. B. Jacobi, Cap. V,*
v. 10 & 11. *Exemplum accipite, fratres,
exitus mali, laboris, & patientiæ, pro-
phetas qui locuti sunt in nomine Domini.
Ecce beatificamus eos qui sustinuerunt.
Sufferentiam Job audistis, & finem Do-
mini vidistis.* Extitit ergo Job, vir tole-
rantiâ malorum inclytus, sicuti extitêre
prophetæ, sicuti extitit ipse *Christus*.

Quid jam respondendum magiæ ne-
gantibus possibilitatem ?

*Potestates, virtutes, principatus, domi-
nationes, throni, angeli & archangeli,
vocantur in sacrâ angeli haud boni dun-
taxat, sed pravi, ut mox ex *Epist. ad Co-
loff.* patuit, & ut *Paulus Eph. VI* repe-*

tit: *Induite vos, inquit, armaturam Dei, ut possitis stare adversus insidias diaboli: quoniam non est nobis colluctatio adversus carnem & sanguinem, sed adversus principes & potestates, adversus mundi rectores tenebrarum harum,* gr. πρὸς τὰς κοσμοκράτορας τὰς σκότους τὰς αἰώνιας τύπτε. Titulus summorum imperatorum. *Contra summos imperatores tenebricosi hujus mundi, contra spiritualia nequitiæ in cœlestibus,* πρὸς τὰ πνευματικὰ τῆς πονηρίας ἐν τοῖς ἐπερπανοῖς, in cœlestibus, vel in supracœlestibus. Sunt ergo angeli prævaricatores principes summi que imperatores hujus corrupti & execrati mundi, contra quos divina armatura, jubente apostolo, induenda est. Nequeo quin hinc autorem laudem, qui sanctorum patrum in hunc textum commentarium paucis verbis comprehendit, sapientissimum ac maximè pium *Du Gues*, *Libr. de J. C. crucif. Part. II, Cap. VI.*
 « Peccatum haud penitus dejecit spiritualem apostatae angeli naturam: in malum tantummodo convertit suas, quibus donatus fuerat, naturales qualitates; scilicet intellectum, penetracionem, activitatem, mediorum cum notitiam, tum usum: & in artificio, imposturas, illusiones lœdendo homini aptas, lumen ac sapientiam naturalem,

» usu fineque convertit. » Meretur legi integrum hujus autoris *Caput VI*, quod optimè totam hanc veritatem illustrat.

Profectò quām potens angelus, qui unā nocte *Affyriorum* 185000 unus interfecit! Quantam potestatem possidet ille summus imperator tenebricosi hujus saeculi, in historiā *Job*, ad latrones raptioresque colligendos, ad evocandum è cœlo ignem, ad ventos in ædium hominumque ruinam a regione deserti convocandos, horrendosque morbos humano generi inferendos! Frustrane *κοσμητόρες* appellavit dæmones apostolus?

Ut ergo rem paucis dicam, duo scopuli evitandi hīc nobis sunt: primò, ne satanæ aut modicam, nullamve, secundò, ne illi nimiam tribuamus potestatem. *Erroneum* utrumque ac *periculosum* est. Erramus enim ejus negando potestatem quam sacra Biblia nobis adeò formidabilem describunt: & conjicimus nos ipsi in periculum magnum a sanctâ fide naufragandi. Appello hīc ad laudatum mox auctorem *Du Guet*, qui postquam illos, qui naturalibus potius causis quām dæmoni, dæmoniacorum phænomena adscribere malint, corripuisse, in hæc verba erumpit: « Eiusmodi errores, si eo fervore » propugnarentur, ut converterentur in

» dogma , sique in extremas consequentias promoverentur , parùm a manifestâ infidelitate different . Licet verò malim eosdem tanquam nubes , & dubia fidem obnubilantes considerare , quām ut fidei adversas hæreses , abesse tamen nequeo , quin eosdem reputem veluti servatoris nostri reportatæ de diabolo victoriæ injuriosos , &c. »

Quandò è contrario ampliaverit quis ejus dominium ac potentiam , pariter ille in errorem & periculum , alio prorsū modo quām prior , conjicit se . A regulâ fidei æquè seceditur tūm quandò minùs , tūm quandò plus quām illa proponit , creditur . Intellectus limitatissimus noster non facit , non creat fidem , sed fides intellectum captivat , imponens raciocinio cuicunque silentium . Fide novimus spiritus iminundos magnâ quidem potestate pollere , verùm à Deo limitatâ . Ut mari , ut creaturis reliquis , ita pravo angelo dixit : *Hucusque pervenies* . Non potuit erga *Job* vel minimum gressum , Deo non permittente , facere ; omnemque plagarum ac temptationum progressum , non nisi Deo singulum permittente , facere potuit . Hinc per Dei invocationem toties ejus retusam malitiā in Historiâ sacrâ legimus . In omnibus ferè *Psalmis*

ejusmodi invocationes precesque invenimus; præcipue autem in *Psalmo XC* qui apud *Hebreos XCI* est.

Sed dixi errorem *periculoseum* esse, si quis, diabolicâ potestate ex sacris intellectâ, eò inducatur ad majorem a satanâ formidinem, quâm ad debitam in Deum fiduciam. Nihil cogitari potest Deo injuriosus. Periculorum nos circumdantium certiores Deus nos voluit, ut in majorem erga se fidem fiduciamque erigeret, in ardentiorem ipsius amorem, qui inter tanta pericula, quæ nobis peccatum conscient, salvos ad cœlestia dicit. Qui benè de eo convictus est, quod laudatus mox *XC Psalmus* docet, fidenter, cum servatore dicit: *Venit princeps mundi hujus, & in me, quem Deus protegit, non habet quidquam.* Qui sibi metuunt, videant num causam fortè habeant metuendi, consultantque angelum *Raphaëlem Tobiæ Cap. VI.* juniori Tobiæ, occidi a diabolo, ut jam septem juvenibus ante se contigerat metuenti, respondentem: *Audi me, & ostendam tibi, qui sunt quibus prævalere potest dæmonium.* Erimus contra eum muniti per *armaturam Dei*, ex *Epistolæ Pauli ad Ephesios Cap. VI* panopliâ quærendam. Verbo nihil superest nisi ut Deum preceinur gratiam implendi præcepti,

quod nobis calamo *B. Petri* dedit: *Fratres, sobrii estote, & vigilate, quia adversarius vester diabolus, tanquam leo rugiens, circuit quærens quem devoret: cui resistite fortis in fide; scientes eamdem passionem ei, quæ in mundo est, vestræ fraternitati fieri.* *I Pet. Cap. V.*

Finem huic Capiti imponat vir incomparabilis *J. B. Bossuet*, cuius autoritas in rebus quæ ad religionem pertinent eò major esse debet, quò diligentiorem ab ipso operam positam fuisse, cùm in perscrutando, tùm in exponendo Ecclesiæ sensu, non privati solùm theologi, sed ipsimè præcipui Ecclesiæ antistites, in suis pastoralibus institutionibus luculentissimè testantur. Is igitur in libro cui titulus *Elévations à Dieu sur les mystères, Tom. II, Sem. XXIII. Elev. V*, cui titulus: *De Dæmonis in genus humanum potestate*, ostendit Deum « angelos creando, quemadmodùm eos sui intellectus participes fecerat, eos quoque suæ compotes fecisse potestatis. Deus subjiciens illos suæ voluntati, decrevit, ad servandum in mundo ordinem, ut naturæ corporeæ atque inferiores, iis spirituum subjicerentur, juxta præscriptos his ab illo terminos. Suo proinde modo mundus sensualis mundo spirituali, atque in-

» tellestuali subjectus fuit , pactumque
 » hoc Deus cum corporeâ naturâ fecit,
 » ut voluntate angelorum moveretur,
 » quantum hæc angelorum voluntas , in
 » hoc cum voluntate Dei conformis ,
 » eamdem ad certos effectus finesve de-
 » terminaret.

» Statuamus igitur Deum , omnis cor-
 » poreæ naturæ motorem supremum , sive
 » movere illam , sive determinato in spa-
 » tio continere ad angelorum volunta-
 » tem. Spirituum beatorum nonnulli vir-
 » tutes appellantur , de quibus legitur :
 » Benedicite Domino omnes angeli ejus ,
 » potentes virtute , facientes verbum illius ,
 » ad audiendam vocem sermonum ejus .
 » Benedicite Domino , omnes vos quos
 » virtutes suas sive potestates appellat :
 » Ps. CII. Et : Laudate eum omnes angeli
 » ejus ; laudate eum omnes virtutes ejus .
 » Ps. CXLVIII. De his virtutibus vel
 » potestatibus fortè sermo est , dum Jobi
 » Cap. IX dicitur : Deus , sub quo cur-
 » vantur , qui portant orbem . Quidquid
 » demum sit , per omnia hæc quamdam
 » potestatis speciem naturæ spiritualis su-
 » pra corpoream naturam agnoscimus .

» Quantoperè autem virtus angelo-
 » rum virtuti hominum belluarumque
 » præstet , quantumque ipsis dominari

» Dei ordinatione possit, ostendit Deus;
» quandò vel unius angelus cunctos ho-
» minum atque animalium primogenitos
» in universâ *Ægypto* occideret, *Exod.*
» *XI, XII*; & quandò unicus angelus
» tantam stragem unâ nocte in regis *Sen-*
» *nacherib*, Jerusalem obsidentis, exer-
» citu ederet. *IV. Reg. XIX.*

» Quæri hîc posset an prævaricatori-
» bus damnatisque angelis eamdem Deus
» conservet, quam fidelibus beatisque an-
» gelis potestatem? Quæstionem deci-
» dit Apostolus, qui Christianos ad re-
» sistendum temptationibus adhortatur,
» eosdem monet non esse colluctandum cum
» carne & sanguine, sed adversus princi-
» pes & potestates, quas, ratione origi-
» nis, adhuc virtutes cœlestes, de cœlo
» licet jam præcipitatas, appellat; ut os-
» tendat angelos damnatos adhucdum
» æquè potestatem, quam nomen, qui-
» bus a naturâ gaudebant, possidere. Nec
» miretur hoc quisquam: quandoquidem
» Deus, qui cunctis quas a naturâ po-
» fidebant prærogativis privare illos po-
» tuisset, id præstare judicavit, ut, con-
» servatis his, ostenderet omnem natu-
» ræ prærogativam his, qui contra Deum
» iisdem abutantur, in supplicium verti.
» Servatus itaque illis intellectus est,

» æquè quām olim penetrans, sublimis-
» que: eamdemque ob causam mansit vis
» eadem movendorum corporum volun-
» tatis, veluti reliquiæ horrendi ipsorum
» naufragii.

» Si interīm quis regerat id haud ita
» videri, cūm vis voluntatis pravorum
» angelorum olim indē orta fuisset, quod
» voluntas illorum esset cum voluntate
» Dei planē conformis, jam verò illi ad-
» versa: hic oblisci videtur Deum iis-
» dem adhuc uti, ut justitiæ suæ minif-
» tris, velle: in eoque conformis perpe-
» tuò eorum erit cum divinâ voluntate
» voluntas; quia pravâ suâ voluntate idem
» efficient, quod bonâ semper voluntate
» efficit Deus.

» Prævaricatoribus itaque angelis præ-
» rogativæ naturales conservantur in sup-
» plicium. Deus ipsis omne in mala ver-
» tit. Et cūm naturalis illorum nobilitas
» in fastum vertatur, intellectus in astu-
» tiā, atque voluntas in calliditatem
» ac zelotypiam, simul & superbi facti
» sunt, impostores, invidi, & hāc suâ
» conditione miserabili ad lugubre ten-
» tandorum hominum officium redacti.
» Sic ut post eam, quā olim fideles frue-
» bantur, felicitatem, illis nihil super-
» sit nisi latens id malitiosumque gau-

» dium, quo flagitosi in faciundis com-
 » plicibus, quo infortunati in comparan-
 » dis sibi infortunii sociis, exultare fo-
 » lent. Voluit porrò Deus ut hinc disce-
 » remus quòusque facultatem naturæ, &
 » facultates penetrantis ingenii potestatis-
 » que existimare debeamus: facultates,
 » inquam, quæ dæmonibus superstites,
 » nihil minus infelices odiososque eos-
 » dem reddunt.

» Potestas autem illorum post lapsum
 » hominem, qui sic in illorum manci-
 » piūm redactus est, aucta potius quam
 » imminuta fuit. Principio homines red-
 » diderat Deus angelis *non nihil* subjec-
 » tos: *Minuisti eum paulò minus ab an-*
gelis. Ps. VIII. Diabolus autem homi-
 » nis lapsu, quo vicit illum, ejusdem
 » factus tyrannus est, nosque, ut *Joan.*
VIII, Servator, ait, diaboli filii, ven-
 » ditique huic tyranno servi: sic ut nos
 » ab ejus servitute non modò nos libe-
 » rare non possimus, verùm etiam ne
 » quidem ex nostris solis viribus vel tan-
 » tillùm conari, quo ex hâc servitute libe-
 » remur; ita ut J. C. dæmonem princi-
 » pein hujus mundi appellaverit, *Joan.*
XII, v. 14, 16. »

Explicat deinde *Bossuetus* potentiam
 diaboli in tentatione ipsius Filii Dei, in
 positione

positione sanctissimi ejus corporis in pinnaculum templi, inque montis fastigium : potestatem deinde in tentandis hominibus, quos meritò monet cautos esse oportere, ne suggestum ab illo peccatum in delectationem, multò minus in consensum abeat ; « cùm, inquit, si diabolus » potest, ut potuit, corpora movere, si » jam ad delectationem corporis mo- » veat humores, in quam horrendam tunc » non conjicimur tempestate ! » Denique omnes Christianos erigit in spem superandi satanam per ipsa ea arma, quæ & tentatus Servator, & tentati apostoli, virique sancti suggesserunt. Qui ampliorem explicationem de dæmonum naturâ, lapsu ac potestate desiderant, legant *Bossueti Serm. I & II, in Dom. I. Quadrag. pag. 81, Vol. V, edit. novæ oper. Paris. 1772, in-4°.* Atque iisdem penè verbis, quo *Bossuetus*, explicuit totam hanc quæstionem *Estius in Libr. II, Sent. Distinct. VII, §. XVI.*

Paucis itaque concludam, & verius esse nihil dicam, quām quod vera magia detur, eò quòd omnis sacra & profana Historia, omnis divina & humana autoritas, tandem experimenta indubia, quāvis, aut exceptione, aut dubitatione majora, me existentem hanc diabolicam

artem docent, & demonstrant sic, ut
jure negare eamdem nequeam.

TERTIÆ PARTIS

C A P. II.

Quàm prudenter & circonspectè audito magiæ rumore, incedere oporteat: & an signa dentur quibus magiam veram a suppositâ internoscere possimus? Sapientissima Esti monita. Spei declamatio de judicium furore in homines de magiâ falsò plerumque accusatos,

§. I. QUEMADMODUM Parte XV.

Rat. Med. per omnem autoritatem demonstratâ hominum a dæmone obsessione, cavendum esse monui, ne quidquid eo nomine perhibetur, mox verè tale esse credamus, eò quòd longè plures falsò, quàm verè obsessi haberentur; idem à me moneri mei lectores procul dubio hîc expectabunt. Utinam æquè certa & conspicua, utinam æquè felicia forent magiam veram a falsâ distinguendi signa, quam ea quæ tradidi, ex propriâ experientiâ, veram a falsâ obsessione discriminandi! Quidquid tamen in difficulti obscuraque hoc negotio aut certitudine, aut

verisimilitudine , nosse h̄c possimus , diligenter enumerabo .

Antequam verò ad hanc regularum recensionem me accingam , nonnulla ex laudato jam s̄epiùs in hoc opusculo *Van Epen* , tanquam dicendorum fundamentum , præmittam , in Libro ante citato §. XLIII.

« Indubitatum est summâ prudentiâ & circonspectione h̄c procedendum esse , cùm certum sit multa frequenter magicis & diabolicis artibus adscribi , atque ex commercio diabolico perpetrari existimari , quæ naturales causas habent , aut certè non nisi phantastica & illusoria sunt hominum figmenta .

» Imò nonnunquam dæmon suis præstigiis homines , præsertim mulierculas , ita movere , aut earum phantasiam turbare potest , ut reverà credant se , nescio quæ cum dæmone commercia habere , atque de his interrogatæ etiam factantur , & ex ordine etiam cum quādam certitudine , ut ipsis appareat , dependent mira sibi obvenisse , atque cum dæmone tractasse , quorum tamen nihil subsist : quam in rem videre licet canon. 12 , cauf. 26 , quæst. 5. Videri etiam possunt , quæ habent Abulensis in Cap. 13 , Genes. quæst. 354 , & Caje-

» tanus in 2 , quæst. 95 , art. 3 , ap-
» parebitque quod non raro fallantur mu-
» lieres quæ credunt , & pro indubitato
» asserunt , se ope dæmonum ad cer-
» tum conventum sagarum translatas fui-
» se , atque mira cum dæmone gessisse , &
» locutas fuisse. Quin & admodum vero-
» simile est translationes istas ad sagarum
» conventus esse meras dæmonis illusio-
» nes , & muliercularum vehementer ima-
» ginationes : neque iis fidem esse adhi-
» bendam , nisi de earum veritate ex cæte-
» ris argumentis constiterit.

» A pluribus jam pridem observatum
» & notatum fuit , quod illis in locis ,
» ubi sagæ aliquo numero trahuntur ad
» judicia , & veluti tales condementur ,
» ordinariè plures aliæ mulieres sibi per-
» suadeant quod & ipsæ sint sagæ ; forti-
» nimirum imaginatione ex illis , quæ de
» sagis audiunt , cerebrum suum ita oc-
» cupant , ut sibi persuadeant se quoque
» illa aut fecisse , aut passas esse , de qui-
» bus priores fuerant accusatæ. Et hinc fit ,
» ut per ejusmodi inquisitionem , saga-
» rum , ut creduntur , numerus mirè mul-
» tiplicetur ; & ex adverso , ubi de sagis
» non fit per judices inquisitio , paucio-
» res inveniantur de hoc crimine sus-
» pectæ , »

Idem *Van Espen* §. LVI, ubi anteà ostenderat magica quandoquè sacris ac piis ceremoniis peragi, & sic imponere hominibus, prosequitur sic: « Præcipue » autem attendere debent pastores, & » allaborandum erit circa obſervantias » è quibus populus non tantum ſperat » conſervationem, aut recuperationem » rerum temporalium, aut vitæ humanae, » ſed etiam emolumētum aliquod in ec- » clasticos, aut eorum Eccleſias, vel com- » munitates ex iis redundat. Incredibile » enim quām facile ſimiles obſervantiæ, » etiam evidenter ſuperstitioſæ, invales- » cant, &, cùm invaluerint, quām diſ- » fulter aboleri queant.

» Dum ſimilium obſervantiarum abo- » litio tentatur, imò vel in quæſitionem » ducitur, mox clamores in populo exci- » tantur, quaſi ipſe ſanctorum, vel imagi- » num, aut reliquiarum cultus, aut pro- » batus ab Eccleſiâ ritus abolendi eſſent, » nihilque niſi zelus avitæ religionis reti- » nendæ auditur, & auribus popularibus » inclamatur; quibus excitatus populus » clamat non ſecūs ac clamabat *Aſia* » populus, *Magna Diana Ephesiorum*, » excitatus a *Demetrio* & ſociis ejus, ſpe- » cie venerationis in Dianam, ejusve » templum, ſed reipsâ quia *Demetrius*

» *argentarius, faciens ædes argenteas Dia-*
 » *næ, præstabat artificibus non modicum*
 » *quæstum: quos convocans, ait facer*
 » *textus, & eos qui erant ejusmodi opi-*
 » *fices, dixit: Viri, scitis quia de hoc*
 » *artificio est nobis acquisitio. »*

Atque hæc necessariò præmittenda erant, utpote ab autore prolata, qui et si veram magiam admittat, doceatque hanc esse ab Ecclesiâ creditam & admissam, deesse tamen non potuit, quin ingenuè indicaret judicibus, quid sæpè simplicitas, imaginatio, avaritia, malitiaque interponant ad fallendum; & quin eosdem admoneat ne fidem adhibeant clamoribus, rumoribus, & accusationibus, nisi de earum veritate ex certis argumentis constiterit.

Profectò animus meminisse horret illi, qui ad vagas tales accusationes, ex malitiâ sæpè & invidiâ natas, mox torturam adhiberi in processuum historiâ legit. Quos olim hæc, nunc saltem repressa, invaserit rabies, ne in eamdem relabantur, revocent sibi in mentem, quam *Part. II, Cap. I*, descripsi, horrendam *Atrebatum* historiam: legant tandem attentè mei toties laudati patris *Spei* declamationem in *Resp. ad Argum. IX, Dub. XLIX.* « Quod denunciatae pleræque

» verè sagæ fuerint , ait, non satis ex se-
 » cutâ earum confessione convincitur.
 » Quàm enim parùm tuta sit fides a tor-
 » turâ quæsita aliundè liquet. . . . Stulta
 » autem est , ut dixi , quæcumque delata
 » ream se non fateatur : cogetur enim
 » tot tormentis , ut tandem succumbat ;
 » & si non succumbat , comburetur viva,
 » ut obstinata. Repete quæ hinc indè su-
 » pra dicta sunt.

» Nesciunt sanè omnes ii quid virium
 » in tormentis insit , qui vel commentari
 » lucubrationes suas in quiete atque otio
 » solent ; vel immitti animo ac feroce
 » quis pœnarum sit sensus experti un-
 » quam non sunt. Quos ego non ex uliâ
 » malevolâ voluntate , sed affectu optimo
 » ac christiano , ad majus ipsorum bo-
 » num , & majorem conscientiæ caute-
 » lam præcarer , ut vel ad dimidium
 » quadrantem Equulei aliquem gustum
 » sumere , & velut prius ipsi prælibare
 » velle , in animum inducerent , quam ac-
 » cederent ad odiosas has reorum causas ,
 » in Equuleo tractandas. »

Legant deinde eumdem autorem in
Rat. XVI , ad *Dub. XX* , ubi inducit
 amicum suum , virum ornatissimum , sic
 alloquenter magistratus : « Quid , inquit ,
 » tam sollicitè maleficos quærimus ? Heus

» judices ! ostendam exemplò ubi sint.
 » Agite, rapite Capucinos, Jesuitas, re-
 » ligiosos omnes, & torquete ; fatebun-
 » tur. Si qui negant, repetite ter, qua-
 » ter ; fatebuntur. Si adhuc obstinati sint,
 » exorcizate, detondete. Utuntur male-
 » ficio, obdurat eos dæmon ; vos proce-
 » dite : tandem dabunt manus. Tùm si
 » plures vultis, rapite Ecclesiæ prælatos,
 » canonicos, doctores ; fatebuntur : nam
 » quid miseri illi, & delicati qui subsis-
 » tent ? Quod si adhuc plures vultis, vos
 » ipsos ego torsero, & me vos deindè.
 » Non diffitebor quod vos fassi eritis. Sic
 » omnes magi sumus.

Addant denique quod in *documento ad Dub. XXX*, idem *Speus* scribat. » Di-
 » cam aliquid, quod audire cupiam,
 » quicumque aures audiendi habent, ma-
 » xime verò sacratiss. imperatorem, prin-
 » cipes, eorumque consiliarios : Finga-
 » tur enim de industriâ atrocissimum ali-
 » quod *exceptum* crimen, quo noceri sibi
 » vulgus apprehendat ; atque ejus deindè
 » dispersa fama, in id inquisitores fese
 » accingant iisdem viis, quibus nunc in
 » maleficâ. Aio sanè : Si in *Germaniâ*
 » paulò post pauciores erunt ejus crimi-
 » nis, quàm nunc magiæ, sistam me sum-
 » mo magistratui & in flamas vivus in-
 » jiciar.»

Audacter sanè hīc : sed cui totum mysterium iniquitatis patebat , cur ille molli-
ter idem tectèque describeret ? Quantas
non debeat Deo *Germania* laudes , quod
Mariæ Theresiæ prudentiâ , sollicitudine ,
ac sagacitate , uti mox facta demonstra-
bunt , huic furori immanitatiique tale frœ-
num injectum sit , ut in innocentium vi-
tas fævire haud facile possit !

Atque hæc de necessario *Eſtii* ac *Spei*
monitu satis . Prætereo rudiorein hinc
indè ac jactabundum posterioris sermo-
nem ; prætereo corruptam ejus doctrinam
moralem *de ſuidicio* ac *mendacio* ; ſiqui-
dem *tacitò* , Christianorum hosti , plus
fidei , quam Christianis autoribus adhi-
bens , palàm edifferit & benè eos facere ,
qui injustè accusati , mox se reos ad pri-
mam torturam fateantur , ne ante rogum
torqueantur pluries , & Ecclesiam mar-
tyrum choro eos Christianos adſcripsiffe ,
qui a *Nerone* de urbis incendio falsò ac-
cusati , torturarum evitandarum causâ fe-
reos declaraffent : hæc , inquam , ſimilia-
que , eò quòd privatæ autoris opiniones
hæ ejusdem observationes demonstratio-
nesque neutiquam infirment , omnino
prætereo , redeoque ad quæſitionem , quæ
hujus digressionis cauſa erat ; ſcilicet ſi-
quidem ex factis evictum eſt magicos .

morbos rariore casu dari, an certa signa-
dentur, quibus medicus a morbis natu-
ralibus eosdem discriminet?

TERTIÆ PARTIS

CAP. III.

*Evidetum cum sit, quamvis rarius, nonnun-
quam tamen, morbos magicos dari, an
eosdem medicus certis signis a morbis
naturalibus discriminet? De triptici eo-
rumdem curatione discussio.*

S.I. MORBI magici vel naturalibus mor-
bis consimiles, vel dissimiles sunt. Pri-
mùm de prioribus agamus. Morbi natura-
libus similes, quos magia generavit, se
eodem modo a principio habent, ut ii,
quos naturali modo homines incurront. An
magici morbi non carent passim causis
præparantibus & excitantibus, quas me-
dicus in morbo naturali inquirere, inveni-
reque, & ut veras morbi causas declarare
solet? Si ubique, & semper, medicus has
causas inveniret, ita ut nunquam mor-
bus naturalis extaret, quin unà ejus causæ
patescerent, aliquid fundamentum ha-
beremus, deficientibus omnino hisce cau-
sis, magiam suspicandi: verum cum in

morbis naturalibus vel patientissimo, accuratissimoque examine, nullæ prorsùs causæ non raro detegantur, regula ex causarum defectu nulla cudi potest.

Quoad morbi decursum, morbi naturales in felici aut infelici curâ quid habent quod naturæ vel temperatæ, vel fortiori, vel debiliori, vel prostratæ, nihilque cum selectissimâ medendi methodo cooperanti naturaliter tribuere passim solemus omnes.

Quamdiù omnia in pejus meliusve, pro consuetudine curabilium, incurabiliūmque morborum, peraguntur, non est quod quis quid magici suspicetur. Imò neque tunc, quandò præter assimilis morbi morem insoliti quid contigerit. Vel enim à medico ignaro rerum, vel ab empirico, vel a vetulâ medicatrice, medicina porrecta fuit, quæ vel maximam spem vitæ convertat in triste letum: vel communi morbo solitum in modum progresso, latitans alicubi in corpore causa aut epileptica, aut apoplextica, aut podagrīca, aut venerea, per morbum excitata, &c. symptomata, in hoc morbo naturali tam varia, impetuosa, & extraordinaria excitat, ut credulus eadem miratus, mox causas supernaturales inepte suspicetur. Vomicæ pulmonis, eæque

204 DE MAGIA.
aliquandò ingentes, medicos ægrotosque latentes, ut exempla docuerunt, homini fortè insunt: communis eum prehendit, mitis, facilis, neminem occidens febris: pus in vomicâ calore febrili corrumpitur, liqueficit, putrefactum intra humores resorbetur, generat symptomata ejusmodi in hoc morbo nunquam visa, numerosa, horrenda, letifera. Invenire homines est naturæ adeò novercalis, ut cæterorum more nunquam ægrotent, & attonitos reddant ignaros hujus medicos. Dantur morbi verè naturales, sed tam portentosi, ut & in omnibus quos invadunt incomprehensibiles sint, & si viginti homines unà prehendant, singulares in singulis producant effectus. *Catalepsis* & *epilepsia*, testes sunto! Infantum, puerorumque morbi, aliquandò cum veris nos latentibus causis adeò mirifici sunt, ut certi quid in illis, si cauti agamus, non audeamus determinare; præcipuè, quandò causas in vitâ latentes in cadaveribus rimati, nullam aliquandò, cui morbus adscribatur, inventiamus. Non ad magiam, sed ad miranda corpora tune configimus, ad nervos, dico, quorum fabricam aliquatenus, quorum usum a posteriore, quorum agendi patiendique modum, crassâ quadam con-

jecturâ in nostris musæis egregiè , in contemplandis morbis ipfis imperfectissimè assequimur. Quin & in multis adulorum ægritudinibus , planè inexplicabili- bus, idem nobis asylum patet. Sic ut nihil unquam magici hîc suspiceinur.

Quid plura ? Ipsa non raro imperscru- tabilis est natura rerum , ut in medicis , ita & in reliquis rebus creatis ; ut vel ideò ad causas supranaturales confugere curtæ suæ suppellestilis gnaris non liceat. Dehortan- turque nos ab hâc temeritate experimenta rerum quæ olim habebantur longè su- perantes naturam , jam autem demonstrantur & in gremio naturæ sitæ esse , & ejus solius potentia perfectæ.

Nulla ergo ratio in omnibus enarratis casibus extat ad magiam refugiendi.

Addamus ad hæc omnia hominum va- fritiem malitiamque , quam , qui decipi nolit , nunquam ex mente deponat. Quo- tiefne contingit , pudet me referre , ut unica , eaque contemptibilis puella , pa- rentes , magistratus , medicos , longâ die- rum , mensium , annorumve serie , turpis- simè decipiat , antequam infandum dete- gantur facinus ! Hæc in *Parte II* enarrata sunt. Studeamus ergo astutiores in foco detegendo versatioresque fieri , quam illi

vafri homines in eodem celando sunt.
Dolus sæpè patescit cunctando.

Cautos præterea nos esse oportet, dum, et si non ægri ipsi, alii verò, ægros incantatos esse, & eo quidem incantatore, eave incantatrice, publicè, turmatimque clamitant. Pronum vulgus est, si, v. g. puer quis ægrotare ceperit, ex quo difformis, horrida ac edentula mulier, aut in ædibus, aut iisdem vicina fuerit, ut eamdem sagam habeant, deferantque ad judicem: morbo autem aut pejorante, aut insuetius decurrente, ut in carcerem vetula trudatur, tormentorum ferocitate se fateatur incantatricem esse, & immertum roguum concendat. Contigit ut fœmina, cuius infans ægrotabat, fœminam vicinam, quâcum habebat simultates, ut sagam quæ infantem suum incantasset, ad judicem deferret; hæc verò in carcerem conjecta, torturisque victa, se magiæ ream fateretur & mortis damnaretur supplicio. Et hanc fœminam, & duas alias rogo destinatas, anno 1758 mense Octobri, *Augustissima Imperatrix & Regina nostra, vera innocentium protectrix, & universæ Patriæ mater,* jussérat, execuzione suspensi, ex regno *Croatiae Vienam*, idque in meum Nosocomium trans-

ferri : lecto processu, & infortunatis hisce, barbariae dicam, an ignorantiae victimis, interprete *Croato*, rigorosè examinatis, *Ill. Baro Van-Swieten*, egoque, a morte immeritâ omnes liberavimus, ad nostram relationem, sententiam mortis rescidente Augustâ (a).

(a) Dudum erat, quòd partim in ipsas ceremonias magicas, partim in falsos magiæ rumores, partim etiam in præmaturam magorum ac sagarum sententiam capitalem, sapientissima decreta dederat Augusta. Primum dedit anno 1753 contra nefandas *Christophori & Coronæ* preces, ad quas orandas, ut decretum habet, malè feriati homines bonorum civium crumenas exhauriunt, quibus persuadere conantur ejusmodi precibus, exorcismis, expulsionibusque spirituum, absconditos thesauros effodi: quæ omnia S. M. declarat divinis, politicisque legibus, mortis punita supplicio aliquandò fuisse.

Alterum anno 1755 contra *magiam posthumam*, ac si cadavera in cœmiteriis pravo spiritu agitarentur, quæ ob id ecclesiasticorum mandato igne cremabantur. Porrò jussit Augusta, si in posterum ejusmodi rumor denuò spa geretur, negotium judici politico tradendum esse, ut, experto physico ille adjutus, illud accurate examinet.

Tertium anno 1756 contra sententiam mortis in *Joannem Po in capite superstitionis & respective magiæ latam*, & illatas ejusmodi hominibus torturas. Jussit Imperatrix augustissima a peculiari judice loci processum ad justitiam suę

Nihilominus morbi dantur, qui nullam magiae post se relinquunt dubitationem. Si in quopiam morbo, eoque extraordinario potissimum, in lecto, in pulvinariis, in crinibus, plumisve lectorum, in paleâ, in conclavi ægri, ejusdemve ad lacunar, ostia, liminave inveniantur characteres, imagines, ossa, crines, semina radicesve plantarum, & quidquid ejusmodi quisquiliarum plus est; si deinde, his ablatis, aliudve in cubiculum, aut ædes, translato ægro, redeat repentina salus, ut *primâ Parte, Cap. III,* exempla monstrarunt, haud est quod de magiâ dubitemus. Utì neque dubitabimus, si vel æger, vel ejus familiares eò impietatis devenerint, ut quemadmodùm in exemplis habuimus, magum in opem vocent, quo agente, morbus citra alia auxilia mox fatiscat. Vel etiam si insecta & animalia quæ de corpore humano prodire non soleant, si lapides omnis generis, si metalla, acuta vitri ramenta, cul-

riorem, ab hâc autem ad supremum justitiæ tribunal imposterūm mitti, ut ipsa deinde posset in dato casu suam promere voluntatem. Edicta hæc tria reperire est in laudato *de magicis cultibus Tractatu* viri consultissimi *De Caurz*, ad finem operis.

tri, contorti crines, piceæ massæ, ossa, majora ea & mole, & figurâ vario è corporis loco ejificantur, absque summâ partium, per quas transeunt, dilaceratione & destructione, hoc supra naturam, magicumque esse spontè fatebimur: modò priùs, experimentis edocti, probè consideraverimus quantum & quòusque partes variæ humani corporis sese ampliari, citra vel ullam, vel notabilem dilacerationem, finant; exploratumque diligenter fuerit num fraudi ulli, artificioque nullus subsit locus.

Quæri potest an morbi magici soleant perpetuò modo extraordinario infligi, sic, ut nunquam pares iis sint, quos gignere causæ naturales consueverunt? Hoc omnino negat *Daniel Sennertus, Libr. VI, Part. IX, Cap. V.* Nec, cur quis affirmet ratio apparet; cùm ille callidus, & tam vasti ingenii spiritus, corporis naturæ proprietatumque gnarus, probè intelligat quis nasci morbus hisce, quis aliis causis naturalibus positis debeat. Maximè si, ut supra, cum *illustissim. Boffueto* statuamus diabolum, qui corpus integrum movere potest, etiam ejusdem humores vario modo in motum agitare posse. Sed neque hoc in curatione aliquam difficultatem importat, ut mox videbimus.

Magico itaque morbo cognito, quid medico, si sponte non cesset, agendum? Quænam ejus curatio? Curatio prima *divina* est, altera *naturalis*: quod autem *magica*, ut *tertia*, hinc a nonnullis adjungatur, doleo horreoque, & utrum illam insalutatam præteream, an refutem, dubius haereo? Præcipuus ejus autor impius *Paracelsus* est, magicus ipse, ut concludere debemus ex *Tom. II oper.* ejus, in *Libro de Philosophia Sagaci majoris & minoris mundi*, a pag. 522, ad 644, & in *Astronomia magna*, a pag. 647, ad 718. Sequor hinc editionem meam, scil. *Genesensem anni 1658*, in *Tom. III*, in-fol. Infidus & periculosus scriptor, qui impietas suas religiosâ larvâ texit: vir qui non aliud elogium meretur, quam quod ejus veluti funebrem orationem terminavit summus *Boerhaave* in *Parte I Chem.* ubi narraverat *Paracelsum* suis dictasse auditibus, si Deus juvare nollet, se consulere diabolum velle; quin opem suam ægro recusasse, quod ad cœlestem medicum in sacrâ synaxi confugisset: « Cæterum » *Paracelsus*, inquit, dein linguam lati- » nam oblitus, vagus semper, nusquam » constans, assiduè temulentus, nec ves- » tes mutans, ne lecto quidem utens, » *Salisburgi* tandem in diversorio pu-

» blico, post morbum aliquot dierum,
 » viribus deficiens, mente bonâ, mori-
 » tur, anno 1541, ætatis 47, quum solo
 » *Elixirio proprietatis* annos sibi *Mathu-*
 » *salemi* promisisset.»

Patientiam habuit egregius *Sennertus* ejus refutandi impietatem in curâ magicâ præscribendâ; cui lubet, is hunc adeat, mihi autem condonet quod, cùm *Sennertus* sufficienter hoc præstítit, animas timoratas nefandorum recensione non offendam. Satis abundèque refutatus est cumulo argumentorum quæ SS. Biblia, doctrina Ecclesiæ, ac sanctorum patrum, doctorum, interpretumque sententiæ, nobis suppeditarunt.

Curatio naturalis permissa, imò debita est, quâ medicus symptomata, per magian excitata, iis remediis quæ iisdem, naturali modo exortis, proficua esse deprehenduntur, minuere ac tollere satagat. Hic neminem, quos consului, autorum contradicentem inveni: neque in verbo Dei, Ecclesiæ doctrinâ, patrumque sententiâ, quod obstaret, reperi. Tuto ergo medicus naturalem suam methodum præternaturali morbo accommodet.

Verùm cùm medicorum sit in morborum causas agere, easque, si possint, tollere, quæritur num ipsis familiæque li-

ceat inquirere signa, characteresque magorum, eosdem autem inventos, tanquam veras morbi causas, tollere ac delere?

Primo intuitu nihil difficultatis, aut habere, aut habere posse hanc quæstionem diceremus; siquidem id ad officium medici omnino pertinere videtur, ut hîc idem faciat, quod in morbis aliis eum facere jubent artis suæ præcepta. Atque aliquos non ignobiles theologiæ professores hoc non modo approbare, sed jubere apud *Estium* video, *Cajetanum*, *Henricum a Grandavo*, *Scotum*, *Navarrum*.

At verò haud ita visum omnibus est. Deterruerunt multos ab hâc opinione viri sancti, *Hilarion* abbas, & Ecclesiæ pater *Hieronymus*. *Hic* enim in vitæ *illius* historiâ narrat adductam ad illum fuisse, quam dæmon obsedebat, puellam; dæmonenque apertè declarasse, quòd non nisi vi maleficiorum coactus hanc puerilam obsedisset, quòdque recedere ab eâdem non posset, ni priùs, quæ locata sub ædium limine signa erant, tollerentur: porro vetuisse *Hilarionem* ne in illâ quis inquireret, solis autem fusis ad Deum precibus dæmonem expulisse: « Ne, inquit *B. Hieronymus*, aut solitis incantationibus recessisse dæmon videretur,

» aut ipsi sermoni ejus accommodasse fi-
» dem. » Undè Estius : » Igitur tām *Hila-*
» *rionis*, quām *Hieronymi* sententia , per-
» quirere & tollere signum, ut cesset no-
» cumentum , ad incantationem pertinet.
» Et certè non ad miraculum divinum
» *reclē* confugisset *Hilarion* , sed reme-
» dium facilè ac promptum de signis amo-
» vendis , si licitum erat , præscribere de-
» buisset , ne Deum tentare videretur ;
» præsertim cùm signa jam spontè indi-
» cata essent. Nam , ut ait *Augustinus* , *Li-*
» *br. XXII contra Faust. Cap. XXXVI* ,
» pertinet ad sanam doctrinam non ten-
» tare Deum , quandò habet homo quod
» faciat. Postremò apud *Gratianum* 33 ,
» *Quæst. I, Cap. Si per sortiarias* , ubi
» enumerantur legitima remedia malefi-
» cii , nulla fit mentio requirendi ac def-
» truendi signi : nec quisquam aliis ve-
» terum Ecclesiæ patrum invenitur qui
» de remedio hoc , tanquam licito , lo-
» quatur. »

At verò sunt qui putent sanctos viros
in hujuscemodi casibus modo planè ex-
traordinario agentes , non dare semper
regulam agendi : non omnia eorum facta
nobis , ut imitanda , proponi : vel ne-
cessariæ scientiæ defectu , vel zelo im-
prudenti aliquandò nonnulla dixisse ,

fecisseque, quæ imitati peccaremus: adeòque videri sanctum Anachoretam contra regulam, mox allatam *Augustini*, omnino peccasse.

Licet hanc sententiam, si cum modestiâ & reverentiâ proponatur, rejicere non possimus, ne tamen eam Beato *Hilarioni* accommodemus, nos impedit miraculum expulsionis diaboli, quod Deus, sancto orante, fecit. An non approbavit sic modum agendi *Hilarionis*? An alias ejus preces exaudivisset?

Hinc *Eustius*, & ex *Eustio Sennertus*, ut quæstionem ritè caperemus: « Nulla quæstio est, inquit, quin in contempnum, ac detestationem magicæ superstitionis, ipsiusque diaboli, liceat maleficii signa tollere, destruere, atque abolere. . . . Sed in quæstionem vertitur an ejusmodi signa destruere, vel amovere liceat, hâc spe & intentione, ut dæmon nocere definat, atque omne nocumentum cesset? »

Si nunc attentè perpendamus *Eustii* argumenta affirmantia & negantia, quæ pro suo candore utrinque profert: si deinde *Sennertum*, virum certè ex doctissimis medicis, qui unquam scripserunt, undè haud immerito *Vratislavienium*, quin universæ Germaniæ *Galenus* audiebat,

diligenter evolvamus, in *Prax. Libr. VI*, *Part. IX*, *Cap. VII & VIII*, ferè convincimur de periculo probabili, ne in hisce signis auferendis major minorve communicatio cum magiâ ac dæmone infit; quidquid argumenta secùs opinantum quantumcumque plausibilia, in contrariam statuere annitantur. Ita ut exemplum B. *Hilarionis*, de eoque S. *Hieronymi* sententia, tutorem proponere partem multis visa sint, transierintque apud eosdem in normam agendi.

Ergone judicabimus rem decisam esse? Si liceat, imò oporteat, juxta medicinæ leges tollere morborum magicorum effectus, cur minùs licebit oportebitque tollere causas? Aiunt vix videri quempiam posse eas causas, signa nimirùm, tollere, quin sese intermisceat pacto, quod cum diabolo maleficus init: « Quod pac- » tum, ait *Estius*, est hujusmodi, ut, » signo posito, nocere diabolus incipiat; » manente, nocere pergit; ablato, de- » finat: ergo societate quâdam diabolo » conjungitur, in pactis & sacramentis » ab eo institutis. » Ita & *Sennertus*.

Verùm enim verò, inflictus a mago morbus sui cum diabolo pacti præcipua pars est: citra hunc morbum, pactum nihil est; est unicus pacti scopus. Hanc

pacti præcipuam partem, intentionemque, si auferre mihi liceat, videtur omnino mihi licere, idque a fortiore, primam tollere pacti partem, signa scilicet & characteres, quorum vi cætera sequuntur, &, quibus ablatis, morbus aut protinus, aut felicius saltem curabitur.

Evidem suadent nobis, idque sapienter prudenterque, ad Deum ut potius confugiamus, qui se solùm *irrita facere divinorum signa posse & velle per Isaïam dixit*, quam ut signa eâ spe tollendo, ut nocere diabolus cesseret, nos in periculum communicationis, & veluti erga eum submissionis, atque venerationis, ut nocere cesseret, conjiciamus. Verum enim verò, sancti reges Judæ *Ezechias & Josias*, idolatriæ, operis diaboli, fundamenta eruturi, prior excelsa, lucos, ipsum æneum serpentem, qui jam idololatrico cultu coli videbatur, *IV Reg. Cap. XVIII*; posterior omnes *Bahali* statuas, & nemora, quibus dæmon, veluti signis pacti sui cum sacerdotibus falsisque prophetis utebatur, *IV Reg. Cap. XXIII*, destruxerunt combusseruntque. Si religiosus paterfamilias, qui in recens empta cum universâ suppellectili domo, mox a se, suaque numerosa familia inhabitanda, statuas & picturas, impudicitate infames, reperit,

hasce

hasce omnes, tanquam signa & instru-
menta, & characteres, quibus diabolus
innocentes alioqui intuentium animas oc-
cidit, existimans, aufert, destruitque:
juxta sententiam *Estii* & *Sennerti*, pec-
cavit hic paterfamilias religiosissimus, pec-
carunt magis sancti duo reges, quod non
præmonito populo, ne hisce signis seduci
se fineret, se totos in preces effuderint,
ut, is qui *signa dæmonis irrita facit*, suâ
gratiâ efficeret, ne unquam intuentum
quis in idolatriam impudicitiamve
præcipitaretur. Tantum autem abest ab
hâc illorum opinione, ut potius hi *Judæ*
reges ipso Spiritûs sancti elogio celebrati
fuerint; & ut nemo sit, quin ejusmodi
religionis virtutisque amantem patrem
summis laudibus efferat, cæterisque pro-
ponat exemplo.

Itaque si ego tollo signa magorum,
æquè parùm de venerando diabolo, cum
eoque communicando cogito, quam aut
reges illi, aut hic paterfamilias; idem-
que quod illi hisce destruendis in salutem
animarum fecerunt, ego in salutem cor-
porum facio, Deum per omnia venera-
tus, nihilque de diabolo sollicitus.

Ad hoc argumentum respondeo, esse
magnam in harum historiarum cum magiâ
comparatione differentiam, ob idque eam-

dem minùs stringere ac probare. Idola, serpens æneus, lucus idololatrici, statuæ picturæque impudicæ, quibuscumque sæculis perstitissent, perpetua fuissent angelii prævaricatoris ad mortalium perniciem instrumenta. Faba verò, ossiculum, crinis, mirifica litterarum dispositio, transpositioque, & quidquid ejusmodi nugarum plus est, nihil ex se, quo nocent, possident. Et, si etiam concederetur quod vim nonnullam vi facti cum dæmone pacti naœta essent, hanc pacto finito amitterent forentque, quæ olim, indeterminatæ res innocuæ, peccandiæ nemini causæ. Iniqua ergo, quæ horum cum illis fit, comparatio est.

At verò dixi mox: *Si etiam concederetur, quod vim nonnullam vi pacti naœta essent:* velim hoc unicè a me dictum esse credi, ut ad momentum urgerem argumentum. Quippe vi tali omnino privata hæc corpora esse, & eadem, ne per diabolum quidem donari, minimè dubius assero. Laudatos enim toties viros, *Eftium, Sennertum,* cæterosque de hâc re scriptores, si consulamus, unam omnium sententiam deprehendimus esse; primò, characteres & signa hæc ex sese facere nihil: dæmonem unicè uti, ut seducat maleficos, magis irretiat, arctius sibi devinciat,

perpetuòque suspensos atque a se dependentes reddat. Secundò, spiritum hunc fraudulentum malitiam suam, amotis etiam hisce signis, magno mirante & obstatuente, perfecisse. Tertiò, eumdem sèpè maleficos suos fallere sic, ut signis ex pacto positis, hi efficiant nihil; & ut quemadmodùm *Part. II, Cap. III,* licuit, ex viginti pactis vix duo triave expleat. Id quod, vel Deo diabolum in opere non-nunquam impediente, vel diabolo magos ob dissidentiam puniente, contingere arbitrantur.

Quæ cùm ita se habeant, si *hinc* periculum intueor, quod incurro Deum gravissimè offendendi, proximumque *scandalisandi*, ubi spe melioris morborum curæ signa magica obstulero; *illinc* autem de eorumdem signorum vanitate convictus sum; tutò concludo me & signis suo loco relictis nihil perdere, & nullum cùm peccati erga Deum, tūm offensionis erga proximum incurrere periculum.

Ex omnibus hisce spontè consequitur, ut, si aliquandò plebs ignara magici quid suspicari in morbo videretur, medicus omni industriâ & attentione cavere debat, ne suspicio in assertionem, & in assertionis abire consequentias possit. Sin verò tale quid vel ipse suspicaretur, cautus sit ne, vel verbis, vel gestis, id in-

dicit plebi. Cùm enim hoc in casu non nisi cura *naturalis*, & cura *divina* supersint, signa autem tollere inutile, imò nefas, ratio nulla est populum suspicionis indicatione inquietandi. Eo enim certius nihil, quàm quod medicorum vel negligentia in populi suspicione refutandâ, vel imprudentia in suâ suspicione ipsi pandendâ, in furiis agere integrum pagum oppidumque possit.

De tertiat curatione curandorum magorum, si qui fortè darentur, morborum, divinâ scilicet, potius nihil, quàm non sat digna dicam. Nihil opportunius, nihil decentius, nihil obligatius est; cùm *Deus in omnibus omnia sit*; cùm solus ille *opera diaboli omni ex parte destruat*; cùm ille quoque, ut mente corporeque valeamus, solus sufficiat. Undè oratio assidua cum fide in ejus potentiam, cum spe in ejusdem per Jesu Christi merita misericordiam, tām in hāc, quàm in omnibus vitæ nostræ calamitatibus atque negotiis, ut unica nostra occupatio esset, quandiu degimus in hāc lacrymarum valle, voluit, præcepit, exegitque a nobis. *Immola Deo sacrificium laudis, & redde Altissimo vota tua: & invoca me in die tribulationis; eruam te, & honorificabis me.* Ps. XLIX, v. 14, 15.

F I N I S.










UNIVERSIDAD DE CÁDIZ



3741892605

